




2
H 2-14

At-11

~~14-27-a-1~~

~~14-25-2~~





43





S. THOMAS DE AQUINO
angelicæ doctrinæ mirificus auctor.

PROPUGNATIO PHILOSOPHIÆ THOMISTICÆ



CONTRA

*Cartesium, Gassendum, Cabeum,
Maignanum, ceterosque recentioris
Philosophia propagatores.*

BIBLIOTECA NAZIONALE
ROMA
VITTORIO EMANUELE

TOMUS SECUNDUS.

Qui primam Physicæ partem com-
plectitur.

Authore R. P. JOSEPHO RIVALIER
Congregationis Doctrina Christiana Theologo,
nec non Philosophiæ Professore in Collegio Squil-
lano Tolosæ primario.

*Ex Libris Patrum maximo Aveni
Romani*

Stellang



inellonhelli

BIBLIOTECA NAZIONALE
ROMA
VITTORIO EMANUELE

TOLOSÆ,

Apud J. PECH, Comitiorum Fuxensium, Ty-
pographum, juxta Collegium PP. Societatis
Jesu, sub signo Nominis J E S U. 1683.

Cum Permissione & Approbationibus.

122303



INDEX TITULORUM.

DISTRIBUTIO TOTIUS Physicæ. 3

QVÆSTIO PROEMIALIS
de natura, qualitate & objecto. ib.

TRACTATUS PRIMUS.

De principiis entis mobilis. 7

QUÆSTIO PRIMA. DE PRINCIPIIS ENTIS mobilis.

ART. I. **D**E principiorum definitione tra-
ditâ ab Arist. 8

ART. II. Utrum prima principia sint contra-
ria. 9

ART. III. De principiis entis mobilis in fieri
secundum sententiam Arist. 10

ART. IV. De principiis entis mobilis secundum
Cartesium. 16

INDEX

ART. V.	De principiis entis mobilis secundum Gassendum.	22
ART. VI.	De principiis entis mobilis secundum chymicorum sententiam.	29
ART. VII.	De principiis entis mobilis secundum sententiam Elementariorum.	31
ART. VIII.	De principiis rerum secundum Doctrinam Patris Maignan.	33
ART. IX.	De principiis rerum secundum sententiam Nicolai Cabeii.	36



QUÆSTIO II.

De materiâ primâ. 29

ART. I.	An sit & quid sit materia primâ.	ibid.
ART. II.	Utrum materia prima sit pura potentiâ excludens actum essentialē.	41
ART. III.	Utrum materia prima habeat actum existentie sibi proprium.	47
ART. IV.	Utrum materia prima possit divinitus existere sine forma.	56
ART. V.	Utrum materia prima habeat appetitum ad omnes formas.	59
ART. VI.	Utrum materia prima habeat	

TITULORUM.

- unitatem specificam & numericam, siue utrum habeat actum Metaphysicum. 61
ART. VII. Utrum materia sit ingenerabilis & incorruptibilis. 64



QUÆSTIO III.

- De formâ & privatione.** 65

- ART. I.** De existentia formæ substantialis contra Cartesium & Gassendum. 66

- ART. II.** De existentia formæ substantialis contra Nicolaum Cabacum. 74

- ART. III.** De existentia formæ substantialis contra Doctrinam Maignani. 76

- ART. IV.** De existentia formæ substantialis contra nonnullos recentiores. 80

- ART. V.** De definitione formæ substantialis quæ admittitur à peripateticis. 82

- ART. VI.** Utrum formæ substantiales educantur de potentia materiae. 83

- ART. VII.** Utrum anima rationalis educatur de potentia materiae. 85

- ART. VIII.** Utrum formæ cælorum & Elementorum fuerinteductæ

INDEX

- ART. IX.** *de potentiâ materiæ. 90*
CONTRA CARTESIUM
ET RELIQUOS.
Utrum dentur accidentia quæ
sint entitates reales absolute,
& distinctæ realiter à subje-
cto 93
- ART. X.** *Utrum gratia & habitus super-*
naturales sint accidentia reali-
ter distincta à subjectis. 97
- ART. XI.** *Utrum species Eucharistica sint*
accidentia realia, vel solum ali-
qua entitas modalis juxta opi-
nionem Cartesii. 101
- ART. XII.** *Utrum species Eucharistica sint*
accidentia realia vel substantio-
le juxta nonnullos Cartesianos.
105
- ART. XIII.** *Utrum species Eucharistica sine*
accidentia realia, vel sensation-
es nostræ (ut volunt alij re-
centiores. 108
- ART. XIV.** **CONTRA MaignanVM.**
Utrum species Eucharistica sint
meræ apparentiæ. 110
- ART. XV.** *Utrum formæ accidentales edu-*
cantur de potentiâ subjecti. 117
- ART. XVI.** *An detur & quid sit privatio,*



QUÆSTIO IV.

De composito substantiali. 121

ART. I. *Vtrum compositum substantiale
constet materiâ & formâ tan-
quàm partibus essentialibus.*

ART. II. *Vtrum detur unio realis & posi-
tiva distincta inter materiam
& formam.*

ART. III. *Vtrum Compositum distinguatur
à partibus simul sumptis &
unitis.*



QUÆSTIO V.

De naturâ, violentia & arte. 135

ART. I. *Quid sint natura & violentum.*

ART. II. *Quibus rebus conveniat ratio
naturæ.*

ART. III. *Vtrum ars possit producere ope-
ra naturæ.*

Supr. relator quoad sub mat.



TRACTATUS II.

De causis entis mobilis. 143



QUÆSTIO I.

De causis in communi. Ibid.

ART. I. Quid & quotuplex sit causa. 144

ART. II. Vtrum causa sit prior & nobilior suo effectu. 146

ART. III. Vtrum causæ sint sibi ad invicem causæ. 149



QUÆSTIO II.

De causâ efficiente. 151

ART. I. Quod sit causa efficiens & quanam sit causalitas causæ efficientis. ibid.

ART. II. Vtrum due causæ totales ejus-

TITULORUM.

7

dem generis, & non subordinata possint producere eundem numero effectum. 152

ART. III. *Utrum due cause totales possint divisim producere eundem numero effectum, sive utrum unus effectus productus ab una causa potuerit produci ab alia.*

155

ART. IV. *Utrum substantia creata sit principium immediate operativum.*

159

ART. V. *Utrum accidens producat aliud accidens, & substantiam sine ullo influxu substantie.*

163

ART. VI. *Utrum proprietates fluant ab essentia per actionem distinctam.*

165

ART. VII. *Per quid constitnatur cause instrumentalis in esse causa instrumentalis.*

167

ART. VIII. *Utrum causa instrumentalis habeat actionem sibi propriam.*

171

QUÆSTIO III.

De causis materiali , formali, &
exemplari. 173

ART. I. *Quid sit causalitas causæ mate-
rialis, & causæ formalis. ibid.*

ART. II. *Quid sit causa exemplaris, & ad
quod causæ genus reducatur.*
174.

QUÆSTIO IV.

De causa finali. 175.

ART. I. *Quid & quotuplex sit finis. 176*

ART. II. *Quenam sit ratio formalis con-
stitutiva finis in actu primo.*

175.

ART. III. *Quenam sit ratio formalis con-
stitutiva finis in actu secun-
do. 183*

ART. IV. *Utrum solus homo agat propter
finem. 187*

QUÆSTIO V.

De causis per accidens. 189

ART. I. *Quid sint fortuna & casus, &
an dentur.* ibid.

ART. II. *De fato.* 191

ART. III. *De monstro.* 192



TRACTATUS III.

*De Proprietatibus entis mobi-
lis.* 193.

QUÆSTIO I.

De Quantitate. 194

ART. I. *De distinctione quantitatis à
substantiâ contra nominales,
ibid.*

INDEX

- ART. II.** De sententiâ Cartesii circa distinctionem quantitatis à substantiâ, siue circa essentiam corporis. 196
- ART. III.** Utrum sententia Cartesii asserentis extensionem actualem constituere essentiam corporis, sit contraria doctrinæ Concilii Tridentini circa Eucharistiæ Sacramentum. 200
- ART. IV.** Utrum sententia Cartesii asserentis extensionem actualem constituere essentiam corporis, sit conformis erroribus Calvinî circa Eucharistiæ Sacramentum. 211
- ART. V.** Utrum sententia Cartesii asserentis extensionem actualem constituere essentiam corporis, sit contraria Sanctorum Patrum Doctrinæ. 213
- ART. VI.** Utrum sententia Cartesii asserentis extensionem actualem constituere essentiam corporis, sit contraria Arist. doctrinæ. 217
- ART. VII.** Utrum sententia Cartesii asserentis extensionem actualem constituere essentiam corporis, sit contraria rationi. 219
- ART. VIII.** De essentiâ corporis contra Gasfendum. 223
- ART. IX.** Utrum substantia corporca habeat partes ex se, vel sit divisibilis independentè à quantitate. 226.

QUÆSTIO



QUÆSTIO II.

De continuo.

231

ART. I. *Utrum in continuo sint partes actu, an solum in potentia, & utrum illæ partes sint inter se realiter distinctæ.* ibid.

ART. II. *Utrum in omni continuo actu existant vera & positiva indivisibilia tam continuantia quæ terminantia.* 234

ART. III. *Utrum continuum constet solis punctis mathematicis.* 239

ART. IV. **CONTRA GASSENDUM.**
Utrum continuum constet partibus in infinitum divisibilibus.
 244.



QUÆSTIO III.

De infinito.

250

ART. I. *Utrum possit dari divinitus creatura infinita secundum essentiam.* ibid.

ART. II. *Utrum possit dari infinitum actu*
 6

INDEX

Secundum quantitatem & qualitatem.

256

QUÆSTIO IV.

De tempore.

260

- ART. I. *Quomodo duratio distinguatur à re durante, & quotuplex sit mensura durationis.* 261
ART. II. *Utrum tempus sit ens reale.* 262
ART. III. *Quid & quotuplex sit tempus.*
ART. IV. *Utrum tempus ratione instantis, siue nunc indivisibilis existat.* 265.

QUÆSTIO V.

De loco & vacuo.

267

- ART. I. *De loco extrinseco CONTRA CARTESIVM.* 268
ART. II. *De loco extrinseco CONTRA BERNERIVM GASSENDI discipulum.* 270
ART. III. *De immobilitate loci extrinseci.* 272

TITULORUM.

10

- ART. IV. *Quid & quotuplex sit ubi.* 273
- ART. V. *Vtrum duo corpora possint esse in eodem loco, tam naturaliter quam supernaturaliter.* 274
- ART. VI. *Vtrum unum corpus possit esse simul in duobus locis circumscriptione.* 278
- ART. VII. *Vtrum possit dari vacuum magnum & sensibile virtute naturali.* 282
- ART. VIII. *Vtrum detur vacuum disseminatum CONTRA GASSENDVM.* 287
- ART. IX. *Vtrum divinitus possit dari vacuum CONTRA CARTESIVM.* 292
- ART. X. *Vtrum in vacuo divinitus introducto possit dari motus.* 293
- ART. XI. *De gravitate CONTRA CARTESIVM.* 296
- ART. XII. *De gravitate, CONTRA GASSENDVM.* 300
- ART. XIII. *Vtrum gravitas consistat in sympathia que reperitur inter terram, & alia corpora sublunaria.* 305
- ART. XIV. *Vtrum gravitas consistat in impulsu neris.* 306
- ART. XV. *Vtrum gravitas sit qualitas distincta à corpore gravi CONTRA PONCIVM & ARRIAGAM.* 307
- ART. XVI. *De levitate CONTRA CARTESIVM.* 309

INDEX

ART. XVII.	De levitate .CONTRA GAS- SENDVM.	310.
ART. XVIII.	Vtrum aer sit gravis vel levis.	311.
ART. XIX.	De suspensione mercurii.	323
ART. XX.	Qua virtute aqua ascendat in- tra Antlias aspirantes.	327
ART. XXI.	Vnde proveniat difficilis duorum marmorum separatio.	331
ART. XXII.	De experientia que fit in folliis occlusis.	334
ART. ULT.	De experientia facta in cucurbi- tis medicis.	337.


Finis Index Titulorum.



APPROBATIO.

NON potuit mihi non probari **Physi-**
ca, seu **Philosophia naturalis R. P. J.**
Rivalier, nostræ **Congregationis Doctrinæ**
Christianæ Theologi; & in hoc nostro **Col-**
legio Tolosano Professoris celeberrimi, ut
 pote, quæ est tota **Angelica**, tota **Christia-**
na. Partes tuetur **Author Scolæ Thomisticæ**,
 invictâ (si quis hactenus) animi fortitudine,
 nec ejus perspicuitati aliquid detrahit brevi-
 tas cõpendiosa. Hostes aggreditur quoscûque
 verioris **Philosophiæ** vincitque, ac penitus
 profligat novo sed glorioso certamine. Legi
 totum hoc **Opus**, suo **Authore dignissimum**,
 nihil mihi succurrit fidei **Orrodoxæ** contra-
 rium, aut bonis moribus adversum. Arrisere
 singula. Placuerunt universa, nihil eorum præ-
 termissum quæ possint **Philosophiæ** studiosum
 perfecte instituere, quæve curioso lectori pla-
 ne satisfacere. Dignum igitur judicavi **Opus**,
 luce publica. Sic mecum sentient quicumque
 legent maximè novitatis olores, veritatis ami-
 ci, atque utilitatis publicæ. Sic sentio. *Tolo-*
sæ, die 3. Martii ann. 1683.

MILHET Doctor
Theol. Congreg. Doctr.
Christ.



APPROBATIONES.

Philosophicum hoc Opus, cui titulus est, *Propugnatio Philosophiæ Thomisticæ, contra Cartesii Gassendii, &c.* à R. P. J. Rivalier Philosophiæ Professore compositum perlegisse, & in eo nihil nos deprehendisse profitemur Catholicæ veritati, aut Christianæ pietati dissonum, omnibus, tum veteris, tum recentioris Philosophiæ amantissimis placitum prævidemus, quia pari perspicuitate utriusque Philosophiæ opiniones exponit; dignum proinde illud Opus judicamus quod omnium manibus teratur, & in bonum publicum prælo mandetur. *Datum Tolosæ die 8. Aprilis anni, 1683.*

F. JOSEPH. BRUNET,
Professor Regius.

F. MATHÆVS DANROS,
Doct̃or Regens Augustinianus.



PERMISSIO.

Viso Professorum testimonio, concedimus, ut præsens Opus Philosophicū, cui Titulus est, *Propugnatio Philosophiæ Thomisticæ, prælo mandetur.* Datum Tolosæ die 8. Aprilis. 1683.

MARAN Vic. gen.

PHYSICA



PHYSICA

SEU PHILOSOPHIA

NATURALIS

secundum illibatam S. Thomæ
doctrinam.



Difficilioribus ad faciliora progre-
dimur; juvat nunc ab intricatis-
simis senticosæ Logicæ, & asperio-
ris Metaphysicæ difficultatibus nos
extricare, ut in vastissimum amœ-

num & frugiferum Physicæ campum descenda-
mus; vastissimum dico campum cujus aditum vo-
bis pando (Peripateticæ & Thomisticæ doctrinæ
amantissimi) cum tantum pateat quantum & ip-
sa natura; de universa enim rerum natura dis-
putat Physica: nec vos vastissimi campi amplitu-
do terreat, juvat certè per amplum & vastissi-
um campum spatium, ubi amœnus, ubi frugifer
campus est, quia siquid timoris, si quid horroris
animis ingereret campi amplitudo, timorem pel-
lit campi amœnitas, horrorem dissipat uberrima
campi fecunditas; quia ex ipsa campi amœnitate

A

maxima nascitur voluptas, ex campi fecunditate mirifica emanat utilitas, voluptas quidem maxima est secretiora totius naturæ secreta curiosè rimari ut enim ait Tullius Acad. qq. lib. 4. indagatio ipsa rerum cum maximarum, tum etiam occultissimarum habet oblectationem: nec modò voluptatem innocentissimam habet naturæ contemplatio, habet & utilitatem insignem, cum ipsa rerum universitas sit quasi liber elegantissimus & mundissimum speculum in quo invisibilia Dei intellecta conspiciuntur, quò fructu nullus major esse potest aut optari.



DISTRIBVTIO TOTIUS PHYSICÆ.



U M ens mobile, de quo agit Physica, possit considerari sub quadruplici statu; ideo tota physica dividetur in quatuor partes. In primâ agitur de ente mobili in communi. In secunda, de ente simplici. In tertia, de ente generabili; In quarta, de ente animato. Sed prius præmittitur.



QUÆSTIO PROEMIALIS.

De Physica.

R Ectus ordo postulat ut secretiora Philosophiæ naturalis arcana perscrutaturi, prius cognoscamus ipsius Physicæ naturam, qualitatem & objectum: sit ergo.

A 2



ARTICULUS UNICUS.

De natura, qualitate, & objecto Physicæ.



DICENDUM est primò, Physicam esse scientiam propriè dictam.

Probatur: In Physica fiunt plurimæ demonstrationes; demonstratur enim corpus naturale esse corruptibile, quia constat ex contrarijs; plurimæque alia demonstrantur, ut patebit in decursu totius Physicæ. Ergò Physica est scientia propriè dicta.

Dicendum est secundò Physicam esse simpliciter speculativam.

Probatur: Illa scientia est simpliciter speculativa, quæ non ordinat cognitionem ad opus: Atqui Physica non ordinat cognitionem ad opus; non enim cognitionem elementorum, aut cælorum, aut aliarum rerum naturalium acquirit ut eas efficiat, sed ut simpliciter in earum contemplatione quiescat, & si quis eo fine naturam auri contempletur, ut illud efficiat, sicut Alchymistæ, finis est scientis, non verò scientiæ; & eodem modò de similibus est philosophandum; Ergò Physica est simpliciter speculativa.

Dicendum est tertiò: ens mobile esse objectum formale, & adæquatum Physicæ.

Probatur: illud est objectum formale alicujus scientiæ quod per se primò consideratur, & de quo demonstrantur passionēs: Atqui mobi-

litas entis est hujusmodi respectu Physicæ; Ergò mobilitas seu ens radicaliter mobile est objectum formale, & adæquatum Physicæ. Major est evidens, minor etiam patet: Quidquid enim per se consideratur à Physica, vel est ens mobile in communi, id est abstrahendo ab omni determinata specie motûs, ut in primâ parte Physicæ; vel est mobile aliquod particulare, ut in parte in qua agitur de cælo, & mundo; Ergò ens mobile est objectum formale & adæquatum Physicæ. Verum quidem est quod ens naturale, substantia naturalis, corpus mobile seu naturale idem significant, quia gradus subalternatim positi, pro eodem omninò sumuntur, si per eandem differentiam essentialem contrahantur. Unde substantia rationalis, vivens rationale, & animal rationale idem omninò significant, scilicet hominem. Ens autem, substantia, corpus sunt gradus subalternatim positi, & contrahuntur per eandem differentiam essentialem, scilicet per ly naturale, aut mobile radicale; Ergò, in præsentî idem omninò sunt. Convenientius tamen dicitur ens mobile esse objectum Physicæ; quia omnia mobilia Physica comprehenduntur sub ente mobili: omne enim quod movetur potest non esse corpus, ut anima rationalis: potest etiam non esse substantia, ut accidentia; Sed quidquid movetur est ens.



PRIMA PARS
 PHYSICÆ,
 SEU PHILOSOPHIÆ
 NATURALIS.

De ente mobili in communi.



STA prima Physicæ pars, apud Aristotelem inscribitur, περὶ τῆς φυσικῆς ἀκροαμα-
 σεως, id est de Physico seu na-
 turali auditu vel auscultatio-
 ne, quia indigent acti studio
 & attentione; ut enim no-
 rat Cicero quinto de finibus; & docent plurimi
 Philosophi. Duo genera librorum conscripsit
 Aristoteles. Unum eorum quos populares vo-
 cavit, quod ad vulgi captum accommodati,
 non magnam requirerent attentionem, cujus-
 modi erant historia animalium, & ii, quos de
 arte Rhetoricâ & poëticâ scripsit. Aliud genus
 librorum scripsit qui sine magno studio capi
 non possunt, & hos auscultatorios vocabat,
 quia magnâ attentione audiri deberent; hujus
 autem generis sunt quos de naturali Philosophiâ
 & Metaphysicâ scripsit; ista verò prima
 Philosophiæ naturalis pars, quæ in octo libros

ab Arist. dividitur, tota brevitatis gratiâ reducetur in tres tractatus; in quorû primo, agetur de principiis entis mobilis in communi; In secundo, de causis; In tertio, de proprietatibus.



TRACTATUS I.

De principiis entis mobilis.

IS T E Tractatus quinque complectetur questiones. In primâ, agetur de principiis entis mobilis in communi; In secundâ, de materiâ primâ; In tertiâ, de formâ & privatione; In quarta, de composito substantiali; In quintâ & ultimâ de naturâ, arte, & violento.



QUÆSTIO PRIMA,

De principiis entis mobilis.

QUAM varia fuerunt antiquorum Philosophorum placita circa rerum naturalium principia, videre est apud Plutarchum, primo de placitis, capite tertio. Apud Augustinum, octavo de civitate, & apud Ambrosium, primo Hexameron, capite secundo. Nec omnia tamen ab antiquis Philosophis exhausta fuerunt. Novas adhuc hypotheses excogitaverunt recentiores Philosophi. Plurimæ ergo antiquorum, & recentiorum opiniones cir-



ARTICULUS I.

De Principiorum definitione , tradita ab Aristot.

Dicendum est , principia entis definiri ab Aristotele *lib. 1. cap. 7. textu 42. illa quæ neque ex alijs , neque ex alterutris , sed ex ipsis omnia naturalia fiunt.*

Prob. prima principia , de quibus agimus , non possunt fieri ex alijs ; quia non essent prima principia , ut patet ; non possunt etiam fieri ex alterutris , quia unum præsupponeretur ad aliud , & sic non essent prima principia ; ergo principia entis mobilis rectè definiuntur ab Aristotele , illa , quæ neque ex alijs , neque ex alterutris fiunt.

Obj. illa definitio tradita ab Aristotele non convenit materiæ , & formæ , quæ sunt principia , ergo illa principia non rectè definiuntur. Prob. Ant. forma fit ex materiæ , quia forma educitur de potentia materiæ , ut probabitur ; materia etiâ fit ex forma ; ergo definitio tradita ab Aristotele non convenit materiæ & formæ.

Rèspondeo 1. Negat. Ant. ad cujus prob. nego aliud Ant. quia forma propriè & simpliciter non fit ; illud enim tantùm simpliciter potest fieri , quod habet esse , quia fieri sequitur , atqui forma non habet simpliciter esse , sed tantùm forma est illud , quo mediante compositum habet esse , ergo forma propriè non fit.

resp. 2. dist. idem Ant. forma fit ex materia in diverso genere causæ. Con. in eodem genere causæ, neg. quia quando Aristoteles docet quod unum principium non potest fieri ex materia, intelligit in eodem genere, & ita nullum inconueniens, quod forma fiat à materia, materia fiat à forma in diverso genere.



ARTICULUS II.

Utrum prima principia sint contraria.

Notandum est 1. quod licet diuersa rerum principia admiserint Philosophi in diuersas sententias distracti, Fatentur omnes quod inter principia debet esse contrarietas quæ, ideoque qui diuersa statuerunt principia, alij dixerunt esse amorem & litem; alij ætherem & vacuum, frigus verò & calorem nonnulli.

Notandum est 2. hîc non agi de contrarietate propriè dicta, quæ tantum reperitur inter qualitates, nequaquam verò inter principia, quæ non sunt qualitates, ut probabitur.

Dicendum est materiam & formam non esse contraria inter se, bene autem formam & priuationem.

Probatur conclusio quoad primam partem: Illa sunt contraria quæ se mutuò expellunt ab eodem; atqui materia non expellit formam, immo illam appetat ut ab ipsa perficiatur; Ergo materia & forma non sunt inter se contraria.

Probatur conclusio quoad 2. partem. Illa

10 *Primæ partis Physicæ,*
sunt contraria quæ non possunt se compari, at-
qui forma & privatio non possunt se compa-
ri ut patet; ergo sunt contraria inter se; & pro-
inde illæ duæ propositiones quas profert Ari-
stoteles cap. 7. sunt veræ, principia sunt con-
traria, principia non sunt contraria: hoc est
aliqua principia sunt contraria, aliqua prin-
cipia non sunt contraria.



ARTICULUS III.

*De Principiis entis mobilis in fieri secundum
sententiam Aristotelis.*

NOtandum est quod ens mobile potest
considerari duplici modo, scilicet in fie-
ri, & in facto esse. Ens mobile consideratur in
fieri quando consideratur in instanti suæ pro-
ductionis, sive quando actu producitur: con-
sideratur vero in facto esse, quando conside-
ratur ut est actu productum, hic tantum dispu-
tatur de principiis entis mobilis in fieri &
quæritur quot sunt principia quæ concurrunt
ad productionem entis mobilis quando actu
producitur.

Dicendum est cum Peripateticis, tria tantum
esse principia entis mobilis in fieri, scilicet ma-
teriam, formam, & privationem.

Prob. Tot dantur principia entis mobilis in
fieri quot requiruntur essentialiter ad genera-
tionem cujuslibet entis mobilis; atqui tria tan-
tum essentialiter requiruntur ad generationem
cujuslibet entis mobilis; ergo dantur tantum

principia entis mobilis in fieri. Prob. min.
eratio est transitus de non esse substantia-
tqui ad quemlibet transitum tria tantum
tialiter requiruntur, scilicet privatio tan-
n terminus à quo, materia tanquam sub-
m in quo fiat talis transitus, & forma tan-
n terminus ad quem, ergo ad quamlibet
rationem cujuslibet entis mobilis tria
um essentialiter requiruntur.

bj. 1. generatio dependet à causa efficien-
ergo causa efficiens est principium gene-
onis, & proinde dantur plus quàm tria prin-
a.

esp. dist. Ant. generatio dependet à causa
iente tanquam à principio extrinseco con.
quam à principio intrinseco nego: quia il-
est tantum principium intrinsecum gene-
onis, à quo generatio essentialiter depen-
; sed generatio non dependet essentialiter
usa efficiente, siquidem dependet tantum
bus scilicet materiâ, formâ & privatione,
& causa efficiens non est principium intrin-
m generationis.

istabis: Atqui generatio dependet essentia-
: à causâ efficiente, ergo causa efficiens est
cipium intrinsecum generationis.

resp. dist. subs. generatio ut est actio, de-
det essentialiter à causâ efficiente con. ge-
atio ut est mutatio dependet essentialiter à
isâ efficiente nego. Quia generatio potest
siderari duplici modo, vel ut est actio per
im causa efficiens sive generans constitui
actu agens, vel ut est mutatio sive transi-
de non esse substantiali ad esse substantiale.
1. modò consideretur verum quidem est

quod generatio dependet essentialiter à causâ efficiente, quia non potest concipi actio sine causa: Si verò consideretur secundo modo, generatio non dependet essentialiter à causâ efficiente.

Instabis iterum: atqui generatio ut est mutatio, dependet essentialiter à causâ efficiente, ergo nulla solutio. Prob. subf. generatio ut est mutatio, dependet essentialiter à materiâ, formâ, & privatione; ergo dependet etiam essentialiter à causâ efficiente. Prob. Conf. ideo generatio ut est mutatio dependet essentialiter à materiâ, formâ, & privatione, quia sine illis mutatio non potest fieri, atqui mutatio etiam non potest fieri sine causâ efficiente, sive mutante; ergo si generatio ut est mutatio dependet essentialiter à materiâ, formâ, & privatione, dependet etiam essentialiter à causa efficiente.

Resp. neg. sub. & conseq. & ad prob. neg. maj. quia generatio non dependet essentialiter à materiâ, formâ, & privatione, ex eo præcisè quod generatio non potest fieri sine illis; sed quia materia, forma, & privatio ingrediuntur definitionē essentialē generationis, & proinde licet generatio ut est mutatio non possit fieri sine causâ efficiente sive mutante, non inde sequitur quod generatio dependeat essentialiter à causâ efficiente: siquidem causa efficiens non ingreditur definitionem essentialē generationis.

Obj. 2. Dispositiones præviæ sunt principium generationis, ergo dantur plusquam tria principia. Prob. Ant. Illud est principium generationis, sine quo generatio non potest fieri,
neque

que divinitus, neque naturaliter: atqui sine dispositionibus prævijs generatio non potest fieri, nec naturaliter, nec divinitus; ergo dispositiones præviæ sunt principium generationis.

Resp. 1. neg. Ant. ad ejus prob. neg. maj. licet generatio nec naturaliter nec divinitus posset fieri sine dispositionibus prævijs, non tamen constituerent principium distinctum à materia: cum enim pertineant ad materiam quam disponunt, & præparant ad recipiendam formam, facerent unicum principium cum ipsâ materiâ.

Resp. 2. neg. Ant. ad ejus prob. Concessâ majori, Nego min. quia generatio potest fieri divinitus sine dispositionibus prævijs: & ita dispositiones præviæ sunt necessariae necessitate secundum quid, non verò necessitate absolutâ.

Obj. 3. ratio quæ probat privationem esse principium generationis, probat etiam formam corrumpendam esse principium generationis; ergo forma corrumpenda est principium generationis, & proinde dantur plura principia. prob. ant. idem privatio est principium generationis, quia generatio dependet à privatione tanquam à termino quo; atqui generatio dependet etiam à forma corrumpenda, tanquam à termino à quo: requiritur enim ut præcedat forma determinata, ad hoc ut fiat talis generatio: v. g. ut producat formam cadaveris, debet necessario præcedere forma viventis; ergo ratio quæ probat privationem esse principium, probat etiam formam corrumpendam esse principium.

Resp. neg. Ant. ad ejus prob. dist. maj. ge-

neratio dependet à privatione , tanquàm à termino à quo per se. Con. per accidens, neg. similiter distinguenda est minor propositio vice versâ ; atquè generatio dependet à formâ corrumpendâ , tanquàm à termino à quo per accidens , con. per se nego : quia in hoc conveniunt forma corrumpenda, & privatio, quòd ab utroque generatio dependeat, tanquàm à termino à quo ; sed in hoc differunt , quòd generatio dependet per se & essentialiter à privatione : quia non potest concipi generatio alicujus formæ , quin mox concipiatur privatio ejusdem formæ , sed generatio dependet tantum per accidens à forma corrumpenda ; quia illud provenit , non ex parte generationis , sed ex parte materiæ, quæ non potest esse sine aliqua forma.

Obj. 4. Forma non est prior generatione ; ergò non est principium generationis , & proinde non dantur tria principia.

Resp. dist. Ant. forma non est prior generatione , in ordine executionis con. in ordine intentionis nego ; quia forma primariò intenditur à generatione.

Obj. 5. Principia ex Aristotele lib. 1. Phys. cap. 7. textu 56. debent semper manere : atquè privatio non semper manet ; ergò privatio non est principium, & proinde non dantur tria principia.

Resp. dist. maj. principia positiua , Con. Principia privativa , nego : vel principia in facto esse debent semper manere C. principia in fieri debent semper manere N. quia illud discrimen intercedit inter principia in facto esse & in fieri , quod principia in facto esse

re constituunt rem, debent remanere, quando res ipsa remanet; sed principia in fieri concurrunt tantum ad rei productionem, in ipso instanti productionis, possunt non esse quando res illa est actu producta.

Obj. ultimò. Ex Aristotele lib. 1, Phys. cap. 66. privatio est principium per accidens, ergò generatio non dependet essentialiter à privatione.

Resp. dist. autoritatem Aristotelis, privatio est principium per accidens respectu rei generatæ. respectu generationis nego, his autem verbis vult tantum docere Aristoteles, quod privatio non est principium in facto esse.

Instabis. atqui privatio non potest esse principium per se generationis, ergò nulla responsio. Prob. subs. non ens non potest esse per se principium generationis, atqui privatio est non ens, ergo &c.

Resp. neg. subs. ad cujus prob. dist. Maj. non ens non potest esse principium generationis per modum partis constituentis, C. per modum termini, à quo, N. Potest etiam distingui minor propositio: privatio est non ens positivum C. privativum nego. Ratio primæ distinctionis est, quia licet privatio non sit pars compositi, quod producit; requiritur tamen essentialiter tantum terminus à quo: Ratio secundæ distinctionis est, quod privatio est aliquid reale, hoc est, existens nullo intellectu cogitante; non est tamen aliquid positivum, sed tantum ens reale privativum.

Instabis iterum: privatio non est in instanti generationis, alioquin materia in eodem instanti esset sub forma & sub privatione formæ:

Ergò privatio non potest esse principium.

Resp. dist. Ant. in instanti generationis privatio non est ut afficiens subjectum C. ut desinens esse in subjecto Nego : quia , ut benè ait Joannes à sancto Thoma , in instanti generationis privatio non est , ut afficiens subjectum , sed ut exclusa ab illa per formam quæ introducit , sicut terminus à quo non est cum ipso termino ad quem in eodem instanti , quasi afficiendo subjectum , sed ut exclusus per terminum ad quem.



ARTICULUS IV.

De Principijs entis mobilis secundum Cartesium.

NOtandum est 1. quòd juxta novam Cartesij doctrinam , omnia entia naturalia sunt ex solis particulis materiæ subtilis , globulosæ , & striatæ. Illas autem materiæ particulas vocare solet particulas quantitatis ; eo quod velit quod materia sive substantia materialis , & corpus sint unum & idem ; docet similiter corpus & extensionem esse unum & idem ; ita ut essentia corporis sita sit in extensione. Sed illa Cartesij opinio alio in loco refutabitur ; ut autem nunc meliùs intelligatur ejus doctrina , circa principia rerum naturalium.

Notandum est secundò , quod secundum Cartesium , Deus initio creavit materiam omnium rerum , & postea illam divisit in partes angulares & quadratas ; ita ut ijs deindè partibus Deus communicaverit motum ; dum au-

tem moverentur hæ partes, factum est ut impingerent & colliderentur invicem; ita ut paulatim imminutæ fuerint, hoc est abrafis angulis sphericæ factæ sint, & ex illis partibus rotundis facta fuit materia globulosa. Fragmenta autem quæ deciderant ex partibus jam globulosis replebant spatia interjecta inter partes illas globulosas, nequid vacui relinqueretur. Illa quidem fragmenta erant subtilissima; non tamen omnes fragmentorum particulæ erant ejusdem parvitatæ & subtilitatæ: aliæ erant subtilissimæ & maximè ad motum idoneæ, & ex illis partibus subtilissimis facta fuit materia subtilis: aliæ erant particulæ crassiores, quarum partes irregulares erant, & parùm ad motum effictæ, & ex illis particulis crassioribus facta fuit materia striata. Ex his omnibus conjicit Cartesius dari tria principia sive tria elementa rerum naturalium. Primum elementum constat ex illis partibus subtilioribus, quæ per motum & attritionem abrasæ fuerunt & deciderunt ex partibus quadratis, & dicitur materia subtilis. Secundum elementum constat ex illis partibus sphericis, & dicitur materia globulosa. Tertium elementum constat ex partibus quadratis, & illud elementum vocatur materia striata, hoc est habens figuras irregulares.

Notandum est tertio, quod Cartesius docet omnia componi ex illo triplici elemento; idque, ut faciliùs probet, docet omnia corpora dividi in tres classes. Quædam sunt corpora lucem emittentia, hoc est, lucida, cujusmodi sunt sol & stellæ fixæ, & illa corpora somniat fieri ex primo elemento, nempe ma-

teriâ subtile. Aliqua sunt transmittentia lucem, sive diaphana, ut cœli, & illa corpora conficiuntur ex secundo elemento hoc est materia globulosa. Alia denique sunt corpora lucem remittentia, hoc est opaca, ut terra, planetæ, cometæ, & conficiuntur ex tertio elemento, hoc est à materia striata. Et hæc cum tam bellè fixerit Cartesius, non tamen censeret, quod unum corpus ex unico tantum elemento fiat: Vult enim tria simul elementa ad cuiuslibet corporis constructionem concurrere: Sed vult ut unum corpus dicatur fieri ex uno elemento: v. g. Sol dicitur fieri ex primo elemento seu materiâ subtile; quia in sole potissimum regnat & prævalet materia subtilis, similiter & de alijs corporibus.

Notandum est 4. quod Cartesius proponit tria illa principia, ut hypothesein tantum; non enim dicit quod entia naturalia ex huiusmodi principijs orta fuerint, sed tantum quod oriri potuerint, Sic enim loquitur Cartesius 3. parte principiorum num. 44. *Verumtamen ne etiam nimis arrogantes videamur, si de tantis rebus philosophando, genuinam earum veritatem à nobis inventam esse affirmemus; malim hoc in medio relinquere, atque omnia quæ deinceps sum scripturus, tanquàm hypothesein proponere; quæ quamvis falsa esse existimetur, satis magnum operæ pretium me fecisse arbitrabor, si omnia quæ ex ipsa deducuntur cum experimentis consentiant: & num. sequenti ait. Si quæ principia possimus excogitare vatè simplicitate, & cognitu facilia ex quibus tanquàm ex seminibus quibusdam, & sidera & terram, & denique omnia quæ in hoc mûdo aspectabili deprehendimus, oriri potuisse de-*

*nionstremus. quamvis ipsa nunquam sic orta probè
sciamus.* His ita prælibatis ad intelligentiam.

Dicendum est hypothesim Cartesij esse impossibilem ; ita ut entia naturalia ex hujusmodi principijs oriri non potuerint.

Prob. hypothesis Cartesij supponit aliquid impossibile, ergò est impossibilis prob. ant. supponit quod communis universi materia à Deo creata , & in partes quadratas divisa, maximâ pernicitate mota fuerit, ita ut ex motu materiæ, quàm maximè agitatæ, tria prodierint elementa; atqui impossibile est, quòd communis universi materia mota fuerit, ergo hypothesis Cartesii supponit aliquid impossibile prob. min. illa materia non poterat moveri, nisi partes materiæ unitæ inter se, & contiguæ à se invicem distraherentur & separarentur : atqui impossibile erat quòd partes illæ à se invicem separarentur, si enim aliquæ tantillum obvertissent suos angulos contrà latera vicinarum, mox inter illas partes à se invicem separatas, fuissent rimæ, & hiatus aliqui quos nulla potuisset replere substantia, & proinde fuisset vacuum, quòd divinitùs etiam est impossibile, secundùm Cartesium: ergò impossibile est, quòd communis universi materia mota fuerit.

Respondent Cartesiani quòd illud spatium fuit repletum particulis primi elementi sive materiâ subtili.

Sed contra: concipitur illud spatium, antequàm sit materia subtilis ; ergò illud spatium non potuit repleri à materia subtili. Prob. Ant. concipitur illud spatium, ubi concipitur partes materiæ à se invicem separari ; atqui ubi con-

cipitur partes materiæ à se invicem separari, nondum concipitur esse materiã subtilem; ergo concipitur illud spatium, antequàm sit materia subtilis, prob. min. non concipitur materia subtilis, nisi quando partium anguli atteruntur: siquidem in opinione Cartesij ipsa materia subtilis procedit ex ipso angulorum attritu: atqui ubi partes materiæ à se invicem separantur, nondum concipitur partium angulos atteri; quia anguli non atteruntur, nisi quia partes à se invicem separantur, & unæ suos obvertunt angulos contra aliarum latera. Prius est ergò partes separari, quàm partes atteri, & proinde prius est partes separari, quàm esse materiam subtilem; ergo ubi concipitur partes à se invicem separari, nondum concipitur esse materiam subtilem, & consequenter concipitur spatium vacuum corpore, antequam sit materia subtilis.

Obj. 1. omnia quæ ex Cartesianâ hypothese deducuntur, experimentis consensunt; ergo Cartesianâ hypothesis est admittenda.

Resp. gratis concessio antecedente, Nego Conseq. cum nostro P. Vincentio, quia ut solidè ait 3. parte suæ discussionis peripateticæ. 139. num. 47. contra principia Philosophiæ Cartesianæ, licet cum experimentis consentiret Cartesij hypothesis, non ideò vera censeretur; quia idem specie effectus potest à pluribus diversis oriri causis, & consequenter per quancumque earum explicari, licet de facto ab una solum procedat; illudque probat efficaciter idem Doctor, eadem parte num. 50. ex diversis Ptolemæi, Tychonis, & Copernici hypothesebus, circa corporum cœle-

stium , terræque dispositionem. Ptolemæus enim & Tycho terram immobilem ponunt. Copernicus verò vult eam , ut verum Planetam moveri circa solem ; & dicunt omnes omnibus Phænomenis hujusmodi systemata apprimè respondere. certum tamen est errare aliquem, falsamque esse unam hypothesim ; alioquin duæ opiniones contradictoriæ essent veræ , scilicet terra movetur (ut docet Copernicus) terra non movetur (ut docet Ptolemæus.)

Obj. 2. & ultimò. Omnia naturæ Phænomena faciliùs explicantur per principia Cartesij , quàm per alia quæcumque principia : ergò illa principia sunt admittenda.

Resp. 1. Neg. Ant. quia plurimæ sunt operationes in brutis quæ non possunt explicari per principia Cartesij , ut fusè alio in loco probabitur.

Resp. 2. Con. Ant. Neg. Conseq. quia ut admittantur aliqua principia, non solum sufficit, ut per illa faciliùs naturæ Phænomena explicentur , sed debent etiam veriùs & solidiùs explicari : sæpè enim homines imperiti & rudes faciliùs intelligunt , quæ explicantur per similitudines & fabulas , quàm quæ explicantur per vera scientiarum principia. Non tamen ex his est inferendum fabulas esse vera & solida scientiarum principia , & ita licet faciliùs explicarentur omnia naturæ phænomena per principia Cartesij , tamen ex his inferendum non est illa principia esse admittenda ut vera.





ARTICULUS V.

De principijs entis mobilis secundum Gassendum.

NOTANDUM est 1. quòd Democritus, & Epicurus post illum duo omnium rerum principia admittit, plenum scilicet & vacuum; hoc est atomos, & inane. Per atomos autem intelligebat aliqua corpuscula longa, lata, & profunda, sed tamen indivisibilia, quibus corpusculis dicebat immensum inane fuisse repletum, & eorum concursu hunc mundum coaluisse, fierique omnia, quæ jam producuntur, concreta corpora. Utriusque Philosophiam jam sepultam, & planè exoletam excitavit Gassendus isto sæculo, & à plurimis erroribus eam expurgavit: Volebant enim illi antiqui Philosophi atomos esse æternas, increatas, & omninò à Deo independentes. Volebant insuper fortuito atomorum occursum, nullâ moderante naturâ omnia facta fuisse; & hæc cum explodat Gassendus, docet dumtaxat quòd Deus sit atomorum causa efficiens, & quòd motus atomorum sit ipsis ab Autore mundi impressus.

Notandum est 2. quòd Democritus, Epicurus, & Gassendus faciunt omnes atomos ejusdem naturæ & essentiæ, illisque attribuunt tres proprietates, nempe magnitudinem, figuram, & pondus sive principium motus: docent præterea omnes, motum localem convenire atomis, cum aliquo tamen discrimine. Democritus enim primus atomorum inventor

volebat, ut motu tantum perpendiculari moverentur, sed Epicurus addidit alium motum, quem vocat motum inclinationis; vult enim nonnullas atomos moveri perpendiculariter, quasdam oblique seu inclinative, alioquin atomi ad corporum constructionem concurrere non possent. Gassendus verò rejicit motum perpendicularem Democriti. Rejicit etiam motum inclinationis Epicuri; vult tantum ut sint in quodam assiduo & inamissibili motu per virtutem aliquam quam receperunt à Deo. Si quis, inquit in sua Epicuri Physiologia cap. de motu atomorum, pagina 219. *tueri forte eas, nempe atomos velit: rejicienda imprimis est, tanquam omnino commentitia; tum gravitas illa sic ipsis tributa, ut seposito omni centro, & distinctis tamen in ipso universo duabus illis sursum deorsumque regionibus, ferantur per se duntaxat deorsum & absque omni quidem tam loci, quam temporis seu principio seu termino; tum declinatio quoque illa à motu perpendiculari quam dictum est à Cicerone solide, meritoque perstringi. Deinde verò, tum quod sint in quodam assiduo incessanteque seu motu, seu nisu, ac varie sibi occurrentes possint sese aut invicem apprehendere, mutuoque implicari, aut invicem deflectere ac sursum deorsum, oblique, & quoquo versum repulsare, tum quod cōlineant in se vim, qua indefinentem hunc motum tueantur, ac illam quidem à Deo authore, cum eas creavit, sic inditam, ut esset à principio mundi in finem usque perduratura. Videlicet hæc satis sunt ut causæ rerum perinde, ac solent ab Epicuro dici, explicentur, & citra quidem illa commenta, quæ fuere ab ipso perperam conficta.*

Notandum est 3. quod, juxta illos Philosophos, atomi, & inane non sunt eodem modo principia, atomi sunt principia, quatenus componunt ipsas res. Inane autem, quatenus locum, & discriminationem ministrat; sive quatenus separat corpora à corporibus. Alio in loco de inani, sive vacuo agetur, hîc tantum de atomis.

Notandum est 4. Gassendum tria docere, quæ in isto articulo sunt rejicienda 1. dari atomos, sive corpuscula indivisibilia 2. quod illæ atomi habent tres proprietates, scilicet magnitudinem, figuram, & gravitatem. 3. Quod ex illis atomis omnia fiant. Probabitur 1. non posse dari illas atomos. 2. Quod etiam si darentur, non possent habere proprietates à Gassendo assignatas. 3. Quod etiam si haberent proprietates à Gassendo assignatas, non possent tamen esse principia rerum naturalium his ergo sic præmissis.

Dicendum est 1. non dari atomos quales somniat Democritus, & Gassendus post illum.

Prob. dari atomos, est dari corpuscula indivisibilia: atqui non possunt dari corpuscula indivisibilia; ergo non possunt dari atomi. prob. Min. omne corpus quantumvis minimum, est divisibile; ergo non possunt dari corpuscula indivisibilia. Prob. Ant. omne corpus; quantumvis minimum, est extensum, & quantum; quia quantitas est proprietas corporis: sed quod est extensum, & quantum, est divisibile; ergo omne corpus, quantumvis minimum, est divisibile.

Respondet Bernerius, peritissimus Gassendi discipulus in suâ Philosophiâ tom. 1. p. 135.

Quod

Quod difficile quidem concipitur, quomodo aliquid possit esse extensum, & simul indivisibile, & tamen adterit quod extensio, & indivisibilitas sociantur simul in atomis. Dicitur autem quod atomi sunt indivisibiles propter suam soliditatem, quæ tanta est, ut si atomus una staret supra incudem nullo malleo ferreo, quantumvis fortiter adacto frangi vel dividi posset. Oritur autem atomi soliditas eo quod hæc sit vacui vel inanis expers. Atomus ergo ex illo Philosopho, est indivisibilis, quia solida, est autem solida, quia in se nullum vacuum admittit.

Sed hæc responsio plurima supponit quæ ab ipso Bernerio non probantur, nec probari possunt. Supponit indivisibilitatem convenire atomis, quia sunt solidæ, sed certè soliditas non potest facere indivisibilitatem: siquidem ubi est soliditas, ibi sunt partes: ubi autem sunt partes, ibi est divisibilitas. Supponit atomos esse solidas, quia in illis nullum est admixtum vacuum, quod in omnibus alijs corporibus admixtum esse putat. Illud tamen nusquam tota Philosophia Epicurea probavit, ut alio in loco fusè demonstrabitur, ubi agitur de vacuo.

Obj. omne, quod est extensum, non est divisibile; ergo licet atomi essent extensæ, non essent divisibiles. Prob. ant. animæ animalium perfectiorum sunt extensæ, & tamen non sunt divisibiles; ergo omne quod est extensum, non est divisibile.

Respondeo negando antecedens, ad cujus prob. dis. ant. animæ animalium perfectiorum sunt extensæ, virtualiter, con. formaliter.

Notandum est 3. quod, juxta illos Philosophos, atomi, & inane non sunt eodem modo principia, atomi sunt principia, quatenus componunt ipsas res. Inane autem, quatenus locum, & discriminationem ministrat; sive quatenus separat corpora à corporibus. Alio in loco de inani, sive vacuo agetur, hinc tantum de atomis.

Notandum est 4. Gassendum tria docere, quæ in isto articulo sunt rejicienda 1. dari atomos, sive corpuscula indivisibilia 2. quod illæ atomi habent tres proprietates, scilicet magnitudinem, figuram, & gravitatem. 3. Quod ex illis atomis omnia fiant. Probabitur 1. non posse dari illas atomos. 2. Quod etiam si darentur, non possent habere proprietates à Gassendo assignatas. 3. Quod etiam si haberent proprietates à Gassendo assignatas, non possent tamen esse principia rerum naturalium his ergo sic præmissis.

Dicendum est 1. non dari atomos quales somniat Democritus, & Gassendus post illum.

Prob. dari atomos, est dari corpuscula indivisibilia: atqui non possunt dari corpuscula indivisibilia; ergo non possunt dari atomi. prob. Min. omne corpus quantumvis minimum, est divisibile; ergo non possunt dari corpuscula indivisibilia. Prob. Ant. omne corpus; quantumvis minimum, est extensum, & quantum; quia quantitas est proprietas corporis: sed quod est extensum, & quantum, est divisibile; ergo omne corpus, quantumvis minimum, est divisibile.

Respondet Bernerius, peritissimus Gassendi discipulus in suâ Philosophiâ tom. 1. p. 135.

Quod

Quod difficile quidem concipitur, quomodo aliquid possit esse extensum, & simul indivisibile, & tamen asserit quod extensio, & indivisibilitas sociantur simul in atomis. Dicis autem quod atomi sunt indivisibiles propter suam soliditatem, quæ tanta est, ut si atomus una staret supra incudem nullo malleo ferreo, quantumvis fortiter adacto frangi vel dividi posset. Oritur autem atomi soliditas eo quod hæc sit vacui vel inanis experta. Atomus ergo ex illo Philosopho, est indivisibilis, quia solida; est autem solida, quia in se nullum vacuum admittit.

Sed hæc responsio plurima supponit quæ ab ipso Bernerio non probantur, nec probari possunt. Supponit indivisibilitatem convenire atomis, quia sunt solidæ, sed certe soliditas non potest facere indivisibilitatem: siquidem ubi est soliditas, ibi sunt partes; ubi autem sunt partes, ibi est divisibilitas. Supponit atomos esse solidas, quia in illis nullum est admixtum vacuum, quod in omnibus alijs corporibus admixtum esse putat. Illud tamen nusquam tota Philosophia Epicurea probavit, ut alio in loco fusè demonstrabitur, ubi agetur de vacuo.

Obj. omne, quod est extensum, non est divisibile; ergo licet atomi essent extensæ, non essent divisibiles. Prob. ant. animæ animalium perfectiorum sunt extensæ, & tamen non sunt divisibiles; ergo omne quod est extensum, non est divisibile.

Respondeo negando antecedens, ad cujus prob. dis. ant. animæ animalium perfectiorum sunt extensæ, virtualiter, con. formaliter,

negō; quia in hoc conveniunt atomi, & animæ animalium perfectorum, quod utrisque conveniat extensio; sed in hoc differunt, quod atomi sunt formaliter extensæ, quia habent formaliter quantitatem, cum sint corpora; sed animæ animalium perfectorum sunt tantum virtualiter divisibiles, quia recipiuntur in subjecto extenso; & proinde ut sit proportio inter subjectum recipiens & formas receptas, illæ animæ debent esse virtualiter divisibiles.

Dicend. est 2. quod ex suppositione, quod daretur atomi non possent habere magnitudinē.

Prob. si atomi haberent magnitudinem essent divisibiles; atqui atomi non possunt esse divisibiles, secundum doctrinam Gassendi; ergo non possunt habere magnitudinem. Prob. sequela. maj. quod habet magnitudinem, superat aliquā mole illud quod dicitur parvum, quia parvum & magnum relativè tantum opponuntur: sed quod superat aliquā mole illud quod dicitur parvum, est divisibile, quia illud quod superat aliud, debet habere partem quam aliud non habet, & illud quod habet partem est divisibile; ergo si atomi haberent magnitudinem, essent divisibiles.

Dicendum est 3. atomos non posse etiam habere diversas figuras.

Prob. 1. ratio quā Gassendus probat atomos habere diversas figuras, nulla est; ergo atomi non habent diversas figuras. probant, idē ex ipso Gassendo in suā Epicuri Physiologiā cap. de figura atomorum pag. 203. *Atomi debent habere diversas figuras, quia omnes homines ejusdem inter se naturæ, sunt inter se diversæ*

figure, & numquam duo reperiuntur omnino similes: sicut nec duo grana tritici, nec duo ova: Atqui illa ratio nulla est, quia ex diversis figuris hominum & granorum, non possunt conjici diversæ atomorum figure: siquidem ex corporibus concretis & compositis, ut sunt homines, grana & ova, quæ diversas possunt habere figuras, non valet consequentia pro corporibus simplicissimis & indivisibilibus, ut sunt atomi, quæ nullius proinde sunt figure capaces; ergo ratio quâ Gassendus probat atomos diversas habere figuras, nulla est.

Prob. 2. contra Gassendum qui pag. 205. vult probare aliquo experimento atomos habere diversas figuras: Si permiseris, inquit, aquam salis ad Solem evaporare, relinquetur sal totum conformatum in figuras cubicas, id est quadratas: si aluminosum in octa hedricas, & ita de alijs salibus, ut engiscopio adhibito sive tubo appropinquatorio patebit: Sed ex hoc experimento malè conjicit Gassendus, atomos diversas habere figuras: Siquidem duo in illo experimento docet. 1. quod omnia grana salis habent eandem figuram nempe cubicam, quia sunt ejusdem nature. 2. quod grana salis, & aluminis habent diversas figuras, quia sunt diversæ nature; ex quibus poterat tantum conjicere, quod omnes atomi sint ejusdem figure, cum sint ejusdem nature: siquidem ideo, ex ipso Gassendo comprobatur, grana salis & aluminis esse diversæ figure, quia sunt diversæ nature; ergo cum omnes atomi sint ejusdem nature, debent esse ejusdem figure: proinde dicendum, quod posito, quod atomi habeant aliquam finitam magnitudinem, necesse est

illas habere aliquam figuram. malè tamen conjicit Gassendus illas habere diversas figuras.

Dicendum est 4. Atomos non posse etiam habere gravitatem, sive principium motus.

Prob. atomi ex quibus compactæ sunt columnæ marmoreæ, semper essent in continuo motu, quia, juxta Gassendum, atomi moventur per inane, antequam constituent corpora; & post ipsam corporum constitutionem non amittunt motum, quia possunt moveri propter vacuola quæ reperiuntur in omnibus corporibus: atqui falsum est, quod atomi ex quibus compactæ sunt columnæ marmoreæ, possint moveri; ergo falsum est quod atomi possint habere gravitatem, sive principium motus.

Respondet Gassendus, quod illæ habent motum internum insensibilem.

Sed contra: si illæ atomi haberent motum insensibilem, haberent etiam motum sensibilem; quia plurimi motus insensibiles possent facere unum motum sensibilem: sicut plurimæ atomi insensibiles & indivisibiles faciunt unum corpus sensibile & divisibile; ergo atomi ex quibus compactæ sunt columnæ marmoreæ, non possunt etiam habere motum internum & insensibilem.

Dicendum est 5. & ultimò, quod posito etiam, quod darentur atomi, & haberent proprietates assignatas à Gassendo, non possunt tamen esse principia rerum naturalium.

Prob. principia rerum substantialium debent facere distinctionem substantialem, quia idem est principium distinctivum & constitutivum: atqui atomi non possunt facere distin-

tionem substantialem; ergo non possunt esse principia constitutiva rerum substantialium. Prob. min. quæ differunt tantum accidentaliter, non possunt facere distinctionem substantialem: atqui atomi differunt tantum accidentaliter; ergo non possunt facere distinctionem substantialem. Prob. min. atomi, secundum atomistas, differunt tantum secundum figuram, & motum: atqui differre secundum figuram & motum, est differre tantum accidentaliter; ergo atomi differunt tantum accidentaliter.



ARTICULUS VI.

De principijs entis mobilis secundum Chymicarum sententiam.

NOtandum est quod Chymici sive Alchimistæ, sic dicti à verbo græco χυμω, fundo, vocantur illi artifices, qui dant operam chymix seu illi arti quæ tota est in fundendis, seu solvendis corporibus seu metallis, & illi docent omnia composita resolvi in tria, quæ vocant principia. Si enim aliquod compositum applicetur ad ignem, mox egredietur aliqua substantia subtilissima & limpidissima, quæ quaque versum facillimè penetrat, & illa substantia dicitur *Mercurius*. Si fiat major ignis applicatio, erumpit quædam substantia viscosa quæ *sulphur* nominatur. Si vero redigatur mixtum in cineres, ex illis cineribus extrahitur substantia quædam

alba & sicca quæ nullam patitur corruptionem, & quæ à corruptione cætera præservat, & illa substantia dicitur *sal*: Quidquid autem extracto sale in cineribus remanet, dicitur *terra damnata* & *caput mortuum*; ut potè ad omnia inutile. Illa autem principia non sunt ejusdem rationis. cum Mercurio, sulphure & sale, quæ in officinis mercatorum emuntur; licet cum illis habeant quandam affinitatem. Mercurius dat fluiditatem & colorem, sulphur calorem & odorem sal denique consistentiam, gravitatem, atque saporem. Præter illas substantias admittunt Chymici spiritum quendam omnia vivificantem, qui vocatur *εντελεξία*, sive *perfectio mundi*.

Dicendum est tria chymicorum principia non esse admittenda.

Prob. Mercurius, sal, & sulphur sunt ex alijs, quia resolvuntur in alia: siquidem mediante ignis validioris calore, Mercurius resolvitur in aërem, sal in aquam, & sulphur in flammam; ergo Mercurius, sal & sulphur non possunt esse principia. Præterea, ex ipsis chymicis, essent plura quàm tria principia, quia omnia non tantùm resolvuntur in Mercurium, sulphur, & sal, sed etiam in terram damnatam & caput mortuum, quod licet sit inutile quoad usus nostros, est tamen utile quoad naturam.



ARTICULUS VII.

*De principijs entis mobilis secundum sententiam
Elementariorum.*

NOtandum est quod Elementariorum non una & eadem est sententia : alij enim volunt unicum esse principium : alij verò plura esse existimant. Inter ipsos, qui unum tantum principium constituunt, censetur omnium Princeps, Thales Milesius qui, teste Aristotele 1. Metaph. cap. 3. pro rerum omnium principio ponit aquam : aërem verò pro principio constituunt, Anaximenes, Diogenes & Archelaüs Atheniensis : terram vero Hesiodus : ignem Heraclitus, qui plura admittunt principia ; alii solum tria Elementa omittendo terram ; alij vero quatuor elementa ad rerum omnium productionem concurrere putant, inter quos præcipuè Empedocles.

Dicendum est neque unum aliquod elementum, neque plura esse principia entis mobilis.

Probatur conclusio quoad 1. partem, quod scilicet unum aliquod elementum non potest esse principium, quia nulla esset distinctio substantialis inter omnes res naturales per unum & idem elementum substantialiter constitutas : tum etiam, quia entia naturalia sunt composita ; ergo debent oriri & componi plurimis principijs, quia compositio est multorum simul positio.

Prob. quoad secundam partem, quod scilicet plura elementa non possunt esse principia; quia illa non possunt esse principia, quæ fiunt ex alijs, ut patet ex definitione principiorum: atqui omnia elementa fiunt ex alijs, quodlibet enim elementum fit ex materia & formâ, cum sit compositum sensibile; ergo plura elementa non possunt esse principia.

Obj. entia naturalia fiunt ex illis in qua resolvuntur: atqui omnia entia naturalia resolvuntur in quatuor elementa; ergo entia naturalia fiunt ex quatuor elementis.

Respondeo 1. ex mente illorum, qui dicunt elementa non remanere formaliter in mixtis, neg. min. quia entia naturalia non possunt resolvi, nisi in illa quæ habent formaliter; ergo cum non habeant formaliter elementa, non possunt resolvi in illa.

Respondeo 2. ex mente illorum qui docent elementa remanere formaliter in mixtis, dist. min. entia naturalia resolvuntur in quatuor elementa, per resolutionem aliquam non ultimam, con. per resolutionem ultimam, nego, quia elementa resolvuntur in alia, nempe in materiam, & formam, ut dictum fuit in conclusione, & ita non possunt esse principia.

Instabis: atqui elementa non resolvuntur in alia; ergo nulla solutio prob. subst. elementa sunt corpora simplicia; ergo non resolvuntur in alia.

Respondeo 1. dist. subst. elementa non resolvuntur in alia corpora, con. principia, nego, nempe in materiam, & formam.

Resp. 2. neg. subst. ad cujus prob. dist. ant. elementa sunt corpora simplicia, per exclu-

tionem compositionis accidentalis, con. per
exclusionem compositionis substantialis, neg.
quia duplex datur compositio, una substan-
tialis, & altera accidentalis. Compositio sub-
stantialis fit ex materiâ & formâ, & illa
reperitur in elementis, quæ proinde non sunt
corpora omnimodè simplicia. Compositio ac-
cidentalis, est illa; quæ fit ex combinatione
quatuor primarum qualitatuum, quæ non re-
peritur in elementis, quia ut fusè in sup loco
probabitur, in quolibet elemento duæ tantum
reperiuntur qualitates.



ARTICULUS VIII.

*De principijs rerum secundum doctrinam
Patris Maignan.*

Notandum est. I. quod Pater Maignan,
vir ingenio ac doctrinâ insignis, no-
vam pro rerum principijs hypotheseos exco-
gitavit. Nomine autem principij sive ele-
menti, intelligit corpus simplex, hoc est cu-
jus omnes partes sint homogeneæ seu ejus-
dem generis cum toto, sive aqua est elemen-
tum, quia quælibet pars aquæ etiam minu-
tissima est ejusdem generis cum aquâ totali;
unde dixit in secundâ parte Philosophiæ na-
turæ p. 113 l. cap. 13. prop. I. num. 3. quod
elementum absolute spectatum definitur *Sub-
stantia corporea homogenea*, sive substantia
quanta & extensa & constans partibus ejus-
dem generis. unde, quia elementi definitio

convenit igni, aëri, aquæ, & terræ; docet cum nonnullis elementarijs, quod illa quatuor elementa sunt principia rerum naturalium.

Notandum 2. quod ille Doctor convenit cum elementarijs, ubi dicit quatuor vulgaria elementa esse principia omnium rerum, sed ab illorum sententia discedit, ubi docet principia esse plura quàm quatuor docet enim cap. 13. prop. 13. num. 2. pag. 1179. quod *præter hæc quatuor elementa, ad compositionem corporum, quæ ærniunt, concurrunt etiam multa spirituum copia, à stellis, ac planetis derivata.* Illi autem cœlestes influxus sunt principia rerum, quatenus veniunt in compositionem cum istis ipsis elementis, & ita in eodem compositio habent rationem materię saltem partialis.

Dicendum est prædictam hypotheseſ non esse admittendam.

Probat. tripliciter: 1. potest rejici illa hypothesis ratione quâ refutata fuit elementariorum sententia.

2. Quia ex illâ opinione necessario sequeretur, innumera & quasi infinita esse elementa & principia rerum; eo quod in illâ sententiâ illud est elementum, quod est substantia corporea homogenea: atqui innumera & quasi infinita sunt substantię corporeæ & homogeneæ, quia præter illa quatuor elementa & influxus cœlestes sunt plurima salium, sulphurum, lapidum, metallorum, & bituminum genera, aliaque infinita corpora quæ sunt substantię homogeneæ; ergo essent innumera elementa & principia rerum natura-

lium. Certè non videtur quomodo ille Philosophus possit negare tot esse elementa seu principia, quot sunt substantiæ corporeæ & homogeneæ. Si verò illud fateatur, sequitur ergo veram esse sententiam Anaxagoræ, qui infinita admittebat principia. Falsam autem esse illius sententiam probat Aristoteles: ex eo quod inde sequeretur res naturales cognosci non posse ex parte suorum principiorum, quæ capi & cognosci non possent: siquidem infinitum ut sic, est incognoscibile; & propterea Philosophia naturalis de medio tolleretur.

Tertio: ratio quâ Maignanus probat, influxus cœlestes cum elementis in compositionem venire, nullius videtur roboris: ideo enim in loco jam citato dicit quod influxus cœlestes sunt principia: *Quia sub quodam cœlo, seu in tali regione, letius germinant hæc vel illa sata; sub alijs verò agrè proveniunt; cum tamen in eis non desit aquæ copia vel terræ, & ignis etiam ac aër abundè adsint; ita metalla non ubique terrarum gignuntur, nec adamas, aliæve gemmæ.* Certè hæc ratio influxuum cœlestium necessitatem declarat, pro illarum rerum productione: sed nullo modo probat influxus cœlestes esse rerum principia. Fatemur ergò influxus cœlestes esse necessarios ad rerum productionem; sed inde tamen non sequitur, ipsos esse rerum principia.



ARTICULUS. IX.

De principijs rerum secundum sententiam

Nicolaï Cabeï.

NOrandum est 1. quod Nicolaïus Cabeus Ferrariensis, Societatis Jesu, novam statuit hypothesim pro rerum principijs lib. enim 4. textu 3. questione 5. docet, quod res omnes constant ex triplici parte, quæ sunt vera & Physica rerum principia. prima est substantia quædam subtilissima, spiritibosa, & volatilis. secunda est substantia quædam crassa, fixa, subsistens & corpulenta. tertia est humor aliquis glutinosus, quo aliæ duæ substantiæ connectuntur. prima habet rationem formæ, cum ab ipsa corpus denominationem & speciem accipiat. secunda habet rationem materiæ quæ est ad omnes formas indifferens, & successivè illas recipit. tertia habet rationem unionis, cum alias duas partes conjungat. probat autem res hujusmodi partes in quolibet corpore reperiri quia ut ait, constat experientiâ nullum esse corpus ex quo per artem chymicam non extrahantur substantiæ quædam subtilissimæ, quæ propter subtilitatem vocantur spiritus; post extractos spiritus remanent faeces ejusdem corporis sive materiæ quædam crassa in quo remanet adhuc humor aliquis glutinosus, quod patet ex eo quod si ignis admoveatur ad illam materiam crassam, mox ignem concipit & in cineres redigitur, consumpto per ignem humore illo glutinoso.

No-

Notandum est 2. quod ex eodem Philosopho illi spiritus qui habent rationem formæ sunt in triplici genere. Spiritus inquit, lib. 4. tex. 2. quæst. 5. pag. 79. columna 1. sunt in triplici categoria, seu ad ad tres classes reducuntur quæ sunt verè, & physicè rerù differenciæ. Sunt enim aliqui spiritus minerales quos Philosophi vocabunt spiritus mixtorum seu corporum simularium inanimatorum & ex istis spiritibus fiunt omnia corpora quæ carent omninò animâ & vitâ, & ut mox dicam ex admixtione horum spirituum & separatione fit continua & apparens varietas omnium corporum simularium. 2. Classis est spirituum viventium seu vegetabilium ex quibus dum conjunguntur cum materia fiunt ventia & vegetabilia, & dum separantur pereunt eadem ventia, & si iterum contingat uniri, fiunt iterum alia ventia, & separatis pereunt. 3. Genus est spirituum animalium ex quibus conjunctis, cum materia fiunt animalia, & illis separatis à materia eadem animalia moriuntur, & si rursus iisdem spiritus conjungantur cum materia iterum fiunt animalia, & separatis pereunt.

Notandum est 3. docere illum insuper quod in uno genere sunt plures differentiæ spirituum v. g. in genere spirituum mineralium sunt plures spirituum mineralium differentiæ putat tamen multas rerum differentias oriri ex varia spirituum admixtione. *Sicut enim, inquit loco laudato, si habeam tres tantum pulveres coloratos diversorum colorum, album, nigrum & rubrum, ex istis tribus pulveribus possum componere innumeros colores, plus de uno, aut altero admiscendo, cum majori vel minori materia, sic*

*Primæ partis Physicæ ;
existimo, ex varia nempe spirituum admixtorum
admixture, plurimas plantarum & herbarum
species oriri, plurimas animantium formas pro-
dure, cum tamen spiritus non sint inter se diversi.*

Dicendum est novam Cabeï hypotheseſim non eſſe admittendam.

Probatuſ multipliciter 1. illa eſſia aſſignata non ſunt corpora ſimplicia, cum per artem chymicam poſſint in alia reſolvi ; ergo non ſunt principia.

2. Ex illa Cabeï ſententia ſequitur nihil de novo produci in generatione, nihilque in corruptione perire, ſed illa duo falſa ſunt, ut alio in loco probabitur ergò ; falſa eſt Cabeï ſententia.

3. Ubi Cabeus ſuam conatur ſtatuerere hypothefeſim videtur aliquid contradictionem involvens dicere ; docet enim loco jam dicto quod plantarum differentiarum oriuntur ex diſverſa ſpirituum vegetabilium admixture, quamvis illi ſpiritus non ſint inter ſe diverſi : & in eodem loco & eadem pagina jam dixerat, quod in eodem genere ſunt plures differentiarum ſpirituum, hoc eſt in genere vegetabili ſunt plurimarum ſpirituum vegetabilium differentiarum ; ergo docet quod ſpiritus vegetabiles ſunt diverſi, & non diverſi.



QUÆSTIO II.

De materia prima.

CUM jam superiori quæstione fu-
se à nobis actum fuerit, de prin-
cipijs corporis naturalis in com-
muni, agendum nunc est de sin-
gulis in particulari. In istâ ergò
quæstione agetur de materiâ primâ, de quâ
septem quærentur in septem articulis.



ARTICULUS I.

An sit, & quid sit materia prima.

Dicendum est i. dari materiam primam.
Probat. datur generatio & corrup-
tio: atqui non potest dari generatio &
corruptio, nisi detur materia prima; ergo
datur materia prima. Major est evidens;
patet enim quòd una substantia producit
aliam substantiam, unus v. g. ignis produ-
cit alium ignem; illa autem actio produ-
ctiva ignis nihil aliud est quàm generatio.
Minor etiam est evidens; siquidem in gene-
ratione præsupponitur subjectum, & in cor-
ruptione relinquitur subjectum, quod non po-
test esse nisi materia prima, quæ certè admit-
titur ab omnibus philosophis, sed non eodem

modo : Cartesiani enim pro materiâ primâ ponunt. particulas quantitatis , Gassendistę atomos , Elementarij elementa , & sic de cæteris.

Obj. Si daretur materia prima , poneretur in aliquo prædicamento : atqui in nullo potest reponi , cum ex Arist. 7. Metaphis. cap. 3. *textu 8. Materia non sit neque quid , neque quale , neque quantum ;* ergo non datur materia prima.

Resp. dist. maj. materia prima poneretur in prædicamento reductivè , con. directè nego , ratio est , quia cum materia sit pars compositi , reducitur ad compositum ; & ita ponitur reductive in eodem prædicamento quo illud ; & hoc satis est pro ente incompleto , quale est materia prima.

Dicendum est 2. materiam primam esse subjectum primum , ex quo aliquid fit , & non secundum accidens.

Prob. & explicatur definitio : 1. dicitur subjectum quod ponitur veluti loco generis , quia per illud vocabulum materia prima convenit cum secundâ , hoc est cum toto composito quod dicitur subjectum formarum accidentalium. 2. Dicitur subjectū primum , & sic discrepat à subjecto secundo , quod est compositum physicum. 3. Materia prima dicitur subjectum primum ex quo aliquid fit , ad excludendas alias causas ; nam efficiens est illa à quâ aliquid fit ; causa finalis est illa propter quam aliquid fit ; formalis est illa per quam aliquid fit. Ultimò dicitur non secundum accidens , ad excludendam privationem sive terminum à quo ; quia ex privatione non fit ali-

quid ut ex constituyente, sicut ex materiâ, sed tanquàm ex aliquo quod relinquitur, itaut privatio se habeat per accidens ad rem in facto esse.



ARTICULUS II.

Utrum materia prima sit pura potentia excludens actum essentiae.

NOtandum est 1. duplicem esse potentiam, scilicet activam & passivam. Activa nihil aliud est, quàm vis aliqua faciendi & operandi. Passiva verò nihil est aliud, quàm facultas aliqua patiendi sive recipiendi. Non disputatur hîc de potentiâ activâ, sed tantùm de passivâ: & quæritur, utrum materia sit ita pura potentia, ut excludat omnem actum; quod ut meliùs intelligatur.

Notandum est 2. quadruplicem esse actum, nempe Physicum, Metaphysicum, essentiae, & existentiae. Physicus est forma substantialis, vel accidentalis. Metaphysicus est differentia specifica & numerica; actus verò essentiae est ille, quo essentia ponitur sub determinato essendi modo, sive quo essentia sit actualis; & ille à quibusdam vocatur entitativus, quia constituit rem in esse actualis entitatis: actus tandem existentiae est ille per quem essentia ponitur perfectè extra causas & nihilum. Actum illum ultimum existentiae vocant entitativum Scotistæ nonnulli, quia per eum res est actu extra suas causas; & ita, juxtà illo-

rum interpretationem , rem habere actum entitativum nihil aliud est , quàm rem esse entitatem realem positivam extra suas causas ; sed an illa Scotistarum explicatio sit legitima vel non , hîc inquirendum non existimo , quia est tantùm disputatio de nomine ; neque etiam disputabitur hîc de actu physico , cum constet materiam secundum se non includere formam substantialem nec accidentalem ; de actu verò metaphysico agetur in 5. istius quæstionis articulo ; superest ergò ut in præsentî articulo disputemus dumtaxat de actu essentia , disputaturi de actu existentia in subsequenti articulo.

Dicendum est , materiam primam ita esse puram potentiam , ut excludat actum essentia , hoc est ejus entitatem essentia non esse actua-lem , sed potentialem.

Prob. 1. autoritatibus : 1. Aristoteles 8. Metaphys. cap. 1. ait , *Materiam eam dico , quæ non est actu hoc aliquid , sed potentia.* 2. Sanctus Thomas dicit. 1. contra gent. cap. 43. *In rebus invenitur aliquid quod est potentia tantùm , ut materia prima ; aliquid quod est actus tantùm , ut Deus ; & aliquid quod est actus & potentia , ut res creata ;* ergò ex mente sancti Thomæ , & Arist. materia prima est pura potentia.

Prob. 2. ratione : actus essentia est ille qui determinat in aliquo essendi modo ; ergò cum materia secundum se non sit eo modo determinata ; eo quod secundum se neque est quid , neque quale , neque quantum , non habet actum essentia , sed excludit illum omninò.

Prob. 3. Si materia includeret actum essentiaë, velet esset actus purus, vel mixtus ex actu & potentia: neutrum dici potest; ergò nulum. prob. min. quoad omnes partes.

1. Materia prima non potest dici actus purus seu tota actus, quia actus & potentia mutuo se se excludunt: siquidem ex Arist. & S. Thoma, ens dividitur in actum & potentiam; ergò potentia non potest esse actus, nec actus potest esse potentia: atqui materia ab omnibus dicitur potentia; ergò non potest dici actus. Insuper si esset actus, vel esset actus inexistens seu informans, & ita aliud subjectum præsupponeret; quod implicat, cum ea sit primum subjectum: vel esset actus per se subsistens, quod non potest admitti, quia actus per se subsistens est perfectissimus, & materia prima est ens omnium entium imperfectissimum.

2. Non potest esse mixta ex actu & potentia, quia sic materia esset primum subjectum, & non esset; esset, ut supponitur, cum hæc sit ejus essentia, & non esset cum ut sic supponeret aliud, nempe potentiam illam ex qua constaret cum tali actu.

Obj. 1. Si materia prima ita esset pura potentia ut non includeret actum essentiaë, & non esset ens actu, esset mærum nihil, quia inter ens actu, & non ens actu non datur medium: atqui materia prima non potest esse mærum nihil; ergò non potest esse pura potentia.

Resp. 1. dist. maj. Si materia prima esset pura potentia objectiva, esset purum nihil, con. si materia prima esset pura potentia sub-

Resp. dist. ant. materia prima debet assimilari Deo, in ratione entis con. in ratione actus neg. quia Deus potest considerari præcisè ut est ens, & ut est ens actualissimum; & ita aliquid potest assimilari Deo secundum illam duplicem formalitatem: Verum quidem est quòd materia prima assimilatur Deo in ratione entis, quatenùs non est nihil; non verò in ratione actus, quatenùs materia excludit omnem actum, ut jam probatum fuit, & pater exemplo infinitatis in quâ nulla creatura ei assimilatur; non enim ipsam participat, licet participet rationem entis.

Inst. Atqui materia debet assimilari Deo, in ratione actus; ergò nulla solutio. Prob. subs. effectus debet proportionari causæ sub ratione sub quâ causa est causa: atqui Deus est causa materiæ & omnium entium, quatenùs est actus; ergò materia debet assimilari Deo in ratione actus.

Resp. nego subs. ad cujus prob. dist. maj. effectus adæquatus & completus debet assimilari causæ con. Effectus inadæquatus & incompletus, nego quia ille effectus est adæquatus qui solus & totaliter terminat actionem producentis; sed materia sola & totaliter non terminat actionem Dei producentis: Deus enim non producit solam materiam, sed producit simul materiam, & formam, hoc est compositum; & ita materia est effectus tantum inadæquatus & incompletus.

Obj. 2. Materia prima habet bonitatem; ergò habet aliquem actum.

Resp. 1. dist. ant. materia prima habet bonitatem, per ordinem ad formam, con. se-

cundum se , neg. quia materia prima eodem modo est bona , quo est ens; est autem ens per ordinem ad formam , & ita est bona per eundem ordinem.

Resp. 2. Materia prima habet potentiæ bonitatem , con. habet bonitatem actus & perfectionis , nego.

Resp. 3. Materia prima habet bonitatem mediæ & ordinis , con. habet bonitatem formalem , nego Quia materia prima est ordinata ad aliquid bonum , scilicet ad formam & compositum.

Obj. Ultimò : eodem modo materia prima est potentia , quo forma est actus : atqui forma non est actus purus ; ergò materia non est pura potentia.

Resp. 1. neg. maj. quia materia est rerum infima. Deus verò est ens supremum ; & ita sicuti Deus excludit omnē omnino potentia- litatem , ita materia excludit omnem actum. forma verò medium tenet inter materiam & Deum : & ita participat aliquid ab utroque ; participat à Deo , quòd sit actus ; à materiâ verò , quòd sit potentia.

Resp. 2. neg. eandem maj. propter aliam rationem ; quia non potest dari ens creatum quòd sit actus purus , sed potest dari ens creatum , quòd sit pura potentia sive ens imperfectissimum. Primum autem non potest dari ; quia ens creatum non est actus , nisi per assimilationem , & accessum ad Deum : cùm autem omnimodus ad Deum accessus non sit possibilis creaturæ , ideò nec potest dari ali- quod ens creatum quòd sit actus purus. Secundum potest dari ; quia ens creatum sit im-

perfectum per recessum à Deo : omnimodus autem recessus à Deo est possibilis , cum nihilum omninò recedat à Deo. Materia ergò quæ ferè accedit ad nihilum , potest dici pura. potentia & ens imperfectissimum.



ARTICULUS III.

Utrum materia prima habeat actum existentie sibi proprium.

Dicendum est materiam primam esse ita puram potentiam , ut excludat actum existentie.

Prob. 1. Authotitate S. Thomæ qui 1. parte quæst. 7. art. 2. ad 3. *Materia prima*, inquit, *non existit in rerum naturâ per se ipsam*, cùm *non sit ens in actu, sed potentiâ tantum* : Atqui materiam primam non existere in rerum naturâ per se ipsam , & non esse ens in actu , est materiam primam non habere propriam existentiam ; ergò materia prima, ex S. Thoma non habet propriam existentiam.

Prob. 2. ratione : si materia prima haberet existentiam ex se, haberet illam antequam reciperet formâ : atqui non potest habere existentiam, antequâ recipiat formâ ; ergò non potest habere existentiam ex se, prob. min. materia prima prius recipit formâ quàm existentiam ; ergò materia prima non habet existentiam antequâ recipiat formam. Prob. ant. materia prima illud prius recipit , ad quod prius ordinatur : atqui materia prima prius ordinatur ad for-

nam substantialem , quàm ad existentiam ; ergò priùs recipit formam substantialem , quàm existentiam , prob. min. potentia essentialiter substantialis , priùs ordinatur ad actum substantialem , quàm ad actum accidentalem : atqui materia prima est essentialiter potentia substantialis , & forma est actus substantialis , existentia verò est actus accidentalis ; ergò materia prima priùs ordinatur ad formam substantialem , quàm ad existentiam ; ergò non priùs recipit existentiam , quàm formam.

Prob. 3. materia prima habens existentiam non faceret unum per se cum formâ : atqui materia debet facere unum per se cum formâ ; ergò materia prima non habet existentiam. Prob. maj. ex duobus entibus habentibus existentiam non fit unum per se ; ergò si materia prima haberet existentiam non faceret unum per se cum formâ , sed aggregatum tantùm per accidens , quod est absurdum.

Respondent aliqui quod materia habens existentiam facit unum per se cum formâ ; quia existentia materiæ se habet ad existentiam formæ , sicut actus ad potentiam.

Sed contra : quæ sunt in eodem genere non possunt ita se habere , ut unum habeat rationem actus , & aliud habeat rationem potentiæ ; atqui existentia materiæ , si quæ esset , & existentia formæ essent in eodem genere , nempè in genere existendi ; ergò non possunt se habere sicut actus ad potentiam.

Obj. 1. materia prima non recipit existentiam à formâ , eo quod materia & forma diversas habeant existentias ; ergò materia prima habet existentiam ex se. Prob. ant. quæ produ-

producuntur diversis actionibus, habent diversas existentias: atqui materia & forma producuntur diversis actionibus; ergò materia & forma habent diversas existentias. Prob. min. materia producitur per creationem, forma verò per generationem; ergò materia & forma producuntur diversis actionibus.

Resp. neg. ant. & min. & ad prob. dist. ant. materia producitur per creationem terminatam ad compositum, con. terminatam ad se solam, nego; quia sola materia non creatur, sed totum compositum; unde docet S. Thomas 1. p. q. 7. art. 2. ad 3. *Quòd materia est magis aliquid concreatum, quàm creatum.* Rationem suggerit idem Doctor 1. p. quæst. 45. art. 4. in corpore his verbis: *creari est quoddam fieri, fieri autem ordinatur ad esse rei; unde illis propriè convenit fieri & creari, quibus convenit esse; sed soli composito convenit esse, non verò partibus, quæ non existunt sed coexistunt; & sic compositum creari propriè dicitur, materia concreari.*

Inst. atqui materia prima producitur aliquandò per creationem terminatam ad se solam; ergò tunc per se habet existentiam. Prob. subf. quando ex speciebus Eucharisticis corruptis generantur vermes, existimat S. Thomas 3. p. q. 77. art. 5. in corpore, Deum producere novam materiam ex quâ eodem instanti educuntur formæ substantiales vermium, virtute agentis naturalis; ergò tunc, ex opinione S. Thomæ materia producitur per creationem terminatam ad se solam.

Resp. 1. neg. subf. & ad prob. dico S. Tho-

nam hoc non dicere asserendo, sed tantum docere quod opinio quam in verbis præcedentibus attulit, posset sic propugnari. Illa autem opinio, quam in illo loco assertit S. Thomas, erat quorundam qui asseriebant quod redibat substantia panis & vini in ipsam corruptione specierum, & quod sic ex substantia panis & vini redeunte generabantur vermes, aut aliquid ejusmodi: Sed illa sententia, inquit S. Thomas, non potest propugnari, *nisi forte dicatur quod in ipso ultimo instanti corruptionis specierum redit non quidem substantia panis & vini, sed materia panis & vini, quæ magis de novo creata diceretur quàm rediens, propriè loquendo, & secundum hoc posset sustineri prædicta positio: quod autem S. Thomas in sua sententia loquens docuerit novam non creati materiam, patet; cum in eodem loco doceat quantitatem dimensionam panis & vini miraculosè accipere vim, ut sit primum subiectum accidentium, ex quo educantur formæ vermium; ita ut quantitas panis & vini verè faciat quidquid faceret panis, si adesset.*

Resp. 2. neg. subf. ad cujus prob. concessio antecedente dist. conseq. materia producitur per creationem terminatam ad se solam per accidens, con. per se, neg. quia materia in illo casu dicitur produci per accidens per creationem ad se solam terminatam, ex eo quod materia ex se non postulet ita fieri & produci; alioquin semper illo modo produceretur, & inde rectè concluderetur materiam primam habere propriam existentiam: tunc autem per accidens illo modo producitur ob

exigentiam agentis naturalis quod debet producere formas vermium, & quod non potest illas producere, nisi præsupponatur aliqua materia.

Resp. 3. *dis.* alio modo eandem consequentiam producitur per creationem terminatam ad se solam & productivam entitatis essentialis materiæ, *con.* per creationem productivam existentiam materiæ, *neg.* quia tunc actio creativa non debet producere existentiam rei quando conjungitur altera actio productiva talis existentiam: sed in illo casu conjungitur altera actio productiva talis existentiam, nempe actio agentis naturalis, per quam formæ vermium producuntur, & per quam existentia communicatur materiæ; ergo actio creativa Dei non debet producere existentiam materiæ.

Obj. 2. materia est prior formâ; ergo non recipit existentiam à formâ. Prob. ant. materia prima est causa compositi; ergo materia prima est prior formâ & composito.

Resp. *dist.* ant. materia prima est prior prioritate naturæ, *con.* prioritate temporis, *neg.* vel est prior in ratione potentiam, *con.* in ratione entis actualiter existentis, *neg.* quia licet aliqua sint simul tempore, unum tamen potest esse prius naturâ.

Inst. atqui materia prima debet esse prior in ratione entis actualiter existentis; ergo nulla solutio. Prob. *subst.* quod causat aliquid, debet actu existere antequam causet: atqui materia prima causat compositum; ergo debet actu existere, antequam causet compositum.

Resp. neg. subf. ad cuius prob. dist. maj. quod causat per modum causæ efficientis, debet actu existere antequam causet, con. quod causat per modum causæ materialis, neg. quia illud discrimen intercedit inter causam efficientem & materiale, quod causa efficiens causet dando existentiam, & ita debet habere illam: causa verò materialis causat, non dando existentiam, sed recipiendo, & ita non debet habere.

Inst. iterum: atquæ quod causat per modum causæ materialis, debet prius existere; ergò nulla solutio. Prob. subf. quod causat per modum causæ materialis debet esse extra nihil; ergò debet prius existere.

Resp. neg. subf. ad cuius prob. dist. ant. quod causat per modum causæ materialis debet esse extra nihil, ratione essentiae, con. ratione existentiae, neg. vel quod causat per modum causæ materialis debet esse extra nihil incompletè, con. completè, neg. quia res quælibet ponitur extra nihil incompletè per se ipsam, completè verò per existentiam.

Inst. iterum: atqui materia prima est extra nihil completè; ergò nulla solutio. Prob. subf. quod est actu & extra causam efficientem, est extra nihil completè: atqui materia prima antequam causet compositum, est actu & extra causam efficientem; ergò est extra nihil completè.

Resp. 1. neg. subf. ad cuius prob. dist. primam partem maj. quod est actu, ut constans actu & potentia est extra nihil completè, con. quod est actu, ut suscipiens actum, est extra nihil completè, neg. aliquid autem po-

test esse actu triplici modo. 1. Ut suscipiens actum, & ita materia prima est actu. 2. Ut dans actum, & ita forma est aliquid in actu. 3. Ut aliquid constitutum ex potentiâ & actu, & ita compositum est actu.

Resp. 2. neg. idem subf. ad cujus prob. dist. maj. quod est extra causam efficientem independentem à formâ, est extra nihil completè, con. quod est extra causam efficientem dependentem à formâ, est extra nihil completè, neg. similiter distinguenda est minor: atqui materia est extra causam efficientem dependentem à formâ, con. independentem à formâ, neg. quia nusquam sola materia creatur, sed simul producitur forma à quâ materia recipit existentiam; & ita materia dicitur concreta.

Obj. 3. si materia prima reciperet existentiam à formâ, materia prima generaretur: atqui non potest generari, cum sit ingenerabilis, ut infra probabitur; ergo materia prima non potest recipere existentiam à formâ. prob. maj. generari est transire de non esse ad esse: atqui materia transiret de non esse ad esse; ergo materia generaretur.

Resp. neg. maj. ad cujus prob. nego min. quia materia nusquam transit de non esse ad esse, sed semper transit de uno esse ad aliud esse, v. g. materia quâ informatur anima viventis transit de esse formæ cadaveris, & ita non dicitur generari; similiter neque potest dici corrumpi, quia nusquam transit de esse ad non esse, sed semper transit de uno esse ad aliud esse.

Obj. 4. quod potest naturaliter existere si-

ne formâ non recipit existentiam à formâ : atqui materia potest naturaliter existere sine formâ ; & de facto extitit sine formâ ; ergò materia non recipit existentiam à formâ. Prob. min. initio mundi materia fuit informis : atqui materiam fuisse informem , est materiam extitisse sine formâ , eo quod illa materiæ informitas importat carentiam omnis formæ , ut patet autoritate S. Aug. qui lib. 12. Confess. cap. 12. & lib. 2. de Genesi ad litteram cap. 11. & lib. 1. de Genesi contra Manich. cap. 5. & 7. locum illum genescos , *terra autem erat inanis & vacua* , interpretatur de materiâ primâ quæ erat informis & vacua ob carentiam formarum ; ergò materia prima extitit sine formâ.

Resp. neg. min. & ad prob. dist. 2. partem alterius minoris. Materiæ informitas importat carentiam omnis formæ , quæ carentia præcessit informationem materiæ aliquâ prioritate naturæ , con. aliquâ prioritate temporis , neg. quia verum quidem est quòd quamvis locis prædictis S. Aug. per informitatem illam materiæ intelligat carentiam omnis formæ , sentit tamen & docet eam informitatem præcessisse formationem ejusdem materiæ , origine tantùm & ordine naturæ , quod expressè asserit 13. Confess. art. 33. *cum* , inquit , *aliud sit cæli & terræ materies , aliud cæli & terræ species , materiam quidem de omnino nihilo , mundi autem speciem de informi materia : simul tamen utrumque fecisti ; ut materiem forma nullâ moræ intercapedine sequeretur.*

Inst. atqui materiæ informitas præcessit

formationem ejusdem materiæ prioritate temporis : siquidem illud docent S. Basilus hom. 2. in Exameron , & Chrysost. hom. 2. in Genesim ; ergo nulla solutio.

Resp. dist. subs. informitas materiæ præcessit prioritate temporis formationem accidentalem ejusdem materiæ , con. formationem substantialem , nego ; quia datur duplex forma , scilicet forma substantialis & accidentalis , & per utramque potest materia diverso quidem modo informari. Per formam substantialem informatur substantialiter ; per formam vero accidentalem accidentaliter : quando autem Patres jam citati dicunt quod informitas materiæ præcessit prioritate temporis formationem ejusdem , loquuntur tantum de formatione accidentali , hoc est intelligunt materiam fuisse informem per aliquod tempus , ex eo quod tantum in instanti creationis non habuerit totam pulchritudinem , totum decus , totamque perfectionem accidentalem quam successu temporis recepit ; & proinde illi sancti Patres dicunt quod materia fuit per aliquod tempus privata formâ accidentali , non verò substantiali.





ARTICULUS IV.

Utrum materia prima possit divinitus existere sine formâ.

Dicendum est materiam non posse. etiam divinitus existere sine formâ.

Prob. quod aliquid sit & non sit, à Deo fieri non potest: atqui si materia existeret sine formâ, esset & non esset; ergò materia prima non potest etiam divinitus existere sine formâ. Prob. min. materia prima esset, ut supponitur, & non esset, quia quod non est determinatum in aliquâ specie, non est: atqui materia prima sine formâ non est determinata in aliquâ specie, quia materia recipit determinationem à formâ; ergò materia prima non esset. Præterea quod est essentialiter incapax existentiae non potest etiam divinitus existere sine formâ: atqui materia prima ante formam est essentialiter incapax existentiae; ergò non potest etiam divinitus existere sine formâ. Prob. min. primum subiectum essentialiter est incapax actus secundi, antequam recipiat actum primum; ergò materia est incapax existentiae ante formam, quia forma est actus primus, & existentia est actus secundus.

Obj. I. accidentia possunt existere divinitus sine subiecto; ergò materia prima potest etiam divinitus existere sine formâ. Prob.

conseq. magis dependent accidentia à sub-
jecto, quàm materia à formâ : atqui acci-
dentia possunt divinitus existerè sine subje-
cto, ut patet in venerabili Eucharistiæ sacra-
mento ; ergò materia prima potest etiam di-
vinitus existerè sine formâ.

Resp. neg. conseq. ad cujus prob. nego
maj. quia accidentia dependent tantùm à
subjecto naturaliter, non verò essentialiter.
Siquidem inhærentia actualis est tantùm na-
turalis accidentibus, non verò essentialis ;
Deus autem potest tollere à re quod tātum est
illi naturale. Materia verò dependet essen-
tialiter à formâ, quia potentia essentialiter
substantialis dependet essentialiter ab actu
substantiali, per quem specificatur & determi-
natur ad tale esse.

Obj. 2. materia prima potest existerè sine
formâ, si possit realiter separari à formâ ; at-
qui materia prima potest realiter separari à
formâ ; ergò potest existerè sine formâ. Prob.
min. illa quæ inter se realiter distinguuntur
possunt inter se realiter separari ; atqui mate-
ria prima distinguitur realiter à formâ ; ergò
potest realiter separari à formâ.

Resp. neg. min. ad cujus prob. nego maj.
quia licet verum sit quod illa quæ separan-
tur realiter, distinguuntur realiter (siquidem
maximum distinctionis realis signum est rea-
lis separatio) non tamen verum est quòd om-
nia quæ distinguuntur realiter, separentur
realiter propter essentialem dependentiam
quam unum dicit ab alio ; & ita licet relatio,
& terminus distinguantur realiter, relatio
tamen non potest separari à termino & exi-

stere sine illo: similiter licet visio & objectum distinguantur realiter, visio non potest realiter separari a objecto, & existere sine illo.

Obj. 3. Deus potest facere per se ipsum quidquid facit per causam secundam: atqui Deus facit ut materia existat per formam; ergo potest facere per se ipsum ut materia existat sine formâ.

Resp. dist. maj. Deus potest facere per se ipsum quidquid facit per causam secundam efficientem, con. quidquid facit per causam formalem, neg. implicat enim quod Deus faciat per se ipsum quidquid facit per causam secundam formalem; quia sic Deus, qui est ens infinitum, limitaretur, cum officium causæ formalis sit recipere actuare materiam; & ita si Deus suppleret officium causæ formalis reciperetur in materiâ, & proinde limitaretur.

Obj. ultimò: Deus potest per existentiam propriam supplere existentiam creatam, ut patet in humanitate Christi, quæ existit per existentiam divinam; ergo potest facere ut materia existat sine formâ.

Resp. dist. ant. Deus potest supplere existentiam stante formâ, con. non stante formâ, nego; quia humana Christi natura, quæ existit per existentiam divinam, prius est constituta per suam propriam formam, nempe animam rationalem.



ARTICULUS V.

Utrum materia habeat appetitum ad omnes formas.

NOtandum est, appetitum nihil aliud esse quam inclinationem rei ad illud quod sibi convenit: unde pro duplici inclinatione, admittitur communiter duplex appetitus, innatus scilicet, & elicited. Innatus est ille quo res fertur in aliquid absque ullâ præviâ cognitione, v. g. corpora gravia deorsum, levia sursum feruntur appetitu innato. Appetitus verò elicited est ille qui sequitur cognitionem, sic homo appetit divitias. Non agimus hîc de postremo hoc appetitu, sed de primo dumtaxat.

Dicendum est quòd materia prima appetitu innato appetit omnes formas, præsentès quidem appetitu quietis & complacentiæ, præteritas appetitu proportionis, futuras verò appetitu tendentiæ & desiderij.

Prob. appetere formas, est tendere ad formas: atqui materia tendit ad omnes formas; ergò appetit omnes formas. Prob. min. omnis potentia tendit ad actum suum, & omnis inchoatio & imperfectio tendit ad suum complementum & ad suam perfectionem: atqui forma est actus seu complementum & perfectio materiæ; ergò materia tendit ad formam; ergò cum omnes formæ tam præsentès, quàm præteritæ, quàm futuræ sint

illius perfectio, ad omnes tendit indifferenter.

Obj. 1. si materia haberet appetitum ad omnes formas, haberet aliquem actum: atqui materia nullum potest habere actum, cum sit pura potentia, ut jam dictum fuit; ergo non potest habere appetitum ad omnes formas.

Resp. dist. maj. si materia haberet appetitum per modum actualis tendentiæ haberet actum, con. si haberet appetitum per modum passivæ capacitatis, neg. Appetitus autem materiæ non est actualis tendentiæ, sed est passiva capacitas ad formam ordinata: siquidem materia prima appetit formas, non ex eo quod eliciat aliquem actum quo feratur in illas, sed quia potest recipere successive omnes formas.

Obj. 2. si materia prima haberet appetitum ad omnes formas nusquam satiaretur, quia cum formæ sint infinitæ, & infinitum non possit exhaustiri, numquam satiaretur appetitus materiæ, & proinde esset inutilis; ergo cum natura & Deus nihil faciant frustra, materia prima non habet talem appetitum.

Resp. dist. ant. materia numquam satiaretur actu, & in facto esse, con. successive & in fieri, neg. quia materia eodem modo habet appetitum ad omnes formas, quo illas potest recipere, non potest autem illas recipere nisi successive, & sic satiatur successive, semperque est in satiari, & nunquam in satiato esse.

Obj. 3. cum nostro Doctissimo Patre Milhet in 1. Tract. suæ Phys. Sect. 2. contr. 4. 7. argumento:

argumento, si materia appeteret omnes formas, magis appeteret perfectiores quam imperfectiores; quia licet ejus appetitus non sequatur cognitionem quæ sit in ipsâ, sequitur tamen cognitionem auctoris naturæ qui illam sic inclinavit: atqui non magis appetit perfectiores, imò aliquando dum habet perfectiorem, appetit imperfectiorem, ut patet in homine, in quo appetit formam cadaveris, dum est sub formâ rationali, quæ est omnium perfectissima; ergò absolutè nullas appetit formas.

Resp. cum eodem Doctore solidissimo dist. maj. Si ferretur ad eas, ut habent rationem entis, con. si ut habent rationem formæ, neg. sub illâ enim ratione omnes cum sint æquales, omnes indifferenter respicit, cum omnes perficiant illam & actuent, illique existentiam tribuant, vel etiam materia appeteret perfectiores, si una esset perfectior aliâ in ratione formæ, con. Si una sit perfectior in ratione entis, nego, omnes enim formæ sunt æqualiter perfectæ in ratione formæ, cum omnes in sublunaribus sint amissibiles: una tamen est perfectior aliâ in ratione entis, v.g. anima rationalis est quidem omnium formarum perfectissima in ratione entis, sed in ratione formæ est æqualis perfectionis cum cæteris formis, quia in hoc statu informat materiam amissibiliter, ut cæteræ.



ARTICULUS VI.

Utrum materia prima habeat unitatem specificam & numericam, siue utrum habeat actum Metaphysicum.

Dicendum est 1. materiam primam secundum se non habere unitatem specificam.

Prob. illud non habet unitatem specificam, quod secundum se non habet principium talis unitatis : atqui materia prima secundum se non habet principium unitatis specificæ; ergò secundum se non habet unitatem specificam. Prob. min. principium unitatis specificæ est forma : atqui materia secundum se non habet formam ; ergò secundum se non habet principium unitatis specificæ.

Dicendum est 2. materiam primam secundum se non habere unitatem numericam.

Prob. materia prima secundum se non habet principium unitatis numericæ ; ergò neque ipsam unitatem numericam. prob. ant. quantitas est principium unitatis numericæ, ut probabitur in metaphysicâ : atqui materia prima secundum se non habet quantitatem, quia sola materia non potest esse subjectum accidentium ; ergò materia prima secundum se non habet principium unitatis numericæ.

Obj. 1. Materia cœlestis & materia sublu-

naris in hoc differunt: quia materia cœlestis respicit actum, ut inamissibilem; materia verò sublunaris respicit actum, ut amissibilem: atqui hoc modo differre est habere differentiam & unitatem specificam; ergò materia prima habet unitatem specificam.

Resp. dist. min. hoc modo differre, est habere differentiam negativam; con. est habere differentiam positivam, neg. Ratio distinctionis est, quia potentia differunt secundum modum respiciendi actus suos; & ideo cùm talis ordo sit ipsa materia connotans formam, & materia sit pura potentia excludens omnem actum, sic non potest habere nisi unitatem negativam, quia non habet in se aliquid positivum per quod specificè dividatur.

Inst. atqui materia prima habet unitatem positivam; ergò nulla solutio. prob. subl. quod est positivum habet unitatem positivam, quia unitas est proprietas entis; & proinde talis est unitas, quale est ens: atqui materia prima est ens positivè; ergò habet unitatem positivam.

Resp. neg. subl. & ad prob. dist. maj. quod est ens positivum actuale habet unitatem positivam & actualem, con. quod est ens positivum potentiale habet aliam unitatem positivam nisi transcendentalem, & meræ potentia, neg. unitas enim positiva transcendentalis quæ est communis omnibus, convenit quidem materia: sed ipsa unitas non potest constituere materiam in specie positivâ & actuali; quia quod est sic constitutum, debet habere unum conceptum per quem conveniat & alium per quem differat: illa autem unitas transcendentalis non facit ut materia conveniat, & ma-

teria differat ; & sic non constituit materiam in specie actuali.

Obj. 2. Quod definitur habet differentiam : atqui materia definitur ; ergò habet differentiam.

Resp. dist. maj. quod definitur definitione propriè dictâ habet differentiam , con. quod definitur definitione lato modo sumptâ habet differentiam , nego. materia autem propriè non habet genus , neque differentiam , & sic non definitur propriè , sed descriptivè.



ARTICULUS ULTIMUS.

Utrum materia sit ingenerabilis & incorruptibilis.

Dicendum est materiam esse ingenerabilem , & incorruptibilem.

Probat. quod non sit ex præsupposito subjecto non generatur , & quod non destruitur remanente subjecto communj non corrumpitur : atqui materia non fit ex præsupposito subjecto , & non destruitur remanente subjecto communi : ergo materia non generatur , neque corrumpitur. Major est evidens , quia generari est fieri ex præsupposito subjecto , & corrumpi est destrui remanente subjecto communi. Sicuti creari est produci ex nullo præsupposito subjecto , & annihilari est destrui nullo remanente subjecto cõmuni. prob. verò min. quantum ad primam partem materia prima est primum

subjectum ex quo omnia fiunt : ergo ipsa materia non fit ex præsupposito subjecto , & proinde non generatur. Prob. similiter quantum ad secundam partem. Materia est ultimum subjectum in quod omnia resolvuntur : ergo materia prima non destruitur remanente subjecto cõmuni, & proinde materia non corrumpitur.

Obj. Quod est causa generationis est generabile juxta tritum axioma , propter quod unumquodque tale & illud magis : atqui materia est causa generationis ; ergo materia est generabilis.

Resp. dist. maj. quod est causa generationis est generabile , ut quo vel ut quod , con. ut quod semper, neg. materia enim non est illud quod generatur , sed illud quo mediante aliquid generatur. Axioma autem allatum debet intelligi tantum de causis quæ sunt ejusdem ordinis, & quæ conveniunt cum effectu, quod non contingit materiæ cui non convenit generari: veritas autem axiomatis liquet in sole, qui licet sit causa caloris in sublunaribus, non tamen est magis calidus, quàm sublunaria, cum non sit causa ejusdem ordinis seu univoca cum illis.



QUÆSTIO III.

De formâ & privatione.

CUm jam probatum fuerit , materiam esse puram potentiam, & non esse ens

actu, nisi per ordinem ad formam; rectus ordo exigit, ut post illustratum illud primum rerum naturalium principium, de duobus alijs principijs agamus, nempe de forma substantiali & privatione. quo autem melius dignoscatur formæ substantialis essentia, formæ accidentalis natura examinabitur: agetur ergo de essentia, existentia & productione formarum substantialium & accidentalium contra omnes recentiores Philosophos.



ARTICULUS I.

De existentia formæ substantialis contra Cartesium & Gassendum.

Notandum est 1. quòd secundum Peripateticorum sententiam, datur quadruplex formarum substantialium genus, nempe anima rationalis in homine, anima sensitiva in brutis, anima vegetativa in plantis, & forma substantialis in rebus inanimatis. Non quæritur hîc, an detur forma substantialis in homine; quia illud certè non negant recentiores Philosophi, neque etiam agetur de anima sensitiva & vegetativa; quia de illis disputabimus in tractatu de anima, sed tantùm hîc quæretur, an detur forma substantialis in rebus inanimatis, quæ sit aliqua entitas distincta realiter à materiâ.

Notandum est 2. quod omnes recentiores Philosophi admittunt quidem formam substantialem in quolibet composito, sed notant

quod illa forma sit aliqua entitas substantialis distincta realiter à materiâ (ut docent Peripatetici;) quid autem sit illa forma quam recentiores admittunt, mira inter illos discrepantia est. hîc tantum discutientur Cartesij & Gassendi sententiæ, quæ in idem videntur coincidere. Cartesius quidem 4. principiorum parte num. 198. Docet quod forma nihil sit aliud, quam particularum dispositio, figura & harmonia; ita ut in generatione nova aliqua substantia non producat, sed fiat tantum nova aliqua partium dispositio & configuratio: Gassendus docet similiter, quod forma est tantum certa & determinata atomorum dispositio.

Dicendum est contra Cartesiu & Gassendu dari in rebus inanimatis formas substantiales quæ sunt entitates realiter distinctæ à materiâ.

Prob. datur anima rationalis in homine distincta realiter à materiâ; ergo dantur formæ substantiales in compositis inanimatis, quæ sunt entitates distinctæ realiter à materiâ. prob. conseq. ideo datur anima in homine distincta realiter à materiâ, quia materia hominis, quæ est incompleta & imperfecta indiget formâ actuante & informante, per quam perficiatur & compleatur: atqui materia in cæteris compositis inanimatis est incompleta & imperfecta; ergo indiget formâ substantiali, per quam compleatur & perficiatur. prob. min. materia in homine & cæteris compositis inanimatis est ejusdē rationis; ergo si materia in homine sit incôpleta & imperfecta, materia etiam in cæteris compositis inanimatis erit incôpleta & imperfecta, & proinde

indigebit aliquâ formâ substantiali per quam compleatur.

Respondet Rohaltus 1. par. phys. cap. 18. num. 2. & 3. exemplum ex animâ rationali desumptum nullo modo probare existentiam formarum substantialium in rebus inanimatis. *Quamvis enim, inquit, anima rationalis sit forma corporis humani, ut humanum est, nollem tamen concedere quod sit forma illius compositi sensibilis, quod vocatur nostrum corpus, præcisè ut corpus est: non est etiam forma partium corporis, quia a quolibet pars habet suam formam peculiarem, quæ etiam in ipsâ parte manet post separationem animæ rationalis.*

Sed contra dupliciter certè videtur errare in his Rohaltus 1. ubi dicit quod anima rationalis non est forma corporis sensibilis, præcisè ut corpus est: siquidem corpus illud sensibile, præcisè ut corpus, debet habere aliquam formam per quam constituatur & per quam distinguatur substantialiter ab alijs rebus: atqui illa forma non potest esse nisi anima rationalis; ergo anima rationalis est forma corporis, ut corpus est. Prob. min. illud corpus non potest constitui per aliquam partium dispositionem; quia cum illa partium dispositio sit aliquid accidentale, non potest facere distinctionem substantialem; ergo illa forma non potest esse alia quàm anima rationalis.

2. Errat, cum dicit quod quælibet pars habet suam formâ peculiare, quæ remanet post separationem animæ rationalis, quia ut probabitur in tractatu de animâ, omnes partes heterogeneæ informantur formâ totius; ita ut os Petri vivi distinguitur specie substantiali ab osse Petri mortui.

Obj. 1. Aristoteles nusquam locutus est de formis substantialibus; ergò non dantur formæ substantiales distinctæ realiter à materiâ.

Resp. neg. ant. quia Aristoteles plurimis in locis docuit dari formas substantiales: siquidem *Metaphys.* 3. textu 7. dividit substantiam in materiam, formam & illud quod ex utrâque constat, hoc est compositum. Ex idem *Arist.* in toto lib. 1. *Phys.* docet tria esse rerum principia, scilicet materiam, formam & privationem.

Obj. 2. Boëtius Aristotelis discipulus de *Trin.* cap. 2. docet, quòd formæ quæ sunt in materiâ, & corpora efficiunt, sunt imagines, hoc est figuræ; ergò ex mente illius Philosophi formæ consistunt tantùm in partium dispositione & figurâ.

Resp. nego conseq. quia quando Boëtius vocat formas imagines, non intelligit quòd formæ substantiales compositorum Physicorum consistant in solâ partium dispositione & figurâ, sed tantùm intelligit quòd formæ substantiales materiales sunt imagines formarum immaterialium; idque expressè ipse docet, cum ait: *assimilantur enim formis ijs quæ non sunt in materia constitutæ*; Illa autem assimilatio in hoc consistit, quòd sicut formæ substantiales immateriales sunt actus materiæ, & principia operationum perfectissimarum; ita formæ substantiales materiales sunt actus materiæ, & principia omnium operationum quæ producuntur à compositis materialibus.

Obj. 3. si daretur forma substantialis, crearetur & annihilaretur ab agente naturali: at-

qui non potest dici quod creetur & adnihilatur ab agente naturali; ergò non datur forma substantialis. Prob. maj. quoad omnes partes: 1. illud dicitur creari, quod fit ex nihilo & quod producit secundum totum suum esse: atqui forma substantialis fieret ex nihilo, & produceretur secundum totum suum esse; ergò crearetur. 2. Agens naturale potest destruere compositum: atqui destruendo compositum adnihilaret formam; ergò si daretur forma substantialis, adnihilaretur ab agente naturali. Prob. min. illud dicitur adnihilari, quod desinit secundum totum suum esse: atqui ad destructionem compositi forma desineret secundum totum suum esse; ergò adnihilaretur.

Resp. 1. neg. maj. quia virtus infinita requiritur ad creandum vel adnihilandum. Virtus autem infinita non potest convenire agenti naturali; & ita agens naturale non potest creare neque adnihilare.

Resp. 2. ad primam partem argumenti dist. maj. quod fit tam ex nihilo sui quam subjecti creatur, con. quod fit ex nihilo sui tantum, nego: similiter distinguenda est minor propositio: forma substantialis fieret ex nihilo sui, con. fieret ex nihilo subjecti; neg. quia creatio exigit, ut res fiat independentem à subjecto præsupposito. Formæ autem substantiales materiales fiunt dependentem à materiâ, & ita non creantur. Patet autem quòd creatio postulat, ut res fiat ex nihilo subjecti; alioquin quando anima rationalis aliquid cognosceret aut vellet, talis cognitio aut volitio crearetur, quia utraque fie-

ret ex nihilo sui. Similiter posset dici, quòd omnes res crearentur, quia omnes res fiunt ex nihilo sui: siquidem nihil erant antequam essent.

Resp. 3. ad secundam partem argumenti neg. min. ad cujus prob. dist. maj. illud dicitur adnihilari, quod definit secundum totum suum esse, nullo remanente subjecto communi, con. remanente aliquo subjecto communi, neg: quia sicut creatio nullum præsupponit subjectum, ita adnihilatio nullum relinquit subjectum. Quando autem formæ destruuntur, relinquunt subjectum, nempe materiam; & proinde non adnihilantur.

Obj. 4. diversa earundem litterarum dispositio facit ut vocabula inter se differant essentialiter, ut ista duo vocabula Amor, & Roma, quæ coalescunt ex iisdem elementis seu litteris diversimodè dispositis; ergo diversa partium dispositio potest facere, ut composita inter se differant essentialiter.

Resp. dist. ant. diversa litterarum dispositio facit, ut vocabula inter se differant essentialiter accidentaliter, con. substantialiter, neg. quia vocabula sunt tantum composita artificialia, quæ proinde debent tantum differre accidentaliter: unde non requiritur aliquid substantiale, per quod inter se differant. Entia verò naturalia sunt composita substantialia, quæ proinde debent inter se differre substantialiter; & ita requiritur aliquid substantiale quod possit facere talem distinctionem substantialem, quæ non potest procedere à dispositione partium, quæ est aliquid accidentale.

Inst. atqui dispositio partium est aliquid substantiale, & licet esset aliquid accidentale, posset tamen facere distinctionem substantialem: ergo nulla solutio. Probat. subf. quoad utramque partem: 1. Dispositio partium est aliquid substantiale, quia nihil aliud est quam partes dispositæ: sed partes dispositæ sunt aliquid substantiale; ergo ipsa partium dispositio est aliquid substantiale. 2. Licet esset aliquid accidentale, posset tamen facere distinctionem substantialem, quia elementa inter se distinguuntur per aliquid accidentale, nempe per quatuor primas qualitates. Ignis enim differt ab aquâ, quod calor conveniat igni, & frigus aquæ; ergo quod est accidentale potest facere distinctionem substantialem.

Resp. 1. neg. subf. ad cuius prob. quantum ad primam partem dist. min. partes dispositæ sunt aliquid substantiale, secundum entitatem con. secundum formam, nego: quia partes dispositæ important duo 1. important entitatem quæ est aliquid substantiale 2. important formam per quam illa entitas substantialis disponitur: illa autem forma est accidentalis, quia quod alicui secundum entitatem constituto advenit (secundum ipsos etiam Cartesianos) est accidentale: sed ipsa forma nempe dispositio advenit partibus in suo esse constitutis; ergo est accidentalis.

Resp. 2. neg. idem subf. ad cuius probat. quantum ad secundam partem dist. ant. elementa, ut sunt elementa distinguuntur per aliquid accidentale, con. elementa, ut sunt composita naturalia, nego; quia elementa possunt considerari duplici modo, 1. ut sunt
elementa

lemēta, 2. ut sunt cōposita naturalia. Si primo modo cōsiderentur, distinguuntur per quatuor primas qualitates: Si verò secūdo modo cōsiderentur, distinguūtur per formas substantiales.

Obj. 5. Forma ex Arist. educitur ē materiā, sicut statua ex ære, dictiones ex litteris, domus ex lapidibus, totum ex partibus: atqui statua nihil aliud est quā partes tali modo dispositæ, dictiones nihil aliud sunt quā litteræ dispositæ &c. ergo forma nihil aliud est quā partes materiæ sic dispositæ.

Resp. dist. maj. forma educitur ē materiā, sicut statua ex ære, secundum quid, con. simpliciter & absolute, nego: quia in hoc conveniunt statua, dictiones, & formæ substantiales, quòd sicut formæ substantiales materiales ita dependent à materiā, ut non possint esse sine illā, eodem modo dictiones non possunt esse sine litteris; sed in hoc differunt, quòd forma distinguitur à materiā, ut jam probatum est, dictiones vero non distinguuntur à litteris simul sumptis, sicut nec totum distinguitur à partibus simul sumptis.

Obj. ultimo: forma substantialis, si daretur non esset substantialis sed accidentalis; ergo implicat dari formam distinctam realiter à materiā. Prob. ant. Illa forma est accidentalis, quæ recipitur in alio tanquam in subjecto; atqui illa forma substantialis si daretur, deberet recipi in alio tanquā in subjecto: ergo illa forma non esset substantialis, sed accidentalis.

Resp. neg. ant. ad cujus probat. dist. maj. illa forma est accidentalis, quæ recipitur in alio, tanquam in subjecto inhæsionis, con. tanquam in subjecto informationis, neg. si-

militer distinguenda est minor propositio : a-
 qui forma substantialis deberet recipi in alio
 tanquam in subjecto informationis , con-
 tanquam in subjecto inhæſionis , neg. quia in
 hoc conveniunt forma substantialis & forma
 accidentalis , quòd utraq; recipiatur in ali-
 quo subjecto ; sed in hoc differant , quòd for-
 ma substantialis recipiatur in subjecto infor-
 mationis , nempe in materiâ ; forma vero re-
 cipitur in subjecto inhæſionis , nempe in com-
 posito. materia autem dicitur subjectum infor-
 mationis , quia simpliciter informatur per for-
 mam à quâ recipit existentiam ; compositum
 verò dicitur subjectum inhæſionis , quia se-
 cundum quid tantum informatur à forma ac-
 cidentali cui dat existentiam.



ARTICULUS II.

*De existentia formæ substantialis contra
 Nicolauum Cabeum.*

NOtandum est , quòd pater Cabeus pro
 formâ substantiali admittit aliquam sub-
 stantiam volatilem & subtilissimam , quæ uni-
 tur cum aliâ substantiâ crassâ : non vult ta-
 men , quòd substantia illa subtilissima de no-
 vo producat in generatione : siquidem juxta
 illum Philosophum , nihil ita absolute & sim-
 pliciter corrumpitur , ut aliquid secundum
 suam entitatem veram & physicam pereat &
 abeat in nihilum , sive dicatur forma , sive
 materia : nihil etiam ita de novo generatur ,

ut substantia aliqua vera & physica secundum
uam entitatem pōnatur de novo in rerum na-
turā. Vult ergò, quòd in corruptione, illa
substantia spiritiosa separetur à substantiā
crassā, ita tamen ut in eā separatione non pe-
reat aut abeat in nihilum illa substantia, sed
tantùm in aurās, & hæc ubi iterum unitur
cum aliā materiā crassā, fit nova generatio.
Quare, inquit, libro 4. textu 2. quæst. 7. *In
tota naturā corporeā sublunari, non est alia ge-
neratio substantialis nec corruptio, nisi conjun-
ctarum partium separatio, & iterum separata-
rum nova conjunctio; ex quibus apparent, &
verè sunt mutationes propriæ substantiales.*

Dicendum est prædictam sententiam Ca-
bei non esse admittendam.

Prob. 1. illa substantia volatilis non potest
habere rationem formæ; ergo sententia Ca-
bei non est admittenda. Prob. ant. formā de-
bet esse intra totam materiam, & cum illā
penetrari: atqui illa substantia volatilis non
potest esse intra materiam seu substantiam fi-
xam, neque cum illā penetrari, alioquin
duo corpora naturaliter penetrarentur, quod
certè rationi & experientiæ repugnat; ergò
illa substantia volatilis non potest habere ra-
tionem formæ. Major non potest negari à
Cabeo, si enim forma non esset intra totam
materiam, esset aliqua materiæ pars quæ non
esset informata, quod absurdum est. Minor
etiam non potest negari, quia penetratio na-
turaliter non admittitur.

Prob. 2. Sententia Cabei, jam sepultam &
toties damnatam pythagoricorum sententiam
videtur excitare: ergo non est admittenda.

prob. ant. Pythagoricorū sententia erat, quod in corruptione nulla peribat forma substan-
tialis, sed quòd unā anima ex unā materiā
transmigrabat in aliam; & sic eadem forma
successivè in diversis recepta materijs diversa
constituebat composita. Idem ferè videtur
edocere Cabelis, ut patet ex dictis; ergo ejus
sententia pythagoricorum sententiam videtur
excitare: unde quod ipsi nunc jure objicitur,
prævidit ipsemet, postquam enim suam pro-
posuit hypothesim, ait. *Nec tamen me putes
indicare transmigrationem animarum pythago-
ricis attributam*: sed ut planè omnium animis
satisfaceret Doctor, utque se ab omni erro-
ris pythagorici suspitione liberum redderet,
debebat certè demonstrare, in quo ejus discre-
paret hypothesi à Pythagoricorū sententiā.



ARTICULUS III.

*De existentia formæ substantialis contra doctri-
nam Maignani.*

NOtandum est, quòd Pater Maignanus
vult formam esse omnium partium es-
sentialium proportionem & convenientiam;
ita ut forma non sit unica pars compositi, sed
omnes simul sumptæ. *constat*, inquit, i. parte
Philos. naturæ cap. i. prop. 5. num. 31. *talem
adequatam seu completam causam formalem non
posse esse (ut fortè vulgò existimatur) unicam
compositi partem, quæcumque illa sit, & cujus-
cumque dignitatis, sed esse omnium, per modum*

nius ac simul sumptarum partium essentialium proportionem & convenientiam ; ita ut in homine sola anima rationalis non sit forma , sed corpus etiam habeat rationem formæ : idque expresse docet in sua Metaph. cap. II. num. 6. artes ipsæ physicae , inquit , ut anima rationalis & corpus sunt forma hominis , non sanè ut habent velibet suum esse quod communicant homini , nam enim dixi , ex eodem Arist. posse ambas , ut & dici materiam hominis , seu ea ex quibus consistens sit homo , seu pro ut habent talem rationem seu convenientiam & proportionem.

Dicendum est, non admittendam esse sententiam P. Maignani.

Prob. P. Maignanus in suâ sententiâ docet, quod sola anima rationalis non habet rationem formæ , sed vult quod corpus etiam simul cum animâ sit hominis forma , & quod proinde forma substantialis est omnium partium essentialium convenientia & proportio : atqui non admittenda illa sententia , quæ docet corpus habere rationem formæ ; ergo non est admittenda sententia P. Maignani. Prob. minor quod non informat nec actuat, neque recipitur in alio , non potest habere rationem formæ : sed corpus non informat nec actuat, neque recipitur in alio , sed tantum informatur, utatur & recipit ; ergo non potest habere rationem formæ.

Præterea, ex eodem Philosopho , corpus habere rationem formæ , quia anima secundum suum physicum non est totum esse hominis ; sed certè inde malè colligit , quod corpus habeat rationem formæ, inde enim potest tantum inferri, præter animam rationalem ,

esse necessario aliam partem essentialem quæ constituit hominem in alio genere causæ, scilicet materialis.

Objicies cum P. Maignano qui citato Cabeco, istud proponit argumentum contra Peripateticos : non producitur forma substantialis in ligno quod comburitur ; ergo non datur forma substantialis in alijs compositis. Consequentia non potest negari, quia ut Peripatetici probent dari formam substantialem, pro exemplo notissimo adducunt formam substantialem quam de novo produci putant in ligno quod comburitur. prob. ergo ant. combustio ligni fit per introductionem quorundam corpusculorum, & non per productionem formæ substantialis ; ergo non producitur forma substantialis in ligno quod comburitur. Prob. ant. in ligno quod comburitur, requiruntur pori ex Arist. qui lib. 4. meteororum cap. 9: textu 34. ait, *Sunt autem combustibilia, quæcumque habent meatus susceptivos ignis, & humiditatem in his, qui secundum directum meatibus, debiliorem igne*, hoc est corpora, ut sint combustibilia debent habere poros adeò latos ad suscipienda ignis corpuscula : debent etiam habere humiditatem debiliorem igne, sive quæ possit superari ab igne. Debent autem habere illam humiditatem in his meatibus qui secundum directum, hoc est in poris qui debent esse directi & in longum pertracti, ut ignis possit liberè excurrere : atqui in combustibilibus requiri poros, est combustionem fieri per introductionem corpusculorum, non verò per productionem formæ quæ poros non requiret. Sic Aristotelis auctoritatem explicat Ca-

beus. Inde, inquit, ad text. 36. quæst. unica
*Non puto ego dari formam ignis, qualem vulgus
 putat, & mecum non putat dari Aristoteles.* Eo-
 dem modo hanc Aristotelis auctoritatem in-
 terpretatur P. Maignanus, inde ait cap. 15.
 prop. 10. *Credant ergo Peripatetici saltem magi-
 stro suo, si rationibus à me allatis fidem non præ-
 bent; ergò combustio ligni fit per introductio-
 nem corpusculorum, non verò per productio-
 nem formæ.*

Resp. neg. utrumque anr. & ad probatio-
 nem neg. min. cum eruditissimo nostro, R. P.
 Vincentio qui in suâ discussione Peripateticâ
 contra Cartesium 4. parte princ. 2. parte sect.
 28. num. 443. *Pori, inquit, exiguntur, non
 ut ignis illos subintret tanquam corpus aliquod,
 cum experientia doceat, ipsum in illis generari
 absque ullâ corporis intromissione, & per solam
 intensiorem caloris: sed ut in istis poris suscipia-
 tur humiditas aërea, hoc est humor aliquis natu-
 ræ aëreæ totum ipsum corpus perfundens, illud.
 que hoc modo idoneum igni concipiendø efficiens.*
 Hanc responsionem haüsit meritissimus Do-
 ctor ex Doctore Angelico qui lect. 13. in il-
 lum Arist. locū dicit, quòd *ustibilia sunt quæ-
 cumque habent poros susceptivos ignis, & humi-
 ditatem superabilem ab igne: talia autem sunt quæ
 habent poros plenos humiditate aëreâ bene passi-
 bili: Dico aërea, quia aër est nutrimentum ig-
 nis & propter hoc Ebenus qui inter omnia lig-
 na est minus aëreus, & magis terrestris, quod
 ostendit pondus & nigredo ejus, non est ustibilis.*
*Debet etiam talis humiditas esse passibilis, quia
 habentia humiditatem grossam & fortem, non
 sunt benè ustibilia, sicut ligna multum viridia.*



ARTICULUS IV.

*De existentia formæ substantialis contra
nonnullos recentiores.*

NOtandum est, recentiores nonnullos asserere formam esse congeriem quarundam qualitatum, cujusmodi sunt fluiditas & firmitas, pondus aut levitas, & aliæ hujus generis qualitates. Forma, v. g. auri, est, aiunt, quod sit flavum, aut subrubrum, quod reliquis metallis sit gravius, quod sit omnium maximè ductile, &c. his ita præfatis,

Dicendum est contra illos recentiores Philophos, formam substantialem non esse congeriem plurimorum accidentium.

Prob. 1. debet esse discrimen aliquod inter generationem & alterationem: atqui nullum esset discrimen inter generationem & alterationem, si forma substantialis esset complexio accidentium, quia utrumque terminaretur ad accidentia; ergo, &c.

Prob. 2. ubicumque remanet complexio accidentium, ibi non remanet forma substantialis; ergo forma substantialis non est complexio accidentium. Prob. ant. in venerabili Eucharistiæ sacramento remanet complexio accidentium panis, & tamen non remanet forma substantialis panis; ergo ubi remanet complexio accidentium, non remanet forma substantialis.

Obj. illud est forma substantialis, quo posito ponitur compositum, & quo destructo destruitur: atqui posita plurimorum accidentium congerie ponitur compositum, & ipsa destructa destruitur; ergo forma substantialis est congeries plurimorum accidentium. Prob. min. plurimis authoritatibus Sanctorum Patrum.

1. Sanctus Aug. lib. de immortal. animæ cap. 8. *Si cera, inquit, ex albo nigrum colorem ducat, aliunde non minus cera est: & si ex quadrata figuram rotundam sumat & ex molli dure scat.* Et sic multas persequitur mutationes, quæ ceræ naturam non tollunt, & si, inquit, eorum quæ in subiecto sunt, hoc est accidentium, tanta commutatio fieret, ut illud quod subesse dicebatur, dici jam omnino non posset, veluti cum calore ignis cera in auras discedit & tantam mutationem patitur, ut intelligatur mutatum esse subiectum, quod cera erat, & cera jam non est. 2. S. Basilii in Hexamer. hom. 1.

Quod si terræ, inquit, singulas quas obtinet qualitates, nigredinem, gravitatem ratiocinando coneris auferre, ipsa in nihilum abierit.

3. Sancti Bas. frater Greg. Niss. lib. de Opificio hominis. *Omnia, inquit, materia qualitatibus quibusdam prædita est, quibus si re ipsa privetur, non jam amplius ratione comprehendere poterit; ergo destructa plurimorum accidentium congerie destruitur compositum.*

Resp. dist. maj. illud est forma substantialis, quo posito ponitur compositum & quo destructo destruitur, immediate & directe conc. mediate & indirecte neg. sim. dist. est min. posita quorundam accidentium congerie ponitur compositum & destructa destruitur

mediate & indirecte, conc. immediate & directe neg. quia destructio compositi non sequitur directe ex destructione quorundam accidentium, sed ex destructione formæ substantialis quæ est entitas distincta à congerie accidentium: cera, v. g. non destruitur precise ex eo quod destruantur aliqua accidentia, sed quia destructis accidentibus destruitur forma substantialis, & destructâ formâ substantiali destruitur cera; ita ut ex destructione accidentium sequitur destructio formæ substantialis, & ex destructione formæ substantialis sequitur destructio ceræ.

Resp. 2. neg. min. quia sublati divinitus omnibus accidentibus, non destruitur tamen compositum; quia semper remanent forma & materia unitæ. Illæ autem autoritates debent tantum intelligi de accidentibus naturaliter destructis.



ARTICULUS V.

De definitione formæ substantialis quæ admittitur à peripateticis.

Dicendum est, formam substantialem quæ admittitur à peripateticis, definiri substantiam simplicem, incompletam, componentem unum per se cum materiâ, cuius est actus & ultima perfectio.

Prob. & explicatur definitio. 1. Dicitur

substantia simplex, ut distinguatur à composito. 2. Dicitur substantia incompleta, quia est pars compositi, & per hoc distinguitur à formis angelorum quæ sunt substantiæ completæ. 3. Dicitur componere unum per se unum materiâ, ut distinguatur à formis accidentalibus quæ faciunt tantum unum per acciens. 4. Dicitur actus materiæ, quia facit illam esse actu. Ultimò denique dicitur perfectio materiæ, quia illam perficit & completet illius potentialitatem.



ARTICULUS VI.

*Utrum formæ substantiales educantur
de potentiâ materiæ.*

NOtandum est. 1. quòd Educi est correlativum ad contineri, unde eodem modo forma dicitur educi; quo continebatur: duplici autem modo dicitur aliquid contineri in alio, scilicet actualiter & in potentiâ. Illud actualiter continetur, quod in suâ entitate præhabetur tanquam de facto existens in aliquo, sic pecunia continetur in arcâ. Illud autem dicitur contineri in potentiâ, quod cum non sit actualiter in alio, potest tamen fieri ex ipso, sic omnes figuræ artificiales continentur in cera. Constat autem quòd formæ substantiales materiales non continentur actu in materiâ, sed tantum in potentiâ: unde educi de potentia materiæ, est quasi emergere de po-

tentialitate materiæ, & fieri, actu in materiâ in quâ erat in potentiâ; Vel educi de potentiâ materiæ, est fieri cum dependentiâ à materiâ; ita ut dependeat ab illa in fieri, in esse & conservari. Idcirco ad veram educationem duo requiruntur. 1. Ut forma quæ educitur, dependeat à materiâ in fieri, in esse & conservari; ita ut ad ipsius productionem, & conservationem materia passivè & subjectivè concurrat. 2. Ut vi illius actionis quâ forma producit, materia transmutetur.

Notandum est 2. quòd ut materia transmutetur, duo requiruntur. 1. Ut materia fuerit sub privatione formæ. 2. Ut forma uniatur materiæ per eandem actionem per quam producit.

Dicendum est. 1. Formas substantiales materiales educi de potentiâ materiæ.

Prob. 1. illud educitur de potentiâ materiæ, quod dependet à materiâ in fieri, in esse & conservari; atqui formæ substantiales dependent à materiâ in fieri, in esse & conservari; ergo educuntur de potentiâ materiæ.

Prob. 2. formæ materiales transmutant materiam, quia uniuntur materiæ per eandem actionem per quam perducuntur: ergo educuntur de potentiâ materiæ.

Obj. formæ substantiales creantur; ergo non educuntur de potentiâ materiæ. Prob. ant. formæ substantiales materiales dicuntur creaturæ; ergo creantur.

Resp. neg. ant. ad cujus. Prob. neg. ult. conseq. quia ut aliquid dicatur creatura, non est necesse ut immediate creetur, (alioquin quæ essent producta per generationem, non essent

essent creaturæ sed sufficit quòd non possit produci nisi ex aliquo præsupposito subjecto creato : ita formæ substantiales dicuntur creaturæ , non quòd immediatè creantur , sed quòd recipiuntur in subjecto creato , scilicèt materiâ.



ARTICULUS VII.

Utrum anima rationalis educatur de potentia materiæ.

Dicendum est , animam rationalem non educi de potentiâ materiæ.

Prob. ut aliquid educatur de potentiâ materiæ , debet contineri in materiâ , tanquàm in causâ materiali concurrente ad illius productionem , & ex vi productionis debet transmutari materia : atqui illa duo non reperiuntur in productione animæ rationalis ; ergò anima rationalis non educitur de potentiâ materiæ. Prob. min. quoad omnes partes.

1. Illud non continetur in materiâ tanquam in causâ materiali concurrente ad productionem , quod non dependet à materiâ in esse : atqui anima rationalis non dependet à materiâ in esse , alioquin corrupto composito corrumperetur anima , quod est hæreticum ; ergò anima rationalis non continetur in materiâ tanquam in causâ concurrente ad illius productionem. 2. Materia non transmutatur ex vi actionis per quam producitur ani-

ma, si anima rationalis non uniatur materiæ per eandem actionem per quam producitur: atqui anima rationalis non unitur materiæ per eandem actionem per quam producitur; producitur enim per creationem procedentem à Deo, & unitur materiæ per generationem procedentem ab agente naturali; ergo materia non transmutatur ex vi actionis per quam producitur anima rationalis.

Obj. I. anima rationalis continetur in potentiâ materiæ; ergo anima rationalis educitur de potentiâ materiæ. Prob. ant. si anima rationalis non contineretur in potentiâ naturali, sequeretur quòd generatio hominis non esset naturalis: atqui non potest dici, quòd generatio hominis non sit naturalis; ergo anima rationalis continetur in potentiâ naturali materiæ. Prob. sequela maj. illa generatio non est naturalis, cui non responderet potentia passiva naturalis, nec potentia activa, nec effectus naturalis: atqui generationi hominis non corresponderet potentia passiva naturalis; quia illa denegatur materiæ, neque potentia activa; quia hæc est agens increatum, neque effectus naturalis; cum sit effectus super naturalis, utpotè excedens vires totius naturæ creatæ; ergo illa generatio non esset naturalis.

Resp. neg. ant. ad cujus prob. neg. maj. & min. quia ut generatio dicatur naturalis sufficit ut forma uniatur ab agente naturali. Hoc autem contingit in generatione hominis; agēs enim naturale, nempè homo unit animam cum materia mediantibus dispositionibus quas introducit in materiâ: unde dupliciter

peccat argumentum. 1. Quòd illa duo confundit, materiam continere in potentiâ naturali animam rationalem, & materiam habere potentiam naturalem ad animam rationalem, quæ duo inter se differunt. Verum enim est quod materia non continet in potentiâ naturali animam rationalem, quia non habet vim causandi illam, & tamen materia habet potentiam naturalem ad animam rationalem recipiendam. 2. Peccat argumentum in eo quòd generationem hominis confundat cum productione animæ rationalis; sunt tamen duæ actiones diversæ: una est creatio terminata ad animam à solo Deo procedens; altera est unio ejusdem animæ cum materiâ dispositâ virtute agentis naturalis, & hæc est generatio quæ est naturalis: tum ex parte principii activi, quod est ipsum agens naturale producens in materiâ dispositiones; tum ex parte principii passivi quod est ipsa naturalis potentia quam habet materia ad recipiendam animam rationalem; tum ex parte effectus qui est ipsum compositum humanum; tum denique ex parte ipsius animæ in se spectatæ, quæ est actus connaturalis respectu potentiæ passivæ materiæ.

Obj. 2. Anima rationalis dependet à materiâ inesse; ergo educitur de potentiâ materiæ. prob. ant. quòd dependet à materiâ in operari, dependet à materiâ in esse, quia operari sequitur ad esse: atqui anima rationalis, saltem in quantum est sensitiva & vegetativa dependet à materiâ in operari; ergo dependet à materiâ in esse.

Resp. neg. antec. ad cujus prob. dist. maj.

quod dependet à materiâ in operari secundum majorem & principalem operationem, dependet à materiâ in esse, con. quod dependet à materiâ in operari secundum operationem minus principalem, dependet à materiâ in esse, neg. similiter distinguenda est min. anima rationalis in quantum est vegetativa & sensitiva, dependet à materiâ in operari secundum operationem minus principalem, con. secundum operationem magis principalem, neg. quia ut anima rationalis dicatur dependere à materiâ inesse, non tantum sufficit ut aliqua operatio dependeat à materiâ, sed requiritur ut principalis animæ operatio à materiâ dependeat.

Obj. 3. Educi, est fieri ex præsupposito subjecto: atqui anima rationalis fit ex præsupposito subjecto; nam priusquam anima rationalis uniatur materiæ, præsupponit illam existentem sub alterâ formâ; ergo anima rationalis educitur de potentiâ materiæ.

Resp. dist. maj. educi, est fieri ex præsupposito subjecto, & dependenter ab illo, con. & independenter ab illo, neg. similiter distinguenda est min. anima rationalis fit ex præsupposito subjecto, & independenter ab illo, con. & dependenter ab illo, neg. quia licet anima rationalis præsupponat materiam, non tamen ab illâ dependet: siquidem non recipit esse à materiâ; sed è contra tribuit esse materiæ.

Obj. 4. Agens naturale tanquam causa instrumentalis educit formas accidentales supernaturales de potentiâ subjecti; ergo à pari agens naturale tanquam causa instrumentalis potest educere animam rationalem de potentiâ materiæ.

Resp. neg. conseq. & parit. ratio disparitatis est ; quia cum forma supernaturalis sit accidens dependenter à subjecto , potest fieri dependenter ab illo , & ita verè educitur de potentia subjecti : cum autem anima rationalis sit forma per se subsistens , non potest fieri dependenter à materiâ , nec proinde educi.

Obj. ultimò: anima rationalis non produci-
tur ut existens ut quod ; ergo non creatur.
prob. antec. Illa forma quæ producitur unita
materiæ & exercens rationem formæ , non est
existens ut quod : atqui anima rationalis pro-
ducitur unita materiæ & exercet rationem for-
mæ ; ergo non est existens ut quod.

Resp. neg. antec. ad cujus probationem dist.
maj. forma quæ producitur unita materiæ , &
quæ unitur per eandem actionem per quam
producitur , non creatur , con. quæ produci-
tur unita , & non unitur per eandem actionem
per quam producitur , non creatur , neg. quia
in hoc conveniunt forma substantialis mate-
rialis & anima rationalis , quòd sicut forma
substantialis materialis producitur ut unita
materiæ , ita & anima rationalis ; sed in hoc
differunt , quòd non uniuntur materiæ eodem
modo : forma enim substantialis materialis
unitur per eandem actionem per quam produ-
citur , & ita reperitur veraeductio cum vi
actionis productivæ transmutatur materia ,
& anima rationalis non unitur per eandem ac-
tionem per quam producitur: producitur enim
per actionem Dei creativam ; & unitur per
unionem quæ est actio procedens à gene-
rante.



ARTICULUS VIII.

*Utrum formæ Cælorum & Elementorum fuerint
eductæ de potentiâ materiæ.*

Dicendum est, formas Cælorum & Elementorum in primâ sui productione non fuisse eductas de potentiâ materiæ.

Prob. ut forma aliqua dicatur educi de potentiâ materiæ, requiritur ut per illius formæ productionem materia transmutetur: atqui formæ Cælorum & Elementorum non fuerunt productæ cum materiæ transmutatione in primâ sui productione; ergo non fuerunt eductæ de potentiâ materiæ. Prob. min. materia Cælorum & Elementorum nusquam fuit sub privatione formæ; quia non potuit produci sine forma; ergo formæ Cælorum & Elementorum non fuerunt productæ cum transmutatione materiæ; & proinde licet formæ Cælorum & Elementorum dependeant à materiâ in fieri, in esse & in conservari, non tamen fuerunt eductæ de potentia materiæ: quia per illarum productionem non fuit transmutata materia.

Obj. 1. Formæ elementorum fuerunt productæ per actionem distinctam ab illâ per quam fuit producta materia: ergo formæ elementorum eductæ fuerunt de potentiâ materiæ. Prob. ant. Actio quâ materia fuit producta, huc usque perseverat, cum adhuc per can-

dem actionem conservetur : conservatio enim est continuata productio, actio verò per quam productæ fuerunt formæ, non perseverat ; ergò materia & formæ elementorum fuerunt productæ per diversas actiones.

Resp. neg. ant. ad ejus prob. disting. aliud ant. actio quâ producta fuit materia huc usque perseverat, perseverante composito, con. destructo composito, neg. quia sicuti materia non potest produci nisi per productionem compositi : ita non potest conservari nisi ad conservationem compositi : unde fit ut cessante uno composito, cessat actio conservativa, & sicut in eodem instanti quo definit conservari per actionem conservativam compositi præexistentis, ita incipit conservari per actionem conservativam compositi subsequentis, quæ actio est secundaria productio.

Inst. atqui materia non conservatur per existentiam compositi : ergo nulla solutio. Prob. subf. Conservari, est persistere in esse : atqui materia non persistit in esse, sed de novo incipit esse, quia novam recipit existentiam à novo composito: ergò materia non conservatur per existentiam compositi.

Resp. neg. subf. ad ejus proba. disting. maj. Conservari est persistere in esse, vel essentia vel existentia, con. in esse existentia tantum neg. quia ut res dicatur conservari, sufficit ut entitas essentia persistat sub existentis diversorum compositorum, quod materie primæ convenit specialiter, eo quòd sit subiectum commune formarum.

Obj. 2. Ideo formæ Cælorum non fuerunteductæ de potentia materiæ, quia materia

non præcessit illas formas prioritate aliquâ temporis ; atqui non requiritur illa prioritas temporis ; ergò formæ Cœlorum fuerunt eductæ de potentiâ materiæ. Prob. min. prioritas naturæ sufficit ; ergò non requiritur prioritas temporis. Prob. ant. Prioritas naturæ sufficit in causâ efficiente, ut causa efficienter producat suum effectum ; ergò eadem prioritas sufficit in causâ materiali, ut materialiter producat suum effectum.

Resp. neg. min. & ant. & ad próba. disting. ultimam conseq. prioritas naturæ sufficit ut causa materialis sit præcisè causa sui effectus, con. ut effectus dicatur educi neg. quia ad veram rationem causæ sufficit ut effectus dependeat à causâ ; talis autem dependentia salvatur per prioritatem naturæ quæ in hoc consistit, quòd illud quod est posterius dicatur dependere ab illo quod est prius. Ita materia formarum cœlestium potest dici causa materialis illarum formarum, quia fuit prior illis saltem prioritate naturæ ; & tamen illæ formæ non eductæ fuerunt de potentiâ illius materiæ, quia ad veram educationem non tantùm requiritur dependentia, sed etiam vera & realis mutatio in materiâ : talis autem vera & realis mutatio non potest fieri, nisi materia fuerit sub privatione formæ per aliquod instans reale, & ita ad veram educationem non sufficit prioritas naturæ, sed requiritur prioritas temporis.

Inst. atqui ad veram educationem sufficit illa prioritas naturæ & illa dependentia ; ergò nulla solutio. Prob. subf. per illam prioritatem educio constituitur vera educio ; ergò sufficit illa prioritas naturæ. Prob. ant. per illud

eductio constituitur eductio, per quod eductio differt à creatione, quia nomine eductionis intelligitur productio distincta à creatione: atqui eductio differt à creatione per talem dependentiam; eductio enim præsupponit materiam, creatio verò non præsupponit; ergò per illam prioritatem & dependentiam eductio constituitur vera eductio.

Rèsp. neg. ant. & ad proba. disting. min. Eductio differt à creatione per dependentiam connotantem prioritatem temporis, con. prioritatem naturæ tantum neg. quia cum in eductione non tantum requiratur dependentia, sed etiam vera & realis immutatio materiæ; & ut talis realis immutatio fiat, requiritur ut materia per aliquod instans reale fuerit sub privatione, ita non sufficit prioritas naturæ, sed requiritur necessariò prioritas temporis, & proinde debet esse dependentia connotans talem prioritatem temporis.



ARTICULUS IX.

CONTRA CARTESIUM ET Reliquos.

Utrum dentur accidentia quæ sint entitates reales absolutæ, & distinctæ realiter à subjecto.

NOtandum est, Cartesium cum suis non solum negare formas substantiales, sed etiam accidentales, quas Peripatetici vocant

adæquata sit divisio entis in substantiam & accidens. ex Aristotele.

Obj. 1. debent tantum dari illa de quibus formari potest clara & distincta idea : atqui de accidentibus nulla potest formari idea clara & distincta ; ergo non debent admitti accidentia.

Resp. 1. neg. maj. quia, ut ait author eruditissimus Philosophiæ veteris & novæ, in Regiâ Burgundiæ pertractatæ, tractatu primo disput. 3. quæst. 3. concl. 2. *Nos verum omnium quas existere certum est, claras distinctasque ideas non habemus, neque enim quæ in nobis ipsis aguntur distinctè percipimus. Idem docet Duhamel Philosophus elegantissimus lib. 1. de corporum affectionibus cap. 1. Quæro, inquit, an rerum omnium quas non modo esse possibles sed etiam actu existere compertum est, distinctas & dilucidas notiones habeamus, multa esse novimus quorum nulla est notio explicata, aut definitio accurata. Noli foras exire, te ipsum, tuum animum contemplare. Nihil tibi notius quam te animo cogitare, Cedo an claram animi tui, aut cogitationis habeas imaginem.*

Resp. 2. transeat major & neg. min. quia accidentia clarè à nobis percipiuntur.

Obj. 2. illa accidentia essent entia absoluta, & non essent : essent, ut supponitur, & non essent ; quia illa entia non sunt absoluta sed relativa, quæ dicuntur ordinem ad aliud : atqui illa accidentia dicerent ordinem ad aliud, nempe ad subjectum à quo dependerent in existendo ; ergo non essent entia absoluta, sed relativa.

Resp. dist. istam propositionem : illa entia

non sunt absoluta sed relativa, quæ dicunt ordinem ad aliud tanquam ad terminum, con-
tanquã ad subiectum neg. quia dantur accidẽ-
tia aliqua absoluta & aliqua relativa. Acci-
dentia absoluta dicunt quidem ordinem ad
subiectum in quo postulant inhærere; sed ille
respectus & dependentia non impedit quin
illa entia sint semper absoluta. Accidentia
verò relativa non tantum dependent à sub-
iecto cui inhærent, sed etiam à termino
quem respiciunt; quia illo sublato pereunt
illà accidentia & per illum respectum ad ter-
minum constituuntur entia relativa.

Obj. 3. & ultimò: illa accidentia essent sub-
stantia; ergo est contradictio. Prob. ant. quid-
quid est reale est substantia: sed illa acci-
dentia essent aliquid reale; ergo essent sub-
stantia. Prob. maj. quidquid est reale, potest
naturaliter vel saltem supernaturaliter sine
alio existere: at quidquid potest sine alio
etiam supernaturaliter existere, est substantia;
ergo quidquid est reale est substantia.

Resp. neg. ant. & maj. & ad probationem
dist. ultimam min. quidquid potest sine alio
existere tam actualiter quam aptitudinaliter
est substantia, conc. quidquid potest sine alio
existere actualiter, & tamen dicit aptitudinem
ad subiectum est substantia, neg. quia illud
discrimen intercedit inter substantiam & ac-
cidens, quòd substantia non dependet à sub-
iecto neque actualiter neque aptitudinali-
ter; accidens vero dependet semper aptitudi-
naliter, hoc est dicit semper ordinem ad sub-
iectum: ita ut inhærentia aptitudinalis sit ra-
tio formalis constitutiva accidentis.

ARTICULUS



ARTICULUS X.

Utrum gratia & habitus supernaturales sint accidentia distincta realiter à subjectis.

Dicendum est, gratiam & habitus supernaturales esse accidentia distincta realiter ab animâ.

Prob. de fide est juxta Concilium Tridentinum sessione 6. Canon. II. gratiam justificantem esse aliquid inhærens in anima justî : atqui gratiam justificantem esse aliquid inhærens in anima justî , est esse formam accidentalem ; ergò gratia justificans est forma accidentalis distincta realiter ab animâ. Similiter gratia actualis non est ipsa anima ut mota ; ergò est aliquid distinctum ab animâ. Probatur ant. si gratia nihil aliud esset quàm ipsa anima ut mota , posset etiam dici quod ipsa anima rationalis nihil aliud esset quàm ipsum corpus ut motum : atqui illud non potest dici ; ergò nec aliud. Probatur sequela maj. sicut se habet anima ad corpus , ita se habet gratia ad animam, nam sicut anima est vita corporis, ita gratia est vita animæ, ut docet D. August. ergò cum anima non sit corpus ut motum, gratia non potest esse anima ut mota. Præterea omnes habitus supernaturales , ut fides, spes & charitas sunt entia in alio ; ergo sunt accidentia realia positiva distincta realiter à subjecto in quò sunt.

Obj. 1. gratia sanctificans consistit in solâ Dei amicitia; ergò non est forma accidentalis distincta ab animâ.

Resp. neg. ant. quod est hæreticum: hæc enim propositio continet sententiam Lutheri & Calvinii & quorundam aliorum hæreticorum, quæ damnata fuit à Concilio Tridentino. *Si quis dixerit, Inquit, sess. 6. Can. 11. hominem justificari, vel solâ imputatione justitiæ Christi, vel solâ peccatorum remissione, seclusâ gratia & charitate quæ in cordibus eorum per Spiritum sanctum diffundatur atque in illis inherere; aut eam gratiam quâ justificamur, esse tantum favorem Dei, anathema sit.* Quæ verba exponens Catechismus Romanus jussu Pij quinti editus tractatu de Sacramento Baptismi, sic ait. *Est autem gratia, quemadmodum Tridentina Synodus ab omnibus credendum sub pœna anathematis decrevit, divina qualitas in anima inherens & velut splendor quidam & lux quæ animarum nostrarum maculas omnes dele ipsasque animas pulchriores & splendidiore reddit.*

Obj. 2. esse in gratiâ, est esse dilectum à Deo: estd esse dilectum à Deo nō importat aliquid intrinsecum distinctum realiter ab animâ; ergo esse in gratiâ non importat aliquid distinctum ab animâ. Prob. min. si esse dilectum à Deo importaret aliquid intrinsecum, sequeretur quòd quidquid includeret specialem Dei dilectionem, importaret aliquid intrinsecum in animâ: sed quidquid includit specialem Dei dilectionem non importat aliquid intrinsecum in animâ; ergò esse dilectum à Deo non importat aliquid intrinse-

cum. Probi. min. prædestinatio includit specialem Dei dilectionem : sed prædestinatio non includit & importat aliquid intrinsecum in animâ : potest enim fieri quòd prædestinatus non habet aliquando gratiam , cum sit in peccato mortali ; ergò quod includit specialem Dei dilectionem , non importat aliquid intrinsecum in animâ.

Resp. neg. duas minores propositiones ad quarum probationem dist. maj. prædestinatio includit specialem Dei dilectionem pro aliquo tempore , conc. pro omni tempore , neg. quia Deus aliquando secundum præsentem justitiam odio habet prædestinatum existentem in peccato mortali vel in infidelitate.

Obj. 3. Concilium loquens de gratiâ , non illam vocat formam accidentalem ; ergò non potest probari ex ipsius gratiæ existentia , dari formas accidentales.

Resp. dist. ant. non vocat formam accidentalem materialiter & expressè & in terminis , con. æquivalenter , neg. & ratio est cum sacrosanctum Concilium gratiam vocat aliquid inhærens in animâ , idem est ac si illam vocaret formam accidentalem ; & proinde potest dici quòd quodammodo de fide est gratiam esse formam accidentalem ; quia sicuti de fide est essentiam panis & vini non manere cum corpore Christi in sacro Eucharistiæ Sacramento , licet Concilia nusquam usa fuerint illo nomine essentia , quia in hoc casu essentia panis & vini idem est ac substantia panis & vini. Similiter licet Concilia expressè non dixerint gratiam esse formam accidentalem.

lem, tamen dixerunt gratiam esse aliquid inherens in animâ; & proinde docuerunt etiam gratiam esse formam accidentalem.

Obj. 4. & ultimò: habitus supernaturales sunt tantum modi spirituales in animâ existentes; ergò non sunt accidentalia realia distincta ab animâ.

Resp. neg. ant. & ratio est quia si illi habitus supernaturales essent tantum modi, vel illi modi essent aliquid reale vel non; non potest dici quòd non sint aliquid reale, alioquin Deus infundens illos habitus supernaturales, infunderet aliquid non reale: non potest etiam dici quòd sint aliquid reale, quia quidquid est reale, juxta ipsa Cartesii principia, potest existere sine subjecto: atqui illi modi non possunt existere sine subjecto modificato, quia illi modi nihil aliud sunt quàm subjectum modificatum; ergò non sunt aliquid reale.

His rationibus convicti aliqui Cartesiani fatentur dari formas accidentales supernaturales; sed dicunt se non posse concipere, quòd dentur formæ accidentales naturales quæ possint produci ab agente naturali; quia est impossibile quòd accidentia possint creari ab agente naturali, sed falsò supponunt illi accidentia creari, cum omnia accidentia tam naturalia quàm supernaturalia de potentia subjecti educantur, ut probabitur. Sufficit autem quòd quidam Cartesiani fateantur gratiam sanctificantem esse aliquam entitatem distinctam ab animâ, ut possimus concludere falsum esse quod dicit illorum Patriarcha, nihil scilicet esse in mundo præter substantiam.



ARTICULUS XI.

Utrum Species Eucharisticae sint accidentia realia, vel solum aliqua entitas modalis juxta opinionem Cartesii.

NOtandum est 1. quòd omnes recentiores Philosophi negantes formas accidentales, communi consensu asserunt species Eucharisticas non esse accidentia realia. Quid autem sint species Eucharisticae, non est una omnium sententia; imò in diversas distracti partes, diversimodè illas explicant, hîc tantum rejicietur sententia Cartesii.

Notandum est 2. quòd Cartesius per speciem panis intelligit illam superficiem, quæ media est inter singulas ejus particulas & corpora ipsas ambientia. Notandum, inquit, in responsionibus ad quartas objectiones, per superficiem panis & vini, alteriusve corporis, non hic intelligi partem ullam substantiæ, nec quidem quantitatis ejusdem corporis, nec etiam partem corporum circumjacentium, sed tantummodo terminum illum qui medius esse concipitur inter singulas ejus particulas & corpora ipsas ambientia, quique planè nullam habet entitatem nisi modalem.

Dicendum est 1. sententiam Cartesii negantis species Eucharisticas esse accidentia realia, esse rejiciendam.

Prob. hæc Cartesii sententia est eadem ac

sententia Joannis Vviclefi: ergo est rejicienda. Prob. ant. in hoc sita erat Vviclefi sententia , quòd assereret accidentia panis non manere sine subjecto in Eucharistiæ sacramento , quæ sententia damnata fuit à Concilio generali Constantiensi : atqui sententia Cartesii docet quòd accidentia non possunt manere sine subjecto , quia essent substantia : docet epim Cartesius quòd quidquid est reale , potest separatum ab omni alio subjecto existere : quidquid autem potest ita separatim existere , est substantia & non accidens ; ergò sententia Cartesij est eadem ac sententia Vviclefi. Præterea , ex Concilio Tridentino , in Eucharistiæ Sacramento est vera transubstantiatio sive cōversio unius substantiæ in aliam: de ratione autē transubstantiationis est , ut remaneat aliquid ex eo quòd convertitur ; debet ergo remanere aliquid quòd antea erat in pane : non potest remanere aliquid substantiæ : ergò debet remanere aliquid accidentale , & proinde species Eucharisticæ sunt accidentia realia.

Dicendum est 2. Contra Cartesium, species Eucharisticas non esse superficiem aliquam quæ habeat entitatem modalem.

Prob. Illa entitas modalis velet separata à subjecto vel non ; si esset separata à subjecto , esset substantia , quia , ex ipso Cartesio , quidquid existit sine subjecto vel naturaliter vel divinitus , est substantia ; si verò illa entitas modalis esset in subjecto , remaneret panis in Eucharistiâ , quod est Lutheranum.

Obj. 1. Concilium non damnavit Hæreticū Vviclefum , ex eo quòd dixerit accidentia non

manere sine subjecto, sed quia docuit, ut Lutherus, substantiam panis & vini manere simul cum corpore Christi in Eucharistiâ; idèd-que dicebat accidentia non existere sine subjecto, quia existebant in pane & vino; ergo sententia Cartesii non est eadem cum sententiâ Viclefi.

Resp. neg. ant. Inde enim sequeretur, quòd secunda propositio Viclefi asserentis accidentia non superesse in Sacro. Sanctâ Eucharistiâ sine subjecto, esset eadem cum primâ illius propositione quâ somniat panem remanere in Sacramento altaris: id autem non potest esse. 1. Quia in primâ propositione Viclefi, ut jam diximus, docet substantiam panis remanere in Sacramento Altaris. In secundâ verò propositione dicit accidentia non manere in Sacramento Eucharistiæ sine subjecto: unde ista secunda propositio est probatio primæ; ita ut eò quòd accidentia panis nequeant sine subjecto existere juxta mentem Viclefi, infertur panem manere in hoc Sacramento. 2. Si secunda propositio esset eadem cum primâ, sequeretur quòd tantum essent 44. propositiones Viclefi damnatæ à Concilio: atqui ab eodem Concilio numerantur 45. Propositiones Viclefi; ergò secunda propositio non est eadem cum primâ.

Obj. 2. Concilium non determinavit accidentia realia existere sine subjecto in Sacramento Eucharistiæ, quia illa quæstio nullius est momenti, & purè Philosophica, & proinde non spectat ad Ecclesiam de illâ re aliquid definire: ergo sententia Cartesii non fuit damnata à Concilio.

Resp. neg. ant. Quia illa quæstio non est purè Philosophica, sed maximè pertinet ad Theologiam, utpotè spectans ad Eucharistiæ mysterium: Ecclesiæ igitur est quid in eâ verum sit decernere, & quid falsum determinare: & ita Concilium damnavit Cartesii sententiã, ubi propositionem Viclefi damnavit.

Obj. 3. Concilium Tridentinum per species Eucharisticas non intelligit accidentia: numquam enim usurpavit hoc nomen accidentium; ergò species Eucharisticæ non sunt accidentia realia.

Resp. neg. ant. Quia licet Concilium Tridentinum nunquam usurpaverit nomen accidentium, non inde inferendum est quòd illæ species Eucharisticæ non sint accidentia; alia enim Concilia tum generalia, tum particularia adhibuerunt hoc nomen aliquando: Siquidem Concilium Constantiense damnat illam propositionem Viclefi, quæ constabat his terminis: *accidentia panis non manent sine subiecto in eodem Sacramento.* Similiter & Concilium Coloniense Titulo de Administratione Sacramentorum cap. 15. disertè ait: *Quid enim panis & vini species aliud sunt post consecrationem, quàm species Sacramentales & accidentia sine subiecto.*



ARTICULUS XII.

Utrum Species Eucharisticæ sint accidentia realia vel substantiæ, juxta nonnullos Cartesianos.

Notandum est, quòd nonnulli Cartesiani intelligunt per species Eucharisticas, substantiolas seu particulas aëris, furfuris, pulveris, & alterius cujuscumque materiæ quæ anteq̃ erant inclusæ intra poros panis & vini.

Dicendum est species Eucharisticas non esse substantiolas seu particulas aëris, furfuris, &c. quæ antea erant inclusæ intra poros panis & vini.

Prob. Si per species Eucharisticas intelligerentur substantiolæ sive corpuscula, ista propositio, *Hoc est Corpus meum*, non esset vera: atqui Hæreticum est dicere quòd illa propositio non est vera; ergo illativè saltem Hæreticum est dicere quòd species Eucharisticæ sint substantiolæ. Prob. maj. Ut illa propositio, quæ est forma consecrationis sit vera, debet identificare cum Corpore Christi, sive convertere in Corpus Christi totam substantiam quæ importatur per illud pronomen *Hoc*: atqui si species Eucharisticæ essent substantiolæ, illa propositio, *Hoc est Corpus meum*, non converteret in Corpus Christi totam substantiam quæ importatur per illud pronomen *Hoc*; ergo non esset vera. Prob. min. Illæ substan-

tiolæ importarentur per illud pronomen *Hoc*, & tamen non convertuntur in Corpus Christi (ut ipsi fatentur); ergo illa propositio non converteret in Corpus Christi totam substantiam quæ importatur per illud pronomen *Hoc*. Prob. ant. Tota substantia, quæ est intra species Eucharisticas, importatur per illud pronomen *Hoc*: Sed illæ substantiolæ sunt intra species Eucharisticas; ergo illæ substantiolæ importantur per illud pronomen *Hoc*.

Respondent defensores hujus opinionis, quod tota illa tantum substantia, quæ potest esse apta materia ad consecrationem, importatur per illud pronomen *Hoc*, & cum illæ substantiolæ non sint apta materia ad consecrationem, non importantur per illud pronomen *Hoc*: & ita licet illæ substantiolæ non convertantur in Corpus Christi, non inde sequitur, quod illa propositio, *Hoc est Corpus meum*, non sit vera.

Sed contra: illæ substantiolæ panis sunt materia apta ad consecrationem: ergo importantur per illud pronomen *Hoc*, & proinde deberent converti in Corpus Christi. Prob. ant. Vel illæ substantiolæ sunt aliquid panis, vel non: si sint aliquid panis: ergo sunt apta materia ad consecrationem: si vero non sint aliquid panis, duo sequuntur. 1. Quod non possunt representare panem. 2. Quod nihil panis remaneret, quod est contra naturam transubstantiationis, quæ exigit ut remaneat aliquid accidentale panis.

Obj. Ubi est odor, ibi debent esse corpuscula: atqui intra species Eucharisticas est odor; ergo intra species Eucharisticas sunt

corpuscula. Prob. maj. ut odor, supernaturali etiam modo existens percipiatur, necessaria est attractio aëris & respiratio: atqui illa attractionis & respirationis necessitas denotat quod ubi est odor, ibi sunt corpuscula; ergo ubi est odor, ibi sunt corpuscula.

Resp. neg. maj. ad cuius proba. neg. min. quia verum quidem est, quod necessaria est respiratio ad percipiendum odorem; illa tamen respirationis necessitas non denotat quod ubi est odor, ibi sint semper corpuscula, sed quod ideò tantum necessaria est respiratio; quia (ut docent plurimi Philosophi) duæ sunt pelliculæ quæ cooperiunt carunculas mamillares, sicut palpebræ cooperiunt oculos: ideò autem admittuntur illæ pelliculæ, eò quod Aristoteles lib. 2. de Animâ cap. 9. textu centesimo, doceat dari quoddam operculum & velamen ante organum odoratus in animalibus respirantibus; in animalibus vero non respirantibus non reperitur, sicut nec palpebræ in iis quæ duos oculos habent. Ut autem species odorum ad odoratus organum trajiciantur, debet tale operculum per respirationem elevari, & odoribus aditum pandere.

Inst. atqui necessaria non est respiratio, ut odorum species trajiciantur ad odoratus organum; ergo nulla responsio. Prob. subs. Species intentionales per se feruntur in omnes alios sensus absque ullâ attractione; v.g. Species visibiles feruntur ad potentiam visivam, quin ipsa potentia agat & ipsas attrahat; ergo species etiam intentionales odorum debent ferri ad odoratus organum absque ullâ attra-

ctione & respiratione, & proinde illa respirationis necessitas denotat ibi esse corpuscula, ubi est odor.

Resp. neg. subf. ad cuius prob. neg. conf. & parit. disparitas autem provenit ex duplici capite, & ex parte sensuum, & ex parte specierum. 1. Ex parte sensuum qui non sunt eodem modo dispositi: si quidem ante organa aliorum sensuum non est operculum quod debeat elevari, ut aditus pateat speciebus intentionalibus; & illud operculum reperitur ante organum odoratus (ut jam dictum fuit.) 2. Illa disparitas provenit ex parte specierum, quia species visibiles sunt minus materiales, & ita in instanti ad oculos accedunt & ad potentiam visivam perveniunt; sed odorum species quæ sunt magis materiales, non possunt transgrediri illud operculum quod est ante odoratum organum, & quod proinde debet aperiri per respirationem & attractionem aëris.



ARTICULUS XIII.

Utrum species Eucharisticæ sint accidentia realia vel sensationes nostræ, ut volunt alij Recentiores.

NOtandum est, quod juxta sententiam quorundam recentiorum, species Eucharisticæ nihil aliud sunt quam sensationes nostræ; v. g. gustatio & visio quas Deus conservat in nobis, vel de novo producit per miraculum

raculum absentibus ipsis subjectis ; ita ut Deus efficiat ut sit in nobis gustatio & visio panis, licet non sit substantia panis & vini.

Dicendum est, species Eucharisticas non esse sensationes nostras.

Prob. duplici ratione. 1. Ecclesia quæ docet remanere species Eucharisticas, intelligit remanere illas species quæ ante consecrationem erant in pane tanquam in subjecto : atqui sensationes nostræ non erant in pane tanquam in subjecto ; ergo Ecclesia per species Eucharisticas non intelligit sensationes nostras.

2. Quia species Eucharisticæ sunt in hostiis consecratis & in pixide reservatis, etiam si nemo illas videat & nemo tangat ; ergo per species Eucharisticas non intelliguntur sensationes nostræ. Prob. ant. Si species non essent in ipsis hostiis in pixide reservatis, sequeretur quòd in ipsis nihil remansisset illius quod conversum fuerat : atqui debet remanere aliquid illius quod convertitur, alioquin non esset propriè conversio, sed esset substitutio unius substantiæ loco alterius ; ergo per illas species Eucharisticas non intelliguntur sensationes nostræ.



ARTICULUS XIV.

CONTRA MAIGNANUM.

Utrum species Eucharistica sint mera apparentia.

NOtandum est, Maignanum docere species panis esse tantum apparentias quæ nihil quidem sunt reale panis, sed, ut ait cap. 33. num. 33. *Sunt realiter ac physice Christi Domini actio objectiva, id est impressiva speciei non sibi propriæ, sed respectu sui alienæ & propriæ autem respectu panis, nimirum similis omnino ei quam sibi propriam imprimeret panis, si adesset.*

Dicendum est contra Maignanum, species Eucharisticas non esse tantum apparentias.

Prob. 1. Ex S. Thoma 3. parte quæst. 75. art. 5. ad 2. *In hoc Sacramento nulla est deceptio: sunt enim ibi secundum rei veritatem accidentia quæ sensibus dijudicantur; intellectus autem per fidem à deceptione præservatur.* Sed in hoc Sacramento esset aliqua deceptio, si species Eucharisticae essent tantum apparentiæ: Christus enim nobis exhiberet id quod non est quasi esset, & ita nos deciperet & nostris sensibus illuderet; ergo species Eucharisticae non possunt esse apparentiæ.

Prob. 2. Quando sumitur Eucharistia, fit vera & realis manducatio Corporis Christi; cum Concilium Tridentinum Sess. 13. can. 8. doceat, *Corpus Christi realiter manducari:*

atqui non esset vera & realis manducatio Corporis Christi, si species Eucharisticæ essent meræ apparentiæ; ergò &c. Prob. min. ut sit vera & realis manducatio Corporis Christi, debet aliquid reale verè & realiter manducari, ratione cujus Corpus Christi dicatur manducari: siquidem Corpus Christi in se non manducatur, cum ibi sit modo spirituali & inextenso: atqui nihil reale manducaretur, si species Eucharisticæ essent meræ apparentiæ. Primò, non manducaretur substantia panis, quia nulla est, ut fides docet. Secundò, Non manducarentur verè & realiter species Eucharisticæ, quia non sunt aliquid reale, sed meræ apparentiæ, ut vult Maignanus; ergo non esset vera & realis manducatio Corporis Christi.

Prob. 3. Plurima verè & realiter dicuntur de speciebus Eucharisticis quæ certè de ipsis non dicerentur, si essent meræ apparentiæ, ergo &c. Prob. ant. 1. Concilium Trid. dicit Sess. 13. Cap. 3. species Eucharisticas esse, *Symbolum rei sacræ, & invisibilis gratiæ formam visibilem.* 2. Tota Theologia asserit cum S. Thoma, 3. parte quæst. 77. art. 6. & 7. species esse partem essentialè Sacramenti, item nutrire, frangi, dividi: atqui illa omnia non possent verè dici de speciebus Eucharisticis, sed tantum apparenter ut patet; ergo &c.

Obj. 1. Admittenda est illa opinio circa species Eucharisticas, quæ faciliùs concipitur, & faciliùs creditur: atqui opinio, quæ docet species Eucharisticas esse meras apparentias, faciliùs concipitur & creditur, quàm illa quæ asserit species Eucharisticas esse accidentia

realia sine subjecto ; ergò admittenda est illa opinio quæ docet species Eucharisticas esse meras apparentias.

Resp. 1. neg. maj. Quia si in rebus quæ ad fidem pertinent , quæreretur & admitteretur opinio quæ faciliùs posset concipi & credi, certè Concilium generale Nicænuni non damnaſſet ſententiam Arrii aſſerentis Chriſtum eſſe tantùm hominem , quia faciliùs crederetur & conciperetur , Chriſtum eſſe tantùm hominem , quam ipſum eſſe ſimul Deum & hominem. Concilia , nempè Turonenſe & Romanum non damnaſſent Berengarium aſſerentem Chriſtum eſſe tantùm figurativè in Euchariftia , quia faciliùs crederetur opinio quæ docet ibi tantùm eſſe Chriſtū figurativè , quàm illa quæ docet ibi eſſe verum Corpus Chriſti.

Resp. 2. neg. min. Quia opinio , quæ docet ſpecies Eucharisticas eſſe tantùm apparentias , habet etiam maximas difficultates : Quid enim conceptu & creditu difficilius quàm quod dicunt acerrimi illius ſententiæ defenſores , quòd nempè nihil reale videtur , nihil reale tangitur , nihil reale percipitur , Quando potentia viſiva videt hoſtiæ albedinem , quando odoratus percipit odorem &c.

Obj. 2. Ubi ſunt ſpecies , ibi ſunt apparentiæ : atqui in Sacramento Eucharistiæ ſunt ſpecies ; ergò ſunt apparentiæ. Prob. maj. Species & apparentiæ idem ſignificant : quando enim dicitur quòd Chriſtus viſus eſt ſub ſpecie hortulani , hoc eſt ſub apparentiâ hortulani ; ergò ubi ſunt ſpecies , ibi ſunt apparentiæ.

Resp. neg. maj. ad cujus prob. diſt. ant.

Species & apparentiæ idem significant in aliquo casu, Con. in omnibus, neg. quia licet species & apparentiæ aliquando idem significant, ut in exemplo Christi qui præferebat extrinsecus speciem seu apparentiam hortulani; in venerabili tamen Eucharistiæ Sacramento non possunt idem significare, quia illud est contra naturam transubstantiationis quæ essentialiter exigit, ut remaneat aliquid illius quod convertitur: si autem species idem essent ac apparentiæ, non remaneret aliquid illius quod convertitur, & consequenter impossibile est, quod species & apparentiæ in Sacramento Eucharistiæ possint idem significare,

Obj. 3. In sensibus non potest esse deceptio & falsitas; ergo Christus non illudit nostris sensibus. Prob. ant. ibi non potest esse deceptio, ubi non potest esse falsum judicium, atqui in sensibus non potest esse falsum judicium:

1. Quia non potest esse affirmatio in sensibus.

2. Quia, ut ait Maignanus in suâ appendicè de speciebus Eucharisticis. *Sensuum non est judicare utrum quantitas, albedo, sapor, calor, humiditas, aliaque hujusmodi secundum propriam cuique essentiam ita sint accidentia, ut non etiam sint simul substantiæ; & ut ait alio in loco ejusdem appendicis, manifestum est non posse in sensu deceptionem colligi ex eo quod ego dico, speciem impressam, seu actionem quæ in Eucharistia oculum sub ratione albedinis afficit esse effectivè, non ab albedine quadam ex pane superstitè, sed à Christo: cum enim de hoc nullum possit oculus formare judicium, consequenter nec poterit formare judicium falsum, adeoque nec in eo deceptionem pati;*

ergo in sensibus non potest esse deceptio.

Resp. dist. ant. In sensibus non potest esse deceptio & falsitas complexa, con. incomplexa, neg. quia tunc est falsitas complexa, quando est difformitas cum objecto, & quando potentia percipit talem difformitatem; ita ut in falsitate complexa debeat esse affirmatio, vel negatio: sed in sensibus non potest esse affirmatio & negatio; ergo nec falsitas complexa. Falsitas verò incomplexa est difformitas cum objecto, hoc est quando potentia non percipit objectum ut est in se: sed si species Eucharisticæ essent meræ apparentiæ, sensus perciperent aliquid ut reale quod non est reale, & proinde in illis esset falsitas incomplexa. Illud non potest negari à Maignano, & de hac falsitate loquitur tantum S. Thomas, quando dicit quòd in illo Sacramento nulla est deceptio in sensibus; non loquitur enim de falsitate complexa, quia certè scit & docet Doctor Angelicus, quòd in sensibus nulla est affirmatio aut negatio.

Obj. 4. Christus potest nobis exhibere id quod non est quasi esset, producendo in nobis speciem impressam rei absentis, & tamen non est deceptio; ergò licet species Eucharisticæ sint meræ apparentiæ, Christus nostris sensibus non illudit. Prob. ant. quando in hoc Sacramento miraculosè videtur caro, aut sanguis, aut etiam aliquis puer per productionem specierum in oculis intuentium, tunc Christus nobis exhibet rem quæ non est quasi esset: atqui tunc non est deceptio, ex S. Thoma 3. parte quæst. 76. art. 8. in corpore. *Nec hoc tamen, inquit, pertinet ad aliquam deceptionem,*

sicut accidit in Magorum præstigiis ; quia talis species divinitus formatur in oculo ad aliquam veritatem figurandam , ad hoc scilicet quod manifestetur verè Corpus Christi esse sub hoc Sacramento : sicut etiam Christus absque deceptione apparuit Discipulis euntibus in Emaüs ; ergò Christus potest nobis exhibere rem quæ non est quasi esset , & tamen non est deceptio.

Resp. dist. ant. Christus potest nobis exhibere illud quod non est , quasi esset , & tamen non est deceptio , si illud exhibeat ad manifestandam aliquam veritatem , con. si illud non exhibeat ad manifestandam aliquam veritatem , neg. Responsio illa desumitur ex loco jam laudato unde Maignanus argumentum desumpserat , ideo enim non decipit Christus , quando in speciebus Eucharisticis nostris oculis exhibet carnem , sanguinem , vel puerum ; neque similiter , quando assumptâ hortulani aut peregrini personâ apparuit Magdalenæ & Discipulis euntibus in Emaüs , quia representationes illæ extrinsecæ & ejusmodi fiebant ad manifestandam aliquam veritatem. Primæ enim erant ad manifestandum Corpus Christi esse in hoc Sacramento ; aliæ verò ad manifestandâ Christi resurrectionem. Si autem Christus in Sacramento Eucharistiæ exhiberet nobis accidentia panis quæ non sunt quasi essent , Christus nos deciperet , eoquod ejusmodi representatio non esset ad manifestandam veritatem hujus Sacramenti ; imò verò eam omninò destrueret , quia destrueret naturam transubstantiationis quæ exigit , ut remaneat aliquid reale & non apparens tantum , ex eo quod præexistebat antea.

Obj. 5. Ex eodem Maignano , qui ubi plurimis rationibus conatus fuit probare nullam esse in sensibus deceptionem , ex eo quod species Eucharisticæ sint meræ apparentiæ; videtur tamen quasi palinodiam canere, & veritate convictus concedere, quod in sensibus est deceptio. Inde tamen putans nullum sequi inconveniens , arguit in hunc modum. In intellectu nudè considerato est deceptio circa species Eucharisticas : si quidem homo , non solum reduplicativè ut animal , sed etiam ut rationalis præcisè , id est non illustratus lumine fidei , visis accidentibus colore , odore & quantitate , judicat ibi remanere panem ; Ergo non est inconveniens quod in sensibus externis sit aliqua deceptio circa species Eucharisticas.

Resp. neg. conseq. & parit. Quia intellectus fallitur per accidens , quod nullum est inconveniens. Sensus verò fallerentur per se circa objectum proprium , quod est maximum inconveniens. Intellectus tunc fallitur per accidens , scilicet ratione sensuum quibus mediantibus attingit & cognoscit accidentia , ex quorum cognitione judicat remanere substantiam, cum tamen non remaneat per miraculum ratione transubstantiationis. Sensus verò fallerentur circa objectum proprium, v.g. Potentia visiva falleretur per se circa albedinem quam putaret esse in hostiâ quæ tamen non est, juxta Maignanum.



ARTICULUS XV.

(Virum formæ accidentales educantur de potentia subjecti.

NOtandum est quod formæ accidentales sunt in triplici ordine. Aliæ sunt naturales ut calor respectu ignis. Aliæ artificiales, ut figura quadrata. Aliæ demum supernaturales, ut fides divina de his omnibus procedit difficultas.

Dicendum est, omnes formas accidentales educi de potentiâ subjecti.

Prob. illæ formæ educuntur de potentiâ subjecti quæ dependent à subjecto in fieri, in esse & conservari, & quæ producuntur cum transmutatione subjecti: atqui omnes formæ accidentales dependent à subjecto in fieri in esse & conservari, & producuntur cum transmutatione subjecti; ergo educuntur de potentia subjecti. Prob. min. nullæ formæ accidentales possunt produci nisi recipiantur in subjecto, neque productæ possunt existere, nisi inhæreant in subjecto: ipsum etiam subjectum transmutatur ad productionem illarum formarum, quia fuit sub privatione; ergo omnes formæ accidentales dependent à materiâ in fieri esse & conservari, & producuntur cum transmutatione subjecti, & proinde omnes formæ accidentales educuntur de potentia subjecti.

Obj. I. quod educitur de potentia subjecti continetur in potentia ipsius: atqui formæ supernaturales non continentur in potentiâ subje-

cti, scilicet animæ; ergo non educuntur de potentia subjecti.

Resp. disting. maj. quod educitur de subjecto, debet contineri in potentiâ vel naturali vel obedienciali con. in potentiâ naturali tantum neg. similiter distinguenda est minor; atqui formæ supernaturales non continentur in potentiâ naturali animæ con. in potentiâ obedienciali neg. sicut enim dantur formæ naturales & supernaturales, ita subjectum habet duplicem potentiam, una est naturalis ad recipienda accidentia naturalia; & altera est obediencialis ad recipienda accidentia supernaturalia.

Inst. atqui gratia nullo modo potest contineri in animâ; ergo nulla solutio. Prob. subf. quod est superioris ordinis non potest contineri in potentiâ animæ; atqui gratia est superioris ordinis; ergo non potest contineri in potentiâ animæ. Prob. maj. quod continetur in alio debet esse ejusdem ordinis & habere aliquam proportionem cum continente; ergo quod est superioris ordinis non potest contineri in potentiâ animæ.

Resp. neg. subf. ad ejus prob. disting. maj. quod est superioris ordinis non potest contineri in potentiâ naturali animæ con. in obedienciali neg. verum quidem est quod debet esse proportio inter illud quod continetur tanquam in causâ materiali respectu potentie obediencialis, & illud quod continet, & talis proportio reperitur inter gratiam & potentialem obediencialem animæ; nam si gratia sit supernaturalis, potentia obediencialis animæ est quodam modo supernaturalis, quod quidem à Thomistis diversimodè expli-

atur. 1. Quidam dicunt quod potentia obedientialis non est purè naturalis nec purè supernaturalis, sed utramque rationem participat; si enim entitativè & ex parte subjecti sit naturalis, tamen terminativè est supernaturalis, quia respicit terminum & agens supernaturale; qui quidem respectus licet non illam variet in esse entitativo, tamen illam variet in esse potentiae, & ita potentia obedientialis est saltem terminativè supernaturalis. 2. Quidam alij dicunt, quod potentia obedientialis formaliter sumpta est supernaturalis non tantum ex parte termini, sed secundum substantiam.

Obj. 2. gratia creatur juxta illud Prophetæ, *Cor mundum crea in me Deus*, per cor autem mundum juxta interpretum expositionem intelligitur gratia; ergo gratia non educitur de potentia subjecti.

Resp. disting. ant. gratia creatur moraliter con. Physicè neg. creari moraliter idem est ac produci ex nullo præsupposito merito, sub hac ratione gratia producitur in animâ ex nullo præsupposito merito, & proindè dicitur creari moraliter: creari verò Physicè est produci ex nihilo sui & subjecti, gratia autem præsupponit subjectum in quo recipiatur, & proindè non creatur Physicè.

Obj. ultimo: ad veram educationem requiritur, ut fiat realis subjecti transmutatio: atqui ad quarundam formarum productionem non fuit facta transmutatio in subjecto; ergo illæ formæ accidentales non fuerunteductæ de potentia subjecti. Prob. min Angeli receperunt gratiam in instanti suæ creationis; si-

militer Beata Virgo in eodem instanti in quo fuit producta recepit gratiam ; ergo ad productionem gratiæ non fuit transmutata Maria , nec fuerunt transmutati Angeli , quia nusquam fuerunt sub privatione talis gratiæ.

Resp. dist. min. ad productionem quarundam formarum non fuit facta transmutatio per accidens con. per se neg. quia licet per se loquendo ad educationem requiratur vera & realis transmutatio , tamen per accidens potest contingere ut manente essentiâ educationis non detur de facto talis transmutatio ; illud contingit quando forma & subiectum licet non habeant inter se necessariam connexionem in eodem instanti producuntur ; & ita dicendum quod Angeli , non fuerunt transmutati per productionem gratiæ , quia nusquam fuerunt sub privatione illius , & tamen gratia fuit educata de potentia obedienciali Angelorum , quia illa actio per quam gratia producta fuit erat transmutativa subiecti licet per accidens non transmutavit : eodem modo ratiocinandum de gratia Mariæ.



ARTICULUS XVI.

An detur & quid sit privatio.


Dicendum est 1. dari plures privationes in materia.

Prob.

Prob. materia informata unâ formâ caret plurimis alijs formis quas appetit; ergo in materia dantur plures privationes, quia cum privatio nihil aliud sit quàm absentia & carentia formæ, plurimæ sunt privationes, cum materia careat plurimis formis.

Dicendum est 2. & ultimo privationem, esse carentiam formæ in subiecto apto, sive in subiecto cui debetur forma.

Prob. & explicatur talis definitio. Privatio & negatio conveniunt in hoc quòd dicunt carentiam in subiecto, & in hoc differunt quòd negatio dicat carentiam in subiecto non apto, qualis est potentia visivæ carentia respectu lapidis: privatio autem dicit carentiam formæ in subiecto apto, qualis est carentia ejusdem potentia visivæ respectu hominis.



QUÆSTIO IV.

De composito substantiali.

HACTENUS egimus de principiis compositi physici: nunc de ipso composito, circa quod tria quaeruntur. 1. Utrum compositum consistet materia & formâ tanquam partibus essentialibus, quod ab alijs alio modo solet enuntiari, nempe utrum dentur duo principia in facto esse. 2. Utrum detur unio.

possit dici nihil, debet esse de essentia cōpositi. Prob. ant. quod in nullo poneretur prædicamento, nihil esset: sed si materia non esset de essentia cōpositi, in nullo poneretur prædicamento. 1. Non poneretur per se, quia secundum se est aliquid incompletum. 2. Non poneretur reductivè, quia non reduceretur ad cōpositum tanquam pars essentialis illius; ergo materia nihil esset.

Obj. 1. si materia in communi esset de essentia cōpositi phisici in cōmuni, sequeretur quòd materia particularis esset de essentia cōpositi particularis v. g. hoc numero corpus esset de essentia talis hominis in particulari: atqui materia particularis non est de essentia hominis particularis; ergo materia in cōmuni non est de essentia cōpositi phisici in cōmuni. Prob. min. quod est de essentia hominis physicè sumpti, debet semper remanere idè; atqui in homine non semper idem corpus, remanere siquidè in ipso qui ad vigesimū ætatis annum venit, non est eadem materia quæ fuit ante viginti annos, quia per actionem caloris naturalis fuit consumpta, & alia per nutritionem fuit subrogata; ergo tale corpus non est de essentia talis hominis in particulari.

Resp. neg. min. ad cujus probationem dist. min. in homine non semper remanet corpus idè materialiter con. formaliter neg. materia enim per rationem caloris naturalis non totaliter deperditur, sed una pars perit, & altera per nutritionem addita continuatur cum præexistente; & ita materia remanet eadem formaliter, quia manet sub eadem forma: sicuti ignis dicitur idem per continuam

lignorum additionem; sicuti fluvius dicitur idem numero licet partes aquæ continuò fluant, quia illis aquæ partibus continuò fluentibus succedunt aliæ; sicuti civitas remanet eadem, licet quot annis pluribus morientibus civibus, novi in eorum locum subrogentur.

Obj. 2. quod est pars essentialis alicujus non potest pertinere ad diversa composita: atqui materia pertinet ad diversa composita; siquidem materia quæ fuit sub forma vivente, nunc est sub forma cadaveris; ergo materia non est pars essentialis compositi phisici.

Resp. dist. maj. quod est pars essentialis alicujus per modum formæ, non potest pertinere ad plura composita, conc. quod est pars essentialis alicujus per modum materiæ, non potest pertinere ad plura composita neg. quia forma non potest successivè recipi in pluribus materiis, cum sit una per materiam; & ita si reciperetur in pluribus materiis, esset una ut supponeretur, & fieret tamen multiplex per diversas materias in quibus reciperetur, & proinde quod est pars essentialis per modum formæ non potest pertinere ad plura: cum autè materia sit subjectum cõmune, & ex natura sua possit successivè recipere plures formas; ideo & potest pertinere ad plura composita.

Instabis: si materia unius individui posset pertinere ad aliud individuum, sequeretur quòd homo non posset idem resurgere: atqui homo debet idem resurgere, juxta illud sancti Athanasii: *Omnes homines habent resurgere cum corporibus suis*; ergo materia unius individui non potest pertinere ad aliud individuum.

Resp. neg. maj. quia ut ait S. Tho. lib. 4. *contra gent. cap. 81. Caro igitur Comesta re-*
regit in eo in quo primo fuit, & paulò post, &
quod defuerit, supplebitur omnipotentia creatoris,
Item docet sanctus Aug. de civ. Dei cap. 20.
si quispiam inquit confectus fame vescatur ca-
veribus hominum, quod malum aliquoties acci-
sisse, & vetus testatur historia, & nostrorum
temporum infelicia experimenta docuerunt, ve-
rum reddetur caro illa homini in quo esse caro
nec primitus cepit.

Obj. ult. quod est de essentia alicujus rei,
est principium distinctivum ipsiusmet rei, quia
idem est principium distinctivum & constitu-
tivum; sed sola forma est distinctivum prin-
cipium; ergo sola forma est principium con-
stitutivum, & proinde sola forma est de essen-
tia compositi.

Resp. dist. maj. quod est de essentia alicu-
jus per modum formæ, est principium distin-
ctivum, con. quod est de essentia alicujus per
modum materiæ, neg. quia licet animal & ra-
tionale sint de essentia hominis metaphysicè
sumpti, tamen homo convenit per animal &
differt per rationale; ita licet corpus & ani-
ma sint de essentia hominis physicè sumpti,
homo convenit per materiam, & differt per
formam.



ARTICULUS II.

*Utrum detur unio realis & positiva distincta
inter materiam & formam.*

Notandum est, quòd quadruplex potest assignari unio inter materiam & formam, scilicet effectiva, dispositiva, relativa, & formalis. Unio effectiva est actio agentis naturalis unientis formam cum materia. Unio dispositiva sunt dispositiones, quibus materia fit capax recipiendi & conservandi formam. Unio relativa est mutuus respectus materiae & formae. Unio denique formalis est copulatio materiae & formae. De duabus primis unionibus ibi non disputatur; quia certum est eas esse quid distinctum à materia & forma. De tertia etiam non disputatur, quia posito quòd ille respectus sit relatio prædicamentalis, constat esse quid distinctum à materia & forma. de quarta tantum agitur, & quæritur utrum sit aliquid distinctum à materia & forma.

Dicendum est, non dari unionem distinctam inter materiam & formam.

Prob. 1. materia & forma determinantur, ut uniantur sine ulla unione distincta; ergò non datur, prob. ant. materia & forma determinantur per se ut uniantur: siquidem materia de se est potentia receptiva formae, forma similiter de se est actus informativus materiae; ergo materia & forma determinantur, ut uniantur sine ulla unione distincta.

Prob. 2.^o Vel illa unio esset corporea, ut docet Complutenses, vel spiritualis, ut vult Suares; neutrum dici potest, ergo &c. prob. prima pars minoris; si enim esset corporea, non posset unire animam materię, nisi reciperetur in illa tanquam in subiecto; atqui res purē corporea non potest permanentē recipi in subiecto spirituali; ergo illa unio non potest esse corporea. prob. 2.^a pars minoris: si talis unio esset spiritualis, non posset produci ab homine per potentiam generativā ut à causa principali; ergo unio nō potest esse spiritualis: Prob. ant. nullus effectus potest excedere virtutem causę suę, & esse nobilioris ordinis: atqui potentia generativa est materialis; ergo homo non potest per potentiam generativam producere illam unionem spiritualement.

Obj. 1. ex S. Th. 1. parte q. 76. art. 1. ad 6. *Secundum se*, inquit, *convenit animę uniri corpori, sicut corpori levi convenit secundum se esse sursum*; atqui corpus leve non potest esse sursum, nisi per ubicationem intrinsecam quę mediat inter corpus locatum & ipsum locum: ergo anima unitur materię per unionem quę mediat inter materiam & formam.

Resp. ad auctoritatē S. Th. *secundum se cōvenit animę uniri corpori, sicut corpori levi convenit secundum se esse sursum*. Disting. secundum inclinationem quam utrumque habet ad terminum, con. secundum modum & statum quo utrumquē est in termino, neg. anima enim & corpus in hoc conveniunt, quod sicut corpus leve separatū à loco sursum habet inclinationem ad illum, ita anima separata à corpore, habet inclinationē ad corpus; disse-

runt verò in hoc quòd corpus leve est in loco sursum per ubicationem distinctam ab ipso corpore, anima verò unitur corpori per se ipsam.

Obj. 2. Omnis actio postulat novum terminum: atqui generatio substantialia est actio realis; ergo postulat novum terminum, sed ille terminus non est materia; quia est ingenerabilis, neque forma in homine, quia creatur à Deo; ergo unio debet esse terminus talis generationis.

Resp. 1. dist. maj. omnis actio requirit novum terminum producendum vel uniendum, con. producendum semper, neg. quia sufficit ut actio uniat terminum præexistentem alicui subjecto, ut patet in resurrectione hominis cujus terminus formalis est anima quæ longo ante tempore exitit.

Resp. 2. dist. illam propositionem forma in homine secundum se spectata non est terminus formalis generationis, con. forma ut communicata materiæ non est terminus formalis generationis, neg. forma autem semper est terminus formalis generationis cum illa tamen differentia ut in compositis materialibus, sit terminus formalis generationis, eò quod producat per generantem, & per eandem actionem per quam producit, uniatur materiæ, unde formæ substantiales materiales dicuntur educi de potentia materiæ; si verò forma non producat per generationem, qualis est forma hominis, tunc terminus formalis generationis erit ipsa forma, non ut producat per generationem, sed ut communicata materiæ.

Resp. 3. Quod etiam si daretur unio distincta à materia & forma, ipsa unio non esset terminus formalis generationis, sed illud semper tantum conveniret formæ 1. quia ex Arist. 2. Phys. textu 1. cap. 14. *generatio est via ad formam* 2. quia terminus formalis generationis est illud per quod compositum formaliter constituitur, non constituitur autem formaliter per unionem, sed tantum per formam: ergo forma non vero unio est terminus formalis generationis.

Obj. 3. quæ separantur realiter, distinguuntur realiter: atqui unio separatur ab anima & corpore: ergo distinguitur ab anima & corpore, prob. min. in morte remanet materia, remanet etiam anima, & perit utriusque unio, ergo unio separatur ab anima & corpore.

Resp. dist. min. unio separatur ab anima & corpore, quando invicem non comunicantur, con. quando invicem comunicantur, neg. vel unio separatur ab anima, quando non dat esse corpori, con. quando dat esse corpori, neg. quia cum unio animæ nihil aliud sit quam ipsa anima communicata, dicitur perire talis unio, quando anima cessat esse in corpore, & ita quando dicitur quod perit unio, non est intelligendum quod pereat aliqua entitas distincta ab anima, sed est intelligendum, quod anima cessat tantum informare corpus.

Obj. ult. ubi datur effectus formalis unionis, ibi debet dari causa formalis: atqui datur effectus formalis unionis, nempe materiam & formam esse unitas; ergo debet dari causa formalis, nempe unio.

Resp. dist. maj. ubi datur effectus formalis

unionis, ibi debet dari causa formalis indistincta, con. distincta neg. Illa enim unio qua materia & forma dicuntur formaliter unitæ, non est aliquis modus positivus medians inter materiam & formam, & ab illis distinctus realiter, sed tantum est inseparatio seu negatio separationis.

Inst. atqui non sufficit illa inseparatio; ergo nulla solutio prob. subf. duplici ratione. 1. Sequeretur quod Angelus posset naturaliter causare resurrectionem, quia posset Angelus statuere animam intra ipsum corpus, & facere ut anima esset indistans.

2. Illa inseparatio esset aliquid negativum cum consisteret in non separatione; atqui unio debet esse aliquid positivum; ergo unio non potest esse tantum inseparatio prob. min. duplici modo 1. unio est forma constitutiva uniti quod est aliquid positivum. 2. Unio est essentialis composito; ergo unio debet esse aliquid positivum.

Resp. 1. neg. subf. & ad primam partem argumenti dico quod unio non est ipsa inseparatio precisè sumpta, sed quatenus ipsa inseparatio denotat dispositiones in materia ab agente naturali introductas, & ita ex nostra conclusione non sequitur Angelum posse naturaliter causare resurrectionem, quia ad veram resurrectionem non sufficit, ut anima statuatur intra corpus, sed debet ipsum corpus iterum informare, ad quam informationem requiruntur in materia eadem dispositiones quæ antea erant, illæ autem non possunt ab Angelo introduci, & ita licet Angelus possit animam intra corpus statuere, non potest tamen

naturaliter causare resurrectionem.

Resp. neg. subsl. & ad 2. partem argumenti respondeo duplici modo.

1. Neg. min. & ad probationem dist. primā partem antecedentis. Unio est forma constitutiva uniti quod est aliquid positivum, si unitū sumatur materialiter con. si sumatur formaliter neg. quia cum unitū sit quasi aliquod concretum, importat duo, unum pro materiali, & aliud pro formali; pro naturali importat partes quæ uniuntur, & sunt quidem aliquid positivum; importat verò pro formali unionem sive inseparationem quæ est aliquid negativum.

2. Neg. secundam partem antecedentis, unio enim non est essentialis composito, cum non sit de primario conceptu illius.

Inst. atqui unio est de primario conceptu compositi, ergò nulla solutio. prob. illud est de primario conceptu compositi, quo sublato quibuscumque remanentibus nullomodo potest remanere compositum: atqui sublata unione non remanet compositum; ergò est de conceptu primario compositi.

Resp. neg. subsl. ad cujus probationem, neg. maj. Quia plurima sunt quibus illud convenit, & tamen non sunt de essentia rei: ita causa efficiens non potest esse causa efficiens, nisi habeat existentiam, quia quod causat per modum causæ efficientis, hoc est dando existentiam debet illam habere, & tamen existentia non est de conceptu primario causæ efficientis cum sit tantum illi accidentalis. Similiter generatio nullomodo potest fieri sine causa efficiente, & tamen causa efficiens non est de pri-

mario conceptu generationis, & ita licet posita unione ponatur compositum, & licet sublata unione tollatur compositum, non inde sequitur, quod unio sit de primario conceptu compositi.



ARTICULUS III.

& ultimus.

Utrum compositum distinguatur à partibus simul sumptis & unitis.

Dicendum est compositum Physicum non distingui realiter à partibus simul sumptis & unitis.

Prob. 1. autoritate Arist. qui 4. Phys. cap. 3. ait; *Totum nihil aliud est quam partes*: 2. autoritate S. Thomæ qui 1. parte quæst. 75. art. 4. sed contra concludens solam animam non esse hominem, adducit hoc testimonium Beati Augustini, qui lib. 19. de Civit. Dei cap. 3. commendat Varronem, qui *hominem nec animam solam, nec solum corpus, sed animam simul & corpus esse arbitrabatur.*

Prob. 2. Ratione: quæ habent eandem essentiam non distinguuntur realiter: atqui totum, & partes habent eandem essentiam, nam partes sunt definitio essentialis Physica Totius, definitio autem & definitum idem sunt ut fateantur omnes; ergo totum & partes simul sumptæ non distinguuntur realiter.

Prob. 3. Illa tertia entitas faceret ens per accidens

accidens cum materia & forma ; ergò non datur distincta realiter à partibus simul sumptis & unitis. prob. ant. Illa entitas facit ens per accidens quæ advenit enti in actu : atqui illa tertia entitas adveniret enti in actu : ergo faceret ens per accidens. prob. min. illa tertia entitas adveniret materiæ habenti formam : sed materia habens formam est ens in actu ; ergo adveniret enti in actu.

Obj. 1. Omnis causa distinguitur realiter à suo causato : atqui materia & forma ut unitæ sunt causa compositi ; ergo materia & forma ut unitæ distinguuntur à composito , & proinde compositum est tertia entitas distincta realiter à partibus.

Resp. 1. dist. maj. Omnis causa extrinseca distinguitur realiter à suo causato, con. omnis causa intrinseca neg. verum est quidem quod causa efficiens & causa finalis quæ sunt causæ extrinsecæ distinguuntur realiter à suo causato ; materia autem & forma sunt causæ intrinsecæ compositi, cum causent illud communicando seipsas, materia recipiendo, forma actuando, ex qua communicatione fit compositum, & ita illæ causæ intrinsecæ non distinguuntur à composito.

Resp. 2. dist. min. Materia & forma ut uniendæ seu in fieri sunt causa cõpositi con. ut unitæ seu in facto esse neg. Quia quãdiu materia & forma sunt sub uniti sive in via ad unionem sunt causa compositi, quando vero sunt sub unione, hoc est quando sunt de facto unitæ, tunc non sunt causa compositi, sed sunt ipsum compositum.

Obj. 2. Multa conveniunt composito quæ

non conveniunt partibus; ergò totum & partes distinguuntur. Prob. ant. multipliciter 1. Compositum est unum, non vero partes. 2. Compositum est subjectum accidentium, non verò partes. 3. Compositum est principium operationum, non verò partes. 4. Compositum est completum, non vero partes; ergo multa conveniunt composito quæ non conveniunt partibus.

Resp. dist. ant. multa conveniunt composito quæ non conveniunt partibus seorsim sumptis con. simul sumptis neg. quia quidquid convenit composito, convenit partibus simul sumptis quæ sunt ipsum compositum. 1. Partes simul sumptæ sunt quid unum, quando autem compositum dicitur unum; hoc est intelligendum de unitate compositionis; dicitur enim unum, quatenus non est multiplex essentia, illud autem non est intelligendum de unitate simplicitatis, ita ut compositum excludat omnem multitudinem cum coalescat ex multis. 2. partes ut unitæ sunt subjectum accidentium. 3. si sumantur seorsim, & secundum suas entitates sunt principium quorundam proprietatum, tum actionum: si vero simul sumantur sunt principium quod. 4. partes simul sumptæ sunt aliquid completum.

Obj. 3. quæ sunt eadem cum uno tertio sunt eadem inter se: atqui si compositum non distingueretur à partibus simul sumptis & unitis, materia & forma essent idem cum uno tertio nempe cum composito; ergo essent idem inter se, quod non potest dici, quia materia & forma distinguuntur realiter.

Resp. dist. maj. si illa adæquatè & conver-

tibiliter se habeant con. si adequatè & convertibiliter non se habeant neg. quia illud principium debet tantum intelligi de illis quæ se habent adequatè & convertibiliter ut patet exemplo paternitatis & filiationis respectu essentia divinx, licet enim filiatio & paternitas sint unum & idem cum essentia divina, tamen distinguuntur inter se, quia non se habent convertibiliter, hoc est unum non prædicatur de alio: non enim potest dici, paternitas est filiatio, neque filiatio est paternitas: ita per aliquam proportionem ratiocinandum est de materia & forma, quæ licet sint unum & idem cum compositò, non sunt unum & idem inter se, quia non se habent convertibiliter, hoc est unum non prædicatur de alio, non enim potest dici, materia est forma, neque forma est materia.



QUÆSTIO .V.

De natura, Violentia & arte.

CUM jam in alijs quæstionibus egerimus de materia & forma, ut sunt principia intrinseca corporis naturalis, nunc de ipsis agendum superest, ut sunt causa & principia motus & quietis.



ARTICULUS I.

Quid sint natura & violentum.

Dicendum est 1. naturam definiri ab Aristotele, principium & causam motus & quietis, hujus in quo est primò per se, & non per accidens.

Prob. & explicatur talis definitio. 1. Natura dicitur principium, five activum, five passivum. 2. Dicitur causa radicalis scilicet omnis motus & per hoc distinguitur à privatione quæ quidem est principium generationis non vero causa, quia non habet realem influxum. 3. Dicitur causa motus, scilicet physici qualis est motus localis & motus alterationis, & per hoc excluduntur motus Angelorum. 4. Additur quietis per quam particulam non intelligitur carentia motus sed permanentia alicujus rei in loco proprio sive centro sub forma sibi connaturali : sic lapis dicitur quiescere in centro: hæc autem duo non conveniunt naturæ conjunctim, ita ut sit simul & semel in eodem subjecto principium motus & quietis, sed in diversis dumtaxat. 5. Dicitur hujus in quo est, hoc est compositi substantialis, in quo est natura. 6. Additur particula primò ut ostendatur naturam esse principium primum & radicale motus non verò secundarium & proximum, ut est gravitas in lapide. 7. Denique dicitur per se & non per accidens, ut ostendatur naturam esse principium internum

ad motum per ſe ordinatum, & ita excluduntur principia interna per accidens, ita ſcientia medici, licet ſit principium internum ad reſtituendam ſuam ſanitatē, non eſt natura quia eſt principium per accidens, ſiquidem per accidens eſt, quod agrotus calleat medicinam.

Dicendum eſt 2. violentum eſſe illud quod eſt à principio extrinſeco, paſſo non conferente vim.

Probatur & explicatur talis conſuſio. Illa forma dicitur violenta quæ introducitur ab agente extrinſeco in ſubjectum quod ad illam nullum habet appetitum ſive inclinationē; ita ut nullam vim conferat, hoc eſt non concurrat paſſivè ad ipſam recipiendam; ſic calor eſt forma violenta reſpectu aquæ; ergo violentum optimè deſinitur illud quod eſt à principio extrinſeco paſſo non conferente vim.



ARTICULUS II.

Quibus rebus conveniat ratio naturæ.

Dicendum eſt 1. rationem naturæ conveni-
re materiæ & formæ.

Prob. materia eſt principium illius motus, quo tranſmutatur ab uno eſſe ad aliud, materia ſimiliter eſt principium quietis formarum, quia formæ quieſcunt in materia; forma verò eſt modo principium paſſivum, motuum, modo principium activum, eſt princi-

pium passivum illorum motuum quos res ipsa in se non excitat, sed naturaliter exigit ab alio habere, ut forma cœli naturaliter exigit habere motum ab intelligentia; forma autem est principium activum motuum quos res ipsa in se excitat, ut sunt motus vitales, motus gravium & levium, &c. ergo ratio naturæ convenit materiæ & formæ.

Dicendum est 2. rationem naturæ aliquomodo convenire naturæ.

Prob. Compositum est radix & origo suorum motuum, ergo aliquomodo ratio naturæ convenit composito. Dixi tamen *aliquomodo* nam ut notant Arist. & S. Th. 2. phys. lect. 2, compositum est magis à natura, id est, constans naturâ, scilicet materiâ & formâ, quam natura.

Dicendum est 3. animam rationalem habere rationem naturæ.

Prob. anima rationalis est forma constitutiva corporis naturalis, corporis scilicet humani: atqui esse formam constitutivam corporis naturalis, est esse principium activum motus sive operationis quæ elicitur à tali composito, & esse principium motus, est habere rationem naturæ; ergo anima rationalis habet rationem naturæ.



ARTICULUS III.

Utrum ars possit producere opera naturæ.

Dicendum est primò, artem non posse virtute sua efficere opera naturæ.

Probatur. Ars dupliciter sumitur vel pro ipso habitu intrinseco & intellectuali, vel pro ipso effectu ab arte producto, v. g. forma cathedræ est effectus artis; atqui ars sub utraque illa formalitate considerata, virtute sua non potest efficere opera naturæ; ergò ars nullo modo potest virtute sua efficere opera naturæ. Probatur minor quoad omnes partes, primò ille habitus est omninò spiritualis, natura verò debet esse aliquid corporeum sive formaliter sive virtualiter; ergò cum ille habitus totaliter differat à natura, non potest virtute sua efficere opera naturæ. Secundò effectus artificiales consistunt vel in figura, ut forma statuarum, vel in compositione, ut formæ unguentorum, vel in ordine ut formæ horologiorum: sed figura, compositio & ordo non possunt causare aliquem motum; ergò effectus artificiales non possunt virtute sua efficere opera naturæ. Probatur minor, figura & ordo non causant motum in naturalibus; ergò nec in artificialibus.

Objicies primò, Albertus magnus confecit caput Æneum voces humanas proferens. Architas Tarentinus confecit columbam ligineam per aëra volitantem. Dædalus confecit

statuas hunc & illuc discurrentes. Archimedes confecit cælum vitreum quod movebatur ; ergo ars potest efficere opera naturæ,

Respondeo negando consequentiam ; quia illa omnia fiebant solum quibusdam machinis intus inclusis , sicut regularis motus horologii fit gravitate ponderum & diversa rotularum dispositione.

Obicies secundò & ultimò , formæ artificiales sunt efficaces ad plurima opera , ut ad sanandas ægrotudines , ad fugandos serpentes ; siquidem virtute imaginum Astronomicarum quas vocant *Talismanos* ; quæ sub certo astrorum aspectu depinguntur , plurima fiunt supra communem naturæ cursum , ut figura serpentis depicti cæteros fugat serpentes ; ergo ars potest virtute sua efficere opera naturæ.

Respondeo quod illa omnia fiunt à Dæmonibus applicando activa passivis.

Dicendum est secundò & ultimò artem efficere opera naturæ applicando activa passivis.

Probat. constat experientia medicos restituere sanitatem adjuvando naturam & præbendo illi instrumenta quibus munita per suam vim intrinsecam se reducat ad pristinam sanitatem. Constat etiam experientia calore ignis enasci pullos & similia : atqui hujusmodi formæ naturales non producuntur nisi applicando virtutes activas passivis directione & industria artis, quæ virtutes activæ superant illas qualitates, quæ sunt in subjecto, & sic ab illo expellunt formam naturalem præexistentem & novam introducunt, qualem exigunt dispositiones & accidentia introdu-

Etia ; ergò ars potest efficere opera naturæ applicando activa passivis.

Obj. si applicando virtutes activas passivis, ars posset efficere opera naturæ , maximè aurum: atqui ars non potest efficere aurum ; ergò ars non potest facere opera naturæ applicando activa passivis. Probatòr minor, sanctus Tho. in secundum sententiarum, distinctione septima, quæstione tertia, articulo primo ad quintum, docet Alchimistas facere solum aliquid simile auro, quantum ad accidentia exteriora, sed non faciunt verum aurum, quia forma substantialis non est factibilis per calorem quo utuntur Alchimistæ, sed per calorem Solis in loco determinato ubi viget virtus mineralis unde Joannes XXII. damnat hujus auri venditionem ; ergo per Alchimiam non potest fieri verum aurum.

Resp. disting. min. per Alchimiam non potest fieri verum aurum moraliter, con. physicè & absolutè neg. quia difficillimum est invenire activa ad hoc requisita & passiva, & illa deinde convenienter applicare, ut constat longa experientia. Multi enim è suis fornacibus fucatum aurum tantùm protulere, idcirco Doctor Angelicus illud falsum arbitrat, & talem artem damnavit summus Pontifex, non quod censeant illud esse omninò impossibile, cum enim omnia metalla constent vivo argento & sulphure, & calor ignis sit ejusdem speciei cum calore Solis, absolutè potest produci verum aurum, quod autem Divus Thomas crediderit aurum posse absolute fieri illud clarè conjicitur ex hoc quod secunda secundæ quæst. 77. art. 2.º ad 1. dicit, *si*

*Primæ pars Physicæ ,
per Alchimiam fieret verū aurum, non esset illi-
citum ipsum pro vero vendere: & mox affert ra-
tionem his verbis; quia nihil, inquit, prohibet
artem uti aliquibus naturalibus causis, ad produ-
cendum naturales & veros effectus.*






TRACTATUS II.

De causis entis mobilis.



AD productionem entis mobilis non solum concurrunt principia intrinseca de quibus jam in primo tractatu egimus, concurrunt etiam plurimæ causæ quæ sunt extrinseca entis mobilis principia: nunc ergo ibi agendum de causa efficiente & finali, redibit etiam sermo de materia & forma prout habent rationem causæ, hæc omnia in quinque questionibus discutientur; in quarum prima agatur de causis in communi, in 2. de causa efficiente, in 3. de causis materiali & formali; in 4. de causa finali, in 5. & ultima de causis per accidens.



QUÆSTIO I.

De causis in communi.

TRes continebit articulos ista quæstio. In 1. quæretur quid & quodplex sit causa. In

In 2. utrum causa sit prior & nobilior effectu.

In 3. & ultimo utrum causæ sint ad invicem causæ.



ARTICULUS I.

Quid, & quotuplex sit causa.

Dicendum est. 1. Causam definiri, principium alicujus per modum influxus, ex quo natum est aliquid consequi secundum dependentiam in esse.

Probatur & explicatur definitio. 1. Dicitur principium loco generis, quia per illud causa convenit cum privatione, cum conditione sine quâ, & aliis quæ dant initium alicui rei. 2. Additur per modum influxus, ut exprimitur ratio formalis quâ omnis causa constituitur actu causans, sive influens & tribuens esse alicui, & per hoc distinguitur à conditione sine qua & aliis principiis ex quibus sine influxu alia procedunt. 3. Additur ex quo natum est aliquid consequi secundum dependentiam in esse, ut assignetur ultima conditio causæ, non enim quilibet influxus potest esse causalitas, sive ratio formalis constitutivâ causæ, sed talis influxus debet importare dependentiam & diversitatem ab alio secundum entitatem; nam omne causatum debet esse diversum à causa; & proinde generatio & spiratio activa in divinis, licet communicent esse, non tamen communicant esse dependens

dependens & diversum ; ergo causa rectè definitur principium ; &c.

Dicendum est 2. & ultimò , quatuor esse causarum genera, sive causam adequatè dividi in materiale, formalem, efficientem & finalem.

Prob. Tot sunt causarum genera , quot sunt causæ concurrentes ad producenda composita naturalia ; atqui quatuor sunt causæ concurrentes ad producenda composita naturalia ; ergò sunt quatuor causarum genera. Prob. min. 1. Compositum naturale non fit ex nihilo , sed ex præsupposito subjecto ; quia nihil fit ex nihilo ab agente naturali : sed illud subjectum quod præsupponitur , est materia , sive causa materialis ; ergò datur causa materialis. 2. Cum materia prima sit pura potentia nullum habens actum , non potest dare speciem & complementum substantiale , quod habent composita naturalia , & quod tantum potest provenire à sola forma ; ergo datur forma sive causa formalis. 3. Nullum compositum est à se , sed ab alio ; & illud à quo est compositum , est causa efficiens , ergo datur causa efficiens. 4. Nullum agens agit temerè ; ergo datur causa finalis propter quam quodlibet agens operatur ; ergo dantur quatuor causæ quæ inter se differunt in hoc , quod causa efficiens sit illa à qua aliquid fit ; causa materialis sit illa ex qua aliquid fit ; causa formalis sit illa per quam aliquid fit ; causa verò finalis sit illa propter quam aliquid fit.



ARTICULUS II.

Utrum causa sit prior & nobilior suo effectu.

Dicendum est 1. causam esse priorem suo effectu, prioritate naturæ.

Prob. Prioritas naturæ præcisè in hoc consistit, quòd posterius dicatur dependere ab illo quod dicitur prius: atqui omnis effectus dependet realiter à sua causa, ut manifestum est ex ipsa causæ definitione; ergò omnis causa est prior suo effectu prioritate naturæ.

Dicendum est 2. effectum esse æqualis perfectionis cum causa materiali & formali simul sumptis: si verò effectus sumatur secundum totum quod dicit, est nobilior qualibet illarum causarum sigillatim sumptâ.

Prob. conclusio quoad 1. partem. Effectus totam perfectionem quam habet entitativam, habet ab illis ex quibus intrinsecè componitur: sed effectus causæ materialis, & formalis, scilicet compositum, conficitur intrinsecè ex ipsa materia & forma simul sumptis; ergò habet totam perfectionem ab ipsis, & proinde effectus causæ materialis & formalis non est perfectior ipsis partibus simul sumptis.

Prob. eadem conclusio quoad 2. partem. Totum habet perfectionem à qualibet causa intrinseca; ergò totum comparatū ad quamlibet sigillatim sumptam, est perfectius; nam præter perfectionem quam compositum habet ab

illa, includit etiam perfectionem quam habet ab alia: unde compositum, secundum totum quod dicit, est perfectius materia & forma sigillatim sumptis.

Dicendum est 3. causam finalem principalem in agentibus benè ordinatis esse nobiliorem effectu, in agentibus vero malè ordinatis esse ignobiliorem effectu.

Prob. conclusio quoad 1. partem. S. Thomas in 2. sent. dist. 15. art. 1. ait, *Inconueniens est quod aliquid sit principaliter propter vilius se:* sed effectus est propter finem; ergo finis est nobilior effectu. Unde natura quæ semper ordinatè agit, ordinat viliora ad nobiliora tanquam ad finem; sic omnia animalia ordinantur ad hominem, homo vero ad Deum.

Prob. conclusio quoad 2. partem. Patet experientia, quòd inordinatè agentes ordinant religionem ad regnandum, sacra ad luerum; elemosinam ad vanam gloriam; ergo ex deordinatione hominum malè operantium, finis est imperfectior suo effectu.

Dicendum est 4. & ultimò*, causam efficientem principalem, modò esse nobiliorem, modò æquè nobilem.

Prob. Omnis causa efficiens vel est æquivoca, vel univoca: atqui causa æquivoca est nobilior suo effectu, & causa univoca est æquè nobilis; ergo causa efficiens principalis est nobilior, vel æquè nobilis. Prob. min. quoad omnes partes. 1. Causa æquivoca, quæ est diversæ rationis ab effectu, continet eminenter suum effectu; ergo habet esse perfectius & eminentius, & proinde est perfectior & eminentior. 2. Causa uni-

voca est ejusdem rationis cum effectu; ergo est æque nobilis, quod si effectus habeat majorem perfectionem individualement quam sua causa, hanc tamen non habet ut est effectus talis causæ.

Obj. 1. Pater aliquis habens ingenium tardum, & difforme corpus, producit filium habentem acutum ingenium, & pulchrum corpus; ergo causa univoca est imperfectior suo effectu.

Resp. distinguendo consequ. Causa univoca est imperfectior perfectione accidentali, conc. perfectione substantiali, neg. quia, quod ille filius sit perfectior patre, hoc provenit ab extrinseco, ex eo scilicet quod habuerit benigniorem concursum causarum externarum, scilicet cœli, solis & hujusmodi; & proinde accidens est, quod ille filius sortitus fuerit melius temperamentum, & feliciorem organorum dispositionem.

Obj. 2. Cœlum est causa efficiens æquivoca viventium, quæ causantur ex putrefactione: atqui cœlum est imperfectius ipsis viventibus, cum sit inanimatum; ergo causa efficiens æquivoca non est perfectior suo effectu.

Resp. dist. maj. Cœlum est causa efficiens æquivoca instrumentalis, con. principalis, neg. quia cœlum non producit hujusmodi ventura per virtutem propriam, sed per virtutem Angeli à quo movetur, ut probabitur in tractatu de cœlis.



ARTICULUS III.

Utrum causæ sint sibi ad invicem causæ.

Dicendum est, causas esse sibi ad invicem causas in diverso genere.

Prob. Quæ mutuò inter se dependent realiter, se mutuò causant realiter: atqui materia & forma, causa efficiens & finalis, inter se mutuò dependent realiter: ergo se mutuò causant realiter. prob. min. causa materialis dependet à formali, ut sit actus, causa verò formalis dependet à materiali, ut existat, similiter causa efficiens dependet à fine; & causa finalis dependet ab efficiente; si quidem finis potest considerari duplici modo, vel ut intentus, vel ut obtentus, finis ut intentus movet causam efficientem, finis verò, ut obtentus causatur ab ipsa causa efficiente; & ita finis est causa & effectus.

Obj. Si causæ essent sibi mutuò causæ, sequeretur quòd causa esset causa sui ipsius: atqui causa non potest esse causa sui ipsius; ergò causæ non possunt esse sibi adinvicem causæ. prob. sequela maj. quod est causa causæ, est causa causati: atqui materia est causa forme per quam deinde causatur; ergò materia est causa sui ipsius.

Resp. neg. sequelam maj. ad cuius probationem dist. maj. Quod est causa causæ, in eodem genere quo causatur; est causa causati,

con. in diverso genere neg. quia forma non dat esse materiæ eodem modo, quo materia dat esse formæ: siquidem forma dat esse materiæ actuando & informando; materia verò dat esse formæ, illam recipiendo. Unde D. Thomas quæst. 31. de malo ad 4. docet, quod ad veritatem illius axiomatis, duo requiruntur. 1. Ut illud quod procedit à causato, procedat ab illo secundum causalitatem secundum quam causatum fuit; quòd si procedat ab illo diversa causalitate, non reducitur ad illum, nec est effectus illius, defectu cuius conditionis, materia non est causa sui. 2. Requiritur, ut prior causa non tantum tribuat alteri causæ esse, sed etiam in fluxum, defectu cuius conditionis Deus non est causa peccati, licet sit causa voluntatis humanæ & entitatis peccaminosæ, quia peccatum non procedit ab eis secundum quod subordinantur divinæ causalitati, sed quatenus se ab illa subtrahunt, bene tamen ignis produciens calorem in aqua, & aqua calefaciens manum, est causa caloris in manu producti per calorem aquæ.





Q U Æ S T I O . II.

De Causa efficiente.

CUM causa efficiens creata sit principalis vel instrumentalis, de qualibet ibi disputabitur.



ARTICULUS . I.

Quid sit causa efficiens, & quænam sit causalitas causæ efficientis.

Dicendum est. 1. causam efficientem definire, primum principium per se, à quo profuit motus.

Prob. & explicatur talis definitio. 1. Causa efficiens dicitur principium, & per hoc convenit cum aliis causis. 2. Dicitur primum, quia causa efficiens est prima in executione; causa vero finalis, quæ dicitur omnium prima, est tantum prima in intentione. 3. Dicitur principium extrinsecum, ut distinguatur à materia & forma, quæ sunt principia intrinseca. 4. Additur per se, ut distinguatur à causis per accidens. 5. Denique subjungitur, à quo pro-

fuit motus; ut ostendatur causam efficientem producere mutationem in subjecto; ergo causa efficiens rectè definitur primum principium extrinsecum per se à quo profluit motus.

Dicendum est 2. actionem, ut est ultimus actus agentis, esse causalitatem sive rationem formalem constitutivam causæ in esse causæ actualis.

Prob. Illud est causalitas causæ efficientis, per quod causa constituitur actu causans: atqui causa efficiens constituitur actu causans per actionem; ergo actio est causalitas causæ efficientis.



ARTICULUS II.

Utrum due cause totales ejusdem generis, & non subordinatæ, possint producere eundem numero effectum.

Dicendum est, duas causas totales efficientes ejusdem generis & non subordinatas, non posse producere eundem numero effectum.

Prob. Duas causas totales simul producere eundem numero effectum involvit contradictionem: ergo illud non potest fieri nec naturaliter nec divinitus: Prob. ant. esse causam totalem, & non esse causam totalem, est aliquid contradictorium: atqui, si duæ causæ totales producerent eundem numero effectum, essent totales & non essent totales: essent totales, ut supponitur, & non essent totales, ut

probatur, per essentialem dependentiam effectus, causa constituitur totalis: atqui, si idem numero effectus produceretur à duabus causis totalibus, esset duplex dependentia & non esset; ergò essent totales & non totales, prob. ant. esset duplex dependentia, ut supponitur & non esset; quia effectus non haberet essentialem connexionem cum una causa: nam illà remotà produceretur æque bene effectus, ac si adesset; ergò non esset duplex dependentia.

Obj. 1. Duo corpora luminosa habentia æqualem virtutem, producant eandem lucem in parte aëris æqualiter distante; ergò duæ causæ totales possunt producere eundem numero effectum. prob. ant. in illa parte aëris æqualiter distante est unica lux: sed illa unica lux producitur ab utroque corpore luminoso; quia non est major ratio, quòd producatur ab uno quàm ab alio: ergò duo illa corpora luminosa producant eundem numero effectum.

Resp. neg. suppositionem: quia impossibile est quod una pars aëris secundum se totam, æqualiter distet ab illis duobus corporibus luminosis, quia omnis aëris pars quantumvis minima est divisibilis in suas medietates: unde quælibet pars aëris mediantis inter illa duo corpora luminosa, illuminatur à corpore propinquiore.

Inst. Illa duo corpora luminosa possunt divinitus se penetrare: atqui tunc producerent eandem lucem in eadem aëris parte æqualiter distante: ergò illa duo corpora luminosa producerent eundem numero effectum.

Resp. 1. neg. min. quia facta illa suppositione, quod scilicet illa duo corpora luminosa se penetrarent, & quod haberent æqualem virtutem, tunc illa duo corpora luminosa se mutuo impedirent, & utrumque cessaret ab agendo.

Resp. 2. dist. min. Illa corpora luminosa producerent eandem lucem, tanquam causæ partiales, con. tanquam causæ totales, neg. quia posito quod illa duo corpora luminosa haberent æqualem virtutem, & quod subjectum non esset capax recipiendi effectum utriusque, tunc illa corpora modifierent suam virtutem, & ita essent tantum causæ partiales.

Inst. iterum. Agentia naturalia non possunt modificare suam virtutem, sed agunt secundum totam suam virtutem quam habent: atqui illa duo corpora sunt agentia naturalia: ergo non possunt modificare suam virtutem.

Resp. neg. maj. Agentia naturalia seorsim sumpta non possunt modificare suam virtutem con. conjunctim & simul concurrentia, neg. quia agentia naturalia in agendo exercent virtutem quam postulant effectus producendi: cum autem effectus producendi non possint dependere à duabus causis totalibus, necesse est ut illæ causæ modifierent suam virtutem, ut non sint causæ totales, sed partiales.

Obj. 2. & ultimò. Deus & ignis sunt duæ causæ totales: atqui Deus & ignis producunt alium ignem: ergo duæ causæ totales possunt producere eundem numero effectum.

Resp. dist. maj. Deus & ignis sunt duæ causæ totales subordinatæ, con. non subordinatæ,

neg. quia cum causæ subordinatæ producant effectum per eandem actionem, non implicat eas posse producere eundem numero effectum.



ARTICULUS III.

Utrum due causæ totales possint divisim producere eundem numero effectum, sive utrum unus effectus productus ab una causa, potuerit produci ab aliâ.

Dicendum est, unum numero effectum productum ab una causa, non potuisse produci ab aliâ.

Prob. 1. Si unus effectus productus ab una causa, posset produci ab aliâ, sequeretur, quod ille effectus dependeret & non dependeret: atqui illud non potest dici, quia illud involvit contradictionem: ergo unus numero effectus productus ab una causa, non potuit produci ab aliâ. prob. sequela. maj. ille effectus productus ab una causa, dependeret ab illâ, ut supponitur; quia omnis effectus dependet essentialiter à causa, & ille effectus non dependeret, quia ille effectus non dependet ab illâ causa, sine qua potuit produci: atqui ille effectus potuit produci sine causa, à quâ fuit productus, cum potuerit produci ab aliâ, ut volunt adversarii: ergo ille effectus non dependeret à causa.

Prob. 2. Idem numero effectus non potest

produci nisi per hanc numero actionem : quia sicuti per actionem effectus recipit esse, ita ab illa effectus recipit unitatem numericam : atque hæc numero actio, per quam effectus fuit productus, non potuit emanare ab alia causa, quia qualibet actio cum sit accidens, induatur per suum principium à quo emanat, & in quo recipitur ; ergo idem numero effectus productus ab una causa, non potuit produci ab alia. Illud docet D. Thomas quodlibeto 5. art. 8. *Impossibile est, inquit, eundem filium nasci, siue sit alius pater, siue sit alia mater, sicut etiam non est idem numero sigillum, siue sit alia cera, siue sit aliud corpus sigilli, ex cujus impressione cera sigillatur.*

Obj. 1. calor productus ab igne A. potuit produci ab igne B. ergo unus effectus productus ab una causa, potuit produci ab alia. prob. ant. calor productus ab igne A. potest conservari ab igne B. ergo potuit produci, quia conservatio est continuata productio : unde agens quod habet virtutem conservandi, habet virtutem producendi.

Resp. neg. ant. ad cujus probationem dist. aliud apt. Calor productus ab igne A. potest conservari ab igne B. per accidens, con. per se, neg. quia aliquid potest conservare aliud duplici modo, scilicet per se, vel per accidens : illud dicitur conservare per se, quod conservat per eandem actionem, per quam res fuit producta : talis autem actio non potest pertinere ad plures causas, quia cum sit accidens, non potest reperiri in diversis subjectis : illud vero dicitur conservare per accidens, quod re-movet contraria : ita ignis B. dicitur per acci-dens

dens conservare calorem productum ab igne A, quia ab illo remover contraria.

Obj. 2. Causa universalis continet virtutem causarum particularium; ergo effectus productus à causa particulari, potest produci à causa universali.

Resp. dist. ant. causa universalis infinita continet virtutem causarum particularium, con. causa universalis finita, neg. quia causa infinita, qualis est Deus, cum habeat esse eminentissimum, continet eminentissimo modo virtutem omnium causarum.

Inst. atqui causa universalis finita, qualis est Sol, continet virtutem omnium causarum particularium; ergo nulla solutio.

Resp. dist. sub. causa universalis finita continet virtutem causarum particularium, secundum rationes específicas, con. secundum rationes individuales, neg. quia Sol potest quidem producere effectus ejusdem speciei, v. g. potest producere calorem ejusdem speciei cum illo qui producitur ab igne, & ita habet eandem virtutem secundum rationes específicas; non autem potest producere eundem numero calorem, quia non potest habere eandem numero actionem, ut jam probatum fuit: proinde Sol non continet virtutem causarum particularium secundum rationes individuales.

Obj. 3. Idem lepus occisus à Petro, potuit occidi à Paulo; ergo effectus productus ab una causa, potuit produci ab alia.

Respondeo concessio antecedente, neg. consequentiam: quia licet idem lepus occisus à Petro, potuerit occidi à Paulo, non ta-

men per eandem occisionem, & licet illud proveniret ab eadem actione, non tamen inde posset conjici, quod unus effectus productus ab una causa, potuerit produci ab alia: quia mors non est effectus positivus de quo ibi est quaestio, sed tantum est effectus privativus, cum mors sit privatio vitae.

Obj. ultimè. Aliqui prædestinati, qui nati sunt à parentibus reprobis, potuerunt nasci ab alijs: ergo unus effectus productus ab una causa, potuit produci ab alia. Prob. ant. si Adamus non peccasset, illi prædestinati nati fuissent: quia prædestinatio divina est infallibilis & immutabilis: atqui illi prædestinati non fuissent nati à parentibus reprobis: quia nullus fuisset reprobis, ut ait Gregorius magnus lib. 4. moralium c. 36. *Si parentem primum nulla peccati rubigo corrupisset, nequaquam ex se filios gehennæ generaret: sed illi qui nunc per redemptorem salvandi sunt, soli ab illo electi nascerentur*; ergo illi prædestinati potuerunt nasci ab alijs parentibus.

Resp. 1. neg. ant. & maj. quia illa suppositio quæ continetur in illa propositione, non potest admitti: quia, ut docet D. Thomas quodlibeto 5. art. 8. Deus non prædestinavit electos, nisi prescius futuri lapsus; & ideo prædestinati nati à parentibus reprobis, non potuerunt nasci ab alijs.

Resp. 2. quod alij dicunt, quod si Adamus non peccasset, fuisset alter rerum status, qui nunc non est, vel non elegisset illos homines quos nunc elegit, vel elegisset illos parentes, sine quibus prædestinati non poterant nasci.

Resp. 3. neg. ant. & concessa suppositione

neg. min. quia licet Adamus non peccasset, fuissent semper reprobi ex quibus nati fuissent predestinati; ut enim ait S. Thomas, in statu innocentie homines non nati fuissent, in justitia confirmati: potuissent ergo peccare & damnari, proinde distinguenda est auctoritas Gregorii magni, si parentem primum nulla peccati rubigo corrupisset, nequaquam ex se generaret filios gehennae, tales factos per peccatum originale conc. tales factos per liberum arbitrium & peccata personalia, neg. ita Divus Thomas explicat auctoritatem Gregorii magni: ait enim 1. p. q. 100. art. 2. ad 1. *Quod si Adam non peccasset, non generaret ex se filios gehennae: ita scilicet quod ab ipso peccatum contraherent quod est causa gehennae: possent tamen fieri filii gehennae per liberum arbitrium peccando.*



ARTICULUS IV.

Utrum substantia creata sit principium immediate operativum.

NOtandum est, circa praesentem difficultatem 4. esse opiniones. 1. Existimat substantiam absolute non operari, nec radicaliter nec proxime; sed sola accidentia operari. 2. Est opinio Scoti affirmantis solam substantiam esse principium tam radicale quam proximum & immediatum operandi; ita ut accidentia sint tantum dispositiones requirae ad introductionem effectus in passio.

3. Est Suarezii afferentis substantiam & accidentia esse simul & conjunctim principium proximum & immediatum operationis; quatenus substantia tribuit accidentibus aliquem influxum & virtutem, quâ mediante accidentia eleuantur ad operandum. 4. Denique est Sancti Thomæ qui docet substantiam esse principium radicale & remotum operandi.

Dicendum est, substantiam creatam esse principium operandi radicale & remotum, non verò principium proximum & immediatum.

Prob. Potentia immediate & proxime operativa est distincta realiter à substantia; ergò non est substantia. Prob. ant. accidens distinguitur realiter à substantia: atqui potentia immediate operativa est accidens; ergo potentia immediate operativa distinguitur realiter à substantia. Prob. min. illa potentia est accidens, & distinguitur realiter à substantia, quæ ordinatur ad actum accidentalem, per quem specificatur & completur: sed potentia operativa ordinatur ad actum accidentalem; ordinatur enim ad operationem quæ est accidens in creaturis; ergo potentia immediate operativa, est accidens. Prob. maj. actus & potentia. ex Aristotele, debent esse in eodem genere, quia omnis potentia specificatur per ordinem quem dicit ad actum; ergo illa potentia est accidens, quæ ordinatur ad actum accidentalem.

Obj. 1. ex sententia illorum qui dicunt substantiam nullomodo ex operari. Ex Aristotele cap. de sapore, *Ignis*, inquit, *non agit ut ignis, sed ut calidus*; ergò substantia nullomodo operatur.

Resp. distinguendo ant. Ignis non agit ut ignis, immediatè & proximè, con. radicaliter & remotè, neg. quia illâ authoritatè vult tantùm docere Aristoteles, substantiam ignis non immediatè operari propter rationem jam allatam in probatione conclusionis.

Obj. 2. Accidentia operantur independentè à substantia, & sine ullo influxu substantiæ; ergò sola accidentia operantur, tam proximè, quàm remotè.

Resp. dist. ant. Accidentia operantur sine ullo influxu substantiæ ut sunt virtutes substantiæ, con. ut sunt accidentia præcisè, neg. quia, licet accidentia non recipiant influxum à substantia, dicuntur tamen operari dependentè à substantia, quatenus accidentia non habent vim operandi, nisi quia sunt conjuncta substantiæ; & proinde substantia dicitur principium radicale operandi.

Obj. 3. Ex sententia illorum qui dicunt substantiam esse immediatè operativam. Idem est principium operandi, ac principium essendi: atqui forma substantialis est principium proximum essendi in compositis; ergò est principium proximum operandi.

Resp. dist. maj. Idem est principium radicale operandi, ac principium essendi, con. idem est principium proximum operandi ac principium essendi, neg. quia licet forma substantialis possit esse principium proximum essendi, non tamen potest esse principium proximum operandi. Forma substantialis potest esse principium proximum essendi, quia forma & esse substantiale sunt ejusdem ordinis: non potest

autem esse principium proximum operandi, quia operatio utpotè accidentalis, est diversi ordinis à forma.

Obj. 4. Quodlibet debet producere sibi simile: ergo una substantia debet producere aliam substantiam.

Resp. dist. ant. quodlibet debet producere sibi simile, vel proximè vel remotè, conc. proximè tantum, neg. quia substantia non potest producere aliam substantiam tanquam causa proxima & immediata propter rationem jam allatam in probatione conclusionis.

Obj. 5. Accidens proximè & immediatè producit aliud accidens: ergo una substantia potest immediatè & proximè producere aliam substantiam.

Resp. neg. conseq. & paritatem: ratio disparitatis est, quia cum accidens sit virtus operativa substantiæ, non indiget alio, ut fiat talis virtus.

Obj. ultimò: substantia Angeli est substantia creata: atqui substantia Angeli immediatè operatur; ergò substantia creata est proximè & immediatè operativa. Prob. min. intellectio, per quam Angelus se cognoscit, procedit immediatè à substantia: ergò substantia Angeli est immediatè operativa. Prob. ant. intellectio quâ Angelus se cognoscit, procedit immediatè à specie representante objectum, quæ species concurret effectivè ad intellectionem: atqui substantia Angeli seipsam representat; ergo intellectio procedit immediatè à substantia.

Resp. neg. min. ad cujus probationem dist.

ant. intellectio procedit à ſubſtantia, ut habet rationem objecti con. procedit à ſubſtantiam ut habet rationem potentię, heg. nullū eſt inconueniens quod actio & objectum ſint in diuerſo genere, eſt autem maximum inconueniens, quod actio & potentia non ſint in eodem genere, ut probatum fuit.



ARTICULUS V.

Utrum accidens producat aliud accidens & ſubſtantiam ſine ullo influxu ſubſantię.

Dicendum eſt, accidens non indigere aliquo peculiari & actuali influxu ſubſantię, ad producendos effectus ſubſantiales.

Prob. Accidens per ſe eſt ſufficiens ad producendos effectus ſubſantiales; ergo accidens non indiget aliquo peculiari & actuali influxu ſubſantię. Prob. ant. quod eſt virtus ſubſantię, eſt ſufficiens ad producendos effectus ſubſantiales: atqui accidens eſt virtus ſubſantię; ergo per ſe eſt ſufficiens ad producendos effectus ſubſantiales. Prob. mjn. accidens eſt propter ſubſtantiam, in qua debet inhærere, & quam debet perficere, & in eſſe & in operari; ergo accidens eſt virtus ſubſantię.

Obj. 1. Omnis cauſa instrumentalis debet recipere virtutem à cauſa principali: atqui accidens eſt cauſa instrumentalis, reſpectu effectuum ſubſantialium quos producit; ergo

debet recipere virtutem sive influxum actua-
lem à causa principali.

Resp. dist. maj. omnis causa instrumenta-
lis, debet recipere virtutem à causa princi-
pali, si non sit virtus substantiæ, con. si sit
virtus substantiæ, neg. quia cum accidens sit
virtus substantiæ, non est necesse ut fiat talis
virtus per aliam virtutem, quia sic daretur
processus in infinitum.

Obj. 2. & ultimò: potentiæ vitales non
possunt exercere suos actus sine influxu actuali
animæ rationalis; ergo accidia non possunt
operari sine actuali influxu substantiæ. prob.
ant. quando intellectus v. g. nimium vacat
contemplationi, potentiæ non exercent suos
actus, v. g. oculus non videt, auris non audit,
& hujusmodi: atqui hoc solum provenit de-
fectu influxus actualis animæ rationalis; er-
go potentiæ vitales non possunt exercere suos
actus sine actuali influxu animæ rationalis.

Resp. neg. ant. & min. quia hoc non pro-
venit ex defectu influxus actualis animæ, sed
ex eo quòd quando anima applicat intelle-
ctum ad contemplationem valde intensam,
spiritus vitales consumuntur, qui requiruntur
ad intellectionem, saltem dispositivè, defectu
quorum, aliæ potentiæ non possunt exercere
suas operationes.

Inst. Si potentiæ vitales non indigerent in-
fluxu actuali animæ rationalis, & si suffice-
ret tales potentias dimanasse ab anima, se-
queretur, quòd si divinâ virtute intellectus se-
pararetur ab anima, & ipsa anima ad nihilare-
tur, adhuc ille intellectus sic separatus elice-
ret operationes quæ possent attribui animæ

rationali : atqui illud est absurdum ; ergo & illud unde sequitur.

Resp. neg. maj. quia ille intellectus positò quòd separaretur ab anima, non esset amplius vitalis, quia ubi potentiæ desinunt esse in sub-
jecto, desinunt etiam esse vitales : siquidem de ratione vitæ ipsarum potentiaturum est, quòd illæ potentiæ sint conjunctæ cum primo prin-
cipio radicali vitæ, & ita cùm ille intellectus separatus ab anima, non esset vitalis, non eliceret operationes vitales, & ita non tri-
buerentur animæ.



ARTICULUS . VI.

*Utrùm proprietates fluant ab essentiâ per actio-
nem distinctam.*

NOrandũ est, emanationẽ sive resultantiã nihil aliud esse quàm productionẽ unius ad productionem alterius, ex vi naturalis connexionis quã simul habent; unde illa dicuntur dimanare ab aliquo, quæ ad ejus productionẽ producuntur per quandam naturalem connectionem; sic calor producitur cum igne, frigiditas cum aqua. His ita positis, quæritur utrùm essentiâ producat suas proprietates per actionem distinctam ab actione sui productiva, vel utrùm ipsæ proprietates emanent ab essentiâ per resultantiam.

Dicendum est, proprietates fluere ab essen-
tia, non per actionem distinctam, sed per na-
turalem resultantiam, hoc est per actionem generantis, quã producitur essentiâ.

nus attingit ! mediante substantiâ proprietates illi naturaliter debitas, dicitur, resultantia.



ARTICULUS VII.

Per quid constituatur causa instrumentalis in esse causæ instrumentalis.

Notandum est. 1. Quod causa instrumentalis est causa agens in virtute alterius causæ principalis. Causa agens continet rationem generis, quia per hoc convenit cum causa principali. Ceteræ particulæ continent differentiam, quia in hoc differt causa principalis à causa instrumentali, quod causa principalis agat virtute propria & connaturali, completâ & permanente, causa verò instrumentalis agit per virtutem impressam à causa principali, & illa virtus est incompleta, fluxa & transiens, quatenus est via & medium ad effectum causæ principalis, & transit cum ipsa actione, illa autem virtute elevatur instrumentum, & recipit sufficientiam & efficientiâ.

Notandum est 2. & ultimò. Instrumentum multipliciter dividi. 1. Dividitur in morale & physicum. Morale est illud quod non influit physicè in effectum, sed ad præsentiam illius causa physica operatur, talis est sonus tubarum excitans milites ad pugnam. Instrumentum physicum est illud, quod realiter influit in effectum, sicut securis scièdendo lignum. 2. instrumentum physicum subdividitur in naturale, supernaturale & artificiale. Naturale est

illud, quod ex natura sua institutum est ad effectum aliquem producendum, ut granum tritici, & omnia semina plantarum. Supernaturale est illud quod attingit effectum supernaturalem, ut sunt Sacramenta. Artificiale denique est illud quo fit aliquod artefactum. 3. instrumentum physicum iterum dividitur in conjunctum & separatum. Conjunctum est illud quod non tantum indiget motione causæ principalis, sed etiam actuali conjunctione, ut calamus scribentis. separatum est illud quod indiget tantum motione causæ principalis, ut Sacramenta.

Dicendum est, causam instrumentalem physicam constitui formaliter in esse instrumenti, ex eo quod operatur ut mota à causa principali.

Prob. Causa instrumentalis definitur causa agens in virtute causæ principalis; ergo causa instrumentalis physica constituitur in esse instrumenti per virtutem causæ principalis. prob. consequ. si nihil reciperet à causa principali, non ageret per virtutem causæ principalis: sed ut patet ex ipsa definitione instrumenti, causa instrumentalis agit per virtutem causæ principalis; ergo causa instrumentalis recipit virtutem aliquam à causa principali.

Obj. 1. Illa virtus quæ imprimeretur instrumento, vel esset proportionata, & sufficiens ad producendum effectum, vel non esset proportionata: secundum dici non potest, quia indigeret altera motione, ut per illam fieret sufficiens & proportionata; primum etiam dici non potest, quia si illa virtus esset proportionata, efficeret instrumentum causam principalem

palem : siquidem illa causa est principalis quæ habet virtutem proportionatam ad producendum effectum , ergo instrumentum non recipit virtutem à causa principali.

Resp. Illam virtutem esse proportionatam per modum instrumenti ad producendum effectum , nec tamen constituit instrumentum in esse causæ principalis , quia illa virtus non est in instrumento per modum permanentis , sed tantum per modum transeuntis.

Obj. 2. Illa virtus quæ imprimitur instrumento est necessaria , ut instrumentum subiciatur , subordinetur , & obedientialiter se habeat ad causam principalem : atqui in creatura , ut docet Sanctus Thomas , datur potentia obedientialis , ut ea media fiat quidquid creator disposuerit ; ergo illa virtus non requiritur , ut instrumentum constituatur in esse instrumenti.

• Resp. distinguendo min. datur potentia obedientialis negativa , radicalis & remota concedo , positiva , formalis & proxima nego : quia illa potentia obedientialis de qua loquitur Sanctus Thomas , nihil aliud est quam ipsa entitas creaturæ non habens repugnantiam obediendi Deo , quod est esse tantum elevabile , & non elevatum : unde requiritur virtus aliqua impressa à causa principali , ut instrumentum elevetur ad producendum effectum.

Inst. datur in creatura potentia obedientialis passiva , per quam ita subordinetur Deo , ut absque ullo superaddito possit recipere formas supernaturales. v. g. fidem ; gratiam , & hujusmodi : ergo à pari datur in creatura po-

tentia obedientialis activa, per quam absque superaddito potest elicere actus supernaturales.

Resp. neg. conseq. & paritatem, ratio disparitatis est, quia licet aqua possit immediate recipere calorem, non potest tamen immediate producere calorem in subiecto externo, & ita licet, creatura possit immediate recipere formas supernaturales, non tamen potest producere effectus supernaturales, nisi mediante aliqua virtute supernaturali.

Obj. ultimò. Sacramenta sunt instrumenta physica. gratiæ: atqui Sacramenta non recipiunt aliquam virtutem; ergo falsum est, quod instrumenta debeant recipere aliquam virtutem à causa principali. Prob. min. Si Sacramenta reciperent aliquam virtutem, vel illa virtus esset spiritualis vel corporea, non potest dici quod sit spiritualis, quia virtus spiritualis non potest recipi in subiecto corporeo, non potest etiam dici quod sit corporea, quia virtus corporea non potest dari ad effectum spirituale; ergo illa virtus nulla est.

Resp. neg. min. ad cujus probationem dist. illam propositionem. Virtus spiritualis non potest recipi in subiecto corporeo, per modum permanentis concedo: per modum transeuntis nego: illa distinctio est Sancti Thomæ 3. parte quæst. 62. art. 4. ad 1. qui docet, quod nullum est inconveniens, quod res spiritualis transiens & incompleta, recipiatur in aliquo subiecto corporeo.



ARTICULUS ULT.

*Utrum causa instrumentalis habeat actionem
sibi q propriam.*

Dicendum est, causam instrumentalem habere actionem sibi propriam, præviâ & dispositivam, ut possit esse instrumentum causæ principalis.

Prob. Si instrumentum non haberet actionem sibi propriam & nihil ageret, non esset instrumentum, sed medium: atqui instrumentum non est tantum mediû; ergo instrumentum debet habere actionem sibi propriam. Prob. maj. Illud dicitur medium, quod deferret virtutem alterius, & ex se nihil agit, ut aër, est tantum medium deferens species visibiles: ergo si instrumentum deferret tantum virtutem causæ principalis, & non haberet actionem sibi propriam, esset tantum medium & non instrumentum. Præterea omne instrumentum propriè & formaliter sumptum, est causa efficiens: atqui de ratione causæ efficientis est operari, sive elicere aliquam actionem, non autem se habere merè passivè; ergo ut instrumentum possit esse instrumentum causæ principalis, debet habere actionem sibi propriam.

Obj. 1. Si causa instrumentalis haberet actionem sibi propriam, vel illa actio esset distincta ab actione quam elicit in virtute causæ principalis, vel non esset distincta: pri-


mum dici non potest, quia deberet habere effectum diversum ab effectu causae principalis, & sic non esset causa instrumentalis: secundum etiam dici non potest, quia talis actio non esset praevia; ergo non est de ratione instrumenti habere actionem sibi propriam.

Resp. Actionem propriam instrumenti aliquando esse distinctam realiter ab actione causae principalis, sicut ablutio aquae & infusio Gratiae in Baptismo, & tunc habent effectus distinctos realiter, aliquando verò est realiter eadem actio, & illae actiones distinguuntur solum virtualiter, ut patet in securi, cujus actio propria est scindere, quia hoc facit propria virtute: actio verò instrumenti est dividere artificiosè, sive *dividendo facere lectum*, ut inquit S. Thomas, & tunc illae actiones virtualiter distinctae habent effectus virtualiter distinctos.

Obj. ultimò. Si instrumentum haberet actionem propriam, deberet illam exercere circa subjectum, in quo producit effectus causae principalis: atqui multa sunt instrumenta, quae cum sint corporea, non possunt operari circa subjectum spirituale, v.g. Sacramenta non possunt operari circa animam, vel etiam non possunt operari circa subjectum, ut potè valde remotum, v.g. Josue circa Solem, quia illa instrumenta non possunt tangere huiusmodi subjecta: ergo non est de ratione instrumenti habere actionem sibi propriam.

Resp. distinguendo illam propositionem. Illa instrumenta non possunt tangere subjectum, contactu physico concedo, contactu virtutis nego, quia licet instrumenta, tam na-

turalia quam artificialia , debeant conjungi
passo contactu physico , quia illorum virtus
est finita & limitata , tamen cum infinita sit
Dei virtus , non est necesse , ut instrumenta
quibus utitur , sint physicè præsentia subje-
ctis.



QUÆSTIO. III.

*De Causis materiali, formali, &
exemplari.*



ISTA quæstio duos dumtaxat, com-
plectetur articulos. In 1. Quæretur
quid sit causalitas causæ materialis,
& causæ formalis. In 2. & ultimo.
Quid sit causa exemplaris , & ad quod causæ
genus reducat.ur.



ARTICULUS I.

*Quid sit causalitas causæ materialis, & causæ
formalis.*

Dicendum est , causalitatem causæ maté-
rialis & formalis , non consistere in ali-
quo utrique superaddito , sed præcisè
in communicatione propriæ entitatis.

Prob. Causalitas materiæ & formæ, est illud per quod materia & forma sunt actu causantes: atque materia & forma fiunt actu causantes compositum per communicationem propriæ entitatis; ergo non fiunt actu causantes per aliquid superadditum. Prob. min. materia & forma causant per modum partis: atque de ratione partis est se communicare toti: ergo materiæ & formæ causalitas consistit in tali communicatione, & proinde causalitas materiæ & formæ, non addit aliquam formalitatem supra materiam & formam.



ARTICULUS II.

Quid sit causa exemplaris, & ad quod causæ genus reducat.

Dicendum est 1. causam exemplarem definiri formam objectam intellectui intra ipsum existentem, ad quam aspiciens artifex operatur.

Prob. & explicatur definitio. 1. Dicitur forma, quia est illud quo res aliqua arte facta determinatur extrinsecè ad certam speciem. 2. Dicitur forma objecta intellectui, ut distinguatur ab habitu & specie intelligibili, quæ non habent rationem objecti, sed tantum sunt principium actionis. 3. Dicitur, intra ipsum intellectum existens, ut distinguatur ab imagine extrinseca, quam artifex sibi imitandam proponit. 4. Denique dicitur, ad quam aspiciens artifex operatur, ut distinguatur à forma in-

turali , quæ est principium intrinsecum operationum.

Dicendum est². & ultimò , causam exemplarem sive idealem , posse reduci ad causam formalem extrinsecam.

Prob. ex S. Thoma 5. Metaph. lectione 2. causa formalis , inquit , comparatur dupliciter , uno modo sicut intrinseca rei , & hæc dicitur species , alio modo sicut extrinseca à re , ad cuius similitudinem rei fieri dicitur , & secundum hoc exemplar res dicitur forma : ergo evidenter patet causam exemplarem esse causam formalem extrinsecam.



QUÆSTIO IV.

De causa finali.

QUAMVIS omnium prima & nobilissima sit causa finalis , postremo tamen loco consideratur à Physica ; tum quia ejus causalitas est occultior ; tum quia in executione , ad quam maximè attendit physica , est posterior.



ARTICULUS. I.

Quid & quotuplex sit finis.

Dicendum est 1. finem definiri illud cujus gratia aliquid fit.

Prob. & explicatur. Causa finalis per illa vocabula convenit cum alijs causis & differt ab illis, nam materia causat recipiendo, forma actuando, efficiens influendo, finis verò movendo & alliciendo per suam bonitatem.

Dicendum est 2. finem multipliciter dividi.

1. Finis dividitur in formalem & objectivum. Finis formalis est operatio, per quam consequimur rem aliquam. finis objectivus est illa res quam consequimur.

2. Finis dividitur in finem ultimum in suo genere, & in finem simpliciter ultimum. Finis ultimus in suo genere est ille ad quem omnia quæ sunt in illo genere, referri debent, ut victoria in bello, sanitas in medicina, sed ille finis potest referri ad alium, ut victoria refertur ad reipublicæ utilitatem. Finis simpliciter ultimus est ille, ad quem omnia referri debent, & qui ad ulteriorem finem non ordinatur, & qui appetitur propter seipsum, quique consequenter, est complementum omnium desideriorum.



ARTICULUS II.

Quenam sit ratio formalis constitutiva finis in actu primo.

NOtandum est, finem posse considerari dupliciter, scilicet in actu primo & in actu secundo. Actus primus est virtus seu potentia causandi. Actus secundus est ipsa operatio, ut in igne, actus primus est virtus calefactiva, actus secundus est ipsa calefactio. Cum igitur finis suam potissimum causalitatem exerceat circa voluntatem, hoc est illam alliciat & moveat ad sui consecutionem, quaeritur, quanam sit ratio objectiva in fine, per quam finis habet potentiam movendi voluntatem, utrum scilicet finis possit movere voluntatem, vel per bonitatem, vel per malum; ita ut voluntas possit ferri aliquando in malum, ut malum est.

Dicendum est, rationem formalem constitutivam finis in actu primo esse bonitatem finis, ita ut malum sub ratione mali, non habeat virtutem movendi voluntatem.

Prob. Illud est ratio formalis constitutiva finis in actu primo, quod habet virtutem & potentiam movendi voluntatem: atqui solum bonum habet virtutem & potentiam movendi voluntatem; ergo solum bonum est ratio formalis constitutiva finis in actu primo. Prob. min. voluntas non potest appetere malum ut malum; ergo solum bonum habet virtutem

movendi voluntatem, prob. ant. Voluntas non potest appetere & amare, nisi illud quod sibi proponitur ut conveniens : quia debet esse proportio & convenientia inter potentiam & objectum : atqui malum ut malum, non potest proponi voluntati ut conveniens ; ergo voluntas non potest appetere & amare malum ut malum est. Prob. min. quod est nocivum, ingratum & abominabile, non potest proponi voluntati ut conveniens : atqui malum ut malum est nocivum, ingratum & abominabile ; ergo, &c. Præterea sicuti intellectus non potest assentiri falso, nisi sub ratione veri, ita voluntas non potest appetere malum, nisi sub ratione boni, quia sicut se habet intellectus ad verum, ita se habet voluntas ad bonum.

Obj. 1. Malum ut malum potest movere voluntatem, si malum ut malum pertineat ad ipsam voluntatem : atqui malum ut malum pertinet ad voluntatem ; ergo malum ut malum potest movere voluntatem. Prob. min. bonum pertinet ad voluntatem ; ergo & malum, prob. conf. Eadem est potentia oppositorum, hoc est, eadem potentia quæ attingit unum oppositum, attingit & aliud : atqui bonum & malum sunt opposita ; ergo pertinent ad eandem potentiam, nempe voluntatem.

Resp. negando min. & conf. & ad probationem dist. maj. cum sancto Thoma prima secundæ q. 8. a. 1. ad 1. Eadem est potentia oppositorum, tendens in opposita diverso modo con. eodem modo, neg. quia, ut inquit sanctus Thomas : *Voluntas se habet ad bonum & ad malum, se habet ad bonum, ad illud*

appetendū, se habet ad malum, ad illud fugiendū.

Inst. Atqui voluntas se habet ad malum ad illud prosequendum; ergo nulla solutio. prob. subf. Potentia libera se habet ad opposita prosequenda ex Aristotele: atqui voluntas est potentia libera, & bonum & malum sunt opposita; ergo voluntas se habet ad malum, ad illud prosequendum.

Resp. neg. sub. Ad cuius prob. dist. maj. cum S. Thoma. Potentia libera se habet ad opposita prosequenda, quæ sub objecto convenienti continentur, con. quæ non continentur neg. quia ut inquit S. Thomas, nulla potentia prosequitur: nisi suum objectum conveniens: objectum autem voluntatis est bonum, unde ad illa prosequenda se habet voluntas, quæ sub bono continentur.

Inst. Iterum. malum ut malum movet voluntatem; ergo continetur sub objecto voluntatis, prob. ant. Voluntas versatur circa malum, ut illud fugiat; ergo malum ut malum movet voluntatem ad talem fugam.

Resp. neg. ant. ad cuius prob. dist. aliud ant. voluntas versatur circa malum & movetur à bono opposito con. & movetur ab ipso malo neg. quia quando voluntas versatur circa malum ad illud fugiendum, non movetur ab ipso malo ad talem fugam, sed à bono opposito tali malo; ideò enim voluntas fugit malum, quia amat oppositum bonum.

Obj. 2. Damnati appetunt non esse: atqui non esse, nullam habet rationem boni; ergo damnati appetunt non esse ut malum.

Resp. dist. min. non esse nullam habet rationem boni, secundum se consideratum con. con-

consideratum secundum quod esset terminativum miseriarum quibus cruciatur damnati, neg. quia quod destruit naturam non potest habere rationem boni: atqui non esse secundum se consideratum destruit naturam; ergo secundum se nullam habet rationem boni, sed non esse comparatum ad miseras quibus cruciantur damnati & quas illud non esse terminaret, habet aliquam rationem boni, non quidem positivi sed privativi, quod consistit in carentia mali.

Obj. 3. Angeli & primi parentes peccaverunt absque ulla ignorantia, quia cum ignorantia sit pœna peccati, non potuit antecedere peccatum; ergo Angeli & primi parentes appetierunt malum ut malum.

Resp. distinguendo ant. Angeli & primi parentes peccaverunt, absque ulla ignorantia propriè & formaliter sumpta con. impropriè & virtualiter neg. quia in intellectu Angeli & hominis possunt reperiri quatuor defectus. Primus est nescientia quæ est carentia cognitionis alicujus rei quam quis non tenetur scire. 2. Est ignorantia quæ est carentia cognitionis alicujus rei quam quisque tenetur scire. 3. Est positivus error consistens in falso de re aliqua judicio. 4. Denique est inconsideratio privativa quæ consistit in carentia actualis considerationis eorum quæ intellectus pro illa temporis differentia tenetur actualiter considerare. Primus Autem defectus nescientia scilicet non potuit præcedere peccatum Angelorum & parentum, cum enim non sit culpabilis non potest esse causa peccati. Secundus nempe ignorantia non potuit Angelorum & parentum peccatum præcedere, quia Angeli & parentes

rentes habebant cognitionem omnium rerum.

3. Defectus est error positivus, qui est gravissimum malum intellectus, non quidem malum culpæ, sed malum pœnæ, malum autem pœnæ supponit culpam, & sic non potuit esse error in intellectu Angelorum & parentum; proinde superest quod inconsideratio privativa præcessit peccatum Angelorum & parentum.

Inst. Atqui in Angelis non fuit inconsideratio; ergo nulla solutio. Prob. sub. sancti Patres docent Angelos peccasse ex malitia, & parentes ex infirmitate: atqui nulla est inconsideratio in illis qui peccant ex malitia, sed potius plena consideratio & perfecta deliberatio; ergo non fuit inconsideratio in Angelis.

Resp. neg. sub & min. quia sancti Patres docentes Angelum peccasse ex malitia, & hominem ex infirmitate, volunt tantum ostendere hominē fuisse magis veniā dignum quam Angelum: homo quidē magis erat dignus veniā, quia inconsideratio, quæ præcessit peccatū hominis, proveniebat ex infirmitate carnis cum ipso congenitæ; inconsideratio verò quæ præcessit peccatū Angeli, proveniebat ex pura malitia, quia nihil erat in Angelo quod posset illum retrahere à consideratione quam tunc habiturus erat.

Inst. Iterum atqui non fuit inconsideratio in primis parentibus; ergo nulla solutio. Prob. sub. 1. Eva consideravit præceptum divinum; ergo non fuit in illa inconsideratio. Prob. ant. fuit admonita de Divino præcepto à serpente qui dixit, *Cur præcepit vobis Deus*; ergo Eva

Q

consideravit præceptum. 2. Adamus peccavit nullo præsupposito errore intellectus; quia *non fuit seductus*, ut ait D. Paulus 1. ad Timotheum c. 2. ergo vidit malum ut malum.

Rep. 1. Negando sub: & ad prob. dist. ant. Eva consideravit Divinum præceptum in aliquo instanti ante peccatum con. in instanti quo peccavit neg. quia duo fuerunt Evæ proposita à serpente. 1. Serpens petiit ab Eva, cur Deus præceperat nè fructum manducarent. 2. Proposuit similitudinem Dei quando dixit, *eritis sicut dij*. In illo autem instanti quo Eva fuit admonita, de præcepto Divino, consideravit præceptum. In alio autem instanti quo Evæ fuit proposita Dei similitudo, non consideravit præceptum Divinum, ipsa autem non credidit se posse fieri Deum, quia hoc tenebat impossibile, nec credidit se posse esse omnino æqualem Deo, quia eadem est impossibilitas, cum Deus sit infinitus, sed fortè credidit, ut ait Tostatus, se posse habere quandam similitudinem cum Deo, scilicet quod sicut Deus nullo alio indigebat, ita illa nullo alio indigeret & omnia scirèt, & ita Eva fuit immersa in consideratione illius felicissimi status quem serpens proponebat, ut Divini præcepti considerationem abjecerit, & in illa inconsideratione peccavit.

Resp. 2. dist. authoritatem Divi Pauli. Adamus non fuit seductus ex colloquio serpentis, conc. ex inordinato mulieris amore, neg. quia serpens cum sola muliere locutus est, & licet uxor narraverit omnia quæ locutus fuerat serpens, non credidit Adamus, & ita dicitur quod non fuit seductus à serpente, sed seductus ab uxore, nam ubi uxor osten-

derit fructum vetitum, manducavit Adam, ut complaceret uxori.

Inst. Si peccatum Adami processit ex inconsideratione, sive ex judicio inconsiderato, tale judicium debuisset esse culpabile & voluntarium: atqui tale judicium non fuit culpabile & voluntarium; ergo peccatum Adami non processit ex judicio inconsiderato. Prob. min. si tale judicium fuisset culpabile & voluntarium, vel fuisset tale per actum voluntatis quem regulabat & in quo consistebat primum peccatum Adami, vel per alium actum priorem: atqui non poterat esse voluntarium per actum voluntatis quem regulabat, neque per alium actum priorem; ergo per nullum. Prob. min. quoad 1. partem: tale judicium est prius actu voluntatis quem regulabat, quia omnis regula est prior regulato & mensurato; ergo tale judicium non fuit culpabile & voluntarium per actum voluntatis quem regulabat. Prob. min. quoad 2. partem: ille actus prior debuisset regulari per aliud judicium inconsideratum de quo idem posset fieri argumentum, & sic in infinitum; ergo tale judicium non erat culpabile & voluntarium per actum priorem.

Resp. Dicendo tale judicium fuisse voluntarium & culpabile per actum voluntatis quem regulabat, quando verò dicitur tale judicium fuit prius illo actu voluntatis, distinguenda est illa propositio, judicium fuit prius in genere causæ formalis extrinsecæ & regulativæ conc. in genere causæ efficientis nego, quia intellectus per tale judicium movit Adami voluntatem quoad specificationem, &

ideo illud iudicium fuit prius ipso actu voluntatis in genere causæ formalis extrinsecæ & regulativæ: voluntas verò movit intellectum per suam malam volitionem, quoad exercitium, ad tale iudicium inconsideratum, & ita actus voluntatis fuit prior in genere causæ efficientis. Illud autem non implicat quod illi duo actus se mutuò causent, quod scilicet actus voluntatis causet actum intellectus, & quod actus intellectus causet actum voluntatis, quia illud est in diverso genere causæ.

Obj. ultimò sunt aliqui qui peccant ex industria, hoc est qui cognoscentes malum, faciunt illud; juxta illud Job. *Quasi de industria ab eo recesserunt & vias ejus intelligere noluerunt;* ergo quorundam voluntas fertur in malum nullo præsupposito errore intellectus.

Resp. dist. cons. Quorundam voluntas fertur in malum nullo præsupposito errore intellectus speculativo vel practico in communi conc. practico in particulari neg. quia duplex datur error, scilicet speculativus & practicus. Speculativus est ille quo aliquis judicat licere quod non licet. Error practicus est ille quo quis judicat aliquid esse faciendum quod non licet, si judicet illud esse faciendum in communi, est error practicus in communi, si verò judicet aliquid esse faciendum in particulari quod non licet, est error practicus in particulari; in illis autem qui peccant ex industria, non est error speculativus, quia sciunt illud non licere, neque est error practicus in communi, quia sciunt in communi illud non esse faciendum, sed est error practicus in particulari, siue iudicium

quo judicant hic & nunc esse eligendum,
quod revera eligendum non est.



ARTICULUS III.

Quenam sit ratio formalis constitutiva finis in actu secundo.

Dicendum est, finem actu movere voluntatem, & constitui in actu secundo per actionem voluntatis, ut pender à fine,

. Prob. Illud est causalitas finis in actu secundo, per quod causa de non causante fit actu causans: atqui finis de non causante fit actu causans per actionem voluntatis; ergo actio voluntatis est ratio formalis constitutiva finis in actu secundo. Prob. min. finis constituitur in actu primo, in quantum est aliquid bonum & appetibile; ergo transit de illo actu primo ad actum secundum, in quantum appetitur & amatur: atqui actualis appetitio est actio voluntatis ut pender à fine, sive ut fit propter finem; ergo cum per actionem voluntatis finis transeat de actu primo ad actum secundum, finis per eandem actionem constituitur in actu secundo.

Obj. 1. Causalitas finis antecedit omnem actum voluntatis; ergo actus voluntatis non est causalitas finis. prob. ant. omnis actus voluntatis est effectus finis; ergo causalitas finis antecedit omnem actum voluntatis.

Resp. neg. ant. ad cujus prob. dist. ant. Ac-

Q₃

tus voluntatis , ut est effectivè elicitus à voluntate, est effectus finis , con. actus voluntatis, ut pendet à fine, est effectus finis neg. quia actio voluntatis , sive amor finis potest considerari sub duplici formalitate. 1. Ut respicit voluntatem à qua elicitur. 2. Ut respicit finem propter quem elicitur : sic actio voluntatis quatenus est à fine præcedit se ipsam quatenus elicitur effectivè à voluntate, & proinde etiã actus voluntatis , ut respicit finem à quo dependet, est causalitas finis in actu secundo , ut verò est elicitus effectivè à voluntate , est effectus finis.

Obj. 2. Actus voluntatis, est causalitas voluntatis, quia per amorẽ voluntas constituitur actu amans; ergo actus voluntatis non potest esse causalitas finis.

Resp. dist. conseq. Actus voluntatis non potest esse causalitas finis, secundum eandem formalitatem con. secundum diversam neg. quia sub diverso respectu , actus voluntatis est causalitas finis, & causalitas voluntatis ; siquidem amor, ut pendet à fine, & ab objecto amato, est causalitas finis, ut verò est actus vitalis procedens à voluntate, est causalitas voluntatis.



ARTICULUS IV.


Utrum solus homo agat propter finem.

NOtandum est, omnia agentia agere tribus modis. 1. Quædam sunt agentia quæ agunt propter finem quem non cognoscunt, ut lapis non cognoscit centrum ad quod tendit. 2. Alia agentia apprehendunt quidem finem quæ est finis, & ejus bonitatem, non tamen cognoscunt proportionem & habitudinem finis ad media, & mediorum ad finem, & ita non cognoscunt finem formaliter, ita equus apprehendit avenam, tanquam rem quandam quæ est finis materialiter, non verò formaliter, quia non cognoscit habitudinem quam avena dicit ad media, hoc est ad agrorum culturam, unde equus non est sollicitus colendi agros. 3. Alia denique agentia non solum apprehendunt rem quæ est finis, sed etiam apprehendunt finem formaliter, hoc est, cognoscunt habitudinem quam dicit finis ad media. v. g. homo non solum cognoscit bonitatem fructuum, sed etiam cognoscit habitudinem quam dicunt fructus ad media necessaria, ad procurandos tales fructus, ut sunt cultura, irrigatio, impinguatio agrorum, unde illa omnia facit homo sollicitus, ut singulis annis copiosos fructus possit percipere.

Dicendum est, omnia agentia naturalia agere propter finem, sed diversimodè. Agentia

quæ nullomodo cognoscunt finem, agunt propter finem executivè, quia eliciunt actiones tendentes ad finem quem non cognoscunt, ut sagitta tendit ad scopum quem non cognoscit. Agentia illa quæ apprehendunt rem quæ est finis, & ejus bonitatem agunt propter finem, non solum executivè, sed etiam apprehensivè, quatenus apprehendunt finem, propter quem operantur. Agentia deniquè quæ cognoscunt formaliter bonitatem finis, agunt propter finem directivè, quatenus se in finem dirigunt; alia verò agentia diriguntur ab autore naturæ.

Prob. Omnia agentia in communi agere propter finem, quia si tolleretur causa finalis, agentia nullomodo agerent: atqui illud non potest dici; ergo nec aliud. prob. maj. si tolleretur causa finalis, tollerentur aliæ causæ; ergo si tolleretur causa finalis, agentia naturalia non agerent. prob. ant. sublata primâ causâ tolluntur & aliæ; quia sublato primo movente cessant secunda moventia: atqui causa finalis est omnium prima, ut docet S. Thomas; ergo sublata causa finali tolluntur aliæ causæ, & proinde omnia agentia naturalia agunt propter finem, sed solus homo agit propter finem directivè, quia solus homo cognoscit habitudinem finis ad media, & mediorum ad finem.



QUÆSTIO V. & ULT.

De Causis per accidens.

TR E S tantum complectetur articulos ista quæstio. In 1. Disputabitur de fortuna & casu. In 2. De fato. In 3. De monstro.



ARTICULUS I.

Quid sint fortuna & casus, & an dentur.

Dicendum est 1. fortunam & casum definiri causas per accidens efficientes, ex quibus præter intentionem sequitur effectus.

Prob. & explicatur talis definitio. Quando fortuna & casus dicuntur causæ efficientes, per hoc conveniunt cum cæteris causis efficientibus. per cæteras verò particulas contentas in definitione, differunt ab aliis causis efficientibus. fortuna autem & casus inter se differunt, quia fortuna dicitur esse ex electione, casus verò non dicitur ex electione. fortuna dicitur ex electione, non quod fortuna agat ex electione, consilio & proposito, sed quia fortu-

na dicitur de causis quæ agunt ex electione & deliberatione, ut quando Absalon fugiens implicatis arboris ramis capillis suspensus hæsit, illud tribuitur fortunæ, quia non intendebat talem effectum, sed fugam. Casus verò non dicitur ex electione, quia convenit causis quæ non agunt ex deliberatione, ut quando ex effusa imbrium copiâ tumescunt flumina, & domos & agros devastant, illud tribuitur casui, quia finis pluvie non est agrorum & domorum devastatio, sed tantum terræ humectatio.

Dicendum est 2. & ultimò, non dari fortunam & casum respectu Dei, bene tamen respectu Angelorum & hominum.

Prob. conclusio quoad primam partem ex Divo Augustino, & ex Divo Thoma. 1. Divus Augustinus lib. 3. de Trinitate cap. 4. docet quod nihil sit visibiliter & sensibiliter in ista totius nature amplissimâ & immensa republica, quod non in interiore & invisibili aulâ summi Imperatoris, aut jubeatur, aut permittatur. 2. Divus Thomas hoc ipsum explicat isto exemplo. Si duo servi, inquit, alicujus Domini mittantur ab eo ad eundem locum, uno de altero ignorante, concursus duorum servorum, si ad ipsos servos referatur, casualis est, quia accidit præter utriusque intentionem, Si autem referatur ad Dominum, non est aliquid casuale, sed per se intentum; ergo cum omnia jubeantur aut permittantur à Deo, & cum Deus omnia cognoscat, nihil potest esse fortuitum & casuale respectu Dei.

Prob. Conclusio quoad secundam partem. Plurima possunt evenire in illis quæ fiunt ab Angelis & hominibus præter intentionem,

quia nulli creaturæ convenit cognitio rerum naturalium; ergo multi effectus possunt fortuito evenire, quia quod est ignoratum ab aliquo, potest fieri præter illius intentionem. v.g. Si Deus præcipiat Angelis, ut evertant aliquam Civitatem, ex cujus Civitatis everfione debet sequi civium conversio, & Deus non declaret Angelis futuram civium conversionem, tunc illa conversio erit casualis respectu Angelorum, quia eveniet præter illorum intentionem.



ARTICULUS II.

De Fato.

Dicendum est, fatum definiri à Philosophis Catholicis, ordinationem & dispositionem causarum secundarum, derivatam à divina providentia, ad executionem effectuum quos per ipsas disponit exequi & exercere.

Prob. & explicatur autoritate Boëtii de Consolatione Philosophiæ. prosa 6. *Fatum*, inquit, *est immobilis dispositio rebus mobilibus inherens, per quam providentia suis quæque vertit ordinibus*: atqui fatum non potest esse immobilis dispositio, nisi quatenus est ordinatio causarum secundarum derivata à divina providentia; ergo fatum rectè definitur à Philosophis Catholicis dispositio causarum secundarum derivata à divina providentia ad executionem effectuum. Nullum autem dubium

est, quin detur fatum, prout ab ipsis Catholicis sumitur.



ARTICULUS III.

De Monstro.

Dicendum est 1. monstrum, quod nihil aliud est quam naturalis effectus à recta & ordinaria secundum speciem dispositione degenerans, habere diversas causas.

Prima causa monstrorum, est penuria materiæ, ex qua oriuntur minuta corpora.

Secunda causa est, abundantia materiæ quâ fit, ut debitam magnitudinem excedant, quales fuerunt gigantes.

Tertia causa est, confusio, vel permixtio materiæ diversæ naturæ, tales fuerunt illi infantes nati ex muliere & Elephante.

Quarta causa est, qualitarum temperies, & combinatio, unde fit, ut aliquando nimio calore, vel nimia humiditate, pueri nascantur barbati, vel canescant in infantia.

Quinta est, parentum imaginatio, ut patet plurimis exemplis.

Ultima denique est, Deus maximus, qui in pœnam alicujus peccati permittit hujusmodi monstra, quales fuerunt illi qui in Anglia nascebantur cum cauda equina.

Dicendum est 2. & ultimò, monstrum intendi à natura universali, non verò à natura particulari.

Prob.

Prob. Utraque pars ex S. Thoma, qui q. 6. de potentia a. 2. ad 1. ait licet monstra non fiant contra naturam universalem, fiunt tamen contra naturam particularem, quia omnis causa particularis intendit sibi assimilare suum effectum: atqui monstrum non est simile causæ particulari; ergo monstrum non intenditur à causa particulari.




TRACTATUS III.

De proprietatibus entis mobilis.



POST principia intrinseca & causas entis mobilis explicatas, examinandæ occurrunt ejusdem entis mobilis proprietates, ut perfecta habeatur cognitio objecti quod consideratur à Physica. Iste ergo tractatus quinque complectetur quæstiones in quarum. 1. Agetur de quantitate. In 2. de continuo. In 3. de infinito. In 4. de tempore. In 5. de loco & vacuo.



QUÆSTIO I.

De quantitate.

Cum quantitas communiter censeatur omnium proprietatum corporis naturalis origine prima, veluti cæterarum fundamentum. In 1. istius tractatus quæstione agetur de quantitate, circa quam plurima quærentur in novem articulis.



ARTICULUS I.

*de distinctione quantitatis à substantia
contra Nominales.*

Dicendum est contra Nominales quantitatem distingui realiter à substantia.
 Prob. Illa distinguuntur realiter, quæ separantur realiter: atqui quantitas & substantia separantur realiter; ergo distinguuntur realiter.
 Prob. min. in Eucharistiæ sacramento non remanet substantia panis, & tamen remanet ejus quantitas; ergo quantitas & substantia separantur.
 Prob. aut. ubi remanent effectus formales quantitatis, ibi remanet quantitas: atqui in.

Eucharistia remanent effectus formales quantitatis ; ergo remanet quantitas. Prob. min. effectus formales quantitatis sunt reddere aliquid extensum & impenetrabile : atqui hostia consecrata est extensa in loco impenetrabiliter ; ergo effectus formales quantitatis remanent in hostiâ consecratâ.

Respondent Nominales quod in Eucharistiâ non remanet quantitas panis , sed destruitur unâ cum substantia panis : hostia tamen remanet extensa in loco , & impenetrabilis ab alia hostia , quia in ea remanent qualitates & accidentia , quorum quodlibet habet suam quantitatem sibi identificatam ratione cujus quantitatis hostia remanet extensa in loco & impenetrabilis.

Sed contra illam responsionem cum Vincenzio nostro. 1. *Si omnia accidentia haberent suam quantitatem propriam per quam essent impenetrabilia , non possent se compati in eodem loco , sicut enim sunt inter se diversa specie , ita diversam impenetrabilitatem habent , & proinde neque in eadem substantiâ panis possent recipi : neque inter se penetrari , quod evidenter falsum est.*

2. *Si hujusmodi accidentia , ut calor , sapor , albedo penetrant se in hostiâ eadem , cur nō possunt penetrari cum similibus accidentibus alterius hostiæ etiam consecratæ : atqui illa accidentia non se penetrant cum similibus accidentibus alterius hostiæ ; ergo hujusmodi accidentia non se penetrant in eadem hostia.*



ARTICULUS II.

De sententia Cartesii circa distinctionem quantitatis à substantia, sive circa essentiam corporis

NOtandum est 1. quod Cartesius cum Nominalibus convenit in eo quod doceat quantitatem non distingui à substantia; sed in hoc ab illis differt, quod non tantum velit quantitatem identificari cum substantia, sed & docet præterea extensionem esse totam essentiam corporis: ait enim 1. parte principiorum num. 53. *Extensio in longum, latum & profundum substantiæ corporeæ naturam constituit.*

Notandum 2. Quod licet, clarè & evidenter Cartesius doceat extensionem constituere essentiam corporis, quidam tamen ejus discipuli famæ & pietati Cartesii consulentes asserunt hanc non esse Cartesii sententiam, eo quod illam in fide valdè periculosam existiment. Tribus ergo diversis modis jam allatam Cartesii auctoritatem interpretantur.

Primi dicunt, quod quando Cartesius asserit extensionem in longum, latum & profundum constituere naturam substantiæ corporeæ, loquitur tantum de extensione radicali, non verò de extensione actuali; ita ut Cartesius doceat tantum essentiam corporis sitam esse in extensione radicali.

Nonnulli verò dicunt, quando Cartesius docet, extensionem in longum, latum & profundum, ſubſtantiæ corporeæ naturam conſtituere, per naturam non intelligere illum, eſſentiam, ſed tantum ſtatum naturalem corporis; ita ut ſenſus illius propoſitionis ſit, quod extenſio non pertinet ad eſſentiam corporis, ſed tantum ad ſtatum naturalem; ita ut corpus in ſtatu naturali conſideratum ſit ſemper extenſum.

Alij demum ingenuè conſitentes Cartesium loqui de extenſione actuali, & per naturam nihil intelligere aliud quam eſſentiam, dicunt illum non aſſerere, quòd extenſio conſtituat naturam corporis, ſed tantum quòd videtur extenſionem eſſe eſſentiam corporis, ſi rationibus naturalibus attendatur: quia tamen opinio aſſerens, extenſionem conſtituere naturam corporis, eſt contraria Sacro-ſancto Eucharistiæ Sacramento, credit Cartesius, quod aliquid aliud eſt in corpore, per quòd eſſentia corporis conſtituitur,

Dicendum eſt 1. Cartesium docere extenſionem actualem conſtituere eſſentiam corporis.

Prob. Ex ipſomet Cartesio, extenſio quæ conſtituit ſpatium eſt actualis. (Docet enim quod non poteſt concipi cavitās vaſis, ſive ſpatium quod reperitur inter latera vaſis, quin concipiatur extenſio actualis alicujus ſubſtantiæ.) Illa omnia deſumuntur ex Cartesio 2. parte principiorum num 18. *Conſiderare oportet nullam quidem eſſe connexionem inter vaſ, & hoc vel illud corpus particulare, quod in eo continetur; ſed eſſe maximam ac omninò neceſſa-*

riam inter vasis figuram concavam, & extensionem in genere sumptam, quæ in ea cavitate debet contineri: aded' ut non magis repugnet nos concipere montem sine valle, quam intelligere istam cavitatem absque extensione in ea cõtenta, vel hanc extensionem absque substantia quæ sit extensa: quia, ut saepe dictum est, nihili nulla potestesse extensio. Atqui ex eodem Cartesio, eadem extensio quæ constituit spatij naturam, constituit etiam corporis essentiam; siquidem parte 2. num. 10. ait, Extensio in longum latum & profundum, quæ spatium constituit, eadem planè est cum illa quæ constituit corpus, ergò ex Cartesio, extensio quæ constituit naturam corporis est actualis.

Dicendum est 2. Cartesium; per naturam substantiæ corporeæ, non intelligere statum naturalem, sed essentiam; ita ut secundum Cartesium, extensio actualis non sit tantum naturalis corpori, sed essentialis, id est non tantum conveniat statui naturali corporis sed etiam ipsius essentiæ.

Prob. Si extensio actualis pertineret tantum ad statum naturalem corporis, non verò ad essentiam. 1. posset minui extensio. & non minui substantia. 2. Posset concipi corpus, etiamsi non conciperetur extensio. 3. Concipere corpus sine extensione, non esset habere ideam confusam substantiæ incorporeæ: atqui ex Cartesio 1. non potest minui extensio, quin minuatur substantia, siquidem 2. part. num. 8. In re fieri non potest ut vel minimum quid ex extensione tollatur, quin tantumdem etiam de substantia detrahatur.

2. Ex Cartesio non potest concipi corpus,

quin concipiatur extensio; si enim corpus concipiatur sine extensione; nihil concipitur. Sic enim pergit loco laudato num. 9.^o *Et quamvis forte nonnulli aliud dicant, non puto tamen ipsos eâ de re aliud percipere; sed cum substantiam ab extensione distinguunt, vel nihil per nomen substantiæ intelligunt; vel confusam tantum substantiæ incorporeæ ideam habent, quam falso tribuunt corporeæ; hujusque substantiæ corporeæ veram ideam extensioni relinquunt.*

3. Concipere corpus sine extensione, est habere ideam confusâ substantiæ incorporeæ, ut patet ex ipsa auctoritate jam allatâ; ergo ex ipso Cartesio extensio actualis non pertinet tantum ad statum naturalem substantiæ. Major est evidens; ex eo enim quod calefactio actualis non est essentialis igni, sed tantum naturalis, hoc est quia calefactio actualis non pertinet ad essentiam, sed tantum ad statum naturalem ignis; potest minui, imo & tolli calefactio actualis, & tamen non minuitur nec tollitur substantia ignis, ut factum fuit in igne fornacis Babylonice; minor etiam probata fuit ex ipso Cartesio, ergo &c.

Dicendum est 3. Cartesium velle & asserere; quod extensio actualis non tantum videtur constituere naturam corporis, sed quod reverâ eam constituit.

Prob. Verum est juxta Cartesium extensionem actualem de facto constituere naturam corporis; ergo non tantum videtur quod extensio actualis constituat naturam corporis, sed de facto eam constituit. prob. ant. Illud omne verum est quod clarè cognoscitur à Cartesio, juxta istud Cartesij principium, ait

enim meditatione 5. Fusè demonstravi illa omnia quæ clarè cognosco esse vera, & in differt. de methodo nam. 4. pro regula assumpsi, illa omnia, quæ clarè & distinctè concipimus, vera esse: at- qui clarè cognovit Cartesius extensionem actualem de facto constituere naturam corpo- ris. *Extensio*, inquit, i. parte princ. num 53. in longum, latum & profundum substantiæ corpo- reæ naturam constituit, & cogitatio constituit naturam substantiæ cogitantis, & paulò post subjungit: Atque ita facile possumus duas cla- ras & distinctas habere notiones sive ideas, unam substantiæ cogitantis creatæ, aliam substantiæ corporeæ; ergo verum est juxta Cartesium ex- tensionem actualem de facto constituere natu- ram corporis.



ARTICULUS III.

Utrum sententia Cartesij asserentis extensionem actualem constituere essentiam corporis, sit contraria doctrinæ Concilij Tridentini circa Eucharistiæ Sacramentum.

Dicendum est, sententiam Cartesij esse contrariam doctrinæ Concilij Tridenti- ni, circa Eucharistiæ Sacramentum.

Prob. Doctrina Concilij Tridentini circa Eucharistiæ Sacramentum, est ista.*

1. Quòd Corpus Christi est totum & inte- grum in Eucharistiæ sacramento sub specie panis & vini.

2. Quod Corpus Christi est totum & integrum sub qualibet ipsius speciei parte. Hæc duo desumuntur ex verbis sacro-sancti Concilij cap. 3. sess. 13. *Totus enim est & integer Christus sub panis specie, & sub quavis ipsius speciei parte.*

Atqui sententia Cartesij asserentis extensionem actualem constituere naturam corporis, est contraria tali doctrinæ quantum ad illa, cum ex prædicta Cartesij sententia sequatur, Corpus Christi non esse integrum sub specie panis & sub qualibet speciei parte; ergo sententia Cartesij est contraria doctrinæ Concilij Tridentini circa sacramentum Eucharistiæ. Prob. min. quoad utramque partem.

1. Quantum ad primam partem. Christus non habet juxta Cartesium in Eucharistia totam substantiam quam habebat in Cruce; ergo Corpus Christi non esset totum & integrum, prob. ant. Christus non habet totam extensionem quam habebat in cruce, ut patet; ergo non habet totam substantiam, quia non potest minui extensio, quin minuatur substantia, nam parte 2. princ. num. 2. *In re fieri non potest, ut vel minimum quid ex extensione tollatur, quin tantumdem etiam de substantia detrahatur.*

2. Prob. quoad secundam partem ex sententiâ Cartesij sequitur, Corpus Christi non esse totum & integrum sub qualibet speciei parte; ergo sententia Cartesij est contraria doctrinæ Concilij Tridentini, prob. ant. ut Corpus Christi sit totum & integrum sub qualibet speciei parte, partes corporis debent se penetrare, ita ut una debeat esse intra

aliam : si enim caput , manus , pedes , & cæteræ corporis partes non se penetrarent , & non essent in eodem loco & in eadem speciei parte ; illæ partes ita se haberent , ut una esset extra aliam , & proinde essent in diversis locis , & consequenter totum & integrum Christi Corpus non esset sub qualibet speciei parte ; atqui ex sententia Cartesij sequitur partes corporis non posse absolutè se penetrare ; ergo ex sententia Cartesij sequitur Corpus Christi non esse totum & integrum sub qualibet speciei parte ; prob. min. repugnat ex Cartesio quòd partes corporis se penetrarent ; ergo ex sententia Cartesij sequitur , partes corporis absolutè & divinitùs non posse se penetrare , prob. ant. Si partes corporis absolutè & divinitùs possent se penetrare , posset aliquid ex extensione tolli , quin tantumdem de substantiâ detraheretur , si enim manus penetraretur cum brachio , illæ partes aliquid substantiæ non perderent , & tamen aliquid extensionis amitterent : atqui ex Cartesio repugnat partes aliquid extensionis amittere , & non simul amittere aliquid substantiæ ; ergo repugnat ex Cartesio quòd partes corporis se penetrarent , prob. min. ex Cartesio 2. parte. num. 8. *Planè repugnat aliquid nova extensione augeri , quin simul etiam nova substantia extensa , hoc est novum corpus ei accedat : Ergo repugnat ex eodem Cartesio partes aliquid extensionis amittere , quin simul de substantia aliquid detrahatùr , quia juxta Cartesij doctrinam tam difficile & impossibile est , ut corpus aliquid ex extensione perdat ; quin simul aliquid de substantia tollatur. Quàm*

difficile & impossibile est, ut corpus acquirat novam extensionem, quin acquirat novam substantiam.

Respondent nonnulli Cartesiani invictissimo allatæ rationis robore convicti, se tantum esse Philosophos, & proinde quod non possunt respondere argumento ex Theologia & mysterio fidei desumpto, & ita nolunt respondere auctoritatij Concilij Tridentini, quia illud tantum pertinet ad Theologos. Ita præcipue Roakus 1. part. phisc. cap. 7. num. 9. idem docet Dom. Calli in scientia generali membr. 2. art. 1. sect. 2. *Id, inquit, solvere Theologorum est.*

Sed contra. ergo Cartesiani, qui se tantum Philosophos profitentur, debent rejicere sententiam Cartesij asserentis extensionem actualement constitutere essentiam corporis, cum illa sententia sit contraria mysterio fidei, prob. consequentia: omnes Philosophi ex Concilio Lateranensi sub Leone X. tenentur conclusiones quæ sunt contra fidem rejicere, ait enim sess. 8. *Omnes & singulis Philosophis in universitatibus studiorum generalium, & alibi publicè legentibus distriktè præcipiendo mandamus; ut cum Philosophorum principia aut conclusiones, in quibus à recta fide deviare noscuntur, auditoribus suis legerint, seu explicaverint quale est ... & alià hujusmodi; teneantur eisdem veritatem religionis christianæ omni conatu manifestā facere; & persuadendo pro posse docere, ac omni studio hujusmodi Philosophorum argumenta, cum omnia solubilia existant pro viribus excludere atque resolvere; ergo debent rejicere sententiā Cartesij quæ est contra fidem, ut jam probatum fuit.*

Respondet alter Cartesianus, quod potest clarè, facilè & dilucidè explicare, quomodo sententia Cartesii circa essentiam materiæ sive Corporis, optimè conveniat cum misterio Eucharistiæ, sed illud necessarium esse non putat, quia *modi*, inquit, *quibus explicantur misteria fidei non sunt de fide*, ita de fide est, quod Corpus Christi est in Eucharistia, sed de fide non est modus quo Corpus Christi est in Eucharistia, sufficit autè ut credamus quod Christus est in Eucharistia, & non est inquirendus modus, quo Christus est in illo Sacramento, ita Auctor libri, qui inscribitur gallicè, *La Recherche de la verité*, Tomo 1. lib. 3. cap. 8.

Sed contra: atqui modus quo Christus est in Eucharistia, est de fide; ergo nulla responsio. prob. subf. ille modus est de fide, qui est determinatus à Concilio Tridentino: atqui modus quo Christus est in Eucharistia, est determinatus à Concilio Tridentino, docet enim quod Corpus Christi est totum & integrum, sub specie panis, & sub qualibet illius parte, quod idem est ac determinare modum, quo Corpus Christi est in Eucharistia; ergo modus quo Christus est in Eucharistia, est de fide.

Præterea alii modi, quibus explicantur alia fidei misteria, sunt de fide: Ecclesia non tantum definit tres esse in Trinitate personas realiter distinctas, quod est tota illius mysterii substantia, sed explicat etiam quomodo distinguantur, definiendo, quod Pater à nullo procedit, quod Filius procedit à Patre, & quod Spiritus Sanctus procedit à Patre & Filio; ergo falsa est propositio illa universaliter sumpta,

sumpta, in qua dicitur, quod modi, quibus explicantur fidei mysteria, non sunt de fide.

Respondent alii Cartesiani, quod Corpus cognitum lumine naturali rationis, habet pro essentia extensionem actualem, non vero Corpus cognitum lumine supernaturali fidei.

Sed quam absurda sit illa responsio, nemo non videt; sequitur enim quod essentia Corporis mutatur, secundum diversum modum quo cognoscitur, vel etiam sequitur, quod idem Corpus habet duplicem essentiam: atqui illa duo non possunt dici. Prim: quidē non potest dici; quia secundum omnes Philosophos essentiae rerum sunt immutabiles. Secūd. etiam non potest dici; quia si Corpus Christi cognitum lumine naturali rationis, & cognitum lumine supernaturali fidei, haberet duas essentias distinctas realiter, sequeretur, quod Corpus Christi non esset unum, sed duplex: ubi enim sunt duae essentiae constituentes Corpus, ibi sunt duo Corpora constituta: atqui non potest dici, quod Corpus Christi fuerit duplex; quia sic posset dici, quod Filius Dei bis fuerit incarnatus; ergo Corpus Christi non habet duas essentias. Præterea illa responsione volunt docere Cartesiani, quod ratio quidem convincit extensionem actualem constituere essentiam Corporis, & quod tamen fides oppositum docet, ex qua responsione optimè concluditur; ergo Cartesius nullomodo potest asserere, quod extensio actualis constituat essentiam Corporis, quia Philosophus Catholicus non debet sequi lumen naturæ rationis, quando fides aliud docet. *Sunt enim*, inquit; Dom. de Laville, in suo examine Philosophiæ

Cartesianæ 2. parte cap. 4. art. 1. num. 15. tres modi quibus possumus cognoscere veritatem, nempe sensu, ratione & fide, illa tamen tria sunt inter se subordinata. Fides superat rationem, sicut ratio sensum : sicut ergo ratio debet corrigere sensum errores, ita fides debet corrigere rationis errores ; unde sequitur, quod quando sensus & ratio non conveniunt, potius credendum rationi quam sensibus, similiter quando fides & ratio non videntur convenire, Catholicus debet potius sequi lumen fidei, quam lumen rationis.

Obj. 1. Ratio, quæ desumitur ex Sacro Eucharistiæ misterio, nihil probat contra sententiam Cartesii ; ergo &c. prob. ant. ratio obscura & incomprehensibilis nihil probat contra sententiam Cartesii : atqui ratio, quæ desumitur ex sacro Eucharistiæ misterio, est obscura & incomprehensibilis ; ergo nihil probat contra sententiam Cartesii. prob. min. sacrum Eucharistiæ misterium est obscurum, incomprehensibile & ineffabile ; ergo ratio quæ desumitur ex sacro Eucharistiæ misterio, est obscura & incomprehensibilis. ex quibus omnibus cõcludit Dom. Calli in Scientia generali membro 2. art. 1. sect. 2. Non ideo perspicua neganda sunt, quòd obscura animo comprehendendi nequeunt : atqui Corpus esse rem extensam perspicuum est, modus autem quo Christi Corpus est in Eucharistia, ut fidei misterium est, sic obscurum : ne igitur obscurum fidei misterium alio obscuriore misterio explicare videamur, illud credendum relinquimus, dum hoc demonstrare conamur.

Resp. neg. ant. ad cujus probationem dist.

maior, ratio obscura, incomprehensibilis, & non certa, nihil probat con. ratio obscura, incomprehensibilis & certa, nihil probat neg. quia ratio quæ desumitur ex misterio certa est certitudine fidei, quæ certitudo æquivaleret evidentie.

Obj. 2. Sententia Cartesii asserentis extensionem actualem constituere essentiam corporis non est contraria doctrinæ Concilii Tridentini; ergo in hoc non est rejicienda. probant, una veritas non potest esse contraria alteri veritati. *Cum una*, inquit Cartesius in epistola ad P. Dinet Præpositum Provinciale Sôc. Jesu per Franciam, quæ habetur post responsiones & objectiones septimas Amstelodami excusas 1670. *veritas alteri adversari nunquam possit; esset impietas timere, ne veritates in Philosophia inventæ, iis quæ sunt de fide adversentur*: atqui sententia Cartesii asserentis extensionem actualem constituere essentiam corporis, est veritas evidentissima in Philosophia, & doctrina Concilii Tridentini circa Eucharistiæ Sacramentum est altera veritas; ergo sententia Cartesii non potest esse contraria doctrinæ Concilii Tridentini.

Resp. 1. neg. ant. ad cujus prob. neg. min. quia sententia Cartesii nullomodo est vera, ut jam probatum fuit.

Resp. 2. Quod maxime peccat Cartesius quando dicit, quod ipsius sententia circa essentiam corporis non adversatur fidei, in hoc enim Catholicum Philosophum non agit cujus munus est in rebus etiam Philosophicis ad fidem potius tanquam ad regulam certissimam confugere, quam ad lumen naturale rationis,

quæ sæpiſſimè fallitur. Cartesius tamen dum corporis eſſentiam inquirir , ad rationem potiùs quam ad fidem confugit ; ita ut velit rationi fidem ſubjicere , non verò rationem fidei.

Obj. 3. Eſſentia Corporis Chriſti non conſiſtit in extensione , & proinde Corpus Chriſti poteſt ibi eſſe inextenſum & penetrabile ; ergo ſententia Cartesii non adverſatur doctrinæ Concilii Tridentini.

Reſp. 1. Quòd admiſſo antecedente , propoſitio Cartesii aſſerentis extensionem actualem conſtituere eſſentiam corporis , non eſt univerſaliter vera , quia illa propoſitio aſſerens extensionem actualem conſtituere eſſentiam corporis , non eſt univerſaliter vera , quæ admittit aliquod verum & reale corpus eſſentialiter non conſtitutum per extensionem : atqui ut conceditur in antecedente illa propoſitio admittit Corpus Chriſti eſſentialiter non conſtitutum per extensionem ; ſi autem non ſit univerſaliter vera , nullomodò vera eſt , quia quod eſt eſſentialiter tale , ſemper eſt tale , & quod convenit corpori in communi , debet convenire cuilibet corpori in particulari juxta tertium principium , *dici de omni*.

Instabis : atqui propoſitio eſt univerſaliter vera , licet non ſit vera reſpectu Corporis Chriſti ; ergo nulla ſolutio. prob. ſubſ. iſta propoſitio , *quæ ſunt eadem uni tertio , ſunt eadem inter ſe* , eſt univerſaliter vera ; licet non ſit vera in Trinitate , in qua licet tres perſonæ ſint unum , & idem cum natura , non ſunt tamen unum & idem inter ſe ; ergo à pari iſta propoſitio (*extenſio actualis conſtituit eſſentiam*

corporis,) est universaliter vera, licet non sit vera respectu corporis Christi. Illud argumentum desumitur ex auctore Anonymo libri qui inscribitur, *La recherche de la verité tom. 1. liv. 3. chap. 8. nomb. 2.*

Resp. 1. neg. subf. ad cuius prob. neg. ant. illud enim axioma semper est verum in divinis & humanis, non quidem absolute, sed cum ista modificatione, sive distinctione; hoc est, quando plurima sunt eadem cum uno tertio incommunicabili, sunt eadem inter se, quando verò plurima sunt eadem cum uno tertio communicabili non sunt eadem inter se, neque in humanis, neque in divinis. Illud autem tertium debet esse incommunicabile, quia singulare quod communicatur plurimis suppositis, est sicuti species communis pluribus individuis, quæ quidem est idem cum suis differentiis individualibus; sed differentiæ individuales non sunt idē inter se, ita natura divina singularis, est certè idem cum diversis suppositis quibus communicatur, sed illa supposita non sunt idem inter se, quia se habent, sicuti differentiæ quæ opponuntur inter se, licet non opponantur naturæ cui sese communicant, & ideo illud axioma dicitur non valere in divinis, non ex eo præcisè quod res divinæ sunt divinæ, sed quia non habent conditionem requisitam ad veritatem illius axiomatis, non habent scilicet aliquid singulare incommunicabile, quæ conditio si non reperiretur in rebus humanis, illud etiā axioma non valeret in rebus humanis.

Resp. 2. neg. ant. ad. cuius probationem neg. conf. & paritatē quia nulla paritas est in-

ter duas propositiones quæ non se habent eodem modo, quales sunt istæ, *quæ sunt eadem uni tertio sunt eadē inter se*, & *extensio actualis constituit essentiam corporis*. Prim. enim propositio universaliter sumpta, sive sine ulla modificatione & distinctione usurpata, est falsa, quia nō est essentialis, se habet enim sicuti ista propositio, *omne animal est rationale*, quæ non est essentialis, & universaliter sumpta est falsa; quod autem illæ duæ propositiones non se habeant eodem modo illud manifestè constat quia ideo ista propositio, *omne animal est rationale*, non est essentialis, quia cognoscimus aliquod animal nempe hominem esse rationale, & aliquod animal nempe leonem non esse rationale, sed cognoscimus etiam quod aliqua quæ sunt eadem uni tertio sunt eadem inter se, ut in Isaac, pater Jacob & filius Abraham non differunt inter se, quia non differunt ab ente Isaac, & cognoscimus quod aliqua quæ sunt eadem uni tertio, non sunt idem inter se ut in Trinitate in qua tres personæ sunt idem cum natura & tamen non sunt idem inter se; ergo illa propositio non est essentialis, & proinde universaliter est falsa: ista autem Cartesii propositio, *extensio constituit essentiam corporis*, est essentialis ex ipso Cartesio, qui vult quod tota essentia corporis consistit in extensione, & proinde illa propositio est universaliter vera; ergo quælibet propositio contenta sub illa universali est vera; ergo vera est ista propositio particularis. *Essentia corporis Christi in Eucharistie Sacramento consistit in extensione in longum, latum & profundum.*

Obj. ult. corpus Christi in Eucharistia non habet suam essentiam; Deus enim potest privare quamlibet rem suâ essentiâ; ergo sententia Cartesii asserentis extensionem actualem constituere essentiam corporis, non repugnat Eucharistiæ Sacramento.

Resp. neg. ant. quòd autem essentia rerum sint immutabiles; jam contra Cartesianos probatum fuit in Metaphysica.



ARTICULUS IV.

Utrum sententia Cartesii asserentis extensionem actualem constituere essentiam corporis, sit conformis erroribus Calvinii circa Eucharistiæ Sacramentum.

Dicendum est sententiam Cartesii esse conformem erroribus Calvinii circa Eucharistiæ Sacramentum.

Prob. Ex sententia Cartesii sequitur error Calvinii circa Eucharistiæ Sacramentum; ergo sententia Cartesii est conformis erroribus Calvinii. Prob. ant. error Calvinii circa Eucharistiæ Sacramentum est, quod corpus Christi non est verè & realiter in Eucharistia, sed tantùm figurativè: sed ex sententia Cartesii sequitur idem error; ergo ex sententia Cartesii sequitur error Calvinii circa Eucharistiæ Sacramentum. Prob. min. doctrina, ex qua Calvinus infert, corpus Christi non posse verè & realiter in Eucharistia esse, est eadem, ac ipsa quam nunc docet Cartesius; ergo ex

sententia Cartesii sequitur error Calvini circa Eucharistiæ Sacramentum. Prob. ant. doctrina Calvinij est ista. 1. Docet extensionem esse essentialẽ corpori. 2. Penetrationem partium esse naturaliter & supernaturaliter impossibilem. 3. Ex illis duobus tanquam ex præcipuis rationibus concludit corpus Christi non posse verè & realiter esse in Eucharistiâ : sed doctrina Cartesii est eadem ; Docet enim illa duo, ut patet ex dictis ; ergo doctrina ex qua Calvinus infert, corpus Christi non esse verè & realiter in Eucharistiâ est eadem ac illa quam nunc docet Cartesius. Prob. maj. quoad tres partes.

1. Docet Calvinus extensionem esse essentialẽ corpori ; docet enim, in institutione Christianæ religionis cap. 18. num. 23. quod *hec est propria corporis veritas ut suis dimensionibus constet* : atqui docere quòd, *propria corporis veritas est, ut suis dimensionibus constet*, est docere quòd extensio est essentialis corpori, quia per veritatem intelligit certè essentialiam, ergo Calvinus docet extensionem esse essentialẽ corpori.

2. Docet quòd partes sunt impenetrabiles siquidẽ docet, quòd repugnat mensurâ auferri corpori ; loco enim citato dicit, *talẽ Christi in Cœna præsentiam cogitemus, quæ nec mensuram illi suam auferat, nec immensam illi magnitudinem affingat* : hæc enim humanæ naturæ non obscurè repugnant : atqui repugnare quòd mensura auferatur corpori idem est ac docet quòd partes sunt supernaturaliter impenetrabiles ; ergo Calvinus docet partes corporis esse omnino impenetrabiles.

3. Calvinus ex his duobus principiis infert corpus Christi non esse verè & realiter in Eucharistia: ideo enim ex Calvino corpus Christi nō est in Eucharistia, quia caro Christi esset caro & nō esset caro: esset caro ut supponeretur, & non esset caro quia non haberet partes extra partes, ait enim loco jam citato num. 27. *Insane quid à Dei potentia postulas ut carnem faciat simul esse & non esse carnem proinde ac si instes, ut lucem faciat simul esse lucem, & tenebras, & lucem vult esse lucem, tenebras, tenebras, carnem, carnem . . . carnem igitur carnem esse oportet, Spiritum, Spiritum: unumquodque qua à Deo lege & conditione creatum, ea vero est carnis conditio, ut sua dimensione constet, & proinde clarè patet sectatorem Calvini ex duobus Cartesii principiis jam confutatis posse rectè inferre corpus Christi non esse verè & realiter in Eucharistia; ergo sententia Cartesii asserentis extensionem actualem constituere essentiam corporis, est conformis erroribus Calvinii.*



ARTICULUS V.

Utrum sententia Cartesii asserentis extensionem actualem constituere essentiam corporis, sit contraria Sanctorum Patrum Doctrinæ.

Dicendum est, prædictam Cartesii sententiam esse contrariam Doctrinæ Patrum.

Prob. auct. Patrum 1. Sanct. Aug. in categorijs cap. 10. de quantitate docet, quantitatē esse accidens corporis; *Descripta*, inquit, *usq̃*, *accidentium definitionem necessarius ordo postulat, quorum primum est quantum*; ergo sanctus Aug. non vult ut quantitas actualis constituat essentiam corporis; quia quod est accidentale corpori, non potest constituere essentiam corporis.

2. Sanctus Tho. docet, quantitatem separari à substantiā in Eucharistiæ Sacramento, cum velit quantitatem remanere & non remanere substantiam panis; ergo non vult ut extensio actualis constituat essentiam corporis. Prob. ant. sanctus Tho. 3. parte q. 77. art. 2. docet, quantitatem dimensionem panis & vini, esse aliorum accidentium subjectum. *Omnia*, inquit, *accidentia præter quantitatem dimensionem, quæ remanent in Sacramento, quamvis in nulla sint substantiā, sunt tamen in quantitate dimensionis panis & vini tanquam in subjecto*: atqui docere quantitatem esse in Eucharistia subjectum aliorum accidentium, est docere quantitatem separari à substantia; ergo sanctus Tho. docet extensionem actualem non constituere essentiam corporis.

3. Idem Doctor q. 76. art. 4. in corpore docet, quod *Quantitas dimensionis panis remanet facta consecratione, sola substantia panis transiente*; ergo, &c. satis est auctoritatibus SS. Aug. & Tho. sententiam Cartesii rejecisse, cum ipsi Cartesiani ipsorum tantum Patrum auctoritates afferant, ut Cartesii sententiam probent.

Obj. 1. *Corpus*, inquit, Sanctus Aug. lib.

7. de Genesi ad litteram, cap. 22. *dicimus materiam quamlibet longitudine, latitudine, altitudine spatium loci occupantem.* Hanc auctoritatem affert Roaltus, ut suam probet sententiam in suo primo colloquio pag. 96. ergò ex mente sancti Aug. extensio actualis est essentialis corpori.

Resp. neg. conseq. ratio est, quia sicut ex ista propositione, *homo est rationalis*, non potest rectè colligi, quod rationalitas actualis sit essentialis homini, sicut neque ex ista, *ignis est calidus*, potest inferri, quod calor actualis sit essentialis igni; ita ex ista propositione, *Corpus quodlibet habet trinam dimensionem*, non potest conjici, quod trina dimensio actualis sit essentialis corpori; sed tantum inferri potest, quod radicalis essentialiter illi conveniat.

Obj. 2. Illud constituit essentiam corporis, quo sublato tollitur corpus: atqui sublata quantitate tollitur corpus ex sancto Aug. ait enim lib. de quantitate animæ cap. 4. *Prius abs te quero, utrum corpus ullum putas esse, quod non pro modo suo habeat longitudinem, latitudinem & altitudinem, si hoc demas corporibus quantum, mea opinio est, neque sentiri possunt, neque omnino corpora esse rectè existimari:* Hanc auctoritatem affert Dominus de Calli membro secundo scientiæ generalis art. 10. sect. 2. ergò ex mente sancti Aug. extensio actualis constituit essentiam corporis.

Resp. 1. dist. primam partem auctoritatis sancti Aug. *Corpus ullum putas, quod non pro modo suo habeat longitudinem, latitudinem, radicalem vel actualem con. actualem semper*

neg. quia extensio actualis, cum non sit essentialis corpori, separari ab eo potest divinitus; ita tamen ut separatâ ab illo corpus retineat veram corporis essentiam, extensionem scilicet radicalem in quâ tota corporis essentia sita est: corpus autem in illo statu nec potest tangi, nec sentiri, ut optimè ait beatus Aug. eo quod quantitate privatum non esset subjectum alicujus sensationis; non enim videretur, non tangeretur, esset tamen verum corpus: quia ad rationem corporis non requiritur; ut actu tangatur, vel videatur, sed tantum ut possit tangi vel videri: corpus autem privatum quantitatè potest tangi, quatenus potest quantitatem recipere, quâ mediante corpus actu tangitur & videtur.

Resp. 2. dist. secundam partem auctoritatis sancti Aug. sublatâ quantitate, non possunt rectè existimari corpora Mathematica con. Physica neg. Ratio distinctionis sumitur ex diversâ naturâ corporis Mathematici & Physici: corpus enim Mathematicum est illud quod habet actu trinam dimensionem: Physicum verò est illud quod exigit habere trinam dimensionem; est ergo verum, quod sublatâ quantitate, corpus cessat esse corpus Mathematicum, sed semper remanet corpus Physicum, quia ad hoc sufficit, ut remaneat compositum ex materiâ & formâ exigens habere trinam dimensionem: Mathematicum verò actu & essentialiter illam requirit, non in potentia & aptitudine tantum, uti Physicum.

Obj. 3. *Corporeitas nihil aliud est quàm tres dimensiones*, ita sanctus Thom. 2. contra gentiles cap. 81. ad 2. hanc auctoritatem affert ad suam

suam probandam sententiam Dominus Calli in membro 2. scientiæ generalis art. 10. sect. 2. ergo sententia Cartesij non est contraria doctrinæ Patrum.

Resp. 1. dist. *Corporeitas nihil aliud est quàm tres Dimensiones*, aptitudinales con. actuales semper nego.

Resp. 2. Turpiter mutilatam esse istam Doctoris Angelici auctoritatem, eam enim si integram attulisset prædictus Doctor, intellexisset haud dubiè; doceri à sancto Thoma extensionem esse accidentalem corpori, non verò essentialem: quod ut omnes intelligant, affero integram auctoritatem Doctoris, qui prædicto loco dicit. *Corporeitas dupliciter accipi potest, uno modo secundum quod est forma substantialis corporis, prout in genere substantiæ collocatur, & sic patet quod corporeitas, prout est forma substantialis in homine, non sit aliud quàm anima rationalis; alio modo accipitur prout forma accidentalis, secundum quam dicitur corpus esse in genere quantitatis, & sic quantitas nihil aliud est quàm tres dimensiones.*



ARTICULUS VI.

Utrum sententia Cartesij asserentis extensionem actualem constituere essentiam corporis, sit contraria Aristotelis doctrinæ.

NOtandum est, quod licet Cartesiani ferè omnibus in locis aspernentur Aristotelis

sententiam, hic tamen asserunt & quasi gloriantur Cartesium Aristotelis sententiæ adhærere, ubi dicit extensionem actualem constituere essentiam corporis; ideo ut probetur Cartesianos Aristotelis mentem non assequi.

Dicendum est sententiam Cartesij asserentis extensionem actualem constituere essentiam corporis, esse contrariam doctrinæ Aristotelis.

Prob. ex Arist. quantitas distinguitur realiter à substantia: ergo sententia Cartesij est contraria doctrinæ Aristotelis. Prob. ant. multipliciter 1. Aristoteles 7. Metaph. cap. 3, textu 8, ait; longitudo verò, latitudo & profunditas sunt quantitates quædam, sed non sunt substantiæ; quantitas enim non est substantia, sed magis cui hæc ipsa primò insunt, illud est substantia.

2. Idem Arist. 1. phys. cap. 2. textu 15. Si igitur & substantia est & quantum; duo & non unum est, quod est: si verò substantia solum sit, non infinitum est, neque magnitudinem habebit ullam.

3. Idem Arist. 5. phys. cap. 1. textu 9. ait, dari motum ad quantitatem, non autem ad substantiam; sensit ergo illa duo distingui realiter; ergo ex his omnibus Aristotelis auctoritatibus constat docere Aristotelem quantitatem distingui realiter à substantiâ.

Obj. Arist. 4. phys. cap. 4. vocat materiam rem extensam; ergo sententia Cartesij non est contraria doctrinæ Aristotelis.

Resp. 1. dist. ant. Vocat materiam rem extensam radicaliter con. actualiter neg. quia materia secundum se dicitur extensa tantum

radicaliter, ex eo quod exigit recipere quantitatem per quam fit extensa actualiter.

Resp. 2. Quod posito quod Arist. loqueretur de extensione actuali, in hoc ipsius Aristotelis sententiam non sequeremur, quamvis enim ut magistrum revereamur, ab ipso tamen discedimus, ubi quædam Religioni & fidei nostræ contraria dicit. *Nonne*, inquit, Cardinalis Pallavicinus in historia Concilij Tridentini lib. 7. cap. 14. *Aristotelis dicta scholastici communiter impugnant de mundi æternitate, de divina in agendo necessitate, de negata ab eo creandi potentiâ, ac de aliis gravissimis capitibus, in quibus hallucinatur ex humane pupule infirmitate ad lucem divinam cæcipientis.*



ARTICULUS VII.

Utrum sententia Cartesii asserentis extensionem actualem constitulare essentiam corporis, sit contraria rationi.

NOtandum est, quod quando Cartesii sententiam, Eucharistiæ Sacramento adversari manifestè probamus, mox solent inclamare Cartesiani, ad probandas res naturales, non esse confugiendum ad res supernaturales, ita ut sæpissimè nobis exprobrent nullam esse rationem naturalem quæ suadeat & convincat extensionem actualem non esse essentialem corpori. Sæpè in illud ed acris invehuntur, quo verius & majoris momenti esse putant, quodque rationibus refutare non valent, Sacris

Scripturis & veritatibus fidei adversari absque ulla ratione affirmant : impir certè hac in parte quod auctoritate Ecclesiæ uti velint ad evertendam veritatem : ita Cart. in fine responsionis ad objectiones quartas ; ut ergò plenè Cartesio & Cartesianis satisfiat , & ut omninò falsa Cartesii sententia destruarur.

Dicendum est , sententiam Cartesii esse contrariam rationi.

Prob. Potest demonstrari plurimis rationibus naturalibus extensionem, actualem non constituere essentiam corporis ; ergo extensio actualis est contraria rationibus naturalibus, probant, multipliciter.

1. Extensio potest concipi sine corpore in vacuo quod potest dari saltem divinitus , & illud contra Cartesianos , alio in loco probabitur , sed quod potest concipi sine corpore, non constituit essentiam corporis ; ergo extensio non constituit essentiam corporis.

2. Si extensio esset corporis essentia, dum augetur extensio corporis , augetur etiam materia corporis , & illa propositio à Cartesio etiam conceditur, ut patet ex dictis : atqui potest augeri extensio , quin simul augeatur materia ; ergo extensio non est essentia corporis, prob. min. potest adaugeri extensio quæ est in aqua , quin adaugeatur materia ; ergo extensio potest adaugeri , quin augeatur materia, prob. ant. experienciâ facta in æolipilis [quæ nihil aliud sunt quam quidam globi ænei , vel ferrei , vel vitrei qui foramen valdè exiguum habent.] ubi enim media globorum hujusmodi pars est aqua plena, globique illi obijciuntur igni , quotidie videmus experienciâ , quod

ex illis globis oritur ventus adeo validus, ut carbones etiam accendat, & qui durat donec tota aqua consumpta fuerit, & tunc aqua convertitur in aërem: atqui quando aqua convertitur in aërem, extensio aquæ augetur, non verò materia, eadem enim aquæ materia quæ sub exigua quantitate erat in colipilis, sub magna est quantitate aëris, quando ex colipilis oritur, cum diu duret ille ventus, & cum aër majorem etiam extensionem postulet, quam aqua, sicut ignis majorem exigit extensionem, quam aër; ergo potest adaugeri extensio, quin adaugeatur materia.

Respondet Cartesius cap. 4. meteororum illud argumentū nihil probare, eo quod in illo casu aqua non convertitur in aerem, adeò ut dicat Cartesius ventum illum nihil aliud esse quam partes aquæ rarefactæ.

Sed contra: si enim ventus ille nihil aliud esset quam partēs aquæ rarefactæ; vel plurimæ partes aquæ per illud exiguum foramen simul exirent vel paucæ, non potest dici quòd plurimæ aquæ partes simul exeant, quia sic ventus brevi cessaret, & quia sic brevi aqua in colipilis contenta dissiparetur, quod tamen est contra experientiam: si verò illæ partes plurimæ simul non exeant, illæ partes subtilissimæ, & in parvo numero existentes non perciperentur à manu; sicuti vapores qui ex fluminibus emanant, à manu non percipiuntur; tamen constat experientia quòd ille ventus, cum sit validissimus, maximè percipitur. præterea si ille ventus nihil aliud esset quam partes aquæ rarefactæ, humectarent manum, quòd tamen est contra experientiam.

Obj. 1. Illud est ratio formalis constitutiva corporis, quod primò concipitur in corpore: atqui extensio in longum, latum & profundum primò concipitur in corpore; ergo extensio in longum, latum & profundum est ratio formalis constitutiva corporis. prob. min. illud primò concipitur in corpore, quo sublato corpus non remanet corpus: atqui sublata extensione corpus non remanet corpus; ergo extensio primò concipitur in corpore.

Resp. gratis concessa maj. neg. min. ad cujus probationē dist. min. sublata extensione non remanet corpus mathematicū, quod ex natura sua postulat trinam dimensionem actualem con. physicum, sive substantia exigens trinam dimensionem, neg.

Inst. Atqui illa substantia exigens trinam dimensionem, non est corpus physicum; ergo nulla solutio. prob. subs. omne corpus physicum debet esse actu divisibile: atqui illa substantia exigens trinam dimensionem non est actu divisibilis; ergo non est corpus physicum.

Resp. neg. subs. ad cujus probationem neg. maj. quia ut aliquid sit corpus physicum, sufficit, ut sit radicaliter divisibile.

Obj. 2. Quod est inseparabile à corpore constituit corpus: atqui extensio est inseparabilis à corpore; ergo constituit corpus. Proponit fusè hoc argumentum Roaltus 1. parte Phys. c. 7. num. 2.

Resp. neg. maj. Quia licet risibile sit naturaliter inseparabile ab homine, non tamen constituit hominem.

Obj. 3. Illud constituit corpus, per quod

corpus distinguitur à spiritu : atqui per solam extensionem corpus distinguitur à spiritu , ergò &c.

Resp. 1. Cartesianos, ut probent suam sententiam , uti eodem argumento quo Petrus Dumoulin conatur probare realem & corporalem Christi presentiam in Eucharistia esse impossibilem : suâ enim Apologiâ 2. parte sect. 30. pag. 175. *auferre à corpore illud per quod corpus differt à spiritu est efficere , ut corpus non sit corpus : atqui per transubstantiationem à corpore Christi aufertur extensio per quam Corpus Christi differt à spiritu, ergo Corpus Christi non est Corpus.*

Resp. 2. neg. min. Quia corpus abstrahens etiam ab extensione actuali distinguitur essentialiter à spiritu , ex eo quod corpus sit capax recipiendi actualem extensionem , non verò spiritus qui non est divisibilis , neque formaliter , neque radicaliter : unde extensionis carentia in spiritu est aliquid negativum , privativum verò in corpore.



ARTICULUS VIII.

De essentia corporis contra Gassendum.

NOrandum est 1. Quòd Gassendus de essentia corporis loquens dicit , quod extensio non potest esse essentia corporis , quia quantitas est tantum modus substantiæ , sive

quantitas est ipsa materia, quatenus ejus partes sibi invicem resistentes & impediētes, ne una introducatur in locum alterius, occupant singulæ locum proprium, particularem & proportionatum ipsarum magnitudini, unde resultat quædam dispositio partium, quæ vocatur extensio materiæ.

Notandum est 2. quod Gassendus ubi Cartesium arguit, in errorem labitur ipse, cum docet quantitatem esse modum substantiæ: Siquidem modus rei ita connectitur cum ipsa re, ut licet res possit esse sine modo, modus tamen non potest à re separatus existere: atqui quantitas à substantia separata existit in venerabili Eucharistiæ Sacramento; ergo non tantum est modus substantiæ, sed est aliquid distinctum realiter à substantia, ut jam probatum est.

Notandum est 3. quod ubi Gassendus rejecit Cartesij errorem circa essentiam corporis, docet naturam corporis consistere in soliditate, sed hæc sententia non minus à veritate aliena, quam ipsa Cartesij opinio.

Dicendum est contra illum naturam corporis non consistere in soliditate.

Prob. Quod est de essentia alicujus rei nusquam potest separari ab illa re: atqui soliditas separatur à corpore, ergo essentia corporis non consistit in soliditate. Prob. min. experientiâ constat plurima corpora esse fluida & non solida; ergo soliditas separatur à corpore.

Obj. 1. Per illud corpus constituitur corpus, per quod distinguitur à spatio: atqui non distinguitur à spatio per extensionem: spatium

enim est extensum in longum, latum & profundum; ergo distinguitur per solam soliditatem, & proinde essentia corporis consistit in soliditate.

Resp. majorem propositionem esse contra Cartesianos, neutiquam verò contra Peripateticos, qui docent essentiam corporis debere consistere in eo per quod corpus distinguitur à spiritu, non verò à spatio.

Obj. 2. Ideo soliditas non est de essentia corporis, quia videmus plurima corpora mollia & fluida: atqui illa ratio nulla est, ergo essentia corporis consistit in soliditate. Prob. min. Illa ratio nulla est, si nullum sit corpus, quantumvis molle & fluidum videatur, quod non habeat soliditatem, & si judicamus aliquod corpus esse molle, illa mollicies non provenit ex eo quod ipsius partes sint molles, sed ex eo quod inter partes quæ solidissimæ sunt, intercipiuntur aliqua vacuola, quæ efficiunt ut corpus cedat tactui & molle videatur, ergo licet aliqua corpora sint fluida vel mollia, essentia corporis potest consistere in soliditate.

Resp. negando minorem & antecedens, quia vacuola illa non dantur, ut infra probabitur.



ARTICULUS IX.

*Utrum substantia corporea habeat partes ex se,
vel sit divisibilis independentè
à quantitate.*

NOtandum est, quòd magna est controversia, utrum substantia materialis & corporea habeat ex se & secundum suam entitatem partes extra partes, & sit divisibilis. Thomistæ docent substantiam corpoream secundum se spectatam habere partes extra partes, & esse solum divisibilem radicaliter & virtualiter, quatenus habet capacitatem ad recipiendam quantitatem, per quam habet actu partes extra partes, & est divisibilis actu & formaliter. Oppositum docent plurimi alij Philosophi contra quos,

Dicendum est, substantiam materialem sive corpoream secundum se & sine quantitate non habere partes extra partes formaliter & actu, nec esse divisibilem.

Prob. 1. auctoritate sancti Thomæ, qui 1. parte q. 50. art. 1. docet materiam sive substantiam materialem dividi in partes non ei convenire, nisi quatenus intelligitur sub quantitate, quâ remotâ substantia remanet indivisibilis, ergo &c.

Prob. 2. Partes integrâtes totius Hæterogenei constituuntur in esse partiû. per quantitatem, &

alia accidentia, ergo quantitas facit partes in substantia, prob. ant. Per illud partes constituuntur in esse partium, per quod differunt, quia idem est principium constitutivum & distinctivum: atqui differunt tantum per quantitatem & alia accidentia, non differunt enim per formas partiales quæ non dantur, ut probabitur in tractatu de anima, ergo partes constituuntur in esse partium per quantitatem & alia accidentia.

Prob. 3. Ex Alberto magno, & illa ratio affertur etiam à R. P. Vincentio. materia prima lapidis, v. g. vel est simplex, vel composita ex se sine quantitate: Si simplex, ergo est indivisibilis: Si composita, ergo vel prima compositione, hoc est, ex actu & potentia: vel secunda; hoc est, ex subjecto & accidente. Non primâ, quia materia est pura potentia nullum includens actum: nec secundâ, quia hæc supponit primam; ergo est omnino simplex, atque adeo indivisibilis, & carens partibus sublata quantitate. Adde quod si haberet ex se partes distinctas, includeret actum, quia actus est qui distinguit ex 7. Metaph. cap. 13. textu 49. & ita non esset pura potentia.

Obj. 1. Si substantia esset divisibilis dependenter à quantitate, secundum se & secundum suam entitatem spectata, esset indivisibilis: atqui substantia corporea non potest secundum suam entitatem dici indivisibilis; ergo substantia corporea non est divisibilis dependenter à quantitate. Prob. min. si substantia corporea secundum suam entitatem spectata, esset indivisibilis, non differret à

substantia spirituali ; atqui debet differre à spiritu , ergò &c.

Resp. neg. min. ad cuius probationem nego maj. quia in hoc differt substantia corporea à substantia spirituali , quòd licet substantia corporea secundum suam entitatē spectata , sit indivisibilis formaliter , est tamen radicaliter & virtualiter divisibilis , quia potest recipere quantitatem per quam sit formaliter divisibilis. Substantia verò spiritualis non est divisibilis neque formaliter , neque radicaliter , quia non potest recipere quantitatem.

Obj. 2. Quātitas non facit partes actuales in substantia , si substantia dividatur independenter à quantitate : atqui substantia dividitur independenter à quātitate ; ergò quātitas non facit partes actuales in substantia. Prob. mi. substantia aliquando dividitur , ipsā quantitate remanente indivisā ; ergò substantia aliquando dividitur independenter à quantitate. Prob. ant. Si quis Sacerdos consecret mediam partem Hostiæ , una medietas substantiæ panis dividitur ab alia medietate , quantitate remanente indivisā ; ergo substantia aliquando dividitur , quantitate remanente indivisā.

Resp. neg. mi. ad cuius probationem nego utrumque ant. quia primò una medietas substantiæ panis non dividitur ab alia medietate , sed solùm definit esse vi verborum. 2. Quia dato etiam , quòd dividatur , hoc fit per quantitatem , quæ licet indivisa apparenter videatur , realiter tamen est divisa ; sicut licet rami non viventes & aridi videantur conjuncti cum viventibus , sunt tamen realiter divisi.

Obj.

Obj. 3. Si quantitas faceret partes in substantia, illæ partes dependerent à quantitate tanquam à causa formali: atqui partes non possunt dependere à quantitate tanquam à causa formali; ergo quantitas non facit partes in substantia, Prob. mi. Si partes dependerent à quantitate tanquam à causa formali, sequeretur quòd illæ partes non essent substantiales, sed accidentales & quantitativæ; quia effectus formalis nihil aliud est quam ipsa forma communicata: atqui partes substantiales non possunt esse accidentales & quantitativæ; ergo partes non dependent à quantitate tanquam à causa formali.

Resp. neg. min. ad cuius probationem dist. maj. Si partes substantiales ut substantiales dependerent à quantitate tanquam à causa formali, non essent substantiales, sed accidentales con. Si partes ut partes sunt dependerent à quantitate tanquam à causa formali, non essent substantiales neg. quia quantitas non facit substantiam in partibus, sed tantum divisibilitatem, & ita partes substantiales & divisibiles non sunt totus effectus quantitatis, sicuti substantia alba non est totus effectus formalis albedinis; habet enim à se quod sit substantia, & ab albedine quod sit alba. Ita partes habent à se quod sint substantiales, & habent à quantitate quòd sint formaliter partes & divisibiles.

Obj. 4. In nutritione substantia acquiritur per partes; ergò substantia secundum se habet partes.

Resp. dist. ant. substantia acquiritur per partes, dependenter à quantitate conc. inde-

pendenter à quantitate. neg. quia nutritio primariò terminatur ad substantiam; secundariò verò ad quantitatem, cum substantia non possit acquiri sine quantitate, sicut accretio terminatur primariò ad quantitatem secundariò ad substantiam, quia cum quantitas sit accidens, non potest acquiri sine substantia.

Obj. ultimò ex sancto Tho. 5. Metaph. lectione 15. Quantitas, inquit, inter alia accidentia propinquior est substantiæ, unde quantitatem esse substantiam putant aliqui; nam sola quantitas habet divisionem in partes proprias post substantiam, hoc est quantitas est divisibilis sicut substantia quæ est divisibilis; ergò substantia habet partes independentes à quantitate.

Resp. dist. auct. Divi Tho. Substantia est divisibilis radicaliter & in potentia conc. formaliter neg. Quia quantitas & substantia conveniunt in hoc, quod utraque habeat partes, sed differunt quod substantia habeat partes quæ non habent rationem partium formaliter nisi per quantitatem: quantitas autem habet partes ex se, & est divisibilis, quia quod est per se tale, non indiget fieri tale per aliud.

QUÆSTIO II.

De continuo.



U M jam in prima hujus tractatus quæstione de quantitate in communi egerimus: nunc agendum superest de aliqua quantitatis specie, nempe de quantitate continua. Mysterium certè Philosophicum est hæc difficultas, in qua ratio plus probat, quam possit intelligere; plus obiicit, quam possit solvere. Ut tamen aliquantulum explicetur continui compositio & natura; ea qua poterimus perspicuitate, involutas de punctis & Mathematicis & Physicis controversias evoluere conabimur.

ARTICULUS I.

Utrum in continuo sint partes actu, an solum in potentia, & utrum illæ partes sint inter se realiter distinctæ.

NOtandum est, continuum vulgò significare aliquod compositum multis partibus

integrantibus nexu aliquo cohærentibus & cōjunctis. Propriè definitur ab Aristotele lib. 5. Phys. cap. 3. textu 26. illud, *cujus partes communi termino copulantur*, unde continua sunt illa, *quorum ultima sunt unum*: contigua verò sunt illa, *quorum ultima sunt simul*.

Notandum est 2. quod circa istam difficultatem duplex est opinio; prima docet continuum nullas habere partes, & esse aliquid indivisum; potentia autem esse divisibile. Secunda docet continuum nullas actu habere partes ab invicem distinctas; ita ut hujusmodi partes fiant actu distinctæ, vel reali & Physica separatione, vel sola designatione digiti vel oculi.

Notandum est 3. duo esse genera partium: aliæ sunt æquales vulgò aliquotæ; aliæ vocantur proportionales. Æquales illæ sunt quæ ad aliquam certam mensuram sumuntur: dicuntur autem aliquotæ, quia aliquoties repetitæ exhauriunt totum v. g. palmus est pars aliquota ulnæ; quia aliquoties repetitus exhaurit præcisè ulnam; dicuntur non communicantes, quia illarum quælibet est extra aliam, & una non communicat cum alia; dicuntur denique designabiles, quia cum una sit extra aliam, possunt designari facile; vel oculo, vel digito, vel alio modo; proportionales verò sunt illæ quæ secundum aliquam mensurarum decrecentium proportionem sumuntur minores & minores semper; ut si cubitus dividatur in duos palmos, palmus in semipalmos, & ita de aliis, servata semper eadem proportionem, illæ partes dicuntur inæquales, ut per se manifestum est. Dicuntur etiam indeterminatæ, quia

non habent certos terminos parvitatis, ita ut facta quacumque divisione nusquam deveniunt ad ultimam: dicuntur denique communicantes, quia una accipit aliquid de altera, sicut semipalmus accipit & participat aliquid de palmo, cum sit illius medietas.

Dicendum est 1. in continuo esse actus partes.

Prob. 1. Quod dividitur in partes, continet actus illas partes, antequam dividatur: atqui continuum dividitur in partes, ut constat experientia; ergo habet actus partes.

Prob. 2. Quod est actus majus, habet actus aliquid, quo fit altero majus: atqui oceanus est actus major fonte; ergo habet aliquid, nempe partes quibus fit major.

Dicendum est 2. hujusmodi partes continui esse realiter inter se distinctas, independentes à quavis designatione mentis, aut aliâ hujusmodi.

Prob. Quælibet res distinguitur ab alia re per illud, per quod constituitur in sua entitate: atqui partes sunt in continuo secundum propriam entitatem; ergo per ipsam distinguuntur ante quamcumque divisionem: nam ante divisionem pedis in digitos, aut digiti in duodecim lineas, jam lineæ actus sunt in digito, & digiti in pede: separari enim possunt abinvicem, & separata existere: quæ est maxima distinctionis nota.



ARTICULUS II.

*Utrum in omni continuo, actu existant vera
& positiva indivisibilia tam continuantia
quam terminantia.*

NOtandum est indivisibilia esse realitates quasdam quibus quantitas continua tam permanens quam successiva dicitur finita & limitata, ne ulterius se extendat: hæc autem indivisibilia in continuis successivis dicuntur instantia; in continuis verò permanentibus dicuntur, vel punctum, quod est illud cuius nulla est pars sive quod nullam habet dimensionem, neque longitudinem, neque latitudinem, neque profunditatem; vel linea quæ est longitudo sine latitudine; vel denique superficies quæ est latitudo sine profunditate; ibi ergo quæritur utrum in omni continuo existant actu, realiter, physicè huiusmodi indivisibilia, quæ uniant & terminent partes continui.

Dicendum est 1. dari indivisibilia terminantia.

Prob 1. Datur contactus; ergo dantur indivisibilia terminantia. Antecedens patet prob. conf. duo corpora non possunt se tangere secundum partes, sed solum secundum indivisibilia terminantia partes; ergo debet dari huiusmodi indivisibilia. Prob. ant. si duo corpora se tangerent secundum partes, deberent esse

simul secundum illud secundum quod se tangerent: atqui partes non possunt esse simul secundum seipsas, aliàs penetrarentur; ergo duo corpora se tangunt secundum indivisibilia terminantia.

Prob. 2. Si globus perfectè rotundus poneretur supra corpus perfectè planum, tangeret illud actu, realiter & Physicè; ergo tangeret illud secundum aliquid actuale, reale & Physicum; siquidem actualis, realis & Physicus contactus debet fieri in aliquo reali Physico & actualiter existente; non autem in sola negatione, quatenus scilicet non distant ab invicem; nam inde sequeretur quod globus æneus cadens supra vitrum planum non illud frangeret vi propria; hoc non potest dici: atqui corpus perfectè rotundum non tangit corpus perfectè planum nisi in puncto; ergo necessariò debent admitti puncta in continuo. Prob. min. si corpus perfectè rotundum tangeret corpus perfectè planum in parte divisibili, non esset perfectè rotundum; illa enim quæ se tangunt debent se adæquare & proportionare in eo in quo se tangunt; proinde illa pars globuli quæ tangeret partem corporis plani, deberet esse plana: in corpore autem perfectè rotundo nihil potest esse planum: alioquin lineæ ductæ à centro non essent æquales: ergo globus perfectè rotundus tangit corpus perfectè planum in puncto.

Dicendum est 2. Dari indivisibilia continuantia,

Prob. 1. partes continui debent uniri per aliquem terminum communem juxta definitionem continui: atqui ille terminus com-

munis non potest esse nisi aliquid indivisibile continuans; ergo &c. prob. min. ille terminus communis non potest esse aliqua pars. 1. Quia impossibile est, ut aliqua pars sit communis duabus partibus. 2. Quia illa pars quæ uniret alias duas, adhuc indigeret uniri, cum ipsa constaret aliis partibus; ergo ille terminus communis debet esse aliquid indivisibile continuans.

Obj. 1. Quod existit tantum in potentia, non existit actualiter: atqui ex Arist. & sancto Thom. puncta existunt in continuo tantum in potentia; ergo non existunt actu, realiter & physice.

Resp. dist. min. Existunt tantum in potentia quantum ad terminationem con. quantum ad continuationem neg. quia Arist. & sanctus Thomas loquuntur solum de punctis quæ resultant ex divisione quantitatis; quando enim linea bipalmaris dividitur in duos palmos, loco unius puncti quod antea uniebat & continuabat utramque medietatem palmarem, resultant duo puncta quæ terminant utramque extremitatem in qua facta est divisio, quæ duo puncta non erant antea actualiter & physice in linea, sed solum in potentia; vel Arist. & Divus Thomas loquuntur de linea circulari, ubi non sunt actu puncta terminantia; sed solum in potentia, quæ resultarent actu, si linea divideretur.

Obj. 2. Ideo existunt actu & physice puncta, ut partes continui inter se uniantur: atqui puncta non sunt necessaria ad illud; ergo falsum est, indivisibilia realiter & physice existere in continuo. prob. min. partes continui

possunt immediatè uniri per se ipsas, sicut materia & forma; ergò indivisibilia non sunt necessaria ad talem unionem.

Resp. neg. min. & auct. Quia materia & forma non se habent sicut partes continui; siquidem cum materia & forma habeant inter se intrinsecam & essentialem dependentiam & ordinem, possunt per se ipsas immediatè uniri: partes vero continui, cum nullam habeant inter se dependentiam, quin imò una periret esse extra aliam; ideo non possunt uniri nisi per indivisibilia.

Obj. 3. Indivisibilia non possunt unire partes continui, punctum. v. g: cum sit omnino indivisibile non potest afficere utramque partem; ergò non dantur indivisibilia.

Resp. dist. ant. Punctum non potest afficere utramque partem continui inhærendo. con. adhærendo neg. quia verum quidem est, quod punctum non potest inhære & se communicare utrique parti continui: quia sic esset in diversis subjectis: sed potest unire & continuare utramque partem adhærendo solum sive intimè assistendo: illa autem indivisibilia cum sint termini & modi quantitatis recipiuntur in eodem subjecto in quo recipitur quantitas, & ita dicendum, quod illa indivisibilia recipiuntur in subjecto, non quidem ratione sui, sed ratione quantitatis, cujus sunt termini & modi.

Obj. 4. Partes uniuntur immediatè indivisibilibus; ergò partes uniuntur immediatè inter se; quia habent maiorem proportionem inter se, cum sint ejusdem rationis & naturæ: indivisibilia verò sunt diversæ rationis & naturæ cum partibus.

Resp. dist. ista verba quæ continentur in consequentia. Partes habent majorem proportionem inter se, quam cum indivisibilibus secundum rationem partium con. secundum rationem unitivam neg. quia licet partes sint ejusdæ naturæ, tamen inter illas nulla est proportio, secundum unitivā rationem & proinde non possunt immediatè uniri, quia inter illas non reperitur intrinseca & essentialis dependētia: partes autem uniuntur immediatè indivisibilibus, quia cum indivisibilia sint ratio formalis unionis, possunt immediatè uniri partibus per se ipsa; si enim requirerent aliquid aliud, quo mediante unirentur, daretur processus in infinitum, ut patet.

Obj. ultimò. Ideò dantur indivisibilia, ut quantitas sit finita & limitata: atqui sine indivisibilibus quantitas; potest esse finita & limitata; si enim indivisibilia divinitus separarentur à quantitate, illa quantitas remaneret terminata, quia non excederet priores limites; ergò indivisibilia non sunt necessaria ut quantitas sit finita & terminata.

Resp. dist. min. Si à quantitate separarentur indivisibilia, quantitas remaneret finita privativè con. positivè neg. quia tunc illa quantitas diceretur finita privativè per carentiam extensionis; non verò positivè, quia non haberet terminum positivum.



ARTICULUS III.

Utrum continuum constet solis punctis Mathematicis.

Notandum est 1. Quod plurimi Philosophi de duobus dumtaxat punctorum generibus ibi disputant, scilicet de punctis mathematicis & punctis physicis, quia puncta Zenonis cum Mathematicis confundunt. Sed insignis Mathematicus P. de Chales observat puncta Mathematica cum Zenonicis male confundi; juxta ergo illius Mathematici sententiam, tria sunt punctorum genera, scilicet puncta Mathematica, puncta Zenonis, & puncta Physica. Puncta Mathematica sunt illa quæ nullam habent dimensionem, neque longitudinem, neque latitudinem, neque profunditatem. Puncta Physica sunt illa quæ habent aliquam dimensionem & magnitudinem. Puncta Zenonis (juxta mentem insignis Mathematici), sunt partes quantitatis omnium minimæ, quæque indivisibile spatium occupant; adeo ut ne per mentem quidem dividi possunt.

Notandum est 2. Quod posito quod puncta Mathematica cum Zenonicis non confundantur, triplex opinio circa compositionem continui rejicienda occurrit. Prima est quorundam qui dicunt continuum constare solis punctis Mathematicis; ita ut omne corpus con-

stet superficiebus; omnis superficies lineis, omnis linea punctis. Secunda opinio est Gassendi, qui cum Epicuro docet continuum constare Solis punctis Physicis. Tertia est Zenonis qui suis solis punctis continuum componi putat: in isto articulo simul eisdem rationibus probabitur continuum non posse constare solis punctis Mathematicis; neque solis punctis Zenonicis; sententia autem Gassendi rejicietur, ubi probabitur continuum constare partibus in infinitum divisibilibus.

Dicendum est continuum non constare solis punctis Mathematicis.

Prob. 1. Illa non possunt facere quantitatem continuam, quæ non possunt invicem continuari: atqui puncta Mathematica non possunt continuari; ergo non possunt facere quantitatem continuam. prob. illa tantum possunt continuari quæ uniuntur secundum extremitates, quia continua sunt illa quorum extrema sunt idem: atqui puncta Mathematica non possunt uniri secundum extremitates; ergo puncta Mathematica non possunt continuari. Major est evidens quia si aliqua uniantur, non secundum extrema, sed secundum se tota, ita ut nihil unius emergat extra aliud; non erunt continua sed penetrata; sicque non facient aliquid extensius; quia unum non extenderetur extra aliud. Minor etiam patet, quia puncta Mathematica non habent extremitates.

Prob. 2. Si continuum constaret solis punctis, nullam haberet extensionem: atqui illud est absurdum; ergo & aliud. prob. sequelæ majoris. ut tria puncta v. g. faciant lineam, debent necessario uniri & proximè juxta se poni

ni; ergo si illa tria puncta faciant extensionē in longum, necesse est, ut tertium punctum magis distet à primo quam à secundo: atqui hoc est impossibile: ergo si continuum constaret puris punctis, non haberet extensionem. prob. min. Si tertium punctum aliquo modo distaret à primo, distaret per intervallum spatii quod occupatur à secundo: atqui spatium nullum est: cum enim punctum nullas habeat dimensiones, nullum etiam potest occupare intervallum: ergo impossibile est, quod tertium punctum distet à primo: inde etiam sequeretur, quod linea viginti palmorum esset æqualis lineæ quadraginta palmorum: quia una non haberet majorem extensionem aliā ergo continuum non constat solis punctis Mathematicis.

Obj. 1. Puncta possunt facere extensionem, si juxta se posita non se penetrant: atqui puncta juxta se posita non se penetrant: ergo puncta possunt facere extensionem. prob. min. punctum quod unit partem cum aliā, non penetratur cum illa: ergo unum punctum potest tangere aliud punctum, quin se penetrant.

Resp. neg. min. ad cujus probationem neg. consequ. & paritatem: quia idē punctum non penetratur cum parte, quia punctum non est adæquatum parti: cum verò punctum sit adæquatum puncto, punctum juxta punctum positum penetratur cum illo, & ita punctum non potest facere extensionem.

Obj. 2. Unitates faciunt multitudinem, & plurima instantia faciunt durationem: ergo plurima puncta possunt facere extensionem. prob. consequ. ex Arist. Linea est in puncto,

sicut unitas in numero, & instans in tempore: ergo si plurimę unitates faciāt multitudinem, & plurima instantia faciant durationem, plurima puncta possunt facere extensionem.

Resp. neg. conseq. ad cujus probationem dist. ant. Linea est in puncto, sicut unitas in numero, & instans in tempore secundum quid conc. simpliciter & absolute neg. quia instans, unitas & punctum conveniunt secundum quid, non verò simpliciter & absolute. unitas & punctum conveniunt in hoc, quòd sicut unitas est principium numeri, ita punctum est principium lineæ: differunt verò in hoc, quòd unitas est pars numeri, punctum vero non est pars lineæ. Unitas est pars numeri, quia numerus est quantitas discreta, & proinde essentialiter exigit partes divisas, & abstrahit à loco & situ, ideoque divisione & separatione constituitur, non vero compositione: inde fit ut possit magnitudinem pluralitatis, non verò magnitudinem extensionis, quantitas vero continua exigit partes continuas & sibi cohærentes, situ tamen & loco distinctas, & proinde non potest ex puris punctis componi, quia indivisibile additum indivisibili non facit extensionem. similiter instans & punctum conveniunt in hoc, quòd sicut punctum est principium lineæ, ita instans est principium durationis: in hoc verò differunt, quòd instans potest facere maiorem durationem; punctum verò non potest facere continuū majus. Instans potest facere maiorem durationem, quia duratio abstrahit ab extensione, & ita potest convenire rei indivisibili, quantitas vero continua non abstrahit ab extensione, quæ non potest fieri per indivisibilia.

Obj. 3. Vel post primum punctum sequeretur aliud punctum, vel pars divisibilis; si sequatur punctum, erunt duo indivisibilia immediatè & juxta se posita, & consequenter in toto continuo; si verò sequatur pars, illa pars erit continua sine punctis; ergò totum erit continuum sine punctis; quia non est major ratio de una parte quàm de aliis.

Resp. Quòd post primum punctum sequitur pars, quæcum sit in infinitum divisibilis, in ea debent esse puncta, non actu, sed potentiâ; quatenus ex divisione nova debent resultare puncta.

Obj. 4. & ultimò. Si globus perfectè rotundus poneretur supra corpus perfectè planum; illud tangeret in puncto (ut jam dictum fuit) ergo si volveretur supra illud tangendo semper in puncto, describeret lineam compositam ex solis punctis; proindè sequeretur omne continuum constare ex solis punctis.

Resp. neg. conseq. Quia licet globus tangeret planum in puncto, non tamen describeret lineam compositam ex solis punctis; quia non tangeret planum continuo motu, sed discreto, scilicet saltando de uno puncto ad aliud. Ille tamen motus dicitur continuus ratione æris circumscribentis ipsum globum & planum, sicut motus progressivus animalium dicitur continuus, licet continuò non tangat terræ paries.



ARTICULUS IV.

Utrum continuum constet partibus in infinitum divisibilibus.

CONTRA GASSENDUM.

Notandum est. Quod ex dictis constat continuum non constare solis punctis, sed partibus. Nunc itaque expendendum an partes illæ ex quibus continuum preedit, sint in infinitum divisibiles, ut visum est Aristoteli, & ut magna peripateticorum pars, imo & Cartesius, ac plerique recentiores existimant. Gassendus contra peripateticos & Cartesium, oppositum docet; vult enim quod continui divisio tandem exhauriatur, cum ad minima, seu ad puncta physica ventum est. Sed contra Gassendum.

Dicendum est cum Aristotele, peripateticis & Cartesio continuum constare partibus in infinitum divisibilibus.

Prob. 1. Nulla pars est in continuo tam minima, quæ non sit in infinitum divisibilis in alias partes; ergo partibus proportionalibus in infinitum divisibilibus constat continuum. prob. ant. nulla pars est in continuo tam minima, quæ non habeat quantitatem, cum quantitas sit proprietas entis; ergo nulla est pars in continuo, quæ non sit in infinitum divisibilis in alias partes.

Obj. 1. Dari possunt in naturâ particulæ corporis adeò tenues & subtiles, ut à nulla creatura dividi possint, & fortè non dubium est, quin multæ tales in mundo dentur, ut atomi, & similes, quas adeo exiguas concipere possumus; ut nulla arte minui possint; & tamen nullus non fatebitur, quin hujusmodi substantiæ sint corporeæ; ergo dici nequit materialem substantiam esse divisibilem in semper divisibilia. Hoc argumentum sibi proponit Antonius le Grand, in sua institutione Philosophiæ secundum principia Cartesii, parte quarta de Physica generali, numero quarto.

Resp. cum eodem Philosopho. Impossibile esse, ut aliquæ partes dentur ita subtiles, exempli causa, Atomî, quæ sint corporeæ, & quæ habere aliquam extensionem concipiantur, & sint indivisibiles; cum esse extensum, & indivisibile, repugnet. Nam licet Deus fortè voluerit, ut aliquæ atomi, à nobis dividi nequeant, tamen dicere non debemus, potestate illas dividendi se privasse. Nam clarè intelligimus, illas à Deo posse dividi, quamdiu à nobis extensas esse supponimus. Itaque indivisibilia (si quæ dari possunt) corporis compositionem ingredi non possunt, quum in corpore nihil reperiatur, quod longitudine, latitudine & profunditate non constet.

Obj. 2. Si continuum constaret partibus proportionalibus in infinitum divisibilibus, daretur infinitum actu in extensione & in multitudine: atqui illud non potest dici; ergo nec aliud, prob. maj. quoad omnes partes. Primo partes infinitæ habentes extensionem faciunt

infinite extensum : atqui partes proportionales infinite habent extensionem ; ergo faciunt infinite extensum. Secundo partes numero infinite faciunt infinitum in multitudine : atqui partes proportionales sunt numero infinite ; ergo faciunt infinitum in multitudine.

Resp. 1. neg. maj. ad. cujus probationem, quantum ad primam partem. dist. maj. Partes infinite habentes extensionem non communicantem faciunt infinitum actu in extensione con. partes infinite habentes extensionem communicantem faciunt infinitum in extensione neg. similiter distinguenda est minor propositio. Partes proportionales habent extensionem communicantem con. non communicantem neg. quia ut partes aliquae faciant infinite extensum, debent habere extensionem non communicantem ; ita ut extensio unius sit extra extensionem alterius : partes autem proportionales non ita se habent ; quia extensio v. g. duorum semipalmarum qui sunt proportionales respectu palmarum, non est extra extensionem unius ex his palmis, sed est extensio ipsius.

Resp. 2. neg. eandem maj. prop. ad cujus probationem quantum ad secundam partem dist. maj. Partes numero infinite actu & cathegorematicè, faciunt infinitum actu in multitudine con. partes numero infinite in potentia tantum & syncathegorematicè, faciunt infinitum in multitudine neg. Similiter distinguenda est min. prop. partes sunt infinite syncathegorematicè & in potentia con. cathegorematicè & actu neg. quia partes proportionales eodem modo sunt infinite, quo sunt partes.

Cum autem ſint tantum partes in potentia; ſiquidem ut aliqua pars ſit actu pars, debet eſſe extra aliam, ſuperaddere aliquid ad illam, habere diſtinctam extensionem & facere majus; cum autem partes proportionales ſint communicantes non habent extensionem diſtinctam: proinde ſunt tantum partes in potentia, & eodem modo ſunt infinitæ.

Instabis. Partes ſunt actu in continuo; ergo faciunt actu infinitum.

Resp. diſt. ant. partes ſunt actu in continuo ſecundum entitatem conc. ſecundum infinitatem neg. quia verum quidem eſt, quod illæ partes habent actu entitatem in continuo; ſed tamen illæ partes non poſſunt facere infinitum, nec in extensione, nec in multitudine, ut patet ex dictis in præcedenti argumento.

Inst. iterum: atqui illæ partes poſſunt facere infinitum in multitudine; ergo nulla reſponſio. Prob. ſubſ. partes actu diſtinctæ ab invicem poſſunt facere infinitum in multitudine: atqui illæ partes ſunt actu diſtinctæ ab invicem: ergo poſſunt facere infinitum in multitudine.

Resp. neg. ſubſ. ad cujus probationem neg. niaj. quia ut partes faciant infinitum in multitudine, non ſufficit, ut ſint actu diſtinctæ, ſed debent eſſe actu diviſæ: ſiquidem numerus non reſultat ex diſtinctione, ſed ex actuali diſiſione partium: unde ſicut impoſſibile eſt, ut omnes illæ partes ſint ab invicem diviſæ, ita impoſſibile eſt, ut ſint infinitæ ſecundum numerum. Solutio eſt ex Sancto Thoma in 4. diſt. 10. q. 1. art. 3. & 3. p. q. 76. art. 3. ad 1.

Obj. 3. Si in quolibet continuo essent partes in infinitum divisibiles, tot essent partes in grano tritici; quot sunt in aliquo alio corpore vastissimo. v. g. in cœlo: quia in grano tritici sunt partes infinitæ sicut in cœlo: atque illud non potest dici: ergò nec aliud.

Resp. dist. maj: tot essent partes in grano tritici, proportionales conc. aliquotæ neg. Quia cum granum tritici & cœlum habeant rationem continui, utrumque debet constare partibus in infinitum divisibilibus: & proinde nullum est inconueniens, quòd tot sint partes proportionales in grano tritici, quot sunt in cœlo.

Obj. ult. non potest concipi, imò & sensui videtur repugnans, granulum v. g. tritici esse divisibile usque ad diem iudicij, imò per totam æternitatem in partes minores & minores, absque eo quod possit tandem devenire ad ultimam divisionem: ergo, &c.

Resp. 1. Quòd licet illud mirum videatur, licet illud captu sit difficile: hoc ita tamen esse suadent exempla, quæ nobis suppeditat, tum natura, tum ars, tum mathematica, ut optime notat Thomista celeberrimus.

1. Natura nobis offert minutissimum acari corpus, in quo tamen minimo corpusculo innumerabiles divisiones natura induxit, in illo enim corpusculo distinguntur cor, jecur, intestina, pedes, nervi, caput, dentes, guttur, &c. & quod magis mirum est, per omnes istas partes curstat magna spirituum copia, & quod demum fidem omnem vinceret, nisi oculi suaderent, deprehensum est per microscopium aliqua ex hujusmodi animalculis, cuius

pilis esse hirsuta. Ex quibus natura nos docet quod minima quantitas in minores & minores partes potest dividi.

2. Ars nobis offert aurum quod malleator potest dilatare repetitis ictibus in varia folia, & nulla est tam minima auri pars quæ adhuc in minores & minores semper particulas in infinitum non possit dividi.

3. Idem nobis suadet Mathematica: docet enim legem trianguli perfecti esse, ut latera ejus à basi ad centrum anguli ducta nunquam nisi in centro coeant, & tamen quanto magis ad centrum accedunt, tanto propius invicem accedant. Sumamus; ergo triangulum rectilineum, cujus basis sit minima quædam lineola, à qua ducantur duæ lineæ ad punctum maximè distans, v. g. ab urbe Avenionensi ad Tolosanam: lineæ istæ quanto magis accedent ad centrum cuspidis, tanto magis invicem accedent, & de brevissimo basis spatium detrahent: & tamen nunquam illud totaliter exhaurient, nisi cum pervenerint Tholosam: quantula ergo particula, putas, detrahetur ex illo spatio singulis leucis, sed quam minor singulis passibus, & quam minima singulis digitis: ergo brevissima illa spatij particula dividetur in tot particulas, quot sunt digiti in illa longitudine immensa, quæ est ab urbe Avenionensi ad Tolosanam. Ita Gouddin l. partis Phys. disput. 3. quæst. 5. art. 1. de continuo.

Resp. 2. Cum S. Th. 1. Phys. lect. 9. cum dicitur, continuum esse divisibile in partes in infinitum divisibiles, hoc esse intelligendum Mathematicè, & quantum pertinet ad ratio-

nem quantitatis : quia si spectetur natura sub-
jecti , Physicè loquendo , potest contingere
non posse eam salvari in quantumvis parva
quantitate.



QUÆSTIO III.

De infinito.

DUO tantum in duobus articulis quæ-
rentur. In 1. utrum possit dari divini-
tus aliqua creatura infinita secundum es-
sentiam. In 2. & ultimo utrum possit dari in-
finitum , actu secundum magnitudinem mul-
titudinem & intentionem qualitatis.



ARTICULUS I.

*Utrum possit dari divinitus creatura infinita
secundum essentiam.*

Notandum est 1. infinitum definiri illud
quod caret fine & termino , vel ut in-
quit Arist. 5. Phys. cap. 7, *Illud cujus aliquid est
semper extra.*

Notandum est 2. quod carentia quæ est
in infinito potest sumi tripliciter, scilicet, pri-
vativè , negativè , & positivè ; sumitur priva-

tivè quando est in aliquo subjecto quod natum est habere terminum, sed tamen caret termino; quantitas v. g. est capax habere terminum; si igitur careat termino dicitur infinita privativè. Infinitum negativè dicitur illud cujus subjectum non est capax alicujus termini; hoc autem duplici modo potest contingere, vel propter perfectionem subjecti quod nullo termino affici potest; & hoc modo Deus est positivè infinitus; alio modo hoc potest contingere, scilicet ex imperfectione subjecti quod adeo imperfectum est, ut nihil habeat in se quod terminari possit; ita punctum est infinitum, quia propter indivisibilitatem non habet terminum. Non ibi agitur de infinito positivè nec de infinito negativè, sed tantum de infinito privativè.

Notandum est 3. Infinitum esse duplex. Aliud est infinitum actu, aliud est infinitum in potentia. Infinitum actu est illud quod secundum id quod actu habet, caret fine & termino, & dicitur infinitum categorematicum, quatenus est infinitum absolute & sine addito; infinitum verò in potentia est illud quod secundum illud quod actu habet est finitum & limitatum, sed secundum illud quod potest habere, caret fine & termino, quia non potest illi assignari certus & determinatus terminus ultra quem non possit transire; illud autem infinitum dicitur syncategorematicum, quia non est propriè infinitum.

Notandum est 4. & ultimò duplex adhuc esse infinitum, aliud scilicet infinitum simpliciter & in omni genere entis; aliud secundum quid & in certo genere entis. Infinitum sim-

pliciter est illud quod primò caret terminis essentiæ, scilicet certo genere & certa differentia, quia continet perfectiones omnium generum & omnium differentiarum. 2. Quod caret terminis Physicis, scilicet materiâ & formâ, quia est actus purissimus & simplicissimus excludens omnem omnino potentialitatem. 3. Quod caret terminis Metaphysicis, scilicet substantiâ & existienciâ: quia illa identificantur cum suâ natura: illud autem ens infinitum est Deus Optimus Maximus: infinitum verò secundum quid, est illud quod caret fine & termino in aliquo certo genere, vel in genere quantitatis tam continuæ quam discretæ, ita ut habeat multitudinem & magnitudinem sine termino & número: vel in genere qualitatis, ita ut careat termino intentionis.

Dicendum est non posse dari divinitus aliquam creaturam infinitam simpliciter & secundum essentiam.

Prob. illud dicitur infinitum simpliciter quod caret terminis essentiæ, scilicet genere & differentia, quod caret terminis Physicis, scilicet materiâ & formâ, & quod caret terminis Metaphysicis, scilicet substantiâ & existienciâ: atqui nulla est creatura quæ careat genere & differentia, quæ careat materia & forma, & quæ non habeat essentiam finitam; ergo nulla potest dari creatura infinita simpliciter. Prob. min. quoad omnes partes. 1. Omnis creatura ponitur in prædicamento; ergo nulla est creatura infinita simpliciter. 2. Quod caret actu & potentialitate, est actus purissimus: atqui nulla est creatura quæ sit actus purissimus; ergo nulla est creatura quæ

quæ sit actus purissimus; ergo nulla est creatura quæ possit carere actu & potentialitate.

3. Quod habet existentiam receptam in alio habet existentiam finitam: unumquodque enim finitur & limitatur per illud in quo recipitur: atqui omnis creatura habet existentiam receptam in essentia, utpote distinctam realiter ab illa, ut probabitur in *Metaphysica*; ergo omnis creatura habet existentiam finitam: & proinde nulla potest dari creatura ita perfecta, ut non possit dari perfectior.

Obj. 1. Potentia Dei operativa est infinita: atqui potentia infinita petit habere effectum infinitum; ergo cum detur potentia infinita, potest etiam dari effectus infinitus.

Resp. dist. min. Potentia infinita petit habere effectum infinitum syncategorematicè & in potentia, conc. categorematicè & actu, neg. quia ut potentia dicatur infinita actu, sufficit ut possit producere effectum infinitum in potentia, hoc est, quod data quacumque creatura secundum essentiam perfectissimâ, possit producere aliam perfectiorem & perfectiorem in infinitum: hoc enim denotat quod talis potentia continet omnem perfectionem omnium creaturarum, & consequenter quod illa potentia est infinita.

Inst. atqui ille effectus debet esse infinitus categorematicè; ergo nulla solutio. Prob. sub. tota virtus & natura agentis manifestatur in effectû; ergo effectus proveniens à potentia categorematicè infinita, debet esse categorematicè infinitus.

Resp. neg. sub. ad cujus probationem dist. ant. virtus agentis univoci tota manifestatur

In effectu conc. virtus agentis æquivoci, nequa, ut ait Sanctus Thomas 1. p. q. 25. a. 2. ad 2. Potentia, inquit, agentis univoci tota manifestatur in suo effectu; potentia enim productiva ignis nihil potest plusquam ignem producere; sed potentia agentis non univoci non tota manifestatur in effectus productione, sicut potentia solis non tota manifestatur in productione animalis ex putrefactione generari. Manifestum est autem quod Deus non est agens univocum; nihil enim potest cum illo convenire neque in specie, neque in genere; non oportet ergo, quod manifestetur infinita Dei potentia in hoc quod producat effectum categorematicè infinitum.

Obj. 2. Deus potest habere hoc imperium. Producat perfectissimus effectus qui potest à me produci: hoc posito quæritur, an ille effectus sit futurus infinitus vel non; si primum, dabitur infinitum; si secundum, dabitur creatura finitè perfecta, ultra quam non poterit Deus producere perfectiorem, quod est falsum, nam illud denotaret, potentiam finitam & limitatam; ergo potest dari infinitum actu.

Resp. Quod impossibile est, ut Deus habeat tale imperium, quia esset otiosum & inutile: siquidem nihil esset quod illi obediret, sicuti si Deus diceret, fiat pars prima, aut ultima continui, non esset pars aliqua quæ tali obediret imperio.

Obj. 3. Si Deus ageret ex necessitate naturæ, produceret infinitum actu, quia tunc agendo secundum omnes suas vires quæ sunt

infinita, produceret creaturam infinitam; ergo Deus agens liberè producit creaturam actu infinitam, quia libertas non facit quòd Deus non habeat semper eandem virtutem.

Resp. neg. ant. quia dato illo impossibili non sequitur, quod à Deo producatur creatura infinita secundum essentiam; siquidem agentia naturalia agunt tantum secundum exigentiam effectus: cum autem implicet produci creaturam infinitam, sic Deus nunquam illam produceret, quamvis ageret ex necessitate naturæ.

Obj. ultimò. Potest dari creatura ita perfecta ut non possit dari perfectior; ergo potest dari infinitum actu. Prob. ant. potest dari creatura ita imperfecta, ut non possit dari imperfectior; ergo potest dari creatura ita perfecta, ut non possit dari perfectior.

Resp. neg. ant. ad cujus probationem neg. ultimam consequentiam & paritatem: quia res sunt imperfecte quò magis recedunt ab esse divino: unde cum sit possibilis omnimodus recessus scilicet nihilum; ita potest dari substantia omnium imperfectissima, quæ quasi accedit ad nihilum, scilicet materia prima. Res verò sunt perfectiores quò magis accedunt ad esse divinum, & cum dato quocumque accessu supersit semper alius & alius major, cum esse divinum sit infinitum, non potest dari creatura ita perfecta ut non possit dari perfectior.



ARTICULUS II. & ULT.

*Utrum possit dari infinitum actu secundum
quantitatem & qualitatem.*

Notandum est, difficultatem non procedere de facto, sed tantum de possibili: quia certum est omnem magnitudinem & multitudinem esse finitam & limitatam, omnemque qualitatem esse finitè intensam.

Dicendum est, non posse dari etiam divinitus infinitum actu secundum quantitatem & qualitatem.

Prob. Omnis quantitas & omnis qualitas debet esse semper finita; ergo non potest dari infinitum secundum quantitatem & qualitatem. prob. ant. illa debent esse finita, quæ debent recipi in subjecto finito: atqui quantitas & qualitas debent semper recipi in subjecto finito & limitato: quia omne corpus naturale & physicum habet formam substantialem finitam & limitatam per suam materiam, quia unumquodque finitur & limitatur per suum oppositum: ergo quantitas & qualitas debent semper recipi in subjecto finito.

Obj. 1. Datur infinitum in potentia; ergo potest dari infinitum actu, quia frustra est illa potentia quæ non reducitur ad actum.

Resp. negando conseq. & dist. ejus probationē. Frustra est illa potentia quæ non potest reduci ad actum, vel perfectum vel imperfe-

Actum con. perfectum tantum, neg. quia potentia v. g. quam habet continuum, ut dividatur in actum perfectum, non debet tamen tota simul in actum reduci, sed sufficit ut successive reducatur in actum admixtum potentialitate, unde continuum est divisibile, & potest semper dividi in partes, & hoc modo ejus potentia potest reduci ad actum divisibilitatis.

Obj. 2. Infinitum actu in magnitudine non repugnat ex parte magnitudinis, quia de se non est determinata habere terminum; ergo potest dari infinitum actu in magnitudine.

Resp. dist. ant. Non repugnat ex parte magnitudinis in communi, & secundum se precise con. in specie & in actu exercito, neg. quia, ut ait sanctus Thomas 1. p. q. 7. a. 3. ad 2. licet infinitum non sit contra rationem magnitudinis circularis vel triangularis, non autem possibile est in genere esse quod in nulla specie est; unde non est possibile esse aliquam magnitudinem infinitam, cum nulla species magnitudinis sit infinita; nulla enim est magnitudo quæ non terminetur & limitetur aliquâ figurâ, vel sphericâ vel cubicâ.

Obj. 3. Deus potest producere possibilem Angelorum multitudinem: æqui illa possibilis Angelorum multitudo est infinita; ergo Deus potest producere infinitum in multitudine.

Resp. dist. maj. Deus potest producere possibilem multitudinem Angelorum in sensu distributivo con. in sensu colectivo neg. quia si Deus produceret omnes Angelos posibles in sensu colectivo, ita ut nullus alius Angelus

258. *Primæ partis Physicæ,*
producendus superesset, exauriretur Dei po-
tentia, quod non potest dici.

Obj. 4. & ultimò. Gratia est qualitas: sed
gratia potest esse infinitè intensa; ergo potest
dari qualitas in intensione infinita. prob. min.
si gratia non posset esse infinitè intensa, vel il-
la repugnantia se teneret ex parte Dei, vel ex
parte gratiæ, vel ex parte subjecti: atqui illa
repugnantia ex nullo capite provenit; ergo
gratia potest esse infinitè intensa. prob. min.
quoad omnes partes. 1. Non se tenet ex parte
Dei, quia habet virtutem infinitam. 2. Non
se tenet ex parte gratiæ, cum gratia sit partici-
patio infinitæ naturæ Dei. 3. Non se tenet
ex parte subjecti cum subjectum recipiat gra-
tiam secundum potentiam obedientialem, quæ
secundum se est infinita, & potest recipere qua-
lemcumque formam; ergo repugnantia ex
nullo capite provenit.


Resp. neg. min. ad cujus probationem dico,
quòd illa repugnantia provenit ex illo triplici
capite. 1. Ex parte Dei, quia si Deus produ-
ceret gratiam infinitè intensam, exauriretur
illius potentia, cum non posset producere per-
fectiorem. 2. Repugnat ex parte gratiæ,
quia omne ens per participationem est crea-
tum & finitum; ergo cum gratia sit ens per
participationem, quælibet gratia est ens fini-
tum. 3. Repugnat ex parte subjecti, quia ut
ait sanctus Thomas, intensio convenit qualita-
tibus, sive fiat per ordinem gradûs ad gradum,
ut docet Scorus, sive fiat per majorem radica-
tionem in subjecto, ut docet Schola Thomi-
stica, semper talis intensio convenit qualita-
tibus per ordinem ad subjectum; ergo non

potest dari qualitas infinité intensa, si subiectum qualitatis sit finitum.

Inst. Gratia Christi de facto fuit infinita secundum intensiorem; ergo potest dari infinitum secundum intensiorem qualitatis, probatur subsumptum. 1. Quod potest habere effectum infinitum, potest esse infinitum: atqui gratia Christi potest habere effectum infinitum, quia poterat se extendere ad justificandos & salvandos infinitos homines si essent; ergo illa gratia erat infinita. 2. Absurdum est dicere gratiam puræ creaturæ posse pertingere ad perfectionem & intensiorem Christi gratiæ; ergo gratia Christi fuit de facto infinita secundum intensiorem.

Resp. 1. neg. subf. & ad probationem, quantum ad primam partem dist. maj. Quod se extendit ad effectum infinitum est infinitum vel physicè vel moraliter. con. physicè tantum neg. quia gratia Christi habet infinitum effectum, vel propter infinitatem moralem, vel propter unionem divinæ personæ, cui anima Christi est conjuncta.

Resp. 2. ad secundam partem distinguendo ant. Absurdum est dicere, quod gratia puræ creaturæ possit pervenire ad intensiorem physicam & moralem gratiæ Christi, con. ad intensiorem physicam tantum neg. quia gratia alterius hominis semper esset infra gratiam Christi; licet esset adeo intensa secundum intensiorem physicam ac gratia Christi.



QUÆSTIO IV.

De Tempore.



UÆ magis apud homines familiaria & usitata sunt, hæc minus ab hominibus cognita. Videntur & conspiciuntur plurima, & tamen semper latent: nimis assidue percipiuntur à sensibus multa, quorum natura intellectum humanum fugit; plurimarum rerum nomen omnibus notum, natura nemini cognita. Communis ferè omnibus serenaræ lucis lætitia, cum sol suâ amicâ luce toti orbi illa-
ceat, & pauci quibus nobilissima lucis natura innotescat. Nihil juxta aureum Divi Augustini effatum, familiarius & notius in loquendo commemoramus quàm tempus, & intelligimus ubique cum id loquimur. Intelligimus etiam cum alio loquente id audimus, nihil communius quàm ipsius temporis nomen & usus, & nihil occultius & ab hominum cognitione magis remotum, quàm ipsa temporis natura; ita ut cum Aug. 11. conf. cap. 14. clamitent singuli, *si nemo ex me querat, quid sit tempus scio; si querenti explicare velim, nescio*. Quantumvis tamen occulta sit temporis natura, quædam de tempore ibi dicenda existimamus, eâ perspicuitate quâ poterimus; sed cum tempus propriè significet durationem

Tract. II. de propr. entis mob. 261.
rerum successivarum, prius aliqua de duratio-
ne in communi sunt tractanda.



ARTICULUS I.

Quomodo duratio distinguatur à re durante, & quotuplex sit mensura durationis.

NOtandum est, quòd duratio est modus adveniens rei, quo formaliter & intrinsecè res dicitur in suo esse permanere; ideò duratio definitur persistentia in existendo.

Dicendum est 1. durationem distingui realiter à re durante.

Prob. Illud distinguitur à re, quod advenit ipsi rei existenti; atqui duratio est aliquis modus accidentalis adveniens rei existenti in secundo instanti; ergò duratio distinguitur realiter à re durante. prob. min. prius est rem existere, quàm durare; res enim non dicitur durare quando concipitur incipere, sed quatenus intelligitur in suo esse permanere; ergò duratio est quidam modus accidentalis adveniēns rei existenti, & proindè duratio distinguitur realiter à re durante. Inde etiam conijciendum est quòd duratio & existentia rei durantis distinguuntur realiter, licet non possint separari, quia separatio realis non est semper necessaria ad distinctionem realem.

Dicendum est 2. & ultimò, triplicem esse mensuram durationis, scilicet æternitatem, æviternitatem & tempus. Æternitas, quæ de-

finitur à Boëtio , interminabilis vitæ tota simul & perfecta possessio , convenit rei quæ nullum initium habet , nullumque potest habere finem. Æviterinitas , quæ definitur duratio tota simul rei immutabilis secundum esse , & non secundum operari , convenit rei quæ licet initium habuerit , finem tamen nullum potest habere ; tales sunt substantiæ spirituales. Tempus , quod definitur ab Arist. 4. phys. numerus motûs secundum prius & posterius , convenit rei quæ habuit initium & habebit finem.



ARTICULUS II.

Utrum tempus sit ens reale.

Dicendum est , tempus esse verum ens reale.

Prob. 1. Duratio entis realis , est ens reale : nam quidquid est in rerum naturâ , verè realiter durat , ac proinde habet durationem realem : atqui tempus est duratio motûs , & rerum corruptibilium realiter existentium : ergo tempus est ens reale.

Prob. 2. Motus primi mobilis nemine cogitante plus durat , quàm motus lapidis : ergo habet majorem durationem nemine cogitante : atqui duratio motûs primi mobilis est tempus : ergo tempus existit nemine cogitante , & consequenter est ens reale.

Obj. 1. Quod non habet partes reales , non

est ens reale : atqui tempus non habet partes reales ; siquidem partes temporis præteritæ non sunt reales , quia jam transierunt ; partes etiam futuræ non sunt reales ; quia nondum sunt ; partes etiam temporis præsentis non sunt reales , quia tempus nullas habet partes præsentis , quod enim præsens est de tempore , est tantum instans indivisibile ; ergo tempus non est reale.

Resp. neg. min. quia licet nihil sit præsens de tempore totum simul præter instans , non sequitur quod non habeat partes præsentis successivè transeuntes ; cum enim illæ partes dicantur præteritæ , debuerunt esse aliquando præsentis.

Obj. 2. Numerus dependet ab anima , ex Arist. & Sancto Thom. ergo tempus non est ens reale.

Resp. dist. ant. Numerus actualis dependet ab anima con. numerus radicalis, neg. quia numerus actualis , nihil aliud est quàm actualis numeratio , & mensuratio partium motûs , quæ mensuratio dependet quidem ab anima numerante ; radicalis ramen & in actu primo convenit ipsi tempori independenter ab anima , quatenus habet partes sibi continuè succedentes ex parte rei.



ARTICULUS III.

Quid & quotuplex sit tempus.

Dicendum est. 1. Tempus definiri ab Arist. 4. phys. cap. 11. textu 101. *numerus motus secundum prius & posterius.*

Prob. & expl. definitio. 1. Dicitur *numerus motus*, hoc est mensura, quia diuturnitas vel brevitās existentiae motus mensuratur tempore. 2. Additur *secundum prius & posterius*, hoc est, tempus est mensura motus habentis partes priores & posteriores, sive successivè fluentes.

Dicendum est, plurima esse tempora particularia, licet sit unicum tempus universale.

Prob. prima pars conclusionis. Tempus est mensura motus; ergo sicut dantur plures motus, dantur etiam plura tempora.

Prob. secunda pars conclusionis. Illud est tempus universale, à quo cætera tempora particularia mensurantur: atqui est unicum tempus universale, nempe tempus primi mobilis, à quo alia tempora particularia mensurantur; ergo, &c.



ARTICULUS IV.

Utrum tempus ratione instantis, sive nunc indivisibilis existat.

NOtandum est, quod tempus propriè dictum subjectatur in illo corpore, cuius motus est magis uniformis & regularis, & quo regulantur cæteri motus. Tale est primum mobile; in illo autem subjectatur tempus propriè dictum, & est illi intrinsecum, extrinsecum verò respectu omnium aliorum corporum, quorum motus regulantur per motum primi mobilis; aliquis enim v. g. dicitur studuisse per diem; per respectum ad unam circulationem primi mobilis. Cum autem tempus sit duratio successiva, & continuò fluens, quæritur an tempus existat, vel ratione partis, vel ratione instantis.

Dicendum est, tempus existere solum ratione instantis, sive nunc indivisibilis.

Prob. Quod est successivum non potest existere ratione alicujus partis: sed tempus est successivum; quia tempus est duratio rei successivæ; mensura autem debet proportionari mensurabili; ergo tempus non existit ratione partis, sed tantum ratione instantis. **Prob. maj.** quod habet plures partes simul existentes, non est successivum: quia res successiva postulat formaliter, & ex natura sua, ut una pars non simul existat cum alia: nam existere suc-

cessivè, est ita existere, ut una pars non coexistat alteri, sed quod una pars fluxerit, & alia fluxura sit: atqui si tempus existeret ratione alicujus partis, haberet etiam plures partes simul existentes: ergo si tempus existeret ratione partis, non esset aliquid successivum. prob. min. quælibet pars, ut ait sanctus Thomas, cujuslibet rei successivæ est, divisibilis in alias partes: ergo si tempus existeret ratione alicujus partis, haberet etiam plures partes simul existentes.


Obj. 1. Tempus habet partes præteritas & futuras: ergo habet partem præsentem. prob. consequenter præteritum est illud quod fuit præsens: futurum verò est illud quod debet esse præsens, ergo si tempus habeat partes præteritas & futuras, debet etiam habere partes præsentes, & actu existentes.

Resp. neg. consequenter ad cujus probationem dist. ant. Præteritum est illud quod fuit præsens ratione instantis con. ratione sui neg. quia tempus est quidem ens reale & physicum, & proinde debet habere partes: sed ut aliquid sit reale & physicum, sufficit ut habeat partes existentes, vel in fieri, vel in facto esse, vel ratione sui, vel ratione instantis. Tempus autem habet partes existentes in fieri & ratione instantis: siquidem cum moveri successivè idem sit ac moveri in fieri, & tendere ad factum esse, & cum partes temporis sint successivæ, se habent sicut in fieri, & instans quod est terminus illarum se habet sicuti esse factum earundem.

Obj. 2. & ultimò. Instans non potest reddere partem præteritam, præsentem & actu

existentem; quia supponit eam non præsentem & non existentem; ergò præteritum debuit esse præsens ratione sui, non verò ratione instantis.

Resp. dist. anr. Instans non potest reddere partem præteritam præsentem initiativè conc. consummativè neg. quia instans quod præcedit aliquam partem, reddit illam initiativè præsentem & existentem in fieri: instans verò quod subsequitur eandem partem, reddit illam consummativè præsentem & existentem in facto esse.



QUÆSTIO V.

De loco & vacuo.

Postquam egerimus de tempore quod est mēſura motus quo acquiritur locus, nunc de ipſo loco agendum; quia verò vacuum videtur eſſe locus non repletus corpore, ſubjunctenda hīc ſunt plurima de vacuo, plurimæque ſunt examinandæ experienciæ quæ à recentioribus afferuntur, quod ut facilius & felicius fiat, quæretur ah aër ſit gravis vel levis.



ARTICULUS I.

De loco extrinseco contra Cartesium.

Notandum est 1. locum distingui in extrinsecum & intrinsecū. Locus extrinsecus est aliquid, tamquam receptaculum, extra corpus locatum existens. Locus verò intrinsecus est præsentia & habitudo ipsius rei locatæ ad locum, per quam dicitur formalitas locata.

Notandum est 2. quòd juxta Cartesium 2. parte princ. num. 15. *Locus externus sumi potest pro superficie quæ proximè ambit locatum.* Notandumque est per superficiem, non hic intelligi ullam corporis ambientis partem, sed medium terminum; qui medius est inter ipsum corpus ambiens, & id quod ambitur; quique nihil aliud est quàm modus.

Notandum est 3. quòd in duobus videtur peccare illa Cartesij sententia. 1. Peccat in hoc, quod Cartesius videatur docere quod superficies non subjegetur in corpore ambiente. 2. Quando dicit quod superficies illa est tantum modus: certum est enim quod superficies est accidens siquidem superficies est species quantitatis, quantitas autem est accidens, ut fusè probatum fuit contra Cartesium; ergo superficies est etiam accidens.

Notandū est 4. quod juxta peripateticos locus externus definitur: *Superficies prima corporis*

Traët. III. de propriet. entis mob. 269
continentis aliud immobiliter, hæc definitio
traditur ab Arist. 4. Physf.

Dicendum est, definitionem loci traditam
ab Aristotele esse bonam.

Prob. 1. & explicatur talis definitio. 1. Lo-
cus dicitur superficies; quia est finis & termi-
nus extrinsecus illius corporis quod aliud cor-
pus continet, & per hoc distinguitur à lineâ,
quæ carens latitudine non potest aliud ambi-
re; similiter differt à corpore, quod habens
profunditatem non potest aliud continere.
2. Dicitur superficies prima; quia corpus est
illa superficies quæ proximè & immediate
tangit corpus cōtēntum contactu proprio, qui
fit quando ultima sunt simul, hoc est, quan-
do superficies prima corporis continentis tan-
git primam superficiem corporis contenti. 3.
Dicitur prima superficies corporis; quia cum
superficies sit accidens, debet inesse corpori
tanquam subjecto. 4. Dicitur prima superfi-
cies corporis continentis; quia nisi contine-
ret actu aliud corpus, non esset propriè locus.
5. Dicitur prima superficies corporis conti-
nentis aliud; quia locus debet esse quid di-
stinctum realiter à locato; alioquin prima su-
perficies pellis alicujus hominis esset illius
locus. Ultimò denique locus dicitur prima
superficies corporis continentis aliud immo-
biliter; quia locus formaliter sumptus est ter-
minus motûs localis; ergò debet esse immo-
bilis; alioquin nusquam posset attingi.

Prob. 2. superficies continens habet om-
nia mūnera quæ pertinent ad veram rationem
loci; siquidem loci munera sunt, 1. Continere
corpus. 2. Repleri ab illo. 3. Illud conservare,

fi sit locus naturalis : atqui superficies habet omnia illa munera. 1. Superficies continet locatum ; nam superficies concava dolij continet vinum. 2. Superficies repletur à locato , ut pater. 3. Superficies conservat locatum : unde omnia corpora naturaliter quærunter contineri intra superficiem corporis amici ; ergo superficies continens habet omnia munera quæ ad veram rationem loci pertinent.



ARTICULUS II.

*De loco extrinseco contra Bernerium Gassendi
discipulum.*

NOtandum est , quod Bernerius priusquàm agat de loco , plurima dicit de spatio lib. 1. de principiis cap. 1. de spatio. Docet autem quod, *Duplex est extensio. Prima est extensio materialis, corporea & impenetrabilis, quæ omnibus tribuitur corporibus. Secunda est extensio incorporea & penetrabilis quæ tantum tribuitur spatio , & quæ proinde vocatur à Bernerio, extensio spatialis , vel localis. Extensio corporea v. g. est longitudo, altitudo & profunditas aquæ vel aëris , aut laterius corporis contenti in aliquo vase : extensio verò incorporea & spatialis, est longitudo & profunditas quam semper concipimus inter latera vasis , etiamsi aqua & quodcumque aliud corpus ab illo vase expelleretur.*

Notandum est 2. quod postquam Bernerius fuse egit de spatio, conatur explicare naturam loci, & dicit locum esse tantum spatium quod vocatur vacuum, quando omni est privatum corpore: & dicitur locus, quando aliquo est repletus corpore.

Dicendum est, falsam esse Bernerij sententiam circa loci extrinseci naturam.

Prob. duo falsa supponit Bernerius loci extrinseci naturam explicans; ergo falsa est Bernerij sententia. Prob. ant. 1. Supponit dari aliquam extensionem incorpoream & immaterialem. 2. Supponit solum spatium posse habere rationem loci, quia soli spatio potest convenire immobilitas, non verò superficiei: atqui illa duo falsa sunt; ergo duo falsa supponit. Prob. min. quoad omnes partes.

1. Non potest dari extensio immaterialis & incorporea, quia nulli potest convenire subjecto, non quidem spatio quod concipitur vacuum, quia immateriabilitas convenit tantum substantiæ vel accidenti: atqui illud spatium non est substantia, neque accidens. Ut ipse fatetur Bernerius; ergo, &c.

2. Supponit quod superficies non potest esse immobilis: atqui falsum est quod superficies non possit esse immobilis, ut autem contra Bernerium probetur superficiei immobilitas, sit.



ARTICULUS III.

De immobilitate loci extrinseci.

NOtandum est, quod de immobilitate loci, conveniunt omnes Philosophi, sed in omnes partes se versant, ut eam loci immobilitatem tueantur.

Alij dicunt locum esse immobilem, quia non movetur ad motum corporis locati, sed recedente locato, manet.

Sed si illa interpretatio esset vera, sufficeret eadem immobilitas in loco, quæ in vase; vas enim non movetur motu contenti, hoc est quando aqua movetur in vase, vas ipsum aliquando non movetur: atqui non sufficit illa immobilitas in loco, hoc est locus debet esse immobilis non tantum motu contenti, sed etiam motu continentis; siquidem, ut advertit sanctus Thomas opusc. 52. Arist. exigit majorem immobilitatem in loco, quam in vase; unde vocat vas locum mobilem; locum verò, vas immobile; ergo, &c.

Alij plerique recentiores (ut refert author Philosophiæ novæ & veteris in Regia Burgundia pertractatæ) loci immobilitatem propugnaturi, ad partes immensitatis divinæ confugiunt: adeo ut res sit in certo loco, quia parti divinæ immensitatis virtuali responderet, quæ ab alia diversa est. Verum hæc sententia optimè ab eodem authore rejicitur tract. metaph. q. 6. de loco.

Nonnulli dicunt, locum fieri immobilem per ordinem quem dicit ad primum continens, seu locans, hoc est ad primum cœlum. Hanc ultimam sententiam ut probabiliorem sequimur.

Dicendum est locum fieri immobilem per ordinem quem dicit ad primum continens, hoc est ad primum cœlum.

Prob. ratione desumptâ ex S. Th. 4. phys. lect.

4. Locus non tantum est continens sed etiam conservans locatum: nihil autem habet rationem conservantis aliud, nisi per virtutem & influentiam corporis cœlestis, quam recipit secundum quod est in determinato situ, & determinata distantia ad corpus cœli: ergo locus fit immobilis per ordinem quem dicit ad primum locans. Proinde quamvis turris eadem diversis successivè circumscribatur superficiebus aëris, manet tamen in eodem loco, quia omnes illæ superficies servant semper eundem situm & ordinem ad primum locans.



ARTICULUS IV.

Quid & quotuplex sit ubi.

Dicendum est, ubi, quod (ut dictum fuit in Logica) est aliqua forma accidentalis intrinseca inherens in re locatâ, dividi in supernaturale, sive sacramentale, in definitivum, & in circumscriptivum.

Prob. & explicatur talis divisio. Ubi sacramentale, sive supernaturale est formalitas

quæ non debetur naturæ corporum, unde, dicitur supernaturalis, & illâ formalitate corpus Christi fit præsens ad species, five accidentia Eucharistica modo indivisibili; ita ut sit totum in tota hostia, & totum in qualibet parte hostiæ, & ita est præsens ad alias, ut possit esse ad alias. Ubi definitivum, est aliqua formalitas, quâ substantiæ spirituales (quales sunt Angeli) ita applicantur ad aliquem locum, ut non possint esse in alio; ita ut tamen sint in toto loco & in qualibet parte loci. Ubi denique circumscriptivum, quod alio nomine appellatur circumscriptione, five præsentia localis passiva proveniens & resultans in corpore locato à circumscriptione & præsentia activa corporis locantis; tale autem ubi est forma quædam accidentalis per quam corpus ita determinatur in uno loco, ut non possit esse in alio, & per quam etiam corpus ita applicatur & constituitur in loco, ut totum respondeat toti loco, & singulæ ejus partes respondeant singulis partibus loci.



ARTICULUS V.

Utrum duo corpora possint esse in eodem loco tam naturaliter, quam supernaturaliter.

NOrandum est, duo corpora esse in eodem loco & se penetrare, idem est, ac contineri sub eadem superficie corporis ambientis, & in eadem omnino distantia ad

puncta fixa mundi ; siquidem penetratio est duorum, vel plurium corporum in uno loco simultanea existentia. Unde dicere penetrationem esse possibilem, est dicere, duo vel plura corpora contineri simul in eodem loco.

Dicendum est, duo corpora posse esse simul in eodem loco supernaturaliter, non tamen naturaliter.

Prob. 1. Sacræ Scripturæ testimonio : Christus clauso sepulchro & immoto lapide exivit, & clausis januis venit ad discipulos : atqui illa non facta fuerunt, nisi quia facta fuit penetratio supernaturaliter ; ergo duo corpora possunt esse in eodem loco supernaturaliter.

Prob. 2. ratione ; De ratione quantitatis est ordinare partes in toto ; ita ut una non sit alia, & deinde illas extendere in loco : ita ut una non intret in locum alterius : ergo si quantitas hoc habet in ordine ad proprias partes quæ simul conjunguntur, multò magis illud præstat respectu corporis à se divisi ; non permittendo ut suas partes & locum intret & occupet ; ergo duo corpora naturaliter non possunt esse in eodem loco : atqui illa expulsio actualis unius corporis ab alio potest tolli à Deo, quia est effectus secundarius quantitatis (ut patet exemplo extensionis in ordine ad locum) quæ tollitur in venerabili Eucharistiæ Sacramento : ergo duo corpora non possunt esse in eodem loco naturaliter : bene tamen supernaturaliter.

Obj. 1. Implicat aliquam formam communicari subjecto ; quin illi communicetur effectus formalis : atqui expulsio unius corporis ab alio est effectus formalis quantitatis ; ergo

duo illa corpora quæ habent quantitatem, debent se invicem pellere ab eodem loco; & proinde non possunt se penetrare.

Resp. dist. maj. Implicat aliquam formam communicari, quin communicetur effectus formalis primarius & privativus, con. secundarius & positivus neg. quia expulsio, actualis sequitur ad extensionem internam & externam, & proinde est effectus secundarius. Preterea fundatur in contactu positivo duorum corporum; siquidem duo corpora dicuntur se mutuo expellere, quatenus se tangunt tantum secundum extrema, non verò secundum se tota; & ita talis effectus est positivus, & debetur quantitati tantum naturaliter, non verò essentialiter; & consequenter potest tolli supernaturaliter.

Inst. Quandiu aliquod corpus est in loco, sequitur privatio alterius corporis in loco eodem; ergo expulsio actualis est effectus privativus; & proinde non potest tolli supernaturaliter.

Resp. dist. ant. Sequitur privatio alterius corporis secundario, & per accidens, con. primario & per se, neg. quia privatio alterius corporis non est effectus formalis quantitatis, sed est aliquid secundario ad illam consequens.

Obj. 2. Dux partes ejusdem continui non possunt se ad invicem penetrare; ergo nec duo corpora. prob. ant. Primo, quia de essentia quantitatis est, habere partes extra partes. Secundò, quia dux partes quantitatis successivæ non possunt absolute esse simul. v. g. dux horæ, duo dies. Tertiò, quia si Deus reduceret

ret totam quantitatem brachii ad locum ubi esset digitus, quantitas brachii esset æqualis quantitati digiti; ergò duo corpora non possunt esse in eodem loco.

Resp. 1. neg. ant. & ad primam probationem dist. istam propositionem. De essentia quantitatis est, habere partes extra partes in ordine ad se sive in toto con. in ordine ad locum neg. quia ut probatum fuit in *Logicâ*, extensio partium in ordine ad se, est ratio formalis constitutiva quantitatis.

Resp. 2. neg. ant. & ad secundam probationem nego consequ. & paritatem. Ratio disparitatis est; quia ipsa ratio quantitatis successivæ requirit, ut una pars sit post aliam, & ita illæ partes non possunt se penetrare; non autem est essentia quantitatis permanentis, ut una pars sit extra locum alterius; proinde duæ partes possunt esse simul in eodem loco.

Resp. 3. neg. ant. & ad tertiam probationem dist. maj. Si Deus reduceret quantitatem brachii ad locum digiti, quantitas brachii esset æqualis quantitati digiti in ordine ad locum, con. in ordine ad totum, neg. quia illa quantitas brachii petit habere majorem extensionem in loco, quam quantitas digiti; licet de facto non occupet illam.

Obj. ultimò. Duo corpora sunt semper impenetrabilia; ergò non potest dari penetratio, nec naturaliter, nec supernaturaliter. prob. ant. Illa duo corpora sunt semper quanta: atqui quod est quantum, est impenetrabile; ergò illa duo corpora sunt impenetrabilia. prob. min. quod est quantum est divisibile; ergò

quod est quantum est impenetrabile. prob. conseq. ideò quod est quantum, est divisibile, quia divisibilitas est proprietas quantitatis: atqui similiter impenetrabilitas est proprietas quantitatis; ergò quod est quantum, est impenetrabile.

Resp. neg. ant. ad cujus probationem dist. min. Quod est quantum, est impenetrabile, vel formaliter vel radicaliter con. formaliter tantum neg. quia non aufertur à quantitate impenetrabilitas apitudinalis, sicut nec divisibilitas; quantitas enim exigit, ut sit impenetrabilis & divisibilis; sed actus illi impediuntur divinitus.



ARTICULUS VI.

Utrum unum corpus possit esse simul in duobus locis circumscriptivè

NOtandum est, corpus esse in loco circumscriptivè, est ita commensurari loco, ut totum corpus respondeat toti loco, & singulæ ejus partes singulis partibus loci; ita ut caput non respondeat illi parti loci cui respondet pes; similiter corpus esse in loco circumscriptivè, est ita circumscribi & limitari per superficiem corporis ambientis, ut non possit esse in alio loco: quærere igitur utrum corpus possit esse simul in duobus locis circumscriptivè, est quærere, utrum idem corpus possit respondere duplici superfici ei corporis ambientis.

Dicendum est, unum corpus non posse esse simul in duobus locis circumscriptivè, nec naturaliter nec supernaturaliter.

Prob. Deus non potest efficere, ut unum corpus sit unum, & non sit unum: atqui si corpus unum, esset in duobus locis circumscriptivè, esset unum, ut supponitur, & non esset unum; quia corpus individuatur à quantitate tanquam à principio radicali; ergò ubi est diversa & multiplex quantitas, ibi est diversum & multiplex corpus: atqui si unum corpus esset in diversis locis circumscriptivè, in illo esset diversa & multiplex quantitas; ergò illud corpus esset diversum & multiplex. prob. min. superficies est quantitas: atqui in corpore in plurimis locis simul constituto deberet esse multiplex superficies; ergò deberet esse multiplex quantitas. prob. min. esse in locis circumscriptivis, est primam superficiem corporis locati circumscribi per duas superficies corporum locantium: atqui non potest terminari per diversas superficies, nisi habeat diversas superficies; ergò in corpore in diversis locis constituto debet esse multiplex superficies.

Obj. 1. Corpus Christi erat simul in Cœlo & in aëre, quando apparuit Divo Paulo proficiscenti Damascum; quia non potest dici, quòd tunc deseruerit Cœlum; ergo unum corpus potest esse in duobus locis circumscriptivè.

Resp. neg. ant. & dist. illius probationem. Christus non potuit deserere Cœlum per longum temporis spatium con. per breve nego. quia corpus Christi non est in Cœlo tanquam in carcere, sed tanquam in loco suæ gloriæ de-

bitio, ita potest deferere illum locum; nec inde sequitur, quod ex illo descensu ullo modo minuatur gloria sanctorum, quia illum æquè bene intuentur existentem in hoc mundo inferiori, ac dum est in Cœlo. Quantum autem ad alias apparitiones, dicendum illas non factas fuisse in proprio corpore, sed secundum aliquam illustrationem vel illuminationem ex parte videntium; quia producebantur species in oculis spectantium, quibus corpora alio in loco existentia ibi repræsentabantur, ac si essent præsentia: vel illæ apparitiones factæ fuerunt per Angelos sibi assumentes corpora ex aëre.

Obj. 2. Corpus Christi est in Cœlo circumscriptivè, & in terra sacramentaliter; ergo potest esse in duobus locis circumscriptivè. prob. conseq. difficilius est habere duas præsentias locales diversæ rationis, quam duas ejusdem rationis: atqui esse in uno loco circumscriptivè, & esse in alio loco sacramentaliter sunt duæ præsentia diversæ rationis; esse verò in duobus locis circumscriptivè sunt duæ præsentia ejusdem rationis; ergo si corpus Christi possit esse in uno loco circumscriptivè & in alio sacramentaliter, à fortiori potest esse in duobus locis circumscriptivè.

Resp. neg. conseq. & parit. ad cujus probationem neg. maj. quia licet idem corpus possit esse in uno loco circumscriptivè, & in alio sacramentaliter: similiter licet unum corpus possit esse in diversis locis sacramentaliter, non tamen potest esse in duobus locis circumscriptivè, quia illæ præsentia locales diversæ rationis non sunt impossibiles, ex


eo quod proveniunt à diversis principiis: siquidem corpus Christi est in Cœlo per quantitatem, & est in sacramento ratione substantiæ panis in propriam conversæ: similiter corpus Christi potest esse in pluribus locis sacramentaliter, quia ratio formalis per quam corpus Christi constituitur in loco sacramentaliter est transmutatio substantiæ panis in substantiam corporis Christi, & cum hæc transmutatio possit multiplicari, ut fides docet, consequenter unum corpus potest esse in diversis locis sacramentaliter, corpus autem non potest esse in duobus locis circūscriptivè, quia duæ præsentix locales circūscriptivè sunt impossibiles, cum proveniant à quantitate quæ non potest multiplicari in uno corpore.

Obj. 3. Corpus Christi est in Cœlo circūscriptivè: atqui simul potest esse in terra circūscriptivè; ergò unum corpus potest esse in duobus locis circūscriptivè. prob. min. potest esse simul in terra circūscriptivè, si quantitas quam habet in Sacramento, possit habere suam extensionem localem: atqui hujusmodi quantitas cessante miraculo potest habere suam extensionem localem, cum sit proprietas quæ debetur naturaliter corpori; ergò unum corpus potest esse simul in Cœlo & in terra circūscriptivè.

Resp. neg. min. ad cujus probationem dist. min. potest habere suam extensionem localem absolute & simpliciter con. factâ suppositione, neg. quia factâ suppositione quòd corpus Christi sit in Cœlo circūscriptivè, quantitas quam habet in Sacramento non potest habere extensionem localem.

Obj. ultimò ex Sancto Thoma. 3. p. q. 6. art. 6. Eadem natura potest terminari tribus personalitatibus divinis , & subsistere per subsistentiam Patris , Filii , & Spiritus Sancti : ergò idem corpus potest terminari diversis superficiebus locorum.

Resp. neg. conseq. & paritatem. Quia tres personalitates divinæ terminando naturam aliquam , non illam dividerent nec multiplicarent , quia (ut ait Sanctus Thomas eodem loco) persona incarnata subsistit in duabus naturis , scilicet divinâ & humanâ : sed tres personæ possunt subsistere in unâ naturâ divinâ : ergò possunt subsistere in unâ naturâ humanâ : ita scilicet quòd sit una natura à tribus personis assumpta : duæ verò superficies locorum postulantés tangere duas alias superficies corporis locati , dividerent & multiplicarent numericè corpus : siquidem natura materialis multiplicatur numero per respectum ad diversam quantitatem.



ARTICULUS VII.

*Utrum possit dari vacuum magnum & sensibile
virtute naturali.*

NOtandum est , quod duplex est vacuum juxta Democritum & Gassendum , scilicet coacervatum & disseminatum. Vacuum coacervatum est locus patens & insignis omni corpore destitutus. Vacuum disseminatum est minimum aliquod vacuum intra corporum

poros. De insigni vacuo hic tantum agemus, de vacuolis disputaturi in subsequenti articulo.

Dicendum est, non posse dari insigne aliquod vacuum virtute naturali.

• Prob. Constat experientia, quod plurima agentia naturalia plurimos producant effectus contra propriam inclinationem, ut semper servetur colligatio, unio & contiguitas partium universi; ergo non potest dari insigne aliquod vacuum virtute naturali. prob. ant. plurimis experientiis. Experientia docet quod dum extrahitur aë ex fistula, ex una parte aqua sursum ascendit. Videtur quotidie quod in vitreis Cucurvitulis à Chyrgis aegroto appositis, caro sursum ascendit, quia aër inclusus ignis calore rarefactus, mox cessante calore condensatur, & ideo minorem locum occupat; oportet ergo ut caro intumescat ad replendum spatium ab aëre relictum. Constat etiam quod in phiala vitrea inversa, & paululum in aqua immersa applicato igne supra extremitatem, aër inclusus rarefit, & remoto igne condensatur, & minorem locum occupat; quare aqua sursum ascendit ad replendum spatium ab illo relictum. Constat etiam experientiâ quod vinum non exit è dolio pleno, nisi sit spiraculum quo aër intrare possit ad replendum vacuum quod esset intra dolium, si vinum exiret; ergo constat plurimis experientiis, quod omnia agentia naturalia producant plurimos effectus contra propriam inclinationem ad vitandum vacuum.

• Obj. 1. Angelus potest inducere vacuum; ergo potest dari vacuum virtute agentis natu-

ralis. prob. ant. Angelus potest destruere totum aërem existentem in aliquo cubiculo , & impedire ne aliquod aliud corpus ingrediatur; ergò Angelus potest inducere vacuum. prob. ant. ex S. Thoma: corpora naturalia obediunt Angelis quoad motum localem; ergò Angelus potest destruere totum aërem existentem in aliquo cubiculo , & impedire ne aliud corpus ingrediatur.

Resp. neg. utrumque ant. & ad prob. dist. autoritatem Divi Thomæ. Corpora naturalia obediunt Angelis quo ad motum localem, si talis motus sit ad bonum vel malum alicujus particularis, con. si sit ad bonum vel malum universi, neg. quia agens particulare non habet vires ut agat contra communem inclinationem, & præcipuum universi bonum. Præcipuum autem universi bonum consistit in contiguitate suarum partium; sicut bonum animalis cōsistit in recta dispositione partium. Si verò daretur vacuum, destrueretur hujusmodi ordo & contiguitas; & proindè magnum in naturâ induceretur nocumentum, quod quidem non potest induci ab Angelis.

Inst. Si Angelus non posset inducere vacuum, maximè quia est malum naturæ: atqui vacuum non est malum naturæ; ergò Angelus potest inducere vacuum. prob. min. si inter duo corpora minimè amica quæ per se non affectant mutuū contactū, ut inter hominem & Basiliscum; si, inquam, inter illa duo corpora daretur vacuum, magnum utrique futurum esset bonum, quia Basiliscus defectu intermedii non posset in hominem infensam qualitatem transfundere; ergò vacuum non est malum naturæ.

Resp. neg. min. ad cujus prob. dist. conseq. Vacuū non est malum naturæ particularis, con. non est malum naturæ universalis, neg. quia, ut jam dictum fuit, vacuum destruit colligationem partium universi, & ita est malum naturæ universalis.

Obj. 2. plurimis experiētiis. Prima desumitur ex tubo vitreo; apponatur ergo tubus vitreus, qui non assurgat ultra altitudinem triginta duorum pedum, cujus apertura sit ita obstructa digito, & ita ad Horizontem disponatur perpendiculariter, & aperturâ obstructâ mergatur in aliam aquam; ubi amoveretur digitus aqua descendit; ita ut sistat sūum descensum, quando pervenit ad altitudinem triginta duorum pedum aut circiter; ergo aqua relinquit spatium vacuum ab alia extremitate tubi usque ad prædictam altitudinem. Secunda desumitur ex syphunculo ex quo si extrahatur aër, aqua sursūm quidem ascendit, sed solum ad altitudinem triginta duorum pedum; unde si syphunculus habeat lōgitudinem sexaginta pedum, & cum aër possit magis ac magis semper extrahi, dabitur vacuum ferè triginta pedum; ergo plurimæ sunt experiētiæ quæ probant posse dari vacuum naturaliter.

Resp. ad illas experiētiās, quòd spatium relictum ab aquâ, non esset vacuum, sed plenum aliquo corpore. Quodnam autem sit illud corpus, vel est aër qui ingressus est per poros tubi: nec mirum est quòd corpuscula aëris penetrarent poros tubi, cūm secundum aduersarios, corpuscula ex magnete exeuntia trajiciunt marmor, & alia corpora solidiora,

cùm moveat ferrum ultra illa corpora; & consequenter aëris corpuscula possunt potiori jure trajicere tubum. Vel illud spatium repletur partibus subtilioribus aquæ: illud autem constat experimento; si enim circa supremam partem tubi vitrei applicetur pannus maximè calefactus, illius calore rarefiunt illæ partes subtiliores, & majorem locum occupantes, faciunt ut aqua inferius descendat, contrarium autem contingit, si applicetur pannus nive. v. g. maximè frigefactus.

Inst. si esset aër in summitate tubi, animalcula ibi posita non morerentur: atqui constat experiëntiâ, quòd animalcula ibi posita moriuntur defectu aëris; ergo non est aër in summitate tubi.

Resp. neg. maj. quia animalcula ibi posita moriuntur defectu aëris crassioris, non verò defectu cujuscumque aëris, aut alterius corporis quodcumque illud sit. Nec mirum si in illâ extremitate tubi posita animalcula moriantur, cùm homines qui altissimorum montium conscendunt cacumina, non possunt præ nimia aëris subtilitate diutius vivere.



ARTICULUS VIII.

Utrum detur vacuum disseminatum

CONTRA GASSENDUM.

Dicendum est, non dari vacuum disseminatum, sive non dari vacuola in corporibus.

Prob. Non datur vacuum magnum & sensibile, ut jam probatum fuit; ergo non datur vacuum disseminatum. Prob. consequenter non datur vacuum magnum & sensibile, quia maximæ corpora contiguitatem & colligationem amantia maximo impetu confluunt ut vacuum impediant: atqui minimæ particulae non minus amant contiguitatem; ergo debent sese comprimere, & in unum confluere ut vitent vacuum; & proinde cum non detur magnum & sensibile vacuum; non datur etiam vacuum disseminatum. Præterea omnes rationes quas affert Gassendus ad probandum suum vacuum disseminatum, nullæ sunt, ut patebit ex solutione argumentorum; ergo, &c.

Obj. 1. Si non darentur illa spatiola, nihil posset moveri localiter: atqui aliquid movetur localiter; ergo dantur spatiola. Prob. maj. moveri localiter est transire de loco in locum: atqui nihil posset transire de loco in locum, nisi darentur illa spatiola; ergo nihil move-

retur localiter. Prob. min. omnia corpora quæ reperirentur, obfisterent ipsi mobili, nisi in illis essent spatiola vacua; ergo nihil posset transire de loco in locum.

Resp. neg. maj. & min. ad quarum prob. neg. ant. quia falsum est quod omnia corpora æquè obfistant corpori advenienti? Quis enim diceret aquam æquè obfistere piscibus natantibus, ac ipsis obfisteret rupes solidissima. Dantur ergo corpora rara & fluida quæ possunt magis cedere quàm solida, & possunt locum solidioribus dare: quatenus se se aperiant, eorumque partes antèrè pulsæ ab alio corpore, recedunt in locum ab eo derelictum.

Inst. illa corpora fluida non possunt cedere locum solidioribus si corpora solidiora non possint incipere suum motum: atqui corpora solidiora non possunt incipere suum motum; ergo corpora solida non possunt cedere locum solidioribus. Prob. min. ut illa corpora solidiora incipiant motum, debent ad pellendum aërem contiguum versus ipsum procedere saltem ad pili crassitudinem: atqui illa corpora solidiora nō possunt versus aërem sic procedere; ergo illa corpora solidiora non possunt suum motum incipere. Prob. min. ut illa corpora solidiora procedant versus aërem, saltem ad pili crassitudinem, debent occupare illud exiguum spatium quod occupavit pili crassitudo: atqui non possunt occupare tale spatium quod occupatur ab aëre, nisi pellant aërem: non possunt autem pellere aërem, quò enim illum pellerent non per latera ad posteriorem locum à corpore solidior,

lidiore derelictum; nullus est enim posterior locus cum corpus solidum nondum motum fuerit; ergo corpora solidiora non possunt procedere versus aërem ad illum pellen- dum.

Resp. neg. omnes minores propositiones & ult. prob. quia partes anteriores aëris con- densantur; ita ut quantum aëris pellitur, tan- tum per latera dilatatur; siquidem talis est natura corporum fluidorum.

Obj. 2. Rarefactio & condensatio probant dari spatiola vacua; ergo dantur. Prob. ant. experientiâ. Desumatur Bombarda Pneumati- ca cujus pars tubi, quæ continet aërem com- primendum, sit duorum digitorum, si nulla sint spatiola vacua intermixta in illo aëre, constat quod tanta est moles aëris, quanta est capacitas seu locus intra tubum. Constat etiam quod nulla est particula loci in quâ non sit particula aëris quæ sit illi adæquata & proportionata, & ita necesse est ut numerus particularum aëris sit æqualis numero parti- cularum loci; & ita si sint intra tubum mille partes aëris, necesse est ut sint mille partes loci; comprimatur deinde aër, & ad unius digiti spatium redigatur, quæritur nunc quo- modo se habebunt illæ mille partes aëris in il- lo spatio, cum sint tantum quingentæ partes loci, quæritur, inquam, an duæ partes aëris sint in eodem loco, quod non potest dici; ergo in illo casu condensatio illius aëris pro- bat dari spatiola vacua.

Resp. neg. ant & ad experientiam dico quod duæ partes aëris condensati non occu- pant unam tantum partem loci, sed duas par-

tes minores. Similiter ad rarefactionem una pars aquæ rarefactæ non occupat duas partes loci, sed unam tantum majorem.

Obj. 3. Constat experienciâ, inquit Gassendus, quod aqua non potest quamcumque salis quantitatem dissolvere, sed ad certam dumtaxat mensuram; adeo ut aqua sale quasi satiata, quidquid salis superest, inextolutum relinquat, eadem tamen aqua exsoluit saccharum, & alumen ad certam etiam quantitatem: atqui illa experientia probat dari vacuola in aqua: ideo enim aqua exsoluit salem saccharum & alumen, quia aqua habet poros diversæ figuræ in quibus recipiuntur salis, aluminis, sacchari particule diversas figuras habentes; vacuola igitur quæ sunt quadrata, aut cubica, minutissimas salis partes ejusdem figuræ excipiunt: his impletis sal amplius dissolvi nequit: sunt item alia foramina ejusdem cum sacchari, aluminis, aut vitrioli partibus, figuræ, quæ tandem replentur, nec aqua plus dissolvit hujusmodi salium, quàm illa possunt capere spatiola: ergo, &c.

Resp. 1. Quod etiam si aqua haberet poros vacuos, ipsi pori non essent diversæ figuræ, sed ejusdem, ut ex ipso Gassendo contra ipsummet potest probari, siquidem ubi explicat varios magnetis effectus, docet, quod pori magnetis sunt ejusdem figuræ, & omnes pori ferri sunt inter se omnino similes: ergo omnes aquæ pori debent esse ejusdem figuræ, cum non sit major ratio de uno corpore quam de alio.

Resp. 2. Cum D. Duhamel de consensu ve-

teris & novæ Philosophiæ lib. 2. cap. 3. experientiam illam nihil concludere: nam aqua sale, saccharo & alumine prægnans intumescit: & licet fortassis in cypho aquâ pleno, ut cinerum, ita salis certa quantitas, citra aquæ effusionem possit accedere: nihilominus tum aquæ superficies multum attollitur, & fit globosior: unde si Thermometro, seu tubo vitreo sale aut cineres imposueris, tantum crescet aqua, quantum salis injecoris. Non igitur aquæ spatiola penitus inania ex salium solutione demonstrari possunt.

resp. 3. Ideo aqua salē non potest dissolvere jã certa salis quãtitate dissoluta quia in hoc casu eodẽ modo ratiocinandum est de sale & aqua: sicut enim unus sal non potest fieri magis salus, licet cum sale commisceatur, quia salis siccitas non patitur, ut major in illo producatur salsedo, ita cum aqua quandam receperit salsedinem ex salis commisti dissolutione, non potest magis falsa fieri, quia aquæ humiditas non patitur, ut majorem recipiat salsedinem, & proinde cum aqua ad certam salsedinis mensuram pervenerit, non est tam contraria sali; & ideo superstitem sale dissolvere nequit.

Resp. 4. Quod aqua totũ salē dissolvere nequit quia omnes salis particulæ non sunt ejusdẽ rationis. Aliæ sunt volatiles, aliæ sunt fixæ; particulæ volatiles faciliẽ intra omnes aquæ partes commiscuntur per solum aquæ motum qui ipsi ab aëre extrinseco cõmunicatur: particulæ verò fixæ ob suam gravitatem ad infimam vasis partem descendunt, & ita non possunt dissolvi.



ARTICULUS IX.

Utrum divinitus possit dari vacuum,

CONTRA CARTESIUM.

NOtandum est, quod, quia Cartesius docet extensionem esse de essentia corporis, sequitur vacuum etiam divinitus repugnare: quia, ut aiunt Cartesiani, nullus potest concipere extensionem, quin concipiat corpus: sed sicut falsum esse illud principium jam probavimus, quod etiam ex ipso principio sequitur falsum esse nunc probandum superest.

Dicendum est contra Cartesium, vacuum posse dari divinitus.

Prob. Vacuum nihil aliud est quam spatium nullo repletum corpore: atqui non repugnat dari spatium nullo repletum corpore; ergo non repugnat dari vacuum supernaturaliter. prob. min. nihil prohibet quominus Deus efficiat ut corpus aliquod in vase aliquo contentum inde auferatur, & nullum aliud ejus locum impleat: nihil obstat quominus Deus destruat totum aërem qui reperitur intra parietes unius cubiculi, & impediat ne alius aër ejus locum occupet; ergo non implicat dari spatium aliquod nullo repletum corpore.

Obj. 1. Si totus aër unius cubiculi destrueretur, sequeretur quod parietes illius cubi-

culi essent distantes, ut supponitur, & non essent distantes, quia inter illos nullum interjaceret corpus, ergo Deus non potest destruere totum aërem unius cubiculi, & impedire ne aliud corpus ingrediatur.

Resp. quod ut parietes dicantur verè & realiter distantes, non est necesse ut inter illos interjaceat aliquod corpus, sed sufficit ut sit spatium quod quidem non est corpus, ut vult Cartesius, sed spatium illud est aliquid reale, non quidem positivum, sed privativum habens potentiam seu capacitatem ut repleatur.

Obj. 2. Ubi est extensio & mensurabilitas, ibi est corpus; quia extensio & mensurabilitas sunt proprietates corporis: atqui in illo spatio est extensio & mensurabilitas; ergo ibi est corpus.

Resp. dist. maj. ubi est extensio positiva ibi est corpus, con. ubi est extensio privativa, neg. quia quod est privativum non potest esse proprietas corporis positivi.



ARTICULUS X.

Utrum in vacuo divinitus introducto possit dari motus.

Dicendum est, dato divinitus vacuo, posse in eo fieri naturaliter motum localem.

Prob. nulla est repugnantia neque ex parte

mobilis, neque ex parte influentiae coelestis, neque ex parte terminorum, neque ex parte medij; ergo non implicat quòd dato divinitus vacuo, motus fiat in eo naturaliter. Prob. ant. quoad omnes partes. 1. Non repugnat ex parte mobilis, quia supponitur illud corpus esse naturale, & consequenter mobile. 2. Non repugnat ex parte influentiae coelestis, quia in illo casu Deus per suum concursum posset supplere influentias coelestes. 3. Non repugnat ex parte medij, quia nulla esset in medio resistentia quae posset impedire motum corporis. 4. Non repugnat ex parte terminorum; quia si v. g. Deus destrueret omnem aërem qui est inter concavum lunae, & terram, & si dato illo vacuo Angelus projiceret lapidem ex concavo lunae, lapis ille moveretur localiter, siquidem desereret terminum à quo, & acquireret terminum ad quem, scilicet terram; nec tamen ille motus fieret in instanti; licet nulla esset resistentia in medio, quia sola resistentia medij non est causa successionis quae reperitur in motu locali: siquidem successio tribuitur limitationi potentiae moventis, gravitati mobilis & contrariae inclinationi ejusdem mobilis; ergo cum ex nullà parte sit repugnantia in vacuo divinitus dato, potest fieri motus naturaliter.

Obj. 1. Motus localis terminatur ad ubi intrinsecum; sed ubi intrinsecum non posset dari in vacuo; ergo in vacuo non potest dari motus. Prob. min ubi intrinsecum provenit à corpore circumscribente tanquam à fundamento proximo; atqui in vacuo nullum esset

corpus circumscribens ; ergo in vacuo non posset dari ubi intrinsecum.

Resp. neg. min. ad cuius prob. dist. maj. Ubi provenit à corpore circumscribente, vel formaliter, vel virtualiter, con. formaliter tantum, neg. quia, ut per motum localem producat ubi intrinsecum, sufficit ut mobile circumscribatur virtualiter & mediata, sicut fieret in vacuo per concavum lunæ.

Obj. ultimò : Non daretur motus in spatijs imaginarijs, etiam si darentur : ideò respondent Peripatetici ad suppositionem Lucretij quâ dicit, si poneretur homo ad extremitatem illius spatiij habens arcum præ manibus, telumque volatile, vel illud telum posset vibrari, vel non. Respondent Peripatetici quòd telum illud non posset vibrari defectu corporis ambientis ; ergo in vacuo divinitus dato corpus non posset moveri defectu corporis ambientis.

Resp. neg. conseq. & pari. Ratio disparitatis est, quando Peripatetici docent quòd in vacuo potest fieri vacuum, supponunt quòd corpus quòd moveretur, mediata saltem circumscriberetur ab alio corpore. In suppositione verò Lucretij illud non potest dici, quia in illis spatijs imaginarijs nullum esset aliud corpus quo mediata etiam circumscriberetur illud telum.



ARTICULUS XI.

De gravitate.

CONTRA CARTESIUM.

Notandum est 1. quòd plurimi recentiores Philosophi asserunt omnes experientias à nobis allatas ad vacui impossibilitatem à gravitate aëris provenire : ideò hîc veræ illorum effectuum causæ sunt inquirendæ. Ut autem melius & facilius cognoscatur, an aër sit gravis vel levis, agendum prius de gravitate & levitate in communi.

Notandum 2. quòd adeò difficile est naturam gravitatis agnoscere, ut etiam vix doctissimi Philosophi possint intelligere, an corpus aliquod sit grave vel leve. Plurimi Philosophi docent quòd pleraque corpora sunt gravia, & tendunt versus terræ centrum; & quòd aliqua sunt levia, quia tendunt sursùm, ut ignis. Alii verò Philosophi dicunt quòd omnia corpora sunt gravia, & quod si aliqua sursùm ferantur, talis motus sursùm provenit ex eo quod alia corpora gravia pellantur ab aliis in quibus est major gravitas; sicuti videmus quando commiscantur aqua & oleum, aqua facit ut oleum ascendat, quamvis etiam oleum sit grave. Sed contra illas duas Philosophorum sententias, Cartesiani docent quòd omnia corpora sunt levia, & quòd lapides ha-

bent inclinationem ut moveantur versus Cœlum, sicuti ignis; sed tamen quòd lapides potius cadunt in terram, quàm ignis aut materia subtilis; quia cum materia subtilis habeat majorem vim ut recedat à terra, quàm lapides, ipsa materia subtilis facit ut lapides deorsum ferantur, & ipsi cedant locum.

Notandum est 3. quòd Cartesius qui nullam admittit gravitatem, docet quod levitas quæ reperitur in omnibus corporibus, sive inclinatio quam tribuit omnibus corporibus, ut recedant à terra, consistit in quadam motus circularis proprietate, sive quadam naturæ lege quæ vult, quod partes totius quod motu circulari movetur circa centrū, conatur semper recedere à centro. Ex hac motus lege conjicit, quod omnia corpora terrestria sunt levia; docet enim quod terra movetur motu circulari à materia cœlesti illam ambiente, omnesque ejus poros pervadente, & inde infert propter præfatam motus legem, quod omnes terræ partes si sibi mutuo non essent valde firmiter alligatæ, hinc inde versus Cœlum dissilirent, cumque ipsa materia cœlestis habeat majorem inclinationem, ut recedat à centro terræ, maxima velocitate sursum fertur, & totum spatium occupans, deorsum obvia corpora impellit, & in hoc materiæ cœlestis impulsu, vult Cartesius, ut corporum gravitas consistat.

Notandum est 4. Cartesiu per materiā cœlestē non intelligere tantum globulos secundī elementi, sed etiam materiā primi iis admistā, quia *advertendum*, inquit, 4. parte Principiorum num. 25. *materiam primi elementi, cœ-*

teris partibus , majorem vim habere ad corpora terrestria deorsum pellenda, quam globulos secundi , quia plus habet agitationis.

Dicendum est contra Cartesium , quòd tota corporis gravitas non consistit in impulsu materiæ subtilis.

Prob. 1. Corpora terrestria non pelluntur deorsum per impulsum materiæ subtilis ; ergo gravitas corporum non consistit in impulsu materiæ subtilis. Prob. ant. quod est fluxum & debile , non potest corpora terrestria tanta vi ex alto detrudere , ut obvia quæque diruant ; atqui materia subtilis est fluxa & debilis ; ergo corpora terrestria non possunt deorsum moveri per impulsum materiæ subtilis. Major est evidens ? Quis enim crederet materiam aded fluxam & debilem , ut cujusque corporis occursum retrocedat ? Quis inquam , crederet talem materiam posse ingentem detrudere lapidem. Præterea si solus materiæ subtilis impulsus totam corporum gravitatem faceret , sequeretur quòd magnum pondus supra nostrum caput sentiremus semper , quia illa materiæ corpuscula capiti nostro imminencia illud premerent , & ad medium impellerent : atqui hoc est absurdum ; ergo & aliud unde sequitur.

Prob. 2. Ideò , secundum Cartesium materia subtilis deorsum impellit alia corpora terrestria, quia illa materia subtilis habet majorem inclinationem ut recedat à terra : atqui falsum est quòd materia subtilis habeat majorem inclinationem , ut recedat à terra ; ergo materia subtilis non deorsum impellit corpora terrestria. prob. min. materia subtilis non habet majorem motum ; ergo non habet ma-

jorem inclinationem ut recedat à terra. prob. ant. Corpora terrestria tam celeriter moventur quàm ipsa materia subtilis : cum enim (secundum Cartesium) illa corpora terrestria non habeant gravitatem, nihil est quod possit retardare illorum corporum motum; ergo materia subtilis non habet majorem motum.

Obj. Omnia corpora sunt levia; ergo non datur gravitas distincta à corporibus gravibus. prob. ant. omnia corpora sunt levia, si omnia habeant inclinationem, ut recedant à terra: atqui omnia corpora habent inclinationem, ut recedant à terra; ergo omnia corpora sunt levia. prob. min. omnes partes terræ habent inclinationem, ut secundum lineam rectam recedant à centro motûs; ergo omnia corpora terrestria habent inclinationem, ut recedant à terra. prob. ant. partes totius quod movetur motu circulari, habent inclinationem, ut recedant à centro secundum lineam rectam: atqui partes terræ sunt partes totius quod movetur motu circulari [terra enim illo motu movetur] ergo partes terræ habent inclinationem ut recedant à centro. prob. maj. constat experientiâ, quòd quando turbo gyrat, si arena super ipsum conjiciatur, statim cogitur ab illo recedere, atque in omnes partes dispergi. Constat etiam experientiâ, quòd quando lapis in funda rotatur per circulum, mox fundæ funes tenduntur, quòd denotat lapidem habere inclinationem, ut recedat à centro circuli quem describit; ergo partes totius quod movetur motu circulari, habent inclinationem ut recedant à centro.

Resp. neg. ant. & min. & ad prob. neg. maj.

& min. ejusdem syllogismi. 1. Major propositio est falsa, in qua dicitur, quod partes totius quod movetur motu circulari, habent inclinationem, ut recedant à centro motus; nec experientiæ à Cartesio allatæ probant aliquid; verum quidem est, quod quando arena in turbine conjicitur, mox recedit ab illo: sed ille recessus non provenit ex propriâ inclinatione, sed ex impulsu turbine, quod patet alterâ experientiâ: si enim poneretur lapis supra molam motu lento rotatam, non rejiceretur ille lapis, nec à centro motus recedere conabatur; ergo impulsus & motus velociter impressus efficit, ut lapis recedat à centro, non verò propria inclinatio, & proprius conatus: similiter verum est, quod quando in fundâ rotatur lapis, mox tenduntur fundæ funes; sed illa tensio non provenit ex naturali lapidis inclinatione. Secundo falsa est minor propositio, quia falsum est, quod terra moveatur motu circulari.



ARTICULUS XII.

De gravitate.

CONTRA GASSENDUM.

NOtandum est, Gassendum docere, quod semper à terrâ exeunt aliqua hamata corpuscula, quæ cætera alia corpora ad terram trahunt: vult ideo, quod tota corporum gravitas consistat in illis hamatis corpusculis.

Dicendum

Dicendum est contra Gassendum, gravitatem non consistere in hamatis corpusculis, quæ semper exeant à terra, & ad terram trahant omnia alia corpora.

Prob. Posito quod corpuscula semper exirent à terrâ, tamen illa corpuscula non possent ad terram trahere alia corpora; ergo gravitas non consistit in illis corpusculis à terra exeuntibus. probant. Illa hamata corpuscula deberent trahi ab aliquo alio: atqui non potest explicari à quo alio trahantur, & ideo Gassendus dicit, quod ipse non concipit, quomodo illa corpuscula affixa corporibus, possint deorsum movere corpora? ipse non videt, quomodo illud possit fieri, & tamen asserit, quod illud ita fit.

Diceret fortè aliquis in Gassendi gratiam, quod illa corpuscula reflectendo possunt trahere alia corpora ad terram.

Sed illud non potest dici, quia supponitur, quod illa corpuscula reflectuntur, non possunt autem reflecti, quia deberent reflecti propria gravitate: illud autem non potest dici. Quia sic ipsa rediret quæstio, & quæreretur, in quo consisteret illa corpusculorum gravitas: fortè dicent aliqui, quod illa corpuscula occurrentia, v. g. lapidi, reflectuntur propter ipsum lapidem, & redeunt ad locum unde profecta sunt: illud tamen non potest dici: siquidem ut illa corpuscula reflecterentur, deberet esse aliquid in lapide, quod repelleret ipsa corpuscula: atqui juxta mentem Gassendi nihil est in lapide, quod possit repellere illa corpuscula occurrentia lapidi: & licet esset aliquid in lapide, quod posset repellere corpuscula,

Tamen non potest dici , quod illa corpuscula reflecterentur , & redirent versus terram , quia licet rapidissimi fluminis undæ occurrant gravissimo saxo , non redeunt versus originem , sed per latera ipsius saxi effluunt ; ergo nec ipsa corpuscula occurrentia lapidi reflecterentur & redirent versus terram. prob. conseq. & paritas. Ideo fluminis undæ occurrentes gravissimo saxo non redeunt versus originem , quia sunt aliæ fluminis undæ post ipsas immediate fluentes , quæ ipsas impellunt ; ergo à pari corpuscula , quæ occurrunt lapidi , non possunt reflecti & redire versus terram , si alia corpuscula immediate à terra exeant , & sursum impellant prima corpuscula : atqui juxta mentem Gassendi debent esse alia corpuscula immediate exeuntia à terrâ ; ergo si fluminis undæ occurrentes gravissimo saxo non redeant versus originem , propter eandem rationem corpuscula occurrentia lapidi non possunt reflecti.

Obj. 1. Si mente concipiamus totum spatium à concavo lunæ ad terram vacuum esse & omni corpore destitutum , profecto lapis in hoc spatio quiesceret immotus : atqui ille lapis non quiesceret , nisi quia corpuscula à terra exeuntia non illum determinarent ad motum , quod certè conjicitur , ex eo quod si compleatur illud spatium , mox lapis decideret : ergo corpuscula à terrâ exeuntia determinant lapidem ad motum deorsum.

Resp. neg. maj. Quia ille lapis propria gravitate caderet : siquidem (ut jam probatum fuit) in vacuo divinitus dato [potest dari naturaliter motus.

Obj. 2. Corpuscula à terrâ effluentia determinant lapides, ut moveantur versus terram: ergo gravitas consistit in illis corpusculis à terra exeuntibus. prob. ant. si aliò transferretur terra, si v. g. terra poneretur juxta locum ubi nunc est luna, & ibi suspensa remaneret, semper lapides ex alto decedentes, & ab Angelo projecti moverentur in eum locum, in quo esset terra: atqui illi lapides non moverentur ad eum locum, in quo esset terra: nisi quia corpuscula exeuntia à terrâ determinarent lapidem ad talem motum: ergo corpuscula à terrâ exeuntia determinant lapides, ut moveantur versus terram. prob. maj. lapis non moveretur ad eum locum in quo terra erat, si ve ad punctum spatii, quod correspondebat puncto sive centro terræ, quia non potest esse propensio realis ad punctum spatii, quod non est reale & physicum; ergo lapis moveretur ad eum locum in quo tunc esset terra.

Resp. 1. neg. ant. & ad probationem, neg. maj. Quia illi lapides moverentur versus centrum mundi, & ibi quiescerent: si enim transirent per centrum mundi, & peterent terram juxta concavum lunæ existentem, illa corpora gravia ascenderent, & sursùm moverentur, quod est contra naturam corporum gravium: sursùm autem moverentur, quia sursùm moveri est recedere à centro mundi, & accedere versus Cœlum: proindè illi lapides deferrentes centrum mundi, & accedentes ad terram juxta Lunæ concavum existentem, sursùm moverentur.

Resp. 2. neg. ant. & ad probationem concessa majori, neg. min. quia posito etiam

quod lapides ex alto decedentes moverentur versus terram, talis motus non proveniret à corpusculis à terrâ exeuntibus, sed ex eo quod lapides semper quærent terram, & moverentur versus illam ubicumque reponatur: neque ex illo motu potest conjici, quod in lapidibus sit aliqua cognitio, per quam dignoscant, terram abesse à loco in quo antea erat, lapides enim non moventur versus terram ex cognitione, & ex determinatione, sed ex quadam naturæ lege, quâ res omnes suum centrum quærunt.

Obj. 3. & ultimo. Supponatur primo, quod spatium à terrâ ad concavum Lunæ est plenum, quia non potest dari vacuum naturaliter. Secundo, quod mundus est finitus. Tertio, quod semper à terrâ exeunt aliqua corpuscula: his ita suppositis dico, quod illa corpuscula exeuntia à terrâ replent aërem, & impellunt versus terram cætera corpora: ergo motus qui videtur in corporibus gravibus potest explicari per illa corpuscula.

Resp. Conc. omnes suppositiones; & dico tamen, quod effectus non ita sequeretur, hoc est, illa corpuscula exeuntia à terrâ, & replentia aërem non possent impellere alia corpora, quia cum sint fluxa & debilia, non possunt aliis corporibus motum imprimere.



ARTICULUS XIII.

Utrum gravitas consistat in sympathia quæ reperitur inter terram & alia corpora sublunaria.

NOtandum est, quòd aliqui Philosophi gravitatis naturam explicantes asserunt, quòd corpora. versus terram feruntur per aliquam sympathiam quæ reperitur inter ipsam terram & cætera corpora sublunaria.

Dicendum est, falsam esse opinionem illorum qui dicunt, quòd gravitas consistit in sympathia quæ reperitur inter terram & cætera corpora terrestria.

Prob. talis sympathia quæ est causa gravitatis, consisteret in conformitate qualitatum quæ reperiretur in terra & cæteris corporibus terrestribus : atqui talis sympathia non potest consistere in tali conformitate : ergo talis conformitas, sive sympathia non potest esse causa gravitatis. Prob. min. sequeretur, quòd major esset sympathia inter lapidem & lapidem, quàm inter corpus terrestre & terram : quia major esset qualitatum conformitas : & consequenter quòd unus lapis gravitaret versus alium lapidem : atqui illud non potest dici, quia non videtur, quòd unus lapis attrahat alium lapidem ; ergo non potest etiam dici, quòd talis sympathia consistat in conformitate qualitatum.



ARTICULUS XIV.

Utrum gravitas consistat in impulsu aëris.

NOtandum est, quòd quidam Philosophi docent, quòd corpora gravitant, quia pelluntur ab aëre, & quòd ille aër impellitur à cœlorum motu.

Dicendum est, falsam esse illorum Philosophorum sententiam, qui dicunt, quòd corpora gravitant, quia aër impulsus à cœlorum motu alia corpora terrestria versus terram impellit.

Prob. absurdum est dicere, quòd papyrus sit adeò gravis, ac ferrum ejusdem latitudinis: atqui ex sententia illorum Philosophorum, Papyrus esset adeò gravis, ac ferrum ejusdem latitudinis; ergo falsa est sententia illorum Philosophorum. Prob. min: Papyrus & ferrum æqualiter impellerentur ab aëre, quia cum esset eadem utriusque corporis latitudo, esset etiam æqualis extensio aëris impellentis utrumque corpus; ergo ex illâ sententiâ sequeretur, quòd papyrus esset adeò gravis ac ferrum ejusdem latitudinis. Præterea motus corporum gravium esset violentus; siquidem ille motus est violentus qui provenit à principio extrinseco, scilicet ab aëre impellente; ergo motus corporum gravium esset violentus.



ARTICULUS XV.

Utrum gravitas sit qualitas distincta à corpore gravi.

CONTRA PONCIUM
& ARRIAGAM.

NOtandum est, quod Poncius & Arriaga cum peripateticis docentes dari accidentia distincta à subjectis, putant ut probabile, gravitatem non esse qualitatem distinctam à corpore gravi.

Dicendum est, contra Arriagam & Poncium, gravitatem esse qualitatem distinctam realiter à corpore gravi.

Prob. 1. Motus deorsum non potest immediate provenire à formâ substantiali corporis gravis; ergo debet esse aliud principium talis motus: sed illud principium non potest esse nisi aliqua qualitas distincta à corpore gravi: ergo gravitas est qualitas distincta à corpore gravi. Prob. maj. substantia non est immediate operativa (ut jam probatum fuit:) ergo motus deorsum non potest immediate provenire à formâ substantiali corporis gravis.

Prob. 2. Illa distinguuntur realiter quæ separantur realiter: atqui gravitas separatur realiter à substantia: siquidem in venerabili Eucharistiæ Sacramento remanet gravitas panis, & tamen non remanet substantia pa-

nis ; ergo gravitas distinguitur realiter à substantiâ corporis gravis.

Respondent Poncius & Arriaga , quòd in venerabili Eucharistiæ Sacramento non remanet gravitas , sed tantùm effectus illius , nempe impulsus impressus in corpore , vel motus deorsum qui causatur & suppletur à Deo.

Sed contra : non debent multiplicari miracula sine necessitate : sed ibi multiplicarentur , posito quòd motus deorsum causetur à Deo ; quæ multiplicatio non reperitur , si concedatur gravitatem esse accidens distinctum à substantia.

Obj. vel gravitas esset prima qualitas , vel secunda : non potest dici , quod esset prima qualitas (ut patet) neque secunda , quia sic exigeret mixtionem quatuor primarum qualitatum , quæ in elementis non reperitur , & tamen in quibusdam elementis reperitur gravitas ; ergo non est secunda qualitas distincta à corpore gravi.

Resp. Quod gravitas est secunda qualitas , quæ ex primis originem ducit (ut docet Aristoteles 2. de partibus animalium cap. 10.) nec tamen requirit complexionem omnium primarum qualitatum ; sed ex solo frigore & siccitate mediante densitate oritur gravitas in terra.



ARTICULUS XVI.

De Levitate,

CONTRA CARTESIUM.

NOtandum est, quòd Cartesius docet, quòd corpora sunt levia, quia habent plures poros, intra quos est maxima materiæ subtilis copia, quæ cum habeat majorem motum quàm cætera corpora terrestria, habet etiam majorem inclinationem ut recedat à terra; & ita levitas corporum in hoc consistit, quòd inter se habeant materiàm subtilem quæ sursum illa movet corpora.

Dicendum est contra Cartesium, levitatem corporum non consistere in materia subtili, quæ includatur intra poros corporum, & illa sursum impellat.

Prob. idèd levitas ex mente Cartesii provenit à materiâ subtili; quia, cum sit intra poros corporum, facit ut corpora ferantur sursum, quia illa materiâ subtilis habet maximum motum & maximam inclinationem ut recedat à terrâ; atqui posito etiam, quòd illa materia subtilis haberet maximum illum motum & illam maximam inclinationem, ut recederet à terrâ, non posset impellere corpora sursum; ergo levitas corporum non consistit in materiâ subtili inclusâ intra poros corporum. Prob. min. illa materia

subtilis inclusa intra poros corporum amitteret illum motum & illam inclinationem. Quia, cum pori non sint recti & vicini, ipsa materia subtilis non posset moveri; ergo licet materia subtilis secundum se habeat maximum motum & maximam inclinationem, ut recedat à terra; non posset tamen corpora sursum impellere. Præterea falsum est, quod illa materia subtilis habeat maiorem motum, quam cætera corpora terrestria. Quia nihil est (ut jam probatum fuit) in corporibus terrestribus quod possit retardare motum.



ARTICULUS XVII.

De levitate,

CONTRA GASSENDUM.

NOtandum est, quod Gassendus docet, quod illa corpora dicuntur, minus gravia, quæ habent minus materiæ, & intra quæ sunt plura vacuola; ideò levitas corporum consistit in illis vacuolis.

Dicendum est contra Gassendum, levitatem corporum non consistere in hoc, quod corpora habeant minus materiæ & plura vacuola.

Prob. ex illa sententia Gassendi sequeretur, quod in folle pilari Gallicè, *un ballon*, esset minus materiæ, quàm in globulo tormentario ejusdem quantitatis; cum globulus

tormentarius magis gravitet quam follis pilaris : atqui illud non potest dici ; ergo nec aliud. Prob. min. si in folle pilari esset minus materiæ , deberent esse plura vacuola quam in ferro ; vel si esset idem vacuolorum numerus , illa vacuola in folle deberent esse ampliora : atqui non possunt esse ampliora. Quia partes aëris deberent se tangere , quando follis fortiter comprimeretur ; illud tamen non ita contingit ; ergo levitas non provenit ex illis vacuolis , quæ etiam non dantur (ut jam probatum fuit.) Dicendum ergo cum peripateticis , quod levitas est aliqua qualitas distincta realiter à corpore levi.



ARTICULUS XVIII.

Utrum aër sit gravis vel levis.

Dicendum est aërem esse corpus leve. Prob. 1. Illud corpus dicitur leve quod supra cætera corpora assurgit : siquidem levitatem cognoscimus ex motu sursum : atqui aër supra cætera corpora assurgit , nempe supra aquam & terram ; ergo aër est corpus leve. Non quidem assurgit supra ignem , quia non est tam levis quàm ignis , summa enim levitas convenit igni , & levitas in gradu excellenti convenit aëri , & proinde si aër compareretur cum igne , dicitur gravis : ideo docet Arist. lib. 4. cap. 4. tex. 27. quod licet aër & aqua non possint dici absolute gravia,

vel levia, Quia ad terram & ignem comparata, illis sunt leviora, vel graviora, tamen si ad se ipsa conferantur, aliud (inquit) simpliciter est grave, aliud leve; Quibus verbis manifestè significat nihil gravitatis inesse aëri.

Prob. 2. Si aër gravis esset ut volunt recentiores, & si sua gravitate terram premeret, suo etiam pondere exhalationes à terra exeuntes ad terram iterum pelleret, & in causa esset cur ad mediam aëris regionem non possent pervenire, suo etiam pondere plantas tenellulas & recenter natas opprimeret & & quasi suffocaret; atqui illa duo non ita contingunt 1. exhalationes à terra exeuntes liberrimum in aëre transitum inveniunt, cum sæpè ad mediam usque aëris regionem perveniant 2. plantæ recenter natæ nullam in aëre resistantiam experiuntur, cum sua tenellula folia undequaque explicent; ergo, &c.

Prob. 3. In hypothese gravitatem aëris admittente, columna aëris major deberet magis ponderare quam columna aëris minor: atqui experientia potest probari, quòd in eadem hypothese columna aëris major non magis ponderat quam columna aëris minor, imò columna aëris minor magis ponderat quam major; ergo, &c. Prob. min. sumatur tubus vitreus octodecim digitorum longitudinem non excedens, cujus una pars hermeticè sit occlusa, altera verò aperta. Ad altitudinem quindecim tantum digitorum mercurio adimpleatur tubus, ita ut in tubo supersint tres digiti mercurio vacui & tantum aëre communi pleni. Deinde pars tubi aperta digito occludatur, ipseque tubus ferè horizontaliter

taliter ponetur, ut aër possit facillè ad partem tubi superiorem & hermeticè occlusam transire. Hic postea tubus mergatur intra mercurium in vase contentum. His ita peractis constat quòd columna aëris prementis mercurium in vase contentum; major est quàm columna aëris intra tubum inclusi, & tamen illa minor columna aëris intra tubum inclusi magis ponderat quàm columna major aëris externi & mercurium in vase contentum prementis; ergo in hypothesi aëris gravitatem admittente, columna minor magis ponderaret quàm columna major. probat. ant. illa columna magis ponderat quæ fortiùs & efficacius agit in Mercurium intra tubum inclusum: atqui columna aëris intra tubum inclusi fortiùs & efficacius agit in mercurium in tubo contentum, quàm columna aëris externi; ergo columna aëris minor magis ponderat, quàm columna aëris major. prob. minor, columna aëris intra tubum inclusi omninò mercurium in tubo contentum deprimat, cum ipsum in tubo suspensum non possit retinere columna aëris externi major, siquidem constat experientia, quòd ubi aufertur digitus inferiorem tubi partem occludens, mox ferè totus mercurius in tubo inclusus descendit, totusque commiscetur cum mercurio in vase contento; ergo columna aëris minor fortiùs agit in mercurium quàm columna aëris major.

Respondent nonnulli quod ille mercurii descensus provenit ex aëre intra tubum inclusò, qui dum per aliquam vim elasticam dilatatur, impellit & deprimat ipsum mercurium.

Aër inclusus, inquit D. Pecquet in dissertatione anatomica, *magis suâ vi elasticâ quàm suo pondere premit*, & pergens ait, *aër eodem modo premit terram quo in illa experientia premit mercurium.* idem respondet Roaltus 1. parte phys. cap. 12. art. 33. & 34.

Sed contrâ: aër in tubo inclusus per suam vim elasticam non dilatatur; ergo à recentioribus potest tantum dici, quod aër inclusus suâ solâ gravitate mercurium premit, & proinde debent concedere, quod columna aëris minor magis ponderat quàm columna aëris major. prob. ant. vel aër dilataretur, quia intra tubum compressus conatur se in pristinum statum reducere, ut docet Roaltus loco jam citato, vel dilataretur propriâ virtute, ita ut aër non condensatus eodem modo premeret terram quo in illo casu premit mercurium, ut docet Pecquet: atqui neutrum dici potest, ergo nullum. probatur min. quoad omnes partes.

1. Contra Roaltum; aër intra tubum inclusus non est compressus; ergo propter compressionem non dilatatur. prob. ant. ille aër non est compressus qui idem occupat spatium ac antea: atqui ille aër in tubo inclusus idem occupat spatium ac antea occupabat: siquidem priusquam intra tubum includeretur, trium tantum digitorum spatium occupabat, & in experientia jam allatâ supponitur quod aër inclusus trium tantum digitorum spatium occupat; ergo aër intra tubum inclusus non est compressus.

2. Contra D. Pequet aër ex seipso propriâ virtute non dilatatur; ergo potest tantum dici

Precedentioribus quod aër inclusus suâ solâ gravitate premit mercurium, & proinde debent concedere quod in illo casu columna aëris minor magis ponderaret quàm columna aëris major. prob. ant. si aër inclusus propriâ virtute dilataretur & suam vim elasticam exerceret supra mercurium; eodem modo aër premeret terram per suam vim elasticam, ut fatetur ipse D. Pecquet: atqui falsum est quod aër per suam vim elasticam terram premat; ergo &c. prob. min. Si aër suâ virtute elasticâ premeret terram, premeret & ipsum mercurium in vase contentum; & per suam gravitatem & per suam vim elasticam, & proinde deberet mercurium intra tubum suspensum retinere, quia illa columna aëris major deberet fortius agere in mercurium quàm columna aëris inclusi; cum ob suam majorem molem & altitudinem habeat majorem gravitatem & majorem vim elasticam; ergo aër propriâ virtute non dilatur.

Præterea si eadem experientia fiat in tubo cujus utraque pars sit aperta & occlusa duobus digitis, quando ex inferiori parte tollitur digitus; tunc mercurio descendente digitus superiorem tubi partem occludens intra ipsum tubum fortiter attrahitur: atqui si aër per suam vim elasticam dilataretur, digitus intra tubum non attraheretur, quia aër qui undequaque æqualiter dilataretur, digitum sursum impelleret, sicuti mercurium deorsum deprimat; ergo aër intra tubum occlusus per vim elasticam non dilatur.

Obj. I. Sumatur tubus viginti & octo digitorum longitudinem habens, cujus utraque

pars sit aperta, mercurio impleatur, utramque tubi partem occludant duo digiti, immergatur intra vas mercurio plenum, sicut fit in aliis experimentis, ubi tollitur digitus inferiorem tubi partem occludens, descendente mercurio digitus superiorem tubi partem occludens gravissimum sentit dolorem: atqui ille dolor provenit ex gravitate aeris incumbentis & prementis digitum qui ab alio inferiori corpore non sustinetur; ergo &c. hanc experientiam refert D. Pascal tractatu de gravitate aeris cap. 6. pag. 106.

Resp. 1. Neg. min. & affero alteram experientiam. Si sumatur tubus viginti tantum digitorum, cujus utraque pars sit aperta. Si tubus mercurio impleatur & subtrahatur inferior digitus, mercurius nullomodo descendit, quia tota aeris gravitantis moles potest totum hunc mercurium in tubo suspensum retinere. Refertur & conceditur à D. Pachal hæc experientia p. 91. 92. & à D. Roalto 1. parte Physice cap. 12. art. 17. ex hac ergo experientia conjicio dolorem digiti non provenire ex gravitate aeris, sicuti asserit D. Paschal. Si enim in prima experientia digitus dolorem sentiret, quia premitur ab externo aere & à nullo alio inferiori corpore sustinetur, in secunda experientia digitus nullum deberet experiri dolorem, quia tunc sustinetur à mercurio qui nullomodo descendit: atqui constat quod in secunda experientia digitus dolorem sentit; ergo in altera experientia dolor ille non provenit ex gravitate aeris.

Resp. 2. dolorem illum provenire ex gravitate mercurij qui contiguus est cum digito

qui ſuperiorem tubi partem occludit, quique ſemper talem contiguitatem affectans ſuſpenſum retinet mercurium. Quod autem dolor ille ex mercurii gravitate cauſetur, patet ex eo quod dolor ſentitur major, ubi major eſt mercurii gravitas, in prima enim experientia in qua ſunt viginti & octo mercurii digiti, major ſentitur dolor quàm in ſecunda, in qua ſunt tantum viginti mercurij digiti. Præterea ſi ex inferiori tubi parte, digito ſuſum pellatur, & aliquandiu eodem digito tota mercurij gravitas ſuſtineatur, experientiâ comprobabitur quod digitus ſuperiorem tubi partem occludens dolorem non experietur.

Obj. 2. Una pars aëris gravitat ſupra aliam partem aëris, & comprimit illam: ergo gravitas convenit toti aëri. prob. ant. experientiâ conſtat quod aër magis ponderat in montium radicibus quàm in eorum jugis: atqui aër non minùs ponderat in montium jugis, niſi quia tunc aër minùs à minori incumbētis aëris mole comprimitur: ſiquidem ille aër exiſtens ad radicem montis à maximâ incumbētis aëris copiâ comprimitur, & ita magis gravitat: ſed idem aër in montis verticem tranſlatus ſeſe in amplius ſpatium explicat, & à minori comprimentis aëris mole impellitur; ita ut idem contingat in aëre, quod contingit in ingenti lanæ acervo, ſiquidem partes magis infimæ magis comprimuntur, ſed ubi illæ partes tranſferuntur & ſunt ſuperiores, minùs preſſæ ſeſe explicant, & majus ſpatium occupant.

Illud etiam conſtat experientiâ quæ referatur à D. Paſchal. Traſt. de gravitate aëris

cap. I. Folliculus, inquit, aëre semiplenus, & flaccidus in montem quingentas exapedas altum translatus paulatim intumuit, donec in ipso vertice omnino distensus appareret. Sic inter descendendum paulatim detumuit, donec in ima montis parte pristino statui esset restitutus: quod aëris ferè, ut lanæ simplicitates particulæ, & pressu faciles: sed tamen non pressæ se e restituant.

Resp. 1. neg. ant. Quia posito etiam quod gravitas conveniret aëri, una pars aëris non gravitaret supra aliam, quia elementa non gravitant neque levitant in centro, ut probabitur.

Resp. 2. neg. ant. & ad prob. neg. min. Quia illa experientia nullo modo probat gravitatem convenire aëri ab intrinseco, sed tantum ab extrinseco: idè enim magis ponderat ad radicem montis, quia ibi impurius est, & habet plurima admixta corpuscula terrestria, & idè minùs gravitat ad cacumen montis, quia cum sese extricaverit ab illis corpusculis terrestribus, ibi purior existit.

Resp. 3. Quod omnes illi effectus folliculi modo tumescentis, modo detumescentis non proveniunt ex gravitate aëris. Quæ ergo experientia ut clare explicetur, advertendum est, quod aër in montium radicibus existens crassus est, & densus, ob plurimâs exhalationes intermixtas; aër verò in montium jugis existens, subtilior est, quia ab his terrestribus exhalationibus est solutus. aër ergo quo Folliculus est semiplenus, densus est; cumque ad montis cacumen defertur ipse Folliculus, successivè circumscribitur aër ille densus ab alio

aëre subtiliori, qui aer subtilior agit in aerem densum ipsumque attenuat, & subtilem reddit, & proinde facit, ut magis dilateatur, & majorem locum occupet. tumescit ergo Folliculus propter illam subtilioris aeris actionem, non vero propter ipsius aeris gravitatem. similiter inter descendendum paulatim detumescit folliculus, quia aer densus circa terram existens agit in aerem in folliculo inclusum, ipsum comprimit, ipsumque iterum densum reddit.

Obj. 3. Folliculus magis ponderat, dum est inflatus, quam dum non inflatus: atqui illud majus folliculi pondus non potest provenire nisi à gravitate aeris introducti intra folliculum; ergo aer habet gravitatem.

Resp. dist. min. Illud majus folliculi pondus non potest provenire, nisi à gravitate accidentali aeris, con. à gravitate essentiali, neg. quia aer secundum se spectatus est semper levis, tamen per accidens habet aliquam gravitatem; siquidem aer habet in se admixta corpuscula terrestria quæ faciunt ut aer gravitet, & ita dicendum, quod aer non gravitat ratione propriæ gravitatis, sed ratione gravitatis illorum corpusculorum terrestrium.

Obj. 4. Aer ad secretiora terræ antra, & ad omnes subterraneas Cavitates descendit, imo ad ipsius terræ centrum usque descenderet, si sufficiens ipsi pateret aditus: atqui ad illa omnia loca non potest aer descendere nisi propriâ gravitate; ergo aer habet gravitatem.

Resp. neg. min. Quia aer ad secretiores antrorum recessus descendit, vel quia huc im-

pellitur, vel quia attrahitur. 1. Aer interdum impellitur in Cavitatem aliquam recenter factam subtus terram; dum enim ad efformandam illam cavitatem magna terræ quantitas extrahitur, ab ipsa terræ extractæ quantitate aer comprimitur, & deorsum impellitur, ut occupet locum ab ipso ingentissimo terræ extractæ acervo derelictum. 2. Interdum attrahitur, quia ubi aer in antris inclusus à summa antrorum frigiditate condensatur, alium attrahit aerem qui occupet locum ab ipso aere condensato derelictum.

Obj. 5. Si occluso syringis foramine embolus, seu baculus teres, & cylindricus *v. le piston*, vi satis magna attollatur, embolus adductus ab incumbēte aere impellitur etiam syringe inversa; non enim minus aer subjectus à circumfuso aere pressus sursum trudit embolum, quàm incumbens aer eundem embolum deorsum impellebat; ergò constat illa experientia aerem habere gravitatem. hanc experientiam refert auctor Philosophiæ veteris & novæ.

Resp. 1. Quòd vera illius experientiæ causa à recentioribus non assignatur; aiunt enim quod cum mundus sit plenus, aer quem adductus syringis embolus pellit, nullum possit invenire locum quem occupet, magnà vim magnoque imperu repellit embolum qui locum sibi debitum occupabat, & ita vehemens ille emboli motus provenit ex aëris compressi gravitate. Sed illa recentiorum interpretatio quantum ad duo videtur deficere; ille enim emboli motus non potest causari neque à gravitate neque à compressione.

aëris. 1. Non potest causari à gravitate aëris, cum nulla aëri in sit gravitas ut jam probatum fuit & ut fusè in subsequentibus articulis rursus probabitur. 2. Non potest causari à compressione aëris propter triplicem rationem.

1. Quia incredibile est quod tam exigua aëris compressio possit tanta vi tantoque impetu embolum repellere.

2. Constat experientiâ quotidianâ quod aër comprimatur & dilatatur modis prope modum infinitis, nec tamen ex illa majori & sensibili aëris compressione tam vehemens & violentus producit effectus.

3. Si ille motus emboli causeretur ab aëris compressione, illa etiam difficultas quam experitur, qui vult embolum attollere, proveniret ex ipso aëre qui vix talem compressionem patitur; atqui illa difficultas non provenit ex ipso aëre; ergo ille emboli motus non causatur ab aëris compressione prob. min. si illa difficultas & resistentia quam experitur qui vult embolum attollere, proveniret ex ipso aëre, sequeretur, quod si conlingeret embolum jam ad trium digitorum spatium adductum non posse magis attolli; illud certe juxta recetiorum sententiam proveniret ex eo quod aër adeo ab embolo jam adducto est compressus, ut non possit magis comprimi; atqui falsum est quod aër sit ita compressus, ut non possit magis comprimi, si enim poneretur aliquod impedimentum ne ipse embolus ad pristinum locum rediret ita ut per aliquod temporis spatium in eodem statu suspensus existeret, hoc est ad eandem

distantiam adductus remaneret, quandiu in illo statu esset embolus, tandiu remaneret eadem aëris compressio, quæ si tanta esset, ut non posset fieri major, embolus alterius syringis non posset etiam ad tres usque digitos attolli, quod tamen est contra experientiam; ergo, &c.

Resp. 2. Quod ille emboli motus non provenit ex aëris externi impulsu, sed ex interni aëris attractione; quia scilicet extrema emboli pars non ita est contigua cum syringe, ut aliquid aëris non mediet: quando ergo embolus attollitur, ipsa exigua aëris quantitatis attenuatur maxime & dilatatur, ut possit locum ab embolo derelictum occupare, cumque tanta dilatatio sit aëri violenta, ubi embolus sibi relinquitur, mox aër qui se in pristinum locum restituere conatur, attrahit ipsum embolum.

Inf. non datur ille motus attractionis; ergo embolus non attrahitur ab ipso aëre interno. Prob. ant. 1. Ille motus attractionis ita obscurus est, ut nullomodo possit concipi. 2. Est inutilis, cum omnis motus per solum impulsu fiat. Hæc Roaltus prima parte Phys. cap. 11. art. 14. 15. ergo; &c.

Resp. neg. utrumque ant. quia ille, attractionis motus est clarus & necessarius. 1. Clarus est, quia æquè facile concipitur motus attractionis quam motus qui fit per impulsu, nec certè videtur ubi nam sit ipsa obscuritas quam sibi fingit Roaltus. 2. Necessarius est, & ipsius motus necessitatē probat natura provida quæ omnibus dedit animalibus attractionis motu quo attraherent aërem ad vitæ conserva-

tionem necessarium per *Diafoles* attractionem, dedit & alterum motum quo aërem repellerent per *Systoles* impulsionem.



ARTICULUS XIX.

De suspensione mercurij.

NOtandum est, quod recentiores aëris gravitatem probaturi utuntur aliquo tubo vitreo, torricelli quem barometrum vocant quod aëris pondus meriatur, in quo tubo mercurius suspensus manet. Sic ergo illam conficiunt experientiam, tubum vitreum tres pedes aut circiter longum, & ex parte altera occlusum implent hydrargyro: tum in vas subjectum in quo etiam itagnat hydrargyrus, tubum invertunt, quibus ita factis argentum vivum in tubo suspensum manet usque ad viginti septem & amplius digitorum altitudinem. Volunt autem quod illa mercurij suspensio proveniat à gravitate aëris; ita ut tota aëris columna à concavâ superficie supremæ regionis aëris ad terram usque protensa premat mercurium in vase contentum & intra tubum ascendere cogit, donec columna hydrargyri in tubo contenti sit in æquilibrio cum columna aëris incumbentis externo hydrargyro.

Dicendum est, suspensionem mercurij non provenire à gravitate aëris.

Prob. 1. Columna aëris incumbentis non

potest esse in æquilibrio cum columna mercurij in tubo contenti ; ergo illa mercurij suspensio non provenit à gravitate aëris. Prob. ant. columnam aëris esse in æquilibrio cum hydrargyro in tubo contento , est aërem æquis viribus & pari virtute agere in hydrargyrum & hydrargyrum agere in aërem : atqui hydrargyrus non agit in aërem ; ergo columna aëris non est in æquilibrio cum hydrargyro in tubo contento. Prob. min. hydrargyrus non gravitat contra aërem ; ergo non agit in aëre prob. ant. si hydrargyrus gravitaret contra aërem , gravitaret etiam contra aliud quodcumque corpus : atqui falsum est quòd hydrargyrus gravitet contra aliud quodcumque corpus ; si enim digitus intra mercurium in vase contentum immittatur , & si ipso digito occludatur infima tubi pars , & ipse tubus extra vas emittatur , quandiu perpendiculariter erit positus , digitus nullum mercurij pondus sentiet. Hæc experientia ab ipso Roalto ut vera cõceditur , prima parte Phys. cap. 12. art. 31. ergo hydrargyrus non gravitat contra aërem.

Prob. 2. Si pondus aëris in tubo suspenderet hydrargyrum , quo gravior esset aër , eo altius attolleretur hydrargyrus : atqui falsum est quod altius attollatur hydrargyrus , quo gravior est ; ergo pondus aëris in tubo non suspendit hydrargyrum prob. min. aëre sereno altius ascendit hydrargyrus , quàm nimbofo aut pluvio cœlo ; ergo cum aër sit gravior nimbofo aut pluvio aëre , quam sereno cœlo , non plus attollitur hydrargyrus , quo gravior est aër , & proindè suspensio

penſio mercurij non provenit à gravitate aeris

Respondent recentiores nonnulli pluvio tempore magnam vaporum copiam ascendere, qui cum leviores ſint aëre, cumque alio protrudant: (nam duo corpora ſimul eſſe non poſſunt) neceſſe eſt ambſphæram levio- rem exiſtere, quam ſi ij non adeſſent va- pores.

Sed hæc reſponſio in multis videtur defice- re. 1. Falſam eſt quòd illi vapores ſint leviores aere qui nullam habet gravitatẽ, ut jam probatum fuit. 2. Etiam ſi illi vapores leviores eſſent non poſſent aerem alio protrudere, nam cõpus levius non poteſt agere in gra- vius, quĩ imo corpus gravius ſuo pondere deprimit levius; ergo vapores aere leviores aërem non poſſunt alio protrudere, ſed aer ſuo pondere vapores ipſos verſus terram im- pelleret.

Præterea non poteſt negari quod pluvia actu cadens in terram, non premat aerem verſus terræ ſuperficiem, & proindẽ aer à pluvia compreſſus magis gravitat ſupra mer- curium in vaſe contentum, & ita tunc mercurius in tubo exiſtens deberet aliũs ascendere; oppoſitum tamen contingit, ut fatentur ad- verſarii; ergo illa mercurij ſuſpenſio non pro- venit à gravitate aeris.

Prob. 3. in vaſe occluſo, ubi nulla eſt penẽ aeris columna, aut in cubiculo undique clau- ſo ad eandem altitudinem aſcendit Hydrar- gyruſ; ergo ſignum eſt quòd illa mercurij ſuſpenſio non provenit à gravitate aeris.

Obj. 1. Cũ experimentum in locis altio-

E c

ribus perficitur, tum Hydrargyrus minùs ascendit: adeò ut in loco decem exapedis altiore, una linea, seu duodecima digiti parte minuatur. Sic in locis subterraneis altiùs attollitur hydrargyrus; ergo signum est quod suspensio hydrargyri provenit à gravitate aeris.

Resp. neg. conf. quia aer inclusus in tubo nõ agit in mercurium nisi per suam subtilitatẽ & extensionem & proinde quo magis est extensus & subtilis, fortiùs agit in mercurium, sed aer ille magis extensus & subtilis fit, quando barometrum ad altiora montium cacumina transfertur; ergo tunc fortiùs agit in mercurium, ipsumque magis deprimat.

Inst. Quando tubus mercurio plenus intra aquam immittitur, eò altius mercurius ascendit, quò major est aquæ quantitas; ergo quo major est aeris moles, magis mercurius ascendit, & proinde illa major, vel minor aeris suspensio provenit à majori vel minori aeris gravitate. Hac paritate utitur D. Pascal tractatu de gravitate aeris cap. 2.

Resp. neg. cõ. & par. quia maxima est disparitas inter aquam & aerem. 1. Licet ambo sint corpora liquida, non tamen eodem modo liquiditatem participant, quia ut constat, aqua densior est aere. 2. Aqua gravis est, ut fatemur, non verb aer, ut jam probatum fuit. 3. Si esset paritas inter aerem & aquam, ut volunt adversarii, eodem modo deberet aqua in quẽlibet mercurium agere, quo aer, & ita sicuti aeris gravitate magis attollitur mercurius suis partibus subtilioribus spoliatus, quam mercurius communis, ut fatentur ipsi adversarii, deberet ergo & ipse mercurius

partibus subtilioribus exutus, magis attolli per aquæ gravitatem, quam mercurius communis, quod tamen est contra experientiam, ut ipsi etiam cōcedunt recentiores; ergò nulla est paritas inter aerem & aquam.

Obj. 2. Nulla est alia causa à qua possit provenire suspensio mercurii; ergò debet provenire à gravitate aeris.

Resp. neg. ant. quia illa suspensio provenit à vi contiguitatis quæ necessariò debet reperiri inter omnia corpora, & ita ab illa substantia subtiliori quæ superiorem tubi partem replet, suspenditur mercurius.



ARTICULUS XX.

Quæ virtute aquæ ascendat intra Antlias aspirantes.

Notandum est, quod secundum recentiores, aqua intra antlias aspirantes ascendit, cōquidem altius, quò major vis adhibetur: nunquam tamen ultra triginta duos pedes attollitur. Volunt autem recentiores, quod vis quæ aquam premendo sursum tollit, non alia est quam pondus columnæ aeris, quæ antliæ ipsi latitudine æqualis est. Cum autem pondus aeris finitum sit, cōusque aquam intra antliam evehit, quòusque quoddam fiat æquilibrium aquæ sublatae, & columnæ aeris incumbentis.

Dicendum est, aquam non ascendere intra

antlias propter gravitatem aeris.

Prob. Si ascensus aquæ intra antlias causaretur à gravitate aeris, semper quælibet aqua eodem modo pressa ad eandem altitudinem deberet ascendere: atqui experientia constat, quod quælibet aqua ad eandem altitudinem non ascendit, si enim aqua suis partibus subtilioribus sit expurgata altius evehitur, quam aqua communis; sicut mercurius suis etiam partibus subtilioribus expurgatus altius ascendit, quam communis, quæ experientiæ à recentioribus conceduntur. Cum ergo recentiores non possint asserere, quod aeris gravitas ad tantam altitudinem evehat aquam suis partibus subtilioribus expurgatâ, quia secundum ipsos aer habet tantum vim ad impellendam aquam ad altitudinem triginta duorum pedum. Non possunt etiam consequenter asserere, quod aer pondere suo attollat aquam ad altitudinem triginta duorum pedum, quia eadem virtus quæ pellit aquam suis partibus subtilioribus expurgatam, ad quadraginta, vel quinquaginta pedes, debet illam evehere ad triginta & duos pedes; siquidem quod potest magis, potest minus; ergo aquæ ascensus intra antlias non causatur à gravitate aeris.

Obj. 1. Nulla alia potest assignari causalis ascensus aquæ præter gravitatem aeris; ergo &c. *prob. ant. 1.* Non potest provenire ab horrore vacui, metus enim & horror, qui sunt proprii animantium affectus, non possunt tribui rebus sensu carentibus, neque ab ulla aliâ causa procedere; ergo nulla alia potest assignari causa talis ascensus aquæ præter gravitatem aeris.

Resp. 1. Quod nonnulli dicunt talem aquæ ascensum provenire ab horrore vacui, nec ille antiquus loquendi modus dignus est, qui tam acriter à recentioribus Philosophis redarguatur: quis enim nescit Metaphoricam expressionem, neque nomine *metus horrorique vacui* aliud significari, quam conatum rebus insitum; quo feruntur in loco vacantia, ut unionem & colligationem inter se semper servant.

Resp. 2. Quod alii, ne illo nomine metus & horroris vacui utantur, dicunt quod ille ascensus aquæ provenit ex vi contiguitatis corporum quam semper natura affectat; & ideo ne talis contiguitas tollatur, evehitur aqua intra antlias, quod ut clarè explicent, dicunt, quod ubi attollitur embolus, duo diversi producuntur effectus intra tubum antliæ. 1. Aer qui est supra embolum comprimitur, & aer qui est infra embolum, attenuatur & maximè dilatatur ad replendum spatium ab embolo derelictum; cumque ille aer maximè dilatatus & extensus sit quasi in statu violento ob suam maximam extensionem, per vim suæ contiguitatis attrahit aquam, ut aer & aqua simul occupent spatium, quod solus aer per violentam dilatationem cogeatur replere.

Obj. 2. Non potest reddi ratio, cur aqua ad talem & talem altitudinem ascendat, nisi per gravitatem aeris; ideo enim ascendit aqua ad determinatam altitudinem, quia columna aeris aquæ æquiponderat, & facit cum ipsa æquilibrium; ergo aqua ascendit intra antlias propter gravitatem aeris incumbentis.

Resp. 1. Quod aliqui afferunt falsum esse aquam ascendere ad determinatam altitudinem; aqua enim, ut ipsi experti sunt, in plurimis antliis ascendit ad quadraginta pedes, imo & ad sexaginta exapedas.

Resp. 2. Quod alii dicunt aquam ascendere ad hanc determinatam altitudinem, propter determinationē quam recepit à Deo; Deus enim, ut aiunt, cuilibet elemento præfixit suum terminum ultra quem non progreditur.

Resp. 3. Aquam ad hanc determinatam altitudinem ascendere, ob exigentiam naturæ corporum contiguitatem semper affectantis; aqua enim non ascendit nisi ad servandam corporum contiguitatem: ergo eādem naturæ lege debet sistere & quiescere, quando sine illo ascensu potest servari talis corporum contiguitas; sed cum aqua pervenit ad triginta duorum pedum altitudinē potest servari talis contiguitas, quia aqua ex illo spatio potest sufficientem partium subtiliorum copiam emittere ad reliquum spatium replendum: & inde potest optimè reddi ratio, cur aqua suis partibus subtilioribus expurgata ad majorem altitudinem ascendat, quam aqua communis, quia scilicet aqua expurgata non tot in se continet partes volatiles & subtiliores quas possit emittere ad replendum spatium, & ideo lex naturæ contiguitatem corporum semper affectantis exigit, ut illa aqua expurgata altius ascendat, quàm aqua communis.

Resp. 4. Præcisè contra recentiores, & dico quòd ille aquæ ascensus non potest provenire ab aeris gravitate, quia inde sequeretur

quod vel aqua expurgata, & communis deberent æqualiter ascendere, ut dictum fuit in probatione conclusionis. Vel deberet evenire aliquid oppositum experientię quæ ab ipsis recentioribus refertur & conceditur; dicunt enim quod aqua expurgata altius ascendit: atqui si vera esset sententia recentiorum non deberet altius ascendere, quia suis partibus subtilioribus expurgata grauior superest, quam aqua communis, ut patet, & proinde magis resisteret aeris ponderi: ergo falsum est quod illæ aquæ ascensus proveniat à gravitate aeris.



ARTICULUS XXI.

Unde proveniat difficilis duorum marmorum separatio.

NOtandum est 1. quod si duo marmora superficiebus accuratè politis, ita ut ex mutua eorundem applicatione immediatus fiat contactus, congruè sibi invicem applicentur, tam firmiter simul cohærent, ut qui superius sustulerit, & in aere libero elevatum tenuerit, inferius etiam elevare unâ cum superiori atque elevatum tenere necesse habeat. Hanc experientiam refert Dom. Boyle experimento. 3. Hanc etiam referunt omnes recentiores Philosophi.

Notandum est 2. quod secundum omnes recentiores, illa difficilis corporum separatio

provenit ex aeris gravitate; dicunt enim quod ubi marmor superius elevatur, simul & elevatur inferius, quia marmor inferius à subjecto aere tantum premitur, quantum marmor superius ab incumbētis aeris columna. Non enim minor est vis in subjecto aere, ut sursum pellat, quam in columna aeris incumbētis, ut deorsum trumat.

Dicendum est difficilem corporum separationem non provenire à gravitate aeris.

Prob. difficilis corporum separatio manet, ubi nullum est aeris pondus; ergo hæc difficilis corporum separatio non provenit à gravitate aeris. prob. ant. Duo marmora terfa & lævigata in machina pneumatica suspensa, exhausto omni aere crassiori, nullatenus possunt divelli: ergo hæc difficilis corporum separatio manet, ubi nullum ferè est aeris pondus.

Respondent nonnulli recentiores, quod aer subtilis qui remanet in machina Pneumatica per suam vim elasticam ipsa corpora premit, & ipsorum corporum separationem impedit.

Sed contra: Aer ille in machina pneumatica remanens, est maximè subtilis, maximè attenuatus & extensus, ita ut sit in statu violento, cum ex se tantam attenuationem non postulet: ergo tunc aer hæc duo corpora per suam vim elasticam non premit. prob. consideratione aeris subtilis, attenuati & violentè extensi est potius attrahere corpora quam premere, ita ut in illa experientia aer marmor inferiori subjectus deberet ipsum trahere & à superiori marmore separare, ille aer subtilis in machina pneumatica remanens per suam

vim elasticam non premit illa corpora. prob. apt. si experientia mercurij fiat in tubo cujus utraque pars sit aperta & duobus digitis occlusa, quando inferior digitus subtrahitur & mercurius descendit, superior digitus maximâ vi intra tubum attrahitur à substantia quæ superiorem tubi partem occupat, & quæ cum sit maximè subtilis & extensa attrahit ad se digitum, ergo de ratione aeris maximè subtilis & attenuati est potius attrahere corpora quàm premere.

Obj. nulla alia potest assignari causa hujus difficilis separationis, ergo debet provenire à gravitate aeris.

Resp. neg. ant. & dico quod propter necessariam corporum contiguitatem, quæ semper in natura debet persistere, illa duo corpora lævigata, nec in aere, nec in machina pneumatica possunt separari: si enim separarentur illa duo corpora, ut in illa separatione servaretur corporum contiguitas, deberet aer circumfusus totum in instanti occupare locum ab his duobus corporibus derelictum; ergo cum aer in instanti non possit moveri, debent illa duo corpora non separari, nè tollatur corporum contiguitas. Eodem ferè modo videtur explicare hanc experientiam author Philosophiæ veteris & novæ: ubi enim inquit, cur duo corpora lævigata in machina pneumatica non possunt divelli, docet tractatu 2. phys. gen. dissertatione 2. cap. ultimo. *Quod duo marmora in vacuo interdum sibi pertinaciter adhaerescunt: quod subtilis aër qui vitrum penetrat; inter duo marmora summè lævigata aditum non habeat.*



ARTICULUS XXII.

De experientia quæ fit in follibus oclufis.

NOtandum est quod folles occlusis omnibus foraminibus diduci non possunt: dicunt autem recentiores quod illa difficultas provenit ex gravitate aeris; follium enim dilatationi moles circumfusi aeris obstat, quæ vinci non potest nisi vis ingens adhibeatur.

Dicendum est hanc difficultatem quam patiuntur qui folles occlusos volunt diducere, non provenire ex gravitate aeris.

Prob. triplici ratione, 1. Si illud proveniret ex gravitate aeris, nusquam folles, apertis etiam foraminibus, diduci possent, quia semper premerentur à gravitate aeris: atqui falsum est quod folles, apertis foraminibus diduci non possint; ergò falsum est, quod illa difficultas proveniat à gravitate aeris.

2. Ubi aer non premeret follium tabulas deberent facillè diduci, quod tamen non ita contingit: nam si follium tabulæ non essent in Horizontali plano, sed ad ipsum essent perpendiculares, tunc non gravitaret aer desuper, & tamen semper esset eadem difficultas; ergò illud non provenit à gravitate aeris.

3. Posito etiam quod aer gravitaret, illa difficultas non proveniret ex ipsius aeris gravitate, quæ posset facillè vinci, cum aer (ut constat plurimis experientiis) cuilibet corpori

facile cedat, & à quolibet corpore facile comprimatur.

Obj. 1. quando folles intra aquam immerguntur, ita ut tubus viginti pedum longitudinem habens, extra aquam promineat, tunc non erit vacui metus, cum aeri pateat aditus, & tamen si profundior fuerit aqua, diduci non possunt propter aquæ incumbētis pondus; ergo à pari folles in aere diduci non possunt propter ipsius aëris gravitatem, quia eodem modo ratiocinandum est de aëre ac de aqua. Hanc experientiam & paritatem affert D. Paschal tractatu de gravitate aëris cap. 2. sect. 2.

Res. 1. neg. conf. & par. quia ut jam dictum fuit, nulla est paritas inter aquam & aërem; siquidem aqua gravis est, & ita mirum non est, quod folles diduci non possint propter aquæ gravitatem; aër verò non est gravis, ut jam rationibus plurimis & experientiis probatum est.

Resp. 2. quod si paritas valeret, posset ergo dici, quod sicut in prima experientia fatentur adversarii, quod folles facile poterunt diduci, si profundior non fuerit aqua, quia vir robustus poterit vincere gravitatem aquæ; poterunt etiam folles facile diduci, quia illa aëris resistētia poterit vinci ab aliquo fortissimo viro, siquidem illa aquæ moles certè magis ponderat, quam quæcumque aëris incumbētis moles.

Obj. 2. nulla alia potest assignari causa talis difficultatis; ergo debet provenire à gravitate aëris.

Resp. neg. ant. & ut clarè explicetur, unde

hæc provenit difficultas advertendum est, quod quæcumque adhibeatur diligentia ad occludenda follium foramina, eorumque aërem expellendum, semper in folliis remanet aliquid aëris; ita ut follium tabulæ se tantum mediatè tangant, hoc est mediante aëre. Ille autem aër ad se semper trahit follium tabulas, nè illa separatione tollatur corporum contiguitas, & ita dicendum quod illa difficultas provenit ex vi necessariae contiguitatis.

Inst. atqui aër intra folles inclusus non potest follium tabulas attrahere; ergò nulla responsio. prob. subf. aër non attrahit alia corpora, nisi quando est attenuatus, & maximâ violentiâ extensus: atqui aër intra folles inclusus non est attenuatus, & maximâ violentiâ extensus, cum sit ejusdem consistentiæ ac aër externus; ergò aër intra folles inclusus non attrahit follium tabulas.

Resp. neg. subf. ad cujus probationem neg. min. quia ubi aliquis maximos conatus adhibet ad separandas follium tabulas, ipse aër intra folles inclusus mox incipit attenuari, & maximâ violentiâ extendi, & cum majoris non sit capax extensionis, ipse aër parumper attenuatus follium tabulas ad se trahit, ne majorem extensionem patiatur.



ARTICULUS ULT.

De experientiâ factâ in Cucurbitis medicis.

Notandum est 1. Quod in cucurbitis medicis *Ventouses*, prius calefactis, & statim cuti admotis, flamma aërem inclusum multum rarefacit, extinctis candelis aër condensatur, & proindè minus spatium occupat, ita ut spatium ab aëre derelictum, mox caro intumescens adimpleat.

Notandum est 2. Quod ille effectus provenit à gravitate aëris juxta recentiores; ita ut, inquit Maignanus 3. parte Philosophiæ naturæ cap. 20. prop. 8. num. 12. vi aëris circumquaque supra cutem gravitantis, adeoque carnem prementis exprimitur atque congeritur è vicinis partibus ad cucurbitulam, tum sanies, tum sanguis quorum facilior est accursus, & simul subtus turgens intumescit caro in cucurbitulam, atque distenditur intrusione eorum humorum.

Dicendum est contra recentiores carnem non intumescere propter gravitatem aëris.

Prob. Experientia quâ recentiores probant carnem intumescere propter gravitatem aëris, nullomodo probat; ergò &c. prob. ant. experientia quam D. Pascal, tract. de gravitate aëris sect. 6. & quam cæteri recentiores afferunt, est ista, si quis (ajunt) supra femur apponat tubum vitreum viginti pedes longum,

& deindè ingrediatur in vas profundum ali-
quod aquâ plenum, itaut tubus extra aquam
promineat, tum constat experienciâ quod ca-
ro intumescit intra tubum propter aquæ gra-
vitatem quæ omnes carnis partes premit
præter partes tubo correspondentes, congerit
humores plurimos qui faciunt ut caro intum-
escat; ubi minor est pressio. Eodem modo
ratiocinandum, inquit D. Pascal, loco jam
laudato de carne intra cucurbitulam intumes-
cente propter gravitatem aëris: atqui falsum
est quod eodem modo sit ratiocinandum, quia
nulla est paritas inter aquam & aërem, ut jam
probatum fuit; ergo &c. eodem fere modo,
& eodem ferè experimento ascensum aquæ in
syphonibus explicant. Sicut enim, ut aiunt,
aquæ pondus facit, ut mercurius ad syphonis
fastigium ascendat, ita à pari aëris gravitas
facit, ut aqua in syphonibus ascendas; sed
quam hæc omnia facile possunt dilui, constat
ex dictis, & proindè dicendum quod omnes
illæ experientiæ non proveniunt ex gravitate
aëris, sed ex sola vi contiguitatis quæ necessa-
rio inter omnia corpora, debet semper repe-
riri.



Finis primæ Partis Physicæ.



55

